

國學基  
本叢書 楹聯叢話  
附續話  
三話



上海图书馆藏书



A541 212 0006 1825B

~~175929~~

書叢本基學國

話叢聯楹

話三話續附

輯鉅章梁

行發館書印務商

上海

圖書館

藏書

# 楹聯叢話序

荃隣先生八閩碩儒。吐納經範。無書不讀。有美必彰。曩者提刑山左。手輯唐五代以前名論。先之以聖賢遺訓。之在諸經外者。爲古格言十二卷。昌旣受而讀之矣。閱十年而繼李善譯文選旁證四十六卷。博綜審諦於唐宋元明以來卅七家之言。以訂晉府汲古之誤。而集是書之大成。美哉富矣。近復讀公二集。一爲退菴詩存。推本倫紀。鑒別金石。逢源於經籍。殫精於時務。詩也而政教寓焉。一爲退菴隨筆。則數十年拳拳於庭訓師傳。因時隨地。藉束身心。期諸實用。自謂無關乎著作。而學殖躬行。經史諸子。官常家禮。文事武功。蓋靡有弗備者。比年爲吾粵采風陳詩徵文考獻。將有三管英靈之集。而公暇搜羅。孳孳未已。迺復以所輯楹帖見示。諷徧八方。稿凡三易。每聯輒手敍其所緣起。附以品題。判若列眉。瞭如指掌。夫道體之罔弗該也。文字之罔弗喻也。語其壯。則鯤海鵬霄。語其細。則蚊睫蝸角。須彌自成其高也。芥子不隘於納也。楹帖肇自宋元。於斯爲盛。片辭數語。著墨無多。而蔚然蒼萃之餘。足使忠孝廉節之悃。百世常新。廟堂瑰璋之觀。千里如見。可箴可銘。不殊負笈趨庭也。紀勝紀地。何啻梯山航海也。談諧亦寓勸懲。欣戚胥關名教。草茅昧於掌故者。如探石室之司矣。膾炙遍於士林者。可作家珍之數矣。一爲創局。頓成巨觀。惟公以蓬山蒼宿。入直樞垣。敷歷大邦。疊膺重寄。雖官書林立。而几案塵清。偶當詩鉢文壇。輒復露垂泉湧。



茲則秉節全圻。總宏綱而理庶政。猶是思艱圖易。舉重若輕。雍容乎禮法之場。翔泳乎文藝之圃。燭武所謂智深勇沈。穎濱所稱神止氣定者。非歟。故於前所著諸集。見公之綜貫百氏。取精用宏。而於斯集。有以見公心源治法。以整以暇。爲天授。非人力所能及也。道光二十年庚子春正月。陳繼昌謹序。

# 自序

楹聯之興。肇於五代之桃符。孟蜀餘慶長春十字。其最古也。至推而用之楹柱。蓋自宋人始。而見於載籍者寥寥。然如蘇文忠真文忠及朱文公撰語。尙有存者。則大賢無不措意於此矣。元明以後。作者漸夥。而傳者甚稀。良由無蒼萃成書者。任其譙落湮沉。殊可慨惜。我朝聖學相嬗。念典日新。凡殿廷廟宇之間。各有御聯懸挂。恭值翠華臨莅。輒荷宸題。寵錫臣工。屢承吉語。天章稠疊。不啻雲爛星敞。海內翕然向風。亦莫不緝頌。副詩和聲。鳴盛。楹聯之製。殆無有美富於此時者。伏思列朝聖藻。如日月之經天。自有金匱石室之司。非私家所宜撰輯。而名公巨卿。鴻儒碩士。品題投贈。渙衍寰區。若非輯成一書。恐時過境遷。遂不無碎壁零璣之憾。竊謂劉勰文心實文話所託始。鍾嶸詩品爲詩話之先聲。而宋王銍之四六話。謝伋之四六談塵。國朝毛奇齡之詞話。徐鉉之詞苑叢談。部列區分。無體不備。遂爲任彥昇文章緣起之所未賅。何獨於楹聯。而寂寥罔述。因不揣固陋。竊爲斯編。博訪遐搜。參以舊所聞見。或有僞體。必加別裁。郵箒徧於四方。討源旁及雜說。約略條其義類。次其後先。第一曰故事。第二曰應制。第三第四曰廟祀。第五曰廡宇。第六第七曰勝蹟。第八曰格言。第九曰佳話。第十曰挽詞。第十一曰集句。附以集字。第十二曰雜綴。附以諧語。分爲十門。都爲十二卷。非敢謂盡之。而關涉掌故。膾炙藝林之作。則已十得六七。粲然可觀。方之

禁扁似稍擴其成規。比諸句圖亦別開之生面云爾。道光庚子立春日。福州梁章鉅撰於桂林撫署之懷清堂。

## 楹聯續話序

楹聯叢話之輯。始於桂林節署。閱二年而稿成。時遠近知好。以佳聯錄示者。猶紛至沓來。因前書已剗。過半無由僦入。姑存篋衍而已。辛丑仲春。防堵梧江。未遑從事鉛槧。夏初奉量移蘇撫之命。由湘江放荊江。順流以達吳中。甫受事。卽提兵海上。勞勞軍事者四閱月。旋以病作乞假。解組養疴邗上者。又四閱月。復緣海氛孔棘。倉猝南奔。從干戈擾攘中。飛渡錢江。甫得卸裝南浦。合計兩年來。往返奔波。不下八千里。流連勝地。邂逅名流。所見所聞。輒有裨益。因復條舉而件繫之。仍依前編分門之例。編成四卷。題爲楹聯續話。遂付梓人。憶在桂林時。每得一聯。輒與陳蓮史余小霞陳海霞桂舫諸君子賞析之。付梓時。又得小霞專任校字之役。故成書不覺其難。撫今思昔。時異境遷。老病日增。徒形兀兀。蓋不禁感慨係之也。道光癸卯夏至節。福州梁章鉅。撰於浦城池上草堂。

## 楹聯三話序

余前撰楹聯叢話十二卷。授梓於桂林。旋成續話四卷。授梓於浦城。年來各省皆有翻刻本。客有從余索取者。或向書坊轉購以應之。去歲至揚州。同人又有錄示若干條。鉛槧之餘。燕談之頃。亦閒有新得。皆隨時條舉而件繫之。本擬附諸浪跡叢談之末。今夏至杭州。以示張仲甫中翰。則勸余仍別爲書。並力任搜訪之勤。以附益之。今冬就養東甌。應酬稀簡。遂以暇崗緝成卷。雖不能如前此之部居井井。然述舊事於簡端。次之以祠廟。又次之以儼宇。又次之以名勝。又次之以贈答。又次之以壽聯。輓聯。集句。集字。而以雜記諧謔終焉。則依然前刻之例也。既覆視之。往跡新聞。逸言瑣記。亦復斐然可觀。遂題爲楹聯三話。先以稿寄杭州。俾仲甫快讀之。仲甫喜。網羅舊聞。勤勤懇懇。或更有所裨益。擴充之。又何必不爲四話之嚆矢乎。道光丁未嘉平福州七十三叟梁章鉅撰於東甌郡署之戲綵亭。

# 楹聯叢話目次

卷一	故事	一
卷二	應制	一三
卷三	廟祀上	二七
卷四	廟祀下	四一
卷五	廨宇	五三
卷六	勝蹟上	六七
卷七	勝蹟下	八七
卷八	格言	一〇七
卷九	佳話	一一九
卷十	挽詞	一三一
卷十一	集句 附集字	一四五
卷十二	雜綴 附諧語	一五九



# 楹聯續話目次

卷一	故事	一七七
	應制	一八五
	廟祀	一八七
卷二	廨宇	一九七
	勝蹟	二〇四
	格言	二一一
卷三	佳話	二一九
	挽詞	二二六
卷四	集句	二三七
	雜綴附諧語	二四九

# 楹聯叢話

## 卷一

### 故事

嘗聞紀文達師言。楹帖始於桃符。蜀孟昶餘慶長春一聯最古。但宋以來春帖子多用絕句。其必以對語朱箋書之者。則不知始於何時也。按蜀檣杪云。蜀未歸宋之前一年歲除日。昶令學士辛寅遜題桃符版於寢門。以其詞非工。自命筆云。新年納餘慶。嘉節號長春。後蜀平。朝廷以呂餘慶知成都。而長春乃太祖誕節名也。此在當時爲語識。實後來楹帖之權輿。但未知其前尙有可考否耳。

吳越時龍華寺僧契盈。吾閩人也。一日侍忠懿王游碧波亭。時潮水初滿。舟楫輻輳。王曰。吳越去京師三千里。誰知一水之利如此。契盈因題亭柱云。三千里外一條水。十二時中兩度潮。時江南未通。兩浙貢賦。率由海達青州。故云。時人稱爲駢切。

浦城眞西山先生嘗讀書邑之粵山。名其齋曰學易。卽今南浦書院地也。有春聯云。坐看吳粵兩山色。默契羲文千古心。見三才圖會。余嘗主南浦講席。擬爲敬錄此聯。懸之楹柱。而因循未果。附記於此。

朱子於紹熙五年築滄洲精舍。時年六十有五矣。自書一聯云。佩韋遵考訓。晦木謹師傳。謹按朱子之父韋齋先生。嘗自謂卞急害道。因取古人佩韋之義爲號。又朱子受業於劉屏山先生。先生有字朱元晦。祝詞云。交朋尙焉。請祝以字。字以元晦。表名之義。木晦於根。春榮華敷。人晦於身。神明內腴。此朱子聯語所由出也。滄洲精舍卽竹林精舍。據年譜。時爲韓侂胄中傷。以內批罷歸。除江陵府不拜。又乞追還新舊職名。則已無意出山。又懲於趙汝愚之貶。及羣小之攻僞學。故有感而爲佩韋晦木之思焉。

滄洲精舍中尙有兩聯。一云。道迷前聖統。朋誤遠方來。一云。愛君希道泰。憂國願年豐。又朱子全集卷後所附載聯語尙多。謹摘錄如左。以見南宋時楹帖盛行。雖大賢亦復措意於此矣。贈人聯云。水雲長日神仙府。禾黍豐年富貴家。又廣信南巖寺朱子讀書處聯云。一竅有泉通地脈。四時無雨滴天漿。又建寧府學明倫堂聯云。師師庶僚居安宅而立正位。濟濟多士由義路而入禮門。松溪縣學明倫堂聯云。學成君子如麟鳳之爲祥。而龍虎之爲變。德在生民如雨露之爲澤。而雷霆之爲威。又知漳州日建書舍於天寶鎮山開元寺後頂聯云。十二峯送青排闥。自天寶以飛來。五百年逃墨歸儒。跨開元之頂上。又贈漳州一士子云。東墻倒。西墻倒。窺見室家之好。前巷深。後巷深。不聞車馬之音。又一聯云。鳥識元機。銜得春來花上弄。魚穿地脈。挹將月向水邊吞。至世有刻爲木榜。懸諸堂楹。人所習見者。如讀聖賢書。行仁義事。存忠孝心。立修齊志。日月兩輪天地眼。詩書萬卷聖賢心。此類尙多。安得有心人爲之一一搜輯乎。

墨莊漫錄云。東坡在黃州。一日逼歲除。訪王文甫。見其家方治桃符。公戲書一聯於其上云。門大要容千騎入。堂深不覺百男謹。

困學紀聞云。攻媿先生書桃符云。門前莫約頻來客。坐上同觀未見書。按攻媿集。四明樓鑰。大防撰。

宋韓康公宣撫陝右。太守具宴。委蔡司理持正。作候館一聯云。文價早歸韓吏部。將壇今拜漢淮陰。韓極喜之。又京口韓香除夜請客。作桃符云。有客如擒虎。無錢請退之。此二事。皆見蔣平仲山房隨筆。皆切韓姓。此亦後來贈聯切姓之濫觴也。

稗史載宋洪平齋。新第後。上史衛王書。自宰相至州縣。無不指摭其短。大略云。昔之宰相。端委廟堂。進退百官。今之宰相。招權納賄。倚勢作威而已。凡及一聯。必如上式。未俱用而已二字。時相怒之。十年不調。洪自署桃符云。未得之乎一字力。只因而已十年間。

濯纓亭筆記云。元世祖初聞趙子昂之名。卽召見之。子昂丰姿如玉。照映左右。世祖心異之。以爲非人臣之相。使脫冠。見其頭尖銳。乃曰。不過一俊書生耳。遂命書殿上春聯。子昂題曰。九天闔闔開宮殿。萬國衣冠拜冕旒。又命書應門春聯。題曰。日月光天德。山河壯帝居。按日月十字。今率用爲新歲桃符。幾徧閭巷。而不知始自松雪翁。且非臣工所宜用也。又按今人家門。率用天恩春浩蕩。文治日光華十字。不知此

乃雍正年間御賜桐城張文和廷玉桃符句。張氏歲歲懸之。後京官度歲。強半書此作大門春聯。近日則外省亦比戶皆然矣。

堅瓠集載趙子昂過揚州迎月樓趙家。其主求作春聯。子昂題曰。春風閨苑三千客。明月揚州第一樓。主人大喜。以紫金壺奉酬。

孫季昭示兒編載黃耕叟夫人三月十四日生。吳叔經作壽聯曰。天邊將滿一輪月。世上還鍾百歲人。或謂將滿一輪。若是十三日亦使得。不若云猶欠一分。便見直是十四日也。予謂猶欠一分。非祝壽底語。終未若魏仲先壽萊公詩云。何時生上相。明日是中元。形容得七月十四日。坦然明白矣。周益公生於丙午七月十五日。嘗壽以聯曰。年與潞公同丙午。日臨萊國占中元。公覽而笑曰。賢此聯。已道盡了生年月日。只欠說出一箇生時。便是一本好建生矣。按此二事。亦後來壽聯切日之濫觴也。

元楊元誠瑀山居新話載元統間。余爲奎章閣屬官。題所寓春帖云。光依東壁圖書府。心在西湖山水間。時余嶼山爲江浙儒學提舉。寫春帖於山居曰。官居東壁圖書府。家住西湖山水間。偶爾相符。亦可喜也。

明周暉金陵瑣事載太祖嘗御書春聯。賜中山王徐達云。始余起兵於濠上。先崇捧日之心。逮茲定鼎於江南。遂作擎天之柱。按此二十六字。乃初封信國公誥中語也。又一聯云。破虜平蠻功貫古今人第一。出

將入相。才兼文武。世無雙。蓋亦賜中山王作。

列朝詩集載學士陶安字主敬。明太祖嘗製門帖。賜之曰。國朝謀略無雙士。翰苑文章第一家。

簪雲樓雜說云。春聯之設。自明孝陵昉也。時太祖都金陵。於除夕。忽傳旨。公卿士庶家。門上須加春聯一副。太祖親微行出觀。以爲笑樂。偶見一家獨無之。詢知爲醜豕苗者。尙未倩人耳。太祖爲大書曰。雙手劈開生死路。一刀割斷是非根。投筆徑去。嗣太祖復出。不見懸挂。因問故。答云。知是御書。高懸中堂。燃香祝聖。爲獻歲之瑞。太祖大喜。賚銀三十兩。俾遷業焉。

洛水元龜初獻瑞。陰數九。陽數九。九九八十一數。數通乎道。道合元始天尊。一誠有感。岐山丹鳳兩呈祥。雄鳴六。雌鳴六。六六三十六聲。聲聞于天。天生嘉靖皇帝。萬壽無疆。此明世廟齋醮對聯。乃袁文榮煒所撰。見沈德符野獲編。又一本云。撲靈蒼之草。以成文。天數五。地數五。五五二十五數。數生於道。道合元始天尊。尊無二上。截嶰竹之簫。以協律。陽聲六。陰聲六。六六三十六聲。聲聞于天。天生嘉靖皇帝。帝統萬年。詞句大同小異。傳是夏貴溪言手筆。

野獲編云。張江陵盛時。有送對聯諂之者云。上相太師。一德輔三朝。功高日月。狀元榜眼。二難登兩第。學冠天人。江陵欣然懸於廳事。先是華亭公罷相歸。其堂聯云。庭訓尙存。老去敢忘佩服。國恩未報。歸來猶抱慚惶。雖自占地步。而詞旨謙抑。勝江陵之誇詡遠矣。昔年般歷城罷相在里。江陵以宋詩爲對聯寄之。



云山中宰相無官府。天上神仙有子孫。蓋諛與嘲各半。頃者沈四明謝事居家。則直用李適之語云。避賢初罷相。樂聖且銜杯。又今相國福清公邸中所黏桃符。則云。但將藥裹供衰病。未有涓埃答聖朝。尤爲渾雅。

前明邱南鎮岳。由亞卿左遷藩參。數厚遺張江陵。嘗以黃金製對聯饋之云。日月並明。萬國仰大明天子。丘山爲岳。四方頌太岳相公。蓋亦欲以己名時蒙記憶也。江陵喜。將驟擢之。未幾敗。岳遂罷歸。

七修類稿云。吏部許尙書讚。其父亦吏部尙書也。讚先爲戶部尙書。其兄詔亦嘗爲南戶部尙書也。俞子木爲作一聯云。父冢宰。子冢宰。乘一代之銓衡。兄司徒。弟司徒。總兩京之會計。又陳敏之木。天台人也。任徽州歙縣訓導。書一聯於衙曰。四萬八千丈山中仙客。三百六十重灘上閑官。一則不可移易。一則天生切對。

嘉靖末年。南京城守門宦官高剛。於堂中書春聯云。海無波濤。海瑞之功不淺。林有梁棟。林潤之澤居多。蓋謂剛峯念堂二公也。宦官亦重諫臣如此。

望瓠集云。邱仲深學博貌古。而心術不可知。嘗與劉吉不協。劉作一聯書其門云。貌如盧杞心尤險。學比荆公性更偏。時論頗以爲然。

敝帚齋餘談云。江陵初賜第於鄉。上御筆親勒堂對云。忠可格天。正氣垂之萬世。功昭捧日。休光播於百

年可謂異典極褒。至癸未籍沒。則並第宅不保矣。但對聯乃御製御書。不知當時在事者。何以處之。又云。嘗於都下見一罷閑中貴。堂間書一對云。無子無孫。盡是他人之物。有花有酒。聊爲卒歲之歡。又全用南宋喬行簡詞中語。此輩亦知達生如此。

又云。向見王百穀家桃符云。豈有文章驚海內。漫勞車馬駐江干。哂其太誇。頃過陳眉公中庭書一聯云。天爲補貧偏與健。人因見懶誤稱高。蓋用陸務觀語。雖謙抑。實簡傲也。去年至支硎山。范長白學使齋中懸聯云。松風高士供蘭夢。美人圓其所書。卽所作也。時范未有子。故有夢蘭句。然圓夢字。又作原。唐宋人皆已兩用之。未知孰是。范又有對云。門前白水流將去。屋裏青山跳出來。又用笑林中里童屬對語。亦奇。滇省南關外。前明有趙某業屠。一日欲宰母牛。忽失其刀。時小犢在傍。仰臥哀鳴。趙鞭之起。則屠刀在焉。因感悟。棄屠刀。攜子母二牛。屏跡西山。每吟減去心頭火。要見呂洞賓之句。有道者過訪。趙款以茶。盛以古磁。道者失手墜地。趙似動嗔念。道者忽不見。古器依然。遺片紙書云。洞賓方纔到。心頭火又生。趙愧悔。一日憑欄觀海。遙見沐藩於昆明池習水戰。若有所羨。遂溘然逝。後提軍陳用賓來滇。偶遊西山。一一如舊遊。石壁記有趙沒之年。月日。與提軍生日適符。乃知卽趙後身也。自言鎮閩時。有道者來見。款以茶。問減去心頭火否。不解所謂也。臨別約以鸚鵡一會。至是詢知鸚鵡山。遂往遊焉。見一痴道人。手執二瓶。兩口相對。立於山石間。笑語曰。軍門別來無恙。此時向那頭跳出。語未竟。從者喝之。頓失所在。提軍始悟。二

瓶對口。卽呂字。立於山石。卽巖字。就立處爲橋。曰迎仙橋。山半肖洞賓像。爲環翠宮。後人題聯云。春夢慣迷人。九環仙骨。誤著了一品朝衣。任雞鳴紫陌。馬踏紅塵。軍門向那頭跳出。空山曾約伴。六詔杯茶。猶記得七閩片語。看劍影橫天。笛聲吹海。先生從何處飛來。

前明工部尙書張忠定公廷登。以功名顯。劉理順。吳麟徵。夏允彝。周延儒。皆其門下士也。家署門聯云。門多將相。文中子。身係安危。郭令公。蓋門客所題贈。

堅瓠集云。萬曆辛丑九日。焦弱侯先生。招同人登謝公樓。一友曰。嘗見欽天監柱聯云。夏至西逢三伏熱。重陽戊遇一冬晴。今諺云。夏至有風。重陽無雨。皆訛傳耳。按今時占驗語。上句作夏至有雷三伏冷。下句亦作重陽無雨一冬晴。往往有驗。

明末李忠肅都憲邦華。聞外城陷。遂棄家移宿於文信國祠中。李亦吉水人。旣北面再拜。復就信國公位前三揖。曰。邦華鄉邦後學。合死國難。請從先生於九泉矣。遂以白繒繫於信國之龕柱而死。後其鄉人換題新額爲二忠祠。又題楹柱云。後死須知無二道。先生豈願有忠名。幾於千金莫能易一字矣。趙甌北詩。所謂故知曠世心相感。恰好同鄉跡再攀是也。舊有邊華泉聯云。花外子規燕市月。柳邊精衛浙江潮。相傳吾鄉曹石倉先生學。辭官歸里時。閒行街巷。見一陋屋。柴門不正。柱上署桃符云。問如何過日。但卽此是天。詢知宅主。乃屠者徐五也。徑入廳事。有二聯。一云。仗義半從屠狗輩。負心多是讀書人。一云。金

欲兩千酬漂母。鞭須六百撻平王。先生爲之悚然。徘徊間。徐五已回。與語甚契洽。因定交。甲申之變。徐五攜隻雞斗酒。徑造先生廬。排闥而入。見先生。驚曰。吾辦此奉祭耳。何尚在也。先生遂拜而就義焉。盧潛溪孔昭云。相傳徐五更有一聯云。鼠因糧絕潛蹤去。犬爲家貧放膽眠。殊有感慨。又傳曹殉節後數日。人見溪中有浮屍。著素衣冠。識者以爲卽徐五也。按徐五名英。字振烈。侯官人。余田生。句。張超然。並爲之傳。里中人但稱爲徐五云。

柳南隨筆云。王文恪公鑿祖塋在洞庭東山之化龍池。形爲鳳凰展翅。湖中案山稍偏。地師云。可惜狀元旗不正。他年應作探花郎。後竟如其言。越二百年。而公之八代孫世琛。乃於康熙壬辰科狀元及第。聞琛於會試前三日。祈夢於神。夢至一廳事。其柱聯云。雨中春樹萬人雲。裏帝城雙鳳。蓋藏家闕二字。以示必中狀元也。

山陰徐文長。渭。一字天池。又字青藤。所居卽名青藤書屋。青藤其手植也。藤下有池。橫一平橋。橋承以柱。上覆石臺。臺額曰天漢分源。柱聯云。一池金玉如如化。滿眼青黃色色真。柱背又一聯云。未必串關別名教。須知書戶孕江山。乘橋之柱。額曰砥柱中流。皆文長自書。是所謂天池也。見董陽所撰青藤書屋記。紹興府城外三江濱海地也。居民每有其魚之歎。明湯太守紹鳳。創建應宿閣。水患始息。後人立公祠。乞徐文長撰廟聯。文長疾書云。鍊石補星辰。兩月興工當萬歷。續禹之緒。鑿山振河海。千年遺蹟在三江。于

湯有光兩用成語一切其事一切其姓越人每樂述之。

常熟瞿壽明昌文粵行紀事云登伏波山謁關壯繆廟見王父題額曰學本尊王又題一聯云浩氣塞兩間萬古綱常永賴威靈宣八表千秋帶礪全憑凜凜然鞠躬盡瘁之志上通神明矣按壽明爲督師瞿起田式祖孫今此聯無可考桂林人亦不能舉其詞矣。

相傳天啓間塑關帝像二尊一大一小時有日者甚神熹宗指二像令其推算日者稱小者福壽綿遠香火百倍於大者熹宗遂以小像棄置正陽門左側一小廟中而供大像於宮中以窮日者之言未幾闖賊入宮大像遂燬而小者香火日盛崇禎間有卜者邢姓設肆廟前甲申三月初旬卜者書一聯於廟門云漢封侯晉封王有明封帝聖天子可謂厚矣內有姦外有敵中原有賊大將軍何以待之按此語乃左宗上是夕夢入前殿見關帝坐帳中告以明運已盡天命有歸不日大聖人至矣卜者寤後告人曰吾設肆於此十餘年滄桑之變何忍見之明日遂縊於庭樹今廟旁有土地祠一白鬚神卽卜者云。

客有誦王衍宮詞云月華如水浸宮殿有酒不醉真癡人及明福王楹帖云萬事不如杯在手一年幾見月當頭以爲荒亡之言如出一轍是也然福王楹帖是王孟津鐸所書何良俊四友齋叢說謂二語乃吳中老儒朱楚航詩孟津亦書舊句耳。

吾鄉康熙間蕭塾菴震以御史巡鹽兩淮假歸值耿精忠之變爲耿所害籍其貲得三十萬纒首於烏石

山之鄰霄臺。先是蟄菴倡議修復道山。即烏石山建鄰霄臺。勒百字碑紀之。並書臺柱一聯云。但願桑麻成樂土。不妨詩酒上鄰霄。至是鄉人易詩酒二字爲屍首。謝古梅先生詩。所謂荒臺草木千年恨。樂土桑麻一夢中是也。

陸稼書先生從祀文廟。初議時。或以先生家中。曾延僧諷誦爲疑。其後人出先生手書廳事一聯云。讀儒書。不奉佛教。遵母命。權作道場。議遂定。

孫夏峯先生居新安。門人爲築雙柳居於學宮之東。顏乃來題聯云。近聖人之居。教亦多術矣。守先王之道。文不在茲乎。

耿精忠之變。李艴園總督之芳。扼守衢州。厥功甚偉。入爲兵部尙書。三衢軍民爲立生祠。聯云。淮蔡之功茂矣。抑又過之。大難削平。重奠東南半壁。琴鶴之操凜然。於今爲烈。名賢繼起。恰符五百餘年。

筠廊偶筆。載宣武門外教子衙衛永慶寺。爲僧文然所居。祖師殿前白楊古柏二。僧室無他物。壁有聯云。石壓筍斜出。巖垂花倒開。按五代道士石仲元。隱於桂州之七星山。自號桂華子。負詩名。世傳其警句。如石壓木斜出。崖懸花倒生之類甚多。爲湘源守楊徽之所稱。目爲玉方響。事詳粵西叢載。文然但偶書其語。其字句間有異同耳。

柳南隨筆。載錢湘靈先生陸燾。晚年居虞山。老屋三楹。適當石梅之下。松陰嵐翠。如眉臨目。先生兀坐其



中擁書萬卷。咿哦不輟。過其門者。往往駐足覘伺。流連不去。先生咿哦自若也。室中榜一聯云。名滿天下。不曾出戶一步。言滿天下。不曾出口一字。爲三峯釋碩揆所書。

# 楹聯叢話

## 卷二

### 應制

楹聯之爲應制作者。昉於前明嘉靖時。然如袁文榮夏貴溪所撰齋醮對聯。傳者不過一二。而浮夸之辭。無當大雅。良由其時載筆之臣。固無巨手。亦勝朝德政。不足以備揄揚。故凌夷衰微。迄於無聲。若此。我朝累治重熙。凡恭值大典慶成。皆有進御文字。靡不上動天鑒。下洽輿歡。自康熙乾隆年間。兩次編輯。萬壽盛典。皆有圖繪一門。楹聯附焉。而殿廷諸聯。尤足以鋪鴻藻。申景鑠。潤色洪業。鼓吹承平。自有楹聯以來。未有如此之盛者矣。謹就所見。分錄如左。

康熙五十二年。恭值仁廟六旬萬壽。自大內出西直門。達西苑路。皆有牌樓壇宇。每座落必有楹聯。肅括宏深。聞皆出當時名公碩彥之手。如般若菴經棚云。周雅賡歌。如山如川。如日月。箕疇斂福。曰富曰壽。曰康寧。普慶寺諷經處云。文德武功。兼帝王而大備。心宗性學。貫聖智以純全。燈棚牌樓云。輦道風清。葭管萬年調玉露。瑤池春暖。華燈五夜徹瓊霄。龍泉寺諷經處云。沸地笙鏞。丹鳳和鳴。占景運。彌天烟靄。青鸞

舞識禎符。廣濟寺牌坊云。算永東華。若木光騰。春九十。祥開南極。蟠桃花放。歲三千。東三官廟牌樓云。保合太和。道綜乾始。坤生兩儀。並久誕膺。多福功被民熙。物阜四海皆春。西三官廟牌樓云。帝握貞符。禹甸盡歸。滄海貢天開景運。堯封常祝。紫宸朝慈獻寺前牌坊云。十雨五風。處處康衢。歌帝力。千秋萬歲。年年華渚。耀神光。關帝廟燈棚云。敷天長戴。仁天知後天。之不老。大地同游。樂地真應地。以無疆。直隸全省燈棚云。聖算無疆。蠱蠱驚山。開壽域。天顏有喜。溶溶魚藻。漾恩波。江南全省經棚云。皇極運而歲。月日時無易。聖德大而祿位名壽並隆。浙江全省燈棚云。日之升。月之恆。萬年延寶祚。天所覆。地所載。億禩奠金甌。

乾隆五十五年。恭值純廟八旬萬壽。華祝嵩呼之盛。震今鑠古。尤爲史牒所未聞。恭讀萬壽盛典所載。楹聯大都按切時事。臚陳實政。非若登春臺。游華胥者。徒爲揣摩想像之詞。蓋九重之福壽愈隆。功德愈盛。而承明金馬之彥。研精殫慮。其鴻筆又足以發揮之。洵頌禱之大觀。而揄揚之極軌也。謹就所見。分錄如左。如四言云。四時爲柄。萬象皆春。百順爲福。六合同春。佛天佛日。壽世壽民。皇建福極。位在德元。圖成耕織。詩集攻同。願聖人壽。近天子光。五言云。堯齡增瑞甲。軒紀叶長庚。九五福曰壽。八千歲爲秋。八徵陳似範。三祝晉堯封。篆凝仁壽字。花發吉祥春。祝恆河沙壽。歌大海潮音。乾璣甄月軌。泰筴衍天環。六言云。景命壽於旗翼。淳風鬯彼垓埏。五福堂同五代。八旬時念八徵。七言云。泰筴中符天地數。坤珍大闡嶽川祥。

星雲麗近中秋筵。山海祥開益地圖。壽星四照環辰北。王會來同暨日南。春秋紀合八千歲。甲子周回三萬旬。皇嚮福錫庶民福。帝如春與四時春。位祿名壽德惟券。高明博厚久斯徵。八功八德無量佛。千春千秋大椿年。軒籙正當符健順。義文從此衍貞元。人如夏諺歌游豫。地是春臺樂皞熙。春臺煦育歌綏萬。化日舒長紀大千。福由天縱超千聖。年越古稀又十春。能以美利利天下。是用多福福一人。獻華童子名長壽。得道仙翁住太常。謂太常仙蝶也四時來備各以敍。如川方至莫不增。皇建極會極歸極。帝作歌。廣歌載歌由庚慶洽三千界。周甲重開二十春。萬年椿壽斯爲壽。五世蘭孫又見孫。萬衆人天歡贊佛。十方功德統遵王。化國蜚提春大共。壽人更老說從長。渥恩蠲詔駢科詔。新慶交封暨緬封。橋門邁漢三雍典。職貢超唐十道圖。鳩杖作朋春醺飶。鶯衣呈舞嘏詞新。壽趾培基山萬歲。恩波灑潤水中泠。八言云。東西朔南。訖于四海。歲時月日。惟曰萬年。山盛川冲。受茲介福。轅萌壤叟。同我太平。一字一音。求合於古。萬首萬徧。均和其聲。謂新製衢歌樂章也敬天勤民。以篤慶祚。揆文奮武。載揚大聲。儒館獻歌。禮官紀典。海人憬德。纓序蒙禋。文武聖神。在明明德。位祿名壽。得全全昌。九言云。花雨能仁。祝嵩齡億。載曇枝普。茂鞏海甸。三乘五十。有五年堂。開五代。八旬兼八月。璽刻八徵。七曜燦珠囊。榮鏡宇宙。萬年縣寶籙。合撰升恆。祝曼壽須彌。化漸印度。讚文殊師利。景麗臺懷。十言云。萬古希逢。豈止三四五六。一人有慶。直至億兆京垓。久道久照。久成。久徵不息。貞觀貞明。貞一。貞下起元。無我相。無人相。無邊壽相。有善緣。有德緣。有大福緣。十一言云。五試輪經。

蕊榜宏開科甲乙。七均正樂葩詩新。訂譜宮商。陽雨協豐占。徵念九疇之八。京垓增泰筴。呼問萬壽者三。就如日。瞻如雲。梯航羣介壽。軒乎鼓。鼙乎舞。衢壤徧熙春。十二言云。翠籙演天元。泰策揲圖書。正位珠弧環斗柄。壽星輝角亢。南纏臨雍茂。上儀圓橋水。與恩波渥。勒石期壽世。獵碣文從聖藻新。謂重勒石鼓文字也。期艾應昌祀。七旬赴宴三千叟。埏垓昭景貺。五代同堂二百家。十五言云。集山海梯航。東躒西鷄。萬國圖歸王會。感風雲律呂。南兜北昧。九重樂奏鈞天。十七言云。八月際昌期。玉琯金鐘。譜出一十三徽律呂。億年開景福。丹絨翠籙。歌成萬八千歲春秋。

聞乾隆五十五年八月八旬萬壽。經壇中有一長聯。最爲壯麗。膾炙人口久矣。相傳爲彭文勤師元瑞所撰。而恭繙萬壽盛典中。實未之載。謹記錄之。惟所聞字句小有異同。無關體要也。句云。龍飛五十有五年。慶一時。五數合天。五數合地。五事修。五福備。五世同堂。五色斑斕。輝彩服。鶴算八旬逢八月。祝萬壽。八千爲春。八千爲秋。八元進。八愷登。八音從律。八風縹緲。奏丹墀。紫禁城中。各宮殿門屏。榻扇。皆有春聯。每年於臘月下句懸挂。次年正月下句撤去。或須更新。但易新絹。分派工楷法之翰林書之。而聯語悉仍其舊。聞舊語係乾隆間勅儒臣分手撰擬。皆其時名翰林所爲。典麗喬皇。允堪藻繪。昇平。被飾休美。章鉅以珥筆。樞垣。出入承明者數載。千門萬戶。多在睹記之中。又間從清祕堂翰林處鈔錄成帙。雖未全備。已成巨觀。始知王蘭泉侍郎湖海詩傳中所載曹習菴學士仁虎數聯。不過百分之一二也。今謹按各門編錄如

左。

太和左右門云。日麗丹山。雲繞旌旗。輝鳳羽。祥開紫禁。人從闔闔。觀龍光。鳩觀翔雲。九譯同文。朝玉陛。鳳樓煥彩。八方從律。度瑤閭。協和門云。協氣東來。禹甸琛球。咸輯瑞和。風南被。堯階莫莢。早迎春。熙和門云。景緯霞敷。星罕燦三辰。珠璧元和。春盎雲。璇宣六代。咸英。上諭館云。一代典章。垂渙汗。萬年法守。仰都俞。誥勅房云。天寵遙頒。青鎖客。國恩重溢。紫泥封。繙書房云。玉宇中朝。資珥筆。金甌億載。慶垂衣。內閣前門云。聖德醍醐。花深紅藥省。帝光紉縵。日麗紫微天。太和殿中榻扇云。龍德正中天。四海雍熙。符廣運。鳳城回北斗。萬邦和協。頌平章。體仁閣云。黃道天開。東壁琛圖。輝玉宇。紫宸日麗。西山爽氣。映瑤階。宏義閣云。畫棟凝熙。東望攝提。輝曉日。彤庭延景。北臨檠戟。動朝光。中和殿中榻扇云。仁壽握乾符。萬國車書會。極中和。縣鼎錄。九天日月齊光。保和殿中榻扇云。凝鼎命而當陽。聖籙同符。日月握乾樞。以御極。泰階共仰星雲。

乾清門云。帝座九重高。禹服周疆。環紫極。皇圖千禩。永堯天。舜日啓青陽。左門云。紫極正中央。萬國共球並集。青陽迎左个。千門雨露皆新。右門云。皋應闢春陽。瑞氣常浮五雉。義和迴日馭。卿雲時捧雙龍。日精門云。日麗金門。五色雲屏。三島近。風和玉殿。九霄彩仗。百花新。月華門云。瑞啓日中霞。映龍墀。晴色迴。春來天上。烟融鳳闕。曙光高。坤寧宮交泰殿。東西面云。萬化轉璇樞。本天而本地。一元開瑞筴。資始以資生。



居一得元。秉神符而永極。交三成泰。捧寶勝於重華。左右次間。榻扇云。寶瑟和瑤琴。百子池邊春滿。金柯連玉葉。萬年枝上雲多。珠綴繞龍屏。寶炬光連寶籙。璇題懸鳳宸。彤雲瑞應彤墀。永祥門云。蟠桃千歲果。溫樹四時花。穿堂榻扇云。東華燦爛日初昇。紫氣常依曉殿。北闕輝煌雲正麗。祥光徧護春臺。增瑞門云。鳳鳥傳長發。蒼龍協永綏。

寧壽宮左門云。九重敷斂。範陳箕。曼羨蕃釐。共錫萬國會。歸光戴斗。蕩平軌路同遵。右門云。洛籌福紀。慶洪延。象叶居中。建五。乾策祥符。徵順。敍功。俸則大函。三。斂禧門云。輝駢寶笏。晉雲間。推策純常。集。慶。衍。瑤籌。贏。解屋。闡珍鳥。奕流。禊。左門云。重霄日月燭升恆。景運祥開久照。八表山川徵樂壽。昌期福集新韶。右門云。化成熙皞。驗風從。治媿春。孳夏育。祥迓熾。昌昭德。致符呈乾。絡坤維。錫慶門云。億萬齡。錫羨延洪。保定自天。孔固。三千界。重熙。洊洽。祥和與物同春。左門云。三壺景象駐恆春。卸砌環迎。戩穀。六幕光華徵。復旦。彤宸茂集。繁祺。右門云。珠囊曷緯。迓休徵。福界垣。昭太乙。玉燭年華彰瑞應。昌辰化溥。由庚。影壁東。牆門云。川嶽獻珍符。烟燼闡瑞日。星昭景貺。紉縵呈華。西牆門云。玉琯奏誠和。氣調九寓。璿樞徵廣運。衡正三階。

皇極殿云。皇圖盛際。陽春。觀蒼駕。日升久照。帝座高臨。北極。慶紫垣。星拱端居。左右次間云。順時宣象。咸宜。瑞履青陽。開左个。懋德凝禋。孔厚。祥延紫氣。衛中垣。環黼展。瑞煥星雲。共覩堯襟。舜抱。萃貞符。禋流。轉。

載長披金鏡珠囊。東西垂花門云。遵路傍東垣。慶霄春盎。近光瞻左掖。瑞旭晨升。戴斗鎮崆峒。尊臨地  
軸。宣風啓闔闔。順協天樞。昌澤門東西。圍廊榻扇云。韶序啓青陽。煦回歲籥。祥光騰紫氣。慶溢仙閭。福地  
勝三壺。延釐錫羨。融風調六琯。鬯景宣韶。昊歲啓三元。含和籥轉。堯曦光四表。承照華敷。長晷麗前榮。蓬  
瀛春駐。清芬飄合殿。卿喬晴薰。後榻扇云。松牖春回。吉靄正臨。銅晷永。芝庭日麗。祥光長擁。玉樞高。左右  
榻扇云。瑤光東指爲春。瑞啓扶桑。齊七政。黃道左旋而運。頌臚戴斗拱三階。旭臨鳩鵲初昇。華祝騰歡。連  
月窟。仗轉蓬萊。徐引宸居茂。對洽春臺。東西穿堂云。福緯耀微垣。瑤枝絢采。春祺凝化宇。玉樹承曦。協氣  
繞南榮。蒼車獻瑞。條風來左序。青鎖含輝。東西圍廊云。朝爽啓神霄。冥滋左砌。青陽昇麗景。芝秀東房。銀  
箭應琅璈。蓬壺晝永。銅鋪開錦繡。閨苑春濃。

養性殿云。優游蒹祿。咸宜寶籙。日增侔岱華。昌熾壽耆彌固。瑤躔春茂。式璣衡。頤和軒云。靜泰怡神。瑞靄  
光輝。臨黼辰。冲融契道。祥風藹吉。暢文軒。屏門云。生意無邊。奏曲文禽。諧玉琯。真機可挹。交枝仙萼。擁金  
鈴。景祺閣云。寶筴叶仙椿。億齡延祉。泰階昭景曜。九服均禱。暢音閣云。琅璈逸韻。應嵩呼。久矣八風從律。  
閭闔晴光。凝嶰吹。康哉九敍。惟歌。閣後榻扇云。海寓安恬。圓嶠方壺。開福地。天閭跌宕。右平左礮。上熙臺。  
閣是樓云。樽飲康衢。風雨和甘。均六幕。絃調寶瑟。星雲景慶。亘三階。東西配樓云。景麗瑤墀。鸞鶴翔空。騰  
慶靄。春回瓊島。魚龍獻瑞。展新圖。幃載浹祥和。紉縵交呈。旭采。智仁諧樂壽。純常懋迓春祺。角門云。地近

玉階通御氣。春回瓊瑤駐韶光。直房云。承恩沾沆瀣。接武引星辰。尋沿書屋云。千年金鑑長留。插架寶書  
 資政要。寸晷銅儀恆恆惜。揆箋妙蘊發幾餘。保泰門云。六瑄宣和樂。奏鈞天迴暖律。三階拱極圖。呈益地迓  
 新祺。衍祺門云。閭闔象昭回。蘿圖衍慶。蓬萊春茂鬯。寶卮延祺。并院門云。樹衢醲化調天醴。擊壤歡謠洽  
 德源。庫房門云。涵三化洽歸瓊鏡。吹萬風和轉玉杓。古華軒云。星瑄叶珠杓。祥開萬象。雲屏通碧漢。瑞啓  
 三陽。養心殿云。旭日射銅龍。上陽春曉。和風翔玉燕。中禁花濃。東西板門云。蘭燎香繞宜春帖。桂館花浮  
 獻壽杯。三島春深雲氣暖。九霄地迴月明多。直房云。金闕雲晴。九華開扇彩。珠樓風細。七寶拂爐烟。春駕  
 蒼龍。青陽臨左陛。雲開丹鳳。紫極麗中天。養心殿榻扇云。廣樂奏鈞天。萬國衣冠。同瞻旭日。陽春回大地。  
 四時囊籥。首協溫風。雉尾雲移。看玉燭光中。星扶華蓋。螭頭香動。聽金鈴聲裏。風展春旗。毓慶宮榻扇云。  
 北斗回樞。紫氣迎祥。雙闕曉。東風入律。彤雲獻瑞。五門春。蒼震門云。日麗彤墀。四表光華。瞻正朔。雲凝寶  
 仗。萬方歌舞慶同春。齋宮屏風門云。位育本中和。曰旦曰明。至誠丕應。寅清孚上下。亦臨亦保。敬德昭宣。  
 文華殿正門云。道契松雲。心傳符赤帝。祥呈河洛。治統啓青皇。武英殿正門云。四庫藏書。寶笈牙籤。天祿  
 上。三長選俊。縹囊翠軸。月華西傳。心殿云。帝典王謨。昭萬有。乾苞坤絡。奉三無。成安宮云。行慶恩深。陽春  
 資發育。右文典重。雲漢仰昭回。鑾儀衛門云。仙仗五雲。鸞鳴和盛世。德車七宿。龍角運中天。會典館云。金  
 鏡開楹。升恆光北極。珠杓映座。長養順東方。尙衣監云。天上垂衣明藻火。日邊珥筆頌星雲。茶膳房云。得

氣仙莫長應月。呈祥瑞。並迎風。五色雲英滋秀草。千年露實熟蟠桃。湛露凝甘盈玉甕。光風布煦應瑤  
箒。液酌衢尊同介景。音調懈管徧覃禧。神鼎上方調六膳。宮壺春色釀三漿。

阿哥所宮門云。旭日麗龍樓。瑞氣春融珠樹迴。卿雲籠鶴禁。祥光晴護玉階平。金鏡霞明。九苞開鳳錄。玉  
衡星正。五色協麟文。元象轉星杓。丹霄北拱。重門映春樹。紫氣東來。

坤寧宮云。麟定螽說。叶二南於彤管。星軒月殿。配一德於丹宸。澄瑞亭云。景運舒長。天上慶雲環紫極。太  
和翔洽。日邊甘露湛瑤墀。延暉閣云。樹石接蓬萊。三色喬雲成幄。軒窗騫象緯。千秋寶籙凝圖。壽康宮云。  
閭闔風和。瑞應金萱輝寶籙。蓬萊日永。祥呈仙筴耀春暉。大殿云。厚德著璇宮。禁掖常尊堯舜。修齡儲北  
斗。春秋永亘貞元。榻扇云。瑤殿凝麻。天上雲霞依舜萐。袞衣獻壽。域中川嶽捧堯尊。慈寧宮云。景福集璇  
宮。億萬斯年。永登仁壽。慈雲輝寶殿。千八百國。莫不尊親。榻扇云。興慶獻春光。瑤草金芝迎愛景。大安調  
暖律。朱鸞紫鳳叶仙韶。左右門云。玉階曉擁珩璜。天上慶雲移寶扇。金闕遙趨劍佩。春來瑞氣滿瑤池。麗  
韶景於履端。璧帶風微翔彩燕。耀春輝於復旦。簾衣晝靜響銅龍。永康門云。藻景耀中天。瑞啓萬安殿。外  
喬雲垂北極。祥呈長樂宮前。徽音門云。淑景舒華。絳樹含芳承瑞蔭。和風叶律。紫鷓調暖。奉祥嚙。佛堂云。  
兜羅佛手轉金繩。永護坤維日月。優鉢曇花開寶界。增輝震旦山河。妙諦證拈花。萬戶千門。皆成寶地。明  
心同指月。十洲三島。並現金光。長慶門云。北斗泰階平。儀鳳祥雲環錦幄。西池佳氣繞。袞龍愛日侍斑衣。

咸若館云。日耀東瀛。璇室問安雲似綺。星回北斗。珠宮寄賞物皆春。景仁宮云。春紀八千。和風翔壽宇。皇居九五。香露靄仙宮。近光門云。瑞啓青陽。軒雲承翠幄。祥開黃道。羲日展金輿。景陽宮云。頌啓椒花。百子池邊日暖。鷓浮柏葉。萬年枝上春晴。昌祺門云。淑氣凝和。天上香浮簇仗。條風扇瑞。宮中日永垂裳。延禧宮云。紫禦迎春。瑞拂千條御柳。丹樓映日。祥開萬樹宮花。麟趾門云。瑤雲曉護蒼龍闕。玉斗春回紫鳳城。鍾粹宮云。瑞雪霽南山。寒收玉宇。條風噓北斗。春滿金甌。迎瑞門云。麟趾春深千歲酒。鶯聲日暖四時花。千嬰門云。星轉璿杓。光映卿雲五色。春回玉琯。祥開彩勝千枝。承乾宮云。紅日初生。萬戶祥雲臨複道。青陽乍轉。九天佳氣敞重樓。永和宮云。黃道呈祥。八表星環紫闕。青陽布澤。三階日麗丹霄。德陽門云。律轉璇樞。三殿星雲復旦。時調玉燭。千門花柳同春。永壽宮云。化日麗三陽。春回禹甸。條風和萬國。樂奏虞絃。長春宮云。九天淑景凝新旭。三殿晴光接彩霞。啓祥宮云。迎春曙色。含金榜。近日晴光轉玉宸。翊坤宮云。化日舒長。五緯祥光連斗極。惠風和暢。六符瑞采煥台階。儲秀宮云。龍影玉珂聯。花明御路。鸞聲珠履度。日麗天衢。

盛京各門亦有春聯。南宮門云。麗正凝祥。境引琅嬛開積秀。熙韶蒼景。曜連奎壁啓當陽。東西宮門云。海甸蒼珍函。沿波從朔。春陽迎綺陌。倬漢成文。珠筴護豐京。觀化天閭登笈富。銅鋪開兌位。同文月竊獻琛多。獨坐門云。繡嶺銀河環畫棟。丹書玉宇貯琅函。文昌氣象聯奎壁。道派淵源滌漆沮。典超麗正崇文上。

規紹遷函宅洛初。星雲照耀輝天祿。山海崇深蒼地靈。嘉蔭堂云。仿天一藏書。函館岡原揚大烈。應奎三懸象。沛宮父老慶同文。文漪閣云。天作沂前光。玉券十華徵錫極。人文觀大備。瑤籤四照見逢原。九間殿云。益地圖開嶽貢川。珍臚寶笈麗天文。煥幽京。郤室游仙源。後宮東西門云。從朔貽規。三院圖書有典。指南錫極。九霄雲漢爲章。日映東嶠。被光華於藝圃。源流北海。挹沆瀣之文瀾。南北值房云。北鎮標雲。詞林宗斗極。東瀛浴日。學海跂壺天。羣玉成山。思文衍郤室。上奎炳耀。繩武播函風。

彭文勤公撰擬寧壽宮燈聯稱旨。恭讀聖製詩云。東西次第南而北。左右分明後與前。神以通靈氣以運。六爲之儷四爲駢。可謂極天語之褒嘉。而成文字之寵遇矣。按此乾隆五十年事。是冬公卽被命協贊繪扉。時和珅在樞地。欲以青詞宰相誣公。日下輕薄子。遂有燈聯相公之目。不知公之學問優長。一時詞臣無出其右。早結主知燈聯一事。特會逢其適耳。當和珅侮公時。章京方葆巖維甸嘗與力爭不獲。公後有贈方詩云。半山學行吾何敢。爲我伸眉觸要人。卽指此事也。謹按燈聯左右各八。俱以方向字冠首。而以乾隆年間實政經緯其中。洵才人之極筆。足以揄揚盛美。鼓吹休明。同時儒臣皆爲斂手。今備錄於左。南前云。南斗煥珠弧。六旬御寓。萬禳頤和。堯封祝曰。聖人壽。前星臨黼辰。九陛崇基。三元肇祚。周雅歌之君子寧。北後云。北極拱皆朝。子帝有帝。曾孫有孫。五福堂前歡舞綵。後天錫難老。長春如春。元夜不夜。九華燈下壽稱觥。東左云。東作稽關心。雪融隴麥。燭照田蠶。課雨占晴尙初志。左旋杓向角。節宴堯漿。燈詞舜

軫撫時行慶有前規。西右云。西域被流沙。年班藩部。歲報屯田。照世杯圓里二萬。右垣通閣道。出震迪光。  
 乘乾垂裕。和時燭朗界三千。東南云。東國舊戎衣。吹豳有籥。作岐有磬。小物克勤。詠糠燭。南邦昔車斗。恬  
 海如鱗。翁河如鏡。民風可觀。戒燈船。西南云。西園翰墨林。四庫積玉。七閣抽琅。太乙藜光燈以右。南宮禮  
 樂地。兩舉制科。六開恩榜。文昌珠彩。月同圓。東北云。東揖木公朝。十年慶典。千叟恩榮。洛社畫圖。鳩仗集。  
 北迎元日詔。五代齒繁。百家算倍。康衢燈火。篠驂游。西北云。西定噶喇依。恭者我僕。僭者我俘。蠻目更番  
 入春宴。北踰額濟勒。威曰歸降。德曰歸順。鴻臣來賀。御東朝。以上左南前云。南面久仔肩。求衣問夜。秉燭  
 待章。福用敷之次。五極前盟。果如意。鳥篆鐫瓊。鴻文刻玉。古惟稀矣。四三皇。北後云。北戒拱論都。河得真  
 源。淮得真源。九如咸頌。川方至。後車勤覲。嶽岱猶望。幸嵩猶望。幸萬壽宜。歌山有臺。東左云。東箱啓儒席。  
 論敷奧旨。雅肄古歌。詩誦壽萬千。無量。左海侑賓筵。樂補吹笙。鄉觀飲酒。禮成月三五。而盈。西右云。西敍  
 游成功。振以特磬。聲以鐘。節序新詞。卑火樹。右文鬯鳴盛。風有干城。雅有髦士。科名舊事。壓燈毬。東南  
 云。東震旦最尊。樓湧萬佛。經譯三乘。歡喜園中。法輪轉。南瞻部妙勝。印寫祕文。塔飄吉帛。光明天上。慧燈  
 懸。西南云。西社賽春燈。市流帑。舖溢倉糧。六十年逢年布惠。南榮曝朝日。戶弛繆租。漕除玉粒。二十萬  
 桑萬全。獨東北云。東陸鳥可開。辛析紺殿。亥藉黛轅。惕若躬親。奕葉守。北辰象布令。秋獮上蘭。冬嬉太液。  
 昭哉心法。髦期勤。西北云。西來福德。智高六帝。帝享萬年年。典盛禮隆。臚舊政。北向子臣。民奉至尊。尊爲

乘父父天符人瑞遂初心。以上右八聯

乾隆中每歲巡幸熱河必於中秋後一日進哨。即本園場也重陽前後出哨蹕路所經有所謂萬松嶺者滿山皆松爲重九日駐蹕登高之所歲以爲常庚戌歲上進哨時駐此周覽行宮顧謂彭文勤公令將舊懸楹帖悉易新語期以出哨登高時親閱公連日搆思偶於行殿正中得句云八十君王處處十八公道旁介壽謂貼萬松嶺也而難其對因以片紙馳价屬紀文達公成之文達公笑曰芸楣又來考我乎即令來价立待封紙付還文勤公啓視則已就餘紙寫成對語矣句云九重天子年年重九節塞上稱觴嘆曰曉嵐眞勝我一籌矣回轡日此聯果大蒙稱賞特賜文勤公以珍物八事公跪辭曰此出句是臣所撰而不能對對語實紀某所撰請移以賞紀某上曰兩邊語皆好汝自應領賞即另發一分賜文達公余聞之程蘭翹師云



此  
页  
空  
白

# 楹聯叢話

## 卷三

### 廟祀上

廟中楹聯。宋元時絕無傳句。大約起於明代。至本朝而始盛。文昌殿關帝廟兩處。撰者尤多。幾於雅鄭混雜。惟文廟則未之聞。良由著筆甚難。故無人不知藏拙。憶在京師。曾游國學。得恭閱聖製大成殿聯云。氣備四時。與天地日月鬼神合其德。教垂萬世。繼堯舜禹湯文武作之師。惟聖人能言聖人。後有作者弗可及矣。

鄒縣孟廟中。有御題聯云。尊王言必稱堯舜。憂世心同切孔顏。蓋乾隆二十二年南巡過鄒縣時所製。奎藻昭回。當與七篇之書同壽天壤也。

京師有歷代帝王廟。在阜城門外。建於明嘉靖間。本朝順治康熙間。疊議增祀之典。至雍正二年。始親詣行禮。乾隆二十九年。始易蓋正殿黃瓦。聖製聯云。治統滂欽承法戒兼資。洵哉古可爲監。政經崇秩祀實枚式煥穆矣。其神孔安。蓋廟貌雖徧寰區。惟歷代帝王廟與孔廟。典極隆重。必御聯方能相稱。宜百爾臣

工。以及佔畢儒者。皆莫能贊一辭也。

甘肅文縣。地極瘠僻。荒山中有文王廟。縣志謂卽古美里地。亦未見其確也。狄道吳信辰鎮。有文王廟聯云。蒙難觀爻。石徑蒺藜皆卦象。拘幽作操。雲田柞械亦琴材。亦第切其地云爾。

錫山鄒世楠過孟廟夢聯句云。戰國風趨下。斯文日再中。覺而異之。徧觀廊廡。無此十字。後數年過蘇州。得黃野鴻集讀之。乃其集中句也。不知何以入夢。亦奇矣。田實發題孟廟云。孔門功冠三千士。周室生當五百年。亦佳。

曾子祠中楹聯云。述格致誠正修齊治平之傳。萬世咸承厥訓。超德行言語政事文學而外。一人獨得其宗。又一聯云。衍一人忠恕之心。傳學惟省貫。開萬世治平之事業。道極明新。

濟寧州之仲家淺。爲子路故里也。有仲氏祠聯云。允矣聖人之徒。聞善則行。聞過則喜。大哉夫子之勇。見危必拯。見義必爲。

衛輝府之宜溝驛。爲子貢故里。有端木子祠聯云。性道在文章。深造自得。廉平稱治績。遺愛無窮。

吳信辰有顏氏祠堂聯云。馨香分郭外之田。夕膳晨羞。詎敢作拾塵野祭。展拜守家中之訓。左昭右穆。何須縉爭坐名書。自注。上聯用陸機拾塵惑孔顏句。下聯用顏之推家訓及顏魯公爭坐帖事。又樊氏祠堂聯云。薄稼圃而不爲。宜善會先賢之意。敬鬼神而仍遠。當恪尊乃祖所聞。

關帝廟聯最多。世人皆習用三國演義語。殊不雅馴。有集四書句者云。知我者其惟春秋乎。乃所願則學孔子也。最著於時。語似正大。不知帝之好讀春秋。正史亦無明文。惟裴松之引江表傳云。公好左氏傳。諷誦略皆上口而已。學孔子語。亦泛而無當。不得謂之佳聯。若舊官寧改漢。遺恨失吞吳。又漢家宮闕來天上。武帝旌旗在眼中。又吳宮花草埋幽徑。魏國山河半夕陽。皆集句之渾成者。然先主闕宮。丞相祠堂。未嘗不可移用。又不若三分割據紆籌策。萬國衣冠拜冕旒二句。較爲雅切。又記有一聯云。先武穆而神。大漢千古。大宋千古。後文宣而聖。山東一人。山西一人。可包一切。掃一切矣。吾鄉龔海峰先生景瀚有句云。赫厥聲。濯厥靈。無師保。如臨父母。天所覆。地所載。有血氣。莫不尊親。亦尙非俗調也。

商邱宋文康公樞過蒲州謁關廟。見一聯云。怒同文武。道卽聖賢。公以對句不工。思有以易之。偶午睡。夢神告之曰。何不云志在春秋。此事見筠廊偶筆。恐係文康託夢以神其事。按三國志本傳。有威震華夏語。似亦可對志在春秋。又記有一聯云。聖以武成名。剛毅近仁。於清任時和中。更增一席。學於古有獲。春秋卒業。在詩書易禮外。別有專經。語亦矜重。然究嫌春秋云云。涉稗官氣也。

西湖金沙港之關廟。在南山北山之中。胡書農學士敬聯云。聖至於神。薦馨歷千載而遙。如日月行天。江河行地。湖開自漢。崇祀值兩峯相對。有武穆在北。忠肅在南。又岳廟之左。亦有關廟。其門聯云。德必有隣。把臂呼岳家父子。忠能擇主。鼎足定漢室君臣。繆昌期手筆也。

河南許州八里橋。有關帝廟。壁有畫像。帝騎馬居中。曹公及張遼等。分立兩旁。酌酒餞行。有長聯云。亦知吾故主尚存乎。從今日徧逐天涯。且休道萬鍾千駟。曾許汝立功乃去耳。倘他日相逢歧路。又肯忘樽酒綈袍。此聯最著於人口。此事亦見正史。然史但云。吾極知曹公待我厚。然吾受劉將軍厚恩。誓以共死。不可背之。吾終不留。要當立效以報曹公。乃去。及殺顏良。曹公知其必去。重加賞賜。帝盡封其所賜。拜書告辭。而奔先主於袁軍。左右欲追之。曹公曰。彼各爲其主。勿追也。並無酌餞贈袍之舉。此殆鋪張演義之言。而忘其非事實也。梁應來紹壬。兩般秋雨菴隨筆。稱其組織本傳。別有機杼。過矣。

彭春農學士邦嘯曰。先文勤公。視學江蘇。撰署中關帝廟聯云。兵法讀春秋。必有文事。官箴嚴月旦。無作神羞。又爲一剝題句。其正殿奉關帝。左右祀火神龍神。聯云。心之光明猶火也。神而變化其龍乎。皆就地起義也。

有傳關帝乩筆一聯云。史官擬議曰矜。誤矣。視吳魏諸人。原如無物。後世尊崇爲帝。敢乎。論春秋大義。還是漢臣。按此才人之筆。託名於降乩者也。陳壽三國志評云。關張皆稱萬人之敵。爲世虎臣。關報效曹公。張義釋嚴顏。並有國士之風。然關剛而自矜。張暴而無恩。以短取敗。理數之常也。此聯爲帝辨矜字。其意甚善。然視如無物云云。則仍不脫矜字。似非帝所欲云。至我朝順治間。封爲忠義神武大帝。尊崇之典。實至昭代而極隆。非臣工所得擬議。故託諸乩筆。以示謙冲。庶爲帝之所許歟。

吳信辰題關廟聯云。惠陵烟雨。涿郡風雷。在昔墳篋興一旅。魏國山河。吳宮花草。於今蠻觸笑三分。語頗壯麗。然亦嫌墳篋二字裝點。未免有演義語。橫梗胸中也。余小霞曰。若改墳篋字爲同袍。改蠻觸字爲裂土。則無遺憾矣。

熙朝新語。載山東庠生張大美。奉關帝甚虔。病中夢入關廟。見帝著本朝衣冠理事。有頃呼張名語之曰。吾廟中楹柱對聯。膚泛俚俗。甚不愜意。爾與吾有香火緣。其爲吾易之。張跪誦一聯云。數定三分。扶漢室。削吳吞魏。辛苦備嘗。未了平生事業。志存一統。佐熙朝。伏寇降魔。威靈丕振。只完當日精忠。帝深加歎賞。曰。此四十二字。爾來歲當知好處也。次年鄉試首場。張構思未就。倦而假寐。夢帝肘之曰。起起。爾忘對聯字數乎。張驚寤。文思沛然。如夙構。榜發中式第四十二名。適符聯字之數。

繆蓮仙良塗說。載關廟一長聯云。識者觀時。當西蜀未收。昭烈尙無尺土。操雖漢賊。猶是朝臣。至一十八騎走華容。勢方窮促。而慨釋非徒報德。祇緣急國計。而緩奸雄。千古有誰共白。君子喻義。恨東吳割據。劉氏已失偏隅。權卽人豪。詎應抗主。以八十一州稱敵國。罪實難逃。而拒婚豈曰驕矜。明示絕強。援以尊王室。寸心只在自知。蓮仙稱此聯可泣可歌。殊爲溢美。詞費則有之。而尙不軌於正。又秦澗泉學士大士聯云。三教盡皈依。正直聰明。心似日懸天上。九州隆享祀。英靈昭格。神如水在地中。則四平八穩之句也。若世所傳不愛財不愛酒一聯。直是委巷荒唐之語。所當亟爲別裁。而俗流頗多膾炙之者。不得不附錄而

辨之。世所傳此筆聯云。不愛財。不愛酒。不愛婦人。是個老頭陀。祇因眉宇間帶兩字英雄。擔擱了五百年。入山正果。又要忠。又要孝。又要風流。好揚大冤孽。若非胞胎裏有三分癡鈍。險些做十八灘順水行舟。

富陽緜嶺。卽王子晉吹笙處。舊有關帝廟。邑人葺而新之。或懸一聯云。此吳地也。不爲孫郎立廟。今帝號矣。何須曹氏封侯。相傳爲邑之胡明經所撰。惜忘其名。孫權爲富陽產。故出句云爾。

閩浙交界仙霞嶺關廟。最著靈異。聯扁極多。惟周櫟園先生堯工一聯。熟在人口。句云。拜斯人。便思學斯人。莫混帳。磕了頭去。入此山。須要出此山。當仔細。捫著心來。蓋此間閩諺。本有到來福地。非爲福。出得仙霞。始是仙之句。故對語卽同其意。自國初至今。有獻新聯者。卽將舊聯撤去。惟此聯屢經修飾。無敢易之者。然實非雅音也。憶過甘肅之六盤山。徑路酷似仙霞。而高亦相埒。嶺巔關廟。亦有此聯。卻不題周款。不知此語。何以不脛而走如是。

有作關夫人廟聯者云。生何氏。沒何年。蓋弗可考矣。夫盡忠。子盡孝。可不謂賢乎。頗著於人口。按此事。羌無故實。不得不用活筆。然據馮山公景所記。則關夫人自有姓。作者亦未見馮記耳。今附錄筠廊偶筆中一條。以廣見聞云。偶得蒲州朱牧所撰關侯祖墓碑。事奇而文不雅馴。以示吾友馮山公。山公走筆作記一篇。庶足與侯並不朽矣。記曰。天之生聖賢也。必鍾祥於世德之家。故大孝尊親。咸思貽父母令名。予嘗慨漢壽亭侯。生而忠貞。沒爲明神。廟貌徧宇內。血食綿千古。而其祖若考名氏。獨闕軼無考。侯在天之靈。

必有靈然隱痛者。予每遇河東博聞之士。必周咨之。不可得。康熙十七年戊午。解州有常平士于昌者。讀書塔廟。塔廟侯故居也。昌晝夢侯授以易碑二大字。驚而寤。見濬井者。得巨甃。碎之。甃上有字。昌急合讀。乃紀侯之祖考兩世諱字。生卒甲子大略。循山而求。得墓道焉。遂奔告解州守主朱旦。朱旦作關侯祖墓碑記。記中載侯祖石磐公。諱審。字問之。和帝永元二年庚寅生。居解州常平村寶池里。公冲穆好道。以易春秋訓其子。卒於桓帝永壽三年丁酉。享年六十八。子諱毅。字道遠。性至孝。父沒。廬墓三年。既免喪。於桓帝延熹三年庚子六月二十四日生。侯長娶胡氏。於靈帝光和元年戊午五月十三日生。子平。其大略如此。昔趙宋時。劉廷翰官貴。當追封三代。少孤。其大父以上。不皆逮事。忘其家諱。太宗爲撰名。親書賜之。載在宋史。以爲美談。亦以教孝也。而況侯之祖若考。皆有名氏載壙石。章章可考。顧忍軼之哉。世傳張桓侯工書法。有刁斗銘。甚工。又有流江縣紀功題名二十二字。亦侯所書。又俗傳侯之後身。在唐爲張睢陽。在宋爲岳忠武。故吳信辰作廟聯云。雄猛讓一人。武善提戈。文握管。精英傳萬世。唐曾顯姓宋留名。

文昌祠之神。道家以爲張仲後身。又以爲梓潼度世。其實今所祀之文昌。則星象也。古祠屬之天神。祠廟徧天下。而列之祀典。則自我朝嘉慶六年始。儀文與關廟同。而海內私廟之多。亦與關廟等。程春海侍郎恩澤一聯。最爲典切。面面俱到。無能出其右者矣。句云。宇宙大文章。源從孝友。古今名將相。氣作星辰。蓋



無一字無來歷也。

蘇州文昌宮聯云。天惟陰隲下民。止於仁。止於敬。帝乃誕敷文德。作之君。作之師。揚州賀園之西。有梓潼殿。襄平高景來士。鑰聯云。積忠孝以成神。典桂籍科名。予奪後先。十五國文章司命。舉陰隲而垂訓。鑿槐區德行。權衡富貴。億萬年造化樞機。又孫文定公嘉謚聯云。天開參井文章府。星煥山河孝友師。又郭頻伽摩集句聯云。帝以會昌神以建福。文選句下有風雅。上有日星。唐文亦典重不佻。

蘇州有秦伯廟。而湖北亦有至德祠。聯云。違親不孝。背君不忠。敢辭瘴雨蠻烟。採藥當年心最苦。傳季而王。偕仲而霸。豈意吳頭楚尾。瓣香到處德維新。又無錫秦伯祠聯云。勾吳分土惟三。端委垂型。梅里肇基名最古。遷史世家第一。雲仍衍緒。華陂崇祀惠無疆。秦鶴所題也。

聞廣東省城真武廟。有蘇文忠公手書一聯云。逞披髮仗劍威風。仙佛焉耳矣。有降龍伏虎手段。龜蛇云乎哉。語意岸異。非凡手所能。而是否蘇筆。尙須向粵東人考之。

黃鶴樓中。奉純陽呂祖百文敏公百齡聯云。教孝教忠。何殊十七世士夫。顯示化身扶正道。爲谿爲谷。直把五千言文字。參同妙契指迷津。或疑以純陽比文昌爲過。然同爲道教宗主。何必強爲分別。嘉慶年間。勅各直省建立贊化宮。奉祀純陽。儀節與文昌等。則相提並論。豈爲過乎。又黃文炳聯云。遇有緣人。不枉我望穿眼孔。得無上道。祇要汝立定脚。

余家有魁星閣。上懸黃石齋先生所畫魁星像一軸。筆墨雄偉。迥異恆蹊。惟足踏梅花一枝。不知所取。或寓梅占百花魁之意。余集杜白句爲聯云。綵筆昔曾干氣象。文昌新入有光輝。後晤一客云。前人已有此集句也。吳信辰魁星閣聯云。筆足代耕。不厭兼金歸掌握。文能行遠。何妨隻履上雲霄。雖切而近俗矣。觀音大士祠聯最多。惟京師陶然亭中數聯。勝於他處。而均忘撰者姓名。聯云。法雲廣蔭無遮會。慧日高懸有相天。又云。泡影乾坤。粧成寶相。色香世界。幻出空花。又云。蓮宇岿峩。去天尺五。臨韋曲。蘆塘淼漫。在水中央。認補陀。則雅切陶然亭景物矣。

張芥航河帥題大士祠聯云。真實不虛。大慈悲度一切苦厄。意識無界。空色相現。五蘊光明。又張南山郡丞維屏撰千手千眼觀音聯云。菩提今菩提。具大神通。忽現千般千眼。自在觀自在。是真佛力。總由一念慈悲。又德清慈相寺內一聯云。卽色卽空。現慈悲相。吾無隱爾。是萬是一。具手眼人。自能辨之。燕子磯永濟寺中亦有觀音大士像。柱聯云。音亦可觀。方信聰明無二用。佛何稱士。須知儒釋有同源。忘卻何人所題。殊有妙悟。

西湖中天竺白衣殿。卽送子觀音院也。魏春松觀察成憲聯云。白衣仙人。瓶中水楊柳。朱芾男子。天上石麒麟。語特古異。又俗傳一聯云。我具一片婆心。抱個孫兒送汝。你做百般好事。留些陰騭與他。雖近俚語。亦是渡世慈航。百文敏公最喜述之。緣此事本近俚俗所爲。則聯語亦不妨相題而製耳。

諸葛忠武侯廟。有集句一聯云。可託六尺之孤。可寄百里之命。君子人與。君子人也。隱居以求其志。行義以達其道。吾聞其語。吾見其人。又一聯云。自任以天下之重如此。是知其不可而爲之與。皆能恰稱身分。勝讀陳承祚史評矣。又有一聯云。伊呂允堪儔。若定指揮。豈僅三分興霸業。魏吳偏並峙。永懷匡復。猶餘兩表見臣心。

陳東橋孝廉爲余述靈川縣有諸葛祠聯云。梁父吟成高士志。出師表見老臣心。又云。成大事以小心。一生謹慎。仰流風於遺像。萬古清高。忘卻撰者姓名。

京師翰林院禮部國子監各有土地祠。並祀韓文公。不知起於何時。法祭酒法式善聯云。起八代衰。自昔文章尊北斗。興四門學。卽今俎豆重東膠。彭司業定求聯云。進學解成。閒官一席曾三仕。起衰力任。鉅製千秋本六經。則皆爲國學製也。

南河雲梯關爲淮黃入海之路。余備兵淮海時。屢經其地。關旁有禹王廟。廟內有臺。爲乾隆初年。權河督卓亭公所建。題曰平成臺。公名完顏偉。其裔孫麟見亭。麟慶於道光年間。繼爲河督。題聯云。與水不爭能。力盡八年惟注海。升堂思肯構。目窮千里更登臺。

清江浦亦有禹王臺。浦中一勝景也。麟見亭聯云。洪水想當年。幸怪鎖洪湖。十萬戶飯美魚香。如依夏屋。清時思儉德。祝神來清浦。千百載泳勤沐澤。共樂春臺。

清江浦四公祠奉勅建。祀靳文襄公、靳輔、齊恪勤公、齊蘇勒、嵇文敏公、曾筠、高文定公、斌也。麟見亭聯云：本來上界神仙喜功德，在民輝聯俎豆同是盛朝臣子。願靈明牖我，積奏江湖。

淮瀆廟在洪澤湖心龜山之麓。巫支祈井即在殿前。上封以石，舊有宋金臂禪師所建無梁殿。及鐵羅漢百餘尊，久沒於湖。道光年間麟見亭起，出羅漢二十四尊，鐘鏤各一具，建寺奉之。紀以聯云：巫支祈井底深潛，瀾恬洪澤阿羅漢波間重出，福佑清淮。

樅樹湖神廟在寶應縣汜湖濱。廟門前有樅樹一株，相傳乾隆三十年南巡，遇大風，曾維御舟於此。遂錫封建廟。道光間麟見亭出守新安，阻風江口七日，夜夢三神同舟，許助順風。次日果泊西梁山，後督南河過寶應，入廟謁神，宛然其貌。因紀以聯云：示夢記江頭，曾許我一帆風順，安瀾徧河上，願長此大樹春榮。

蘭素亭河帥第錫撰。南河風神廟聯云：聖世不鳴條，默佑湖河占利涉，神功常應律，潛調寒燠叶休徵。太皞陵在陳州府，郡守王掌絲聯云：洩造化之機緘，萬世文章開易象，規山川之形勝，千秋陵寢奠淮陽。邑侯麥祥聯云：後天地而生，朱圉猶堪尋聖蹟，立帝王之極，白雲常此護靈墟。

衛輝府有比干墓，世所傳宣聖題碣者也。城北又有比干廟，有長聯云：君德難回，當此衆叛親離，若但如微子去箕子奴，無以激億萬人忠貞之氣，臣心不死，即茲魂飛血濺，猶將以周日興，殷日喪，上訴諸六七

王陟降之靈詞旨激昂。然頗似時文家兩小比矣。

邯鄲黃梁店有呂公祠。百文敏公聯云：萬井烟濃。人間正熟黃梁飯。四山雲起。天上應開白奈花。

余屢過邯鄲。謁呂仙祠。記得有黃梁夢亭中懸舊聯云：睡至二三更時。凡功名都成幻境。想到一百年後。無少長俱是古人。亦警世語也。

汲縣白雲閣上奉呂祖像。陶雲汀宮保聯云：杯前三尺青蛇。仙會恍游蓬島路。笛外一聲黃鶴。我來猶記洞庭秋。又聯云：卅二色神仙寶光也似佛也似儒。出世還入世。五千言道德真嗣。亦稱師亦稱祖。可名非常名。按宮保素不喜道家言。而撰聯乃諦當如此。

永平府在商爲孤竹國。城外有夷齊廟。余於嘉慶二十三年扈蹕過此。因得入廟展謁。有舊聯云：兄讓弟。弟讓兄。父命天倫千古重。聖稱賢。賢稱聖。頑廉懦立百世師。屬對如生鐵鑄成。

大明湖中有鐵公祠。訥近堂中丞訥爾經額聯云：大節凜東藩。四百載至今如昨。崇祠留北渚。萬千劫雖死猶生。大明湖後有鍾離樓。不知何名。聯云：養性承天。仙教源流通聖教。修真得地。濟南風景賽終南。又千佛山中有碧霞宮。聯云：山高則配天。陽魯陰齊資化育。坤厚故載物。西河東海仰生成。

濟南城北有北極閣。遠對千佛山。俯瞰大明湖。枕城而立。爲會垣最高處。有集句聯云：宮中下見南山盡。城上平臨北斗懸。可謂工而切矣。

汪文端公由敦。有東嶽廟一聯云。雲行雨施。不崇朝而徧天下。理大物博。祖陽氣之發東方。鎔鑄經傳之文。亦自名貴。相傳是趙甌北翼代擬。文端以之進御耳。

張文端公英未遇時。過華山。題陳希夷廟云。天下太平無一事。山中高臥有千秋。語意便自不凡。紹興上虞縣虞姬廟。有對聯云。今尙祀虞。東漢已無高后廟。斯真霸越。西施羞上范家船。此倪文貞公所撰也。光武時。斥呂后。而以文帝母薄太后配祀高帝。出語用之。

浙江曹娥廟大門有聯云。事父未能入廟。傾誠皆末節。悅親有道見吾不拜也。無妨傳爲乩筆。又或以爲徐青藤先生所作。

此页空白

# 楹聯叢話

## 卷四

### 廟祀下

大興朱文正師撰杭州西湖朱文公祠聯云。由孔孟而來。二千年衛道傳經。獨振斯文統緒。當光寧之世。五十日格非陳善。允宜此地蒸嘗。

邊育之儀部延英撰朱子祠聯云。大哉夫子之功。百世權衡。六經羽翼。遠矣斯文之統。周程私淑。孔孟聞知。

長沙有屈賈二公祠聯云。親不負楚。疎不負梁。愛國忠君真氣節。騷可爲經。策可爲史。經天行地大文章。分貼二公處。渾成可喜。

嶽麓寺三閭大夫祠有秦小峴侍郎瀛聯云。何處招魂。香草還生三戶地。當年呵壁。湘流應識九歌心。眉州三蘇祠中楹聯林立。殊少佳構。惟大門有張鵬翔一聯云。一門父子三詞客。千古文章四大家。最爲大雅。又乾隆中州牧蔡宗建一聯云。是父生是子。家學一門。自昔聲名彌宇宙。難兄更難弟。象賢兩世。至



今俎豆重鄉邦。稍可。又劉錫嘏集句一聯云。江山故宅空文藻。父子高名重古今。亦佳。

陶雲汀宮保樹云。益陽郭都賢。字些菴。前明天啓進士。巡撫江西。甲申後。爲僧。自號頑石。其名附見明史。左良玉傳。魏叔子之師也。叔子集中。有上郭天門先生書。卽其人。益陽各廟寺。多有頑石所題楹帖。如桃花江東林寺門聯云。洗菜莫教流去葉。見桃猶記舊會花。又浮邱山祖師殿聯云。中國有聖人。是祖是師。咄咄西來東土。名山藏帝子。亦仙亦佛。元元北鎮南天。

吳中多周公瑾祠。有自誇其撰聯之工者云。顧曲有閒情。不礙破曹真事業。飲醇原雅量。偏嫌生亮並英雄。余謂旣生瑜。又生亮。語出三國演義。史傳中並無其事。本傳歷敘公瑾運籌決勝。絕無與諸葛交涉一言。惟魯肅傳載肅迎劉備於當陽。勸備與權並力。備甚歡悅。時諸葛亮與備相隨。肅謂亮曰。我子瑜友也。卽共定交。數語而已。大抵瑜亮之評。前明卽有之。故王漁洋古詩選凡例。及尤西堂滄浪亭詩序。皆襲用之。且如落鳳坡。亦出演義。而廣輿志誤收之。漁洋遂有落鳳坡弔龐士元詩矣。何況餘子。若桃符綴語中所載一聯云。大帝君臣同骨肉。小喬夫婿是英雄。十四字。卻落落大方。

蜀中姜伯約祠。有聯云。九伐竟無成。心師武侯。能繼祁山六出志。三分不可恃。計誅鄧艾。已復陰平一敗仇。

廣東省城龍王廟。有福文襄郡王聯云。田鼓祝桑麻。丹荔黃蕉隆胙蠶。雲旗迴島嶼。珠宮貝闕奠靈長。可

謂工麗。阮芸臺先生聯云：神德庇三農，統天田以乾象，恩膏流百粵，興雲雨於雩壇，則純用經語。陳義自高，近盧敏肅公坤亦有聯云：嘉樹慶知時，仰神贊天功，靈嘯元氣大田歌，旣渥看澤周南海，福庇東瀛。潮州雙忠祠祀張許二公，聯云：國士無雙，雙國士，忠臣不二，二忠臣，本色語，顛撲不破。張南山云：粵東文謝二公祠中亦懸此聯。

廣西伏波廟最多，皆祀馬文淵。或云：路博德亦爲伏波將軍，其有功於嶺外，更在馬文淵之前。然粵民意中，皆有馬無路。張南山詩云：伏波漢將並流傳，銅柱勳名後勝前，都尉有靈應退讓，千秋人念馬文淵。余小霞州判應松作橫州大灘伏波廟聯云：銅柱鎮鳶飛，顧盼生風，意氣真能吞浪泊，金門留馬式，男兒報國，姓名何必與雲臺，同一意也。惟費袞梁谿漫志云：後漢馬文淵，路博德，皆嘗爲伏波將軍，又皆有功於嶺南，海上有伏波祠，古今所傳，莫能定於一。東坡作碑，謂兩伏波均當廟食，政和中，因修九域圖志，以睢陽雙廟爲例，今祀兩神，蓋義理當於人心，雖是時正諱東坡議論，而亦不能廢也。又劉克莊詩云：緬懷兩伏波，往事可追紀，銅柱戍浪泊，樓船下湟水，時異非一朝，地去亦萬里，山頭博德廟，今爲文淵矣。按以路馬當並祀，自是專指嶺南攷之史，路博德由桂陽下湟水，是今湖廣入廣東道，固未嘗至廣西，且博德下南越於嶺外各郡，僅招集而已，而馬文淵所過嶺西，輒爲郡縣治城郭，穿渠灌漑，以利其民，條奏越律與漢律駁者十餘事，與越人申明舊制以約束之，自後略越奉行馬將軍故事，是其澤之被於嶺西獨深，嶺

西之專祀固宜。非可與嶺南一例論也。

楊紫卿明經季鸞。薄游粵西。有柳侯廟楹帖云。才與福難兼。賈傳以來。文字潮儋同萬里。地因人始重。河東而外。江山永柳各千秋。詞意超脫。相傳柳侯廟有舊聯云。雙柏仰清標。長憶養人如樹。一池尋故蹟。同欣鑿井得泉。蓋廟即在羅池上。又舊有雙柏。今存其一云。

柳州劉司戶祠聯云。古猶登第厚顏。安知今之必異。烏尙銜枝封隴。可以人而不如。相傳司戶以勤民野死。有烏銜枝。蟻負土。頃刻而成墳。下聯卽其事也。

潮州韓文公祠聯云。天意起斯文。不是一封書。安得先生到此。人心歸正道。只須八个月。至今百世師之。緊切潮州。移易他處。昌黎祠不得。

無錫惠山之麓。有尤文簡公表祠。其旁爲錫麓書堂。秦小峴侍郎刻公手札。陷石祠壁。顧晴沙光旭題聯云。依然錫麓書堂。南渡文章。上跨蕭楊范陸。允矣龜山道脈。東林絃誦。同源濂洛關閩。

胡文昭公瓊祠。有孫文靖爾準題聯云。文宣聿啓文昭。木鐸千秋。教著江河日月。有虞肇開。有宋雲仍萬禩。道垂禮樂詩書。邵文莊公寶祠。有秦小峴題聯云。疏許立身。一飯心常懸北闕。功存講學。半弓地已闢東林。

無錫有四中丞祠。始爲周文襄公忱專祠。後乃增入海忠介公瑞。爲周海二公祠。繼又移周公孔教祠於

此康熙末年。並祀湯文正公斌。稱四中丞。鄒曉屏炳泰題聯云。德澤沛三吳。百利俱興。萬姓謳歌如昨。勛名崇兩代。四賢濟美。千秋俎豆常新。

無錫李忠定公綱。祠卽公少時讀書處也。費文恪公淳題聯云。望重三朝持亮節。書成十事秉丹心。又有李曜聯云。文克經邦。武克定亂。勳名過開元宰相。忠以輔主。哲以保身。理學推大宋名儒。又有顧端文公靈成祠。顧晴芬侍郎舉題聯云。立朝與天子宰相爭是非。悉宗社遠謀。國本重計。居恒共師弟朋友相講習。惟至善性體。小心工夫。

顧洞陽可久祠。顧晴沙題聯云。教成於家。渡三國六朝。光昭世德。慎追乎遠。本一門雙義。佑啓後人。又梁山舟學士同書題聯云。事君以道。無憚殺身。昔人稱錫谷四諫之冠。常官而行。不求利己。後世高碧山十老之風。

謝默卿元淮。令無錫時。修南門外水仙王廟。並題聯云。牧民資保障。自公至始築城垣。捍患禦災。當首數蓉湖名宦。守土展明禋。況我來忝同籍里。報功崇德。祇心儀榜社先賢。又一聯云。遺愛成神。比諸南國甘棠。蘋藻潔蠲民罔替。降康祈福。薦以西湖秋菊。梓桑恭敬我尤宜。按水仙王姓王。名其勤。號少月。松滋人。前明進士嘉靖間。令無錫。倭患方亟。而縣城久未建。自公至。首倡議建之。工甫竣。而倭大至。民賴以全。又丈量通境。以定田賦。邑民樂業。以至於今。蓋錫山第一名宦也。默卿亦松滋人。後二百年。繼公宰是邑。故

言之親切如此。

無錫惠山有鄒忠公浩祠。公弟澗始遷居無錫也。湯文正公題聯云：六經萬戶千門，只慎獨兩言。上接泗濱，下肩伊洛。三疏九年再竄，痛引裾一決。曉行嶺海，夜渡瀟湘。

楊州梅花嶺下史忠正公可法祠。蔣心餘太史士銓聯云：讀生前浩氣之歌，廢書而歎。結再世孤忠之局，過墓興哀。又墓柱聯云：心痛鼎湖龍一寸江山，雙血淚魂歸華表鶴。二分明月萬梅花，又不知姓名一聯云：殉社稷，只江北孤城剩水殘山，尙留得風中勁草，葬衣冠有淮南坯土，冰心鐵骨，好伴取嶺上梅花。謝蘊山啓昆知揚州時修葺史閣部祠墓畢，夢閣部來見，因問爲公修葺祠墓，公知之否。曰：知之。此守土者之責也。然要非俗吏所能爲。問己官位，曰：不患無位，患所以立。問將來有子否。曰：與其有子而名滅，如無子而名存。因問公祠中少一聯，應作何語。曰：一代興亡關氣數，千秋廟貌傍江山。謝爲書丹勒石，今存祠內。

明季南都破時，江陰閻典史孤城死守月餘，始殉難。我朝賜諡立祠堂，中有聯云：七十日帶髮効忠，表太祖十六朝人物，三千人同心赴義。存大明一百里江山，相傳臨難時所自題也。

西湖岳墳前有鐵鑄秦檜夫婦及万俟卨張俊四像，鑄姓名於胸次，跪於門外。有松江徐氏女題楹柱云：青山有幸埋忠骨，白鐵無辜鑄佞臣。聞丹陽陳少陽墓亦鑄鐵人肖汪伯彥黃潛善嘉靖間南安鄭普過

之題楹柱云。丹陛披肝。千古綱常可託。荒庭屈膝。兩人富貴何爲。二像應筆而仆。然則愧恥之心。汪黃猶未泯矣。

彭文勤公聯云。舊事總驚心。階前檜賊。感時應潸淚。廟側花神。是題西湖之岳廟。吳雲樵侍郎芳培聯云。千秋冤獄莫須有。百戰忠魂歸去來。是題湯陰之岳廟。對語各切其地。不可移易。

西湖葛嶺下有洪忠宣公皓祠。錢塘縣志載忠宣於建炎初使金。不屈。歷十五年。始放歸。賜宅西湖葛嶺。後人因就地建祠。我朝雍正九年。李敏達衛重修。並書一聯云。身竄冷山。萬死竟回蘇武節。魂依葛嶺。千秋長傍鄂王墳。亦自確切。

杭州城隍廟在鳳凰山上。地勢高敞。西湖卽在眼底。徐文長撰楹聯云。八百里湖山。知是何年圖畫。十萬家烟火。盡歸此處樓臺。或云紹興府城種山蓬萊閣。亦有此聯。

温州府城外濱江。江中有小島。卽謝康樂詩之孤嶼也。嶼中有江心寺。風景極似金山。朱滄湄文翰聯云。長與流芳一片當年乾淨土。宛然浮玉千秋此處妙高臺。寺相傳宋恭帝曾駐蹕於此。旁爲文信國公祠。有聯云。孤嶼有隣。喜得卓公稱後死。嚴陵在望。直呼臬父哭先生。緣祠左卽卓忠毅公敬祠也。又有一長聯云。久要不忘平生之言。古誼若龜鑑。忠肝苦鐵石。敢問何爲浩然之氣。鎮地爲河嶽。麗天爲日星。蓋信國公大魁日出。王伯厚之門。古誼二句。卽其卷中批語也。不獨忠肝鐵石。信國能踐斯言。而伯厚之具眼。

知人亦若龜鑑矣。又卓忠毅公祠聯云。祠接謝亭。亦有文章驚海甸。忠符信國。並懸肝膽照江心。茶餘客話。載王文成公題於忠肅祠一聯云。赤手挽銀河。公自大名垂宇宙。青山埋白骨。我來何處弔英賢。書法遒勁。杭人傳爲文成少時真筆。西湖志又載楊鶴于一聯云。千古痛錢塘。並楚國孤臣。白馬江邊。怒捲千堆雪浪。兩朝冤少保。同岳家父子。夕陽亭裏。心傷兩地風波。語皆悲壯。近彭文勤公亦題一聯云。賴社稷之靈。國有君矣。竭股肱之力。死以繼之。則史評也。

山右河津縣。薛文清公瑄祠。有一聯云。開絕學於胡叔心。陳公甫王陽明之前。享祀方堪從廟廡。集大成於西河氏太史公文。中子之後。誕靈應不愧河津。黃星齋宅中。爲余所述如此。吳門有許將軍遠祠堂中一聯云。待張巡若同胞。先死後死。與常山平原。義分一席。恨李翰不作傳。大書特書。賴紫陽涑水。筆補千秋。

余在吳中。修滄浪亭。郡人士復於亭右建五百名賢祠。以五百名賢像。刻石嵌諸壁。始自周季札。及言子。逮我朝名宦鄉賢。凡五百餘人。春秋致祭。亦一時盛事也。余曾爲之記。陶雲汀撫部爲之聯云。非關貌取前人。有德有言。千載風徽追石室。但覺神傳阿堵。亦模亦範。四時俎豆式金闈。又郡中後學裔孫合題一聯云。百代集冠裳。爍古炳今。總不外綱常名教。三吳崇俎豆。維風勵俗。豈徒在科第文章。則孫子和茂才義鈞撰句也。

蘇州虎邱。新修白公祠。卽顧伊人塔影園舊址也。賀耦庚方伯長齡聯云。唐代論詩人。李杜以還。惟有幾篇新樂府。蘇州懷刺史。湖山之曲。尙留三畝舊祠堂。

蘇州郡學之旁。有名宦專祠四所。祠各有像。歲久傾陔剝蝕。余下車。卽屬長洲令王槐午。錫蒲重修。工竣。槐午索余各紀以聯。韋公祠云。唐史傳偏遺。合循史儒林。讀書不礙。中年晚。蘇州官似謚。本清才名德。臥理能教末俗移。白公祠云。諷諭豈無因。樂府正聲熟。人口行藏何足辨。名山大業定生前。有疑行藏句太空者。余曰。誰辨心與跡。非行亦非藏。卽用香山詩意。但非注脚不明耳。況公鍾祠云。姓字播絃歌。韋白以來成別調。功名起刀筆。蕭曹自古是奇才。陳公鵬年祠云。洛蜀任分門。惟楚有才。增賦肯憑官似虎。河淮方奪路。如鶴乃勇。拯民忍使國無鳩。

宋漫堂題范文正公祠聯云。兵甲富於胸中。一代功名高宋室。憂樂關乎天下。千秋俎豆重蘇臺。

露筋祠中聯扁林立。就余所見者。以陳曼生郡丞鴻壽所集。江淮君子水。山木女郎祠。十字爲工。黎湛溪河帥。亦欲集成一聯。舉王漁洋門外野風開白蓮之句。屬余覓對。余以楊升菴庭前夜雨弄孤篠句奉應。河帥首肯。謂意境相稱。時代亦不相懸也。然土句是露筋祠本事。楊句實未能恰配。故亦未懸掛。無錫金匱。合建貞節祠。林少穆撫部則徐題聯云。盛典繼毗陵。表千秋潛德幽光。長使冰心昭燁管。新祠崇惠麓。聚兩邑貞姬淑媛。羣欽風節樹香蘇。



古無出痘之說。史傳備載人體貌。獨無言面麻者。自唐會昌中。泉州陳黯十三歲。自詠痘花詩云。玳瑁應難比。斑犀定不加。天嫌未端正。滿面與裝花。詩載文苑英華。此痘事之始見於書者。今則爲寰區通病矣。有作痘神廟聯云。到此日方辨妍媸。更向鴻蒙開面目。過這關纔算兒女。還從祖父種根苗。亦未經人道語也。今人家稱出痘爲出寶。又爲天花。故吳信辰痘神廟聯云。寶痘勻圓。喜个个金丹換骨。天花消散。願家家玉樹成林。

吾鄉汀建山村中。每數里。必有關廟。廟多塑像。竊必有周將軍立像。卽世稱周倉者。亦間有周將軍專祠。輒著靈異。而廟中聯語。皆鄙誕不經。緣其事僅見演義。正史中並無其名。考魏書魯肅傳。載肅往益陽。與關相拒。肅邀關相見。各駐兵馬百步上。但諸將軍單力俱會。俗傳關帝單刀赴會。自緣此語而訛耳。肅因責數關曰。國家區區。本以土地借卿家者。卿家兵敗遠來。無以爲資。故也。爲已得益州。旣無奉還之意。但求三郡。又不從命。語未究竟。坐有一人曰。夫土地者。惟德所在耳。何常之有。肅厲聲呵之。辭色甚切。關操刀起曰。此自國家事。是人何知。目使之去。按是人姓名不傳。演義似卽據此。敷衍爲周倉事。然紀文達師筆記中。稱元魯貞作漢壽亭侯碑。已有乘赤兔兮從周倉語。則其來亦已久矣。比至桂林。偶與余小霞談及。小霞述其權蒞浦令時。於城外周廟題一聯云。當蜀吳魏之交。擾攘一時能擇主。附劉關張而後。偏裨千古竟傳名。誠雅製也。

江右管未亭學宣守常德。其鄉人爲鐵柱宮即許真君廟。求楹帖。管書云。君身自是有仙骨。我猶未免爲鄉人。吳舫翁雲。亦有句云。微斯人。吳其爲沼。賴此老海不揚波。

閩浙分疆處。爲楓嶺。景最幽峻。嶺巔祀五顯神。極著顯應。俗皆呼爲五顯嶺。李笠翁云。盤折嵯峨。甲於諸嶺。由麓徂巔。愈轉愈勝。廟中神鬼。諸像畢備。觀者生恐怖心。故余爲之聯云。遠看疑畫。近看似詩。及至身到其間。又覺詩畫都無著手處。善者敬神。惡者畏鬼。究竟皆非異物。須知神鬼出在自心頭。

乾隆十九年。周文恭公煌奉命冊封琉球。使舟至姑米洋。遇颶風。觸礁。柁折。時旣昏黑。兼大雷雨。帆葉廚棚。吹落殆盡。倏見海面一燈浮來。衆悉呼曰。天后遣救至矣。須臾舟定。同舟二百餘人。舉慶更生。舟進姑米洋。謁廟行香。公獻願大能成四字扁。並撰聯云。神爲德其盛乎。呼吸回天登彼岸。臣何力之有也。忠誠若水證平生。

張南山題天后宮聯云。大海茫茫。到無岸無邊。觀於天。天高在上。颶風發發。正可危可懼。俟我后。后來其蘇。

張南山寄錄城隍廟一聯云。百行孝爲先。論心不論事。論事貧家無孝子。萬惡淫爲首。論事不論心。論心終古少完人。曲體人情。不失與人爲善之意。又呂仙祠一聯云。修到神仙。看三醉飛來。也要幾杯綠酒。託生人世。算百般好處。都成一枕黃粱。則曠達語也。

吳信辰工爲楹聯。楊蓉裳芳爍。爲選刻松厓對聯一編。不乏清詞麗句。所稍欠者超脫耳。今錄其佳者。如題佛寺門云。禪門無住始爲禪。但十方國土莊嚴。何處非祇園精舍。度世有緣皆可度。果一念人心迴向。此間卽慧海慈航。又佛堂云。西方貝葉演真經。總不出戒定慧三條法律。南海蓮花生妙相。也只消聞思修一味圓通。又題西巖寺云。色相出真空。眼界光明。震旦雲霞圍舍利。聲聞歸妙有。耳根清淨。乾陀鐘鼓應迦陵。又題千手佛殿云。一心念佛佛如來。鶴唳猿啼。都演出三生妙諦。千手示人人不悟。龜毛兔角。直指開四大疑團。又題佛堂云。佛言三藐三菩提。禮此莊嚴。卽可承三生度脫。人貴一噴一醒豁。除他罣礙。何難證一味圓通。又題鍾離祖師殿云。一朝棄甲成仙。不用偏裨傳兩晉。萬劫銜杯樂聖。聊將散漢著三唐。又題財神廟云。蘊玉藏珠。善賈固皆蒙樂利。心耕筆織。寒儒亦可薦馨香。又題臨洮常山大王廟云。龍神義膽大於身。陷陣推鋒。在昔號常山虎將。忠魂符厥號。興雲降雨。至今冠洮水龍神。又題織神廟云。改革衣卉服之觀。人間溫暖。極錯采鏤金之妙。天下文明。

或傳揚州華陀廟楹聯云。元龍幣聘以來。澤被廣陵。到此日青囊未燼。孟德頭顱安在。烟消漳水。讓先生碧血常新。

# 楹聯叢話

## 卷五

### 廨宇

內閣漢票籤處有舊聯云。天下文章莫大處。龍門聲價最高時。爲諸城劉文正公所書。道光二年燬於火。後陳荔峰閣學嵩慶重書。懸於圓明園直廬。

翰林院署有聯云。儀鳳祥麟游集盛。金書玉字職司勤。爲何義門學士所書。

禮部儀制司堂聯云。在官言官議事以制。隆禮由禮慎乃攸司。集經語頗渾成。然微嫌議事與慎乃作對。虛實字尙不甚勻稱也。

程春廬同文在兵部職方司最久。公正爲同署所推。有聯云。有備師干。駕馭當資軍紀肅。不苛公過。權衡常惜將才難。可以知其風旨矣。

兵部漢本房事繁而職要。與他部本房迥殊。凌虛臺銓聯云。爲機務總其成。按日具題。子細上塵乙覽。與戎曹分厥任。經年繕寫。辛勤下協寅恭。又兵部署中關帝廟聯云。九伐威名襄夏政。千秋正統凜春王。上

句移他處不得。下句以春王對夏政，亦巧而新。

藤陰雜記云：彰儀門外普濟堂，順天府設以養孤獨者。今餞行者於此茶話，堂聯爲姚端恪公文然題云：但覺眼前生意滿，須知世上苦人多。

奉天爲陪都重地，並設五部，特缺天官耳。戶部大堂聯云：典領三司會合東都儲國用，勤修六府循行南畝贍民生。兵部聯云：帝語如聞，惕厲官常臨北極；天威可畏，嚴明軍政肅中樞。刑部聯云：體欽恤以明刑，秋肅春溫惟國法；秉端平而弼教，青天白日見民心。

奉天府丞一職，實兼提督學政，故歷任悉係儒臣。吾閩陳德泉先生治滋，任此最久。題大堂聯云：地重邠岐，禮樂務還醇厚；學宗鄒魯，文章須探本原。李滄雲藥聯云：化衍西岐，佐治仰參儒雅；風清東海，掄才蔚起人文。余叔太常公諱上國，聯云：勉力爲之，正人心厚風俗；實惟根本，文治彰矣。拔真才，加訓迪，勿懈功夫。蓋囊括歷次奏摺中硃批天語，以爲敬謹服膺也。

彭寶臣浚，視奉天學最有名，其去也，滿漢士紳撰聯送之云：名魁天下，化振陪都；本壽考作人，真教玉樹琪花；陸離珊瑚網，兩度來遊，一塵不染，藉文章造福，佇看蘭芽桂蕊，次第瑤階。

奉天城中有瀋陽書院，蔣丹林祥輝聯云：地近聖居，洙泗宮牆瞻數仞；基開王迹，鎬豐鐘鼓振千年。

涿州距京師百里，凡由燕薊南行者，由此分東西兩路，城樓有聯云：日邊衝要無雙地，天下繁難第一州。

曲阜衍聖公府大門聯云。與國咸休。安富尊榮。公府第。偕天不老。文章禮樂聖人家。此前明李文正公東陽所題也。近有成哲親王贈聯云。爵列三公。榮衰黻身。通六藝。紹箕裘。畢秋帆尙書沅贈聯云。恩紀金魚。永鎮東山。檠戟祥徵。玉燕常綿。北海簪纓。又承恩公恭大宗伯恭阿拉贈衍聖公聯云。守道不移。金鼎重居。身常抱玉壺。清聞是謝薌泉侍御。振定所擬。又劉雲房師視學山左時題聯云。到此都稱香案吏。及時多種杏壇花。

紀文達師筆記云。昔李又聃先生言有寒士下第者。焚其遺卷。訴於文昌祠。夢神語曰。爾讀書半生。尙不知窮達有命乎。嘗侍先姚安公。偶述是事。姚安公怫然曰。又聃。應舉之士。傳此語則可。汝輩手掌文衡。傳此語則不可。聚奎堂柱有熊孝感相國題聯曰。赫赫科條。神理常存。惟白簡。明明案牘。簾前何處有朱衣。汝未之見乎。

彭文勤公視學浙江。撰署聯云。天地自成文。湖山有美。國家期得士。桃李無言。蓋學署儀門外。徧植桃李。有牌樓。題曰桃李門。今門額猶存。而聯則久失之。

吾閩汀州試院後。有參天古柏。歲久通靈。歷任學使者皆致祭。紀文達師下車之始。亦循故事。瓣香甫薦。見有緋袍執笏。神隱樹表。因題一聯云。參天黛色長如此。點首朱衣或是君。

紀文達師曰。余督學福建時。署中有筆捧樓。以左右挾雙塔也。使者居下層。其上層則複壁曲折。非正午

不甚觀物。遂爲山魃所據。憶杜老山精白日藏句。悟鬼魅多避明而就晦。因盡撤牆垣。使四面明窗洞啓。三山翠靄。宛在目前。題額曰浮青閣。題聯曰。地迴不遮雙眼闊。窗虛只許萬峰窺。自是山魃遷於署東南隅之會經堂矣。

桂林陳文恭公撫湘時。有題貢院堂聯云。矮屋靜無譁。聽食葉蠶聲。敢忘當年辛苦。文星光有耀。看凌雲驥足。相期他日勳名。又有明遠樓一聯云。矩令霜嚴。看多士俯仰低回。羣鷺盡息襟期。月朗喜此邦江山人物。一覽無遺。相傳爲李笠翁所作。吾閩貢院有一聯云。場列東西。兩道文光齊射斗。簾分內外。一毫關節不通風。江南貢院聯亦同此。余監臨桂林鄉試。亦錄此聯於門屏之間。或云是黃莘田先生任所製也。京師貢院明遠樓上。有七言對聯云。夜半文光射北斗。朝來爽氣挹西山。此雅切京師。若移置他省。便不見佳。不知何人所撰。字則王覺斯所作也。

呂新吾先生坤。陳臬中州時。有城門四聯。東延和門云。青帝布陽春。鬱鬱葱葱。生氣溢沙隨之外。黃堂流德澤。融融液液。太和在梁苑之西。南文明門云。萬丈文光。北射斗牛躡。魁柄三星物采。東聯箕尾上台躔。西寶成門云。萬寶告成。合耕夫織婦。白叟黃童。年年歌大有。五徵來備。看東舍西鄰。南村北疇。處處樂同人。北鍾祥門云。洪濤來萬里恩波。遠抱崇墉浮瑞靄。元女注千年聖水。潛滋環海護生靈。見呻吟語治道門後。

衙署廳齋楹帖。有可當官箴者。如云。當官期於物有濟。凡事求其心所安。吏民莫作官長看。法律要與詩書通。汪龍莊輝祖自題云。官名父母須慈愛。家有兒孫望久長。袁簡齋自題云。獄貴得情寧結早。判防多誤每刑輕。浙江藩署聯云。權衡江海司牧名邦。時時思裕國澤民。何暇論湖光山色。黜陟幽明承宣庶績。念念存戴高履厚。更須持茹槩嘗冰。余在江蘇藩署。亦有一聯云。爽氣挹天平。國計民生如此象。雄藩稱地戶。湖光江色照余心。撫桂林時。東偏有懷清堂。爲百文敏公題扁。余配以聯云。懷哉惟清。旣到此間須刻鵠。勤將補拙。敢云餘暇可驂鸞。

名場似弈無同局。吏道如詩有別裁。亦署齋聯。卻有別致。余小霞曰。記得是無錫顧奎光句。

張南山以名進士觀政楚北。令黃梅時。作大堂楹帖云。催科不免追呼。願百姓早完國課。省事無如忍耐。勸衆人莫到公堂。仁人之言。藹如也。

聞阮芸臺先生言視學山東時。見臬署一對聯。極切而佳。句云。晏嬰齊仁人。一言而溥天下利。孔子魯司寇。無訟當爲百世師。忘却作者姓名。余陳臬時。徧覓此聯不得。蘇鼈石廷玉繼至。乃爲刊榜於二堂。並跋所聞緣起云。

成果亭成格。撫粵東。題廳事聯云。花竹一庭。是亦中人十家產。軒窗四壁。可無廣廈萬間心。阮芸臺先生。題江西藩署大門聯云。庾匡千里開生面。章貢雙流照此心。



浙江溫處道署後有且園。是前官高章之司寇。其佩所關池樹清幽。花石秀野。司寇居而樂之。因以且園自號。粵東陳觀樓先生昌齊題聯云。隨意觀風草。無心狎海鷗。亦自含毫逸然。

州縣署楹帖最多。非諛詞。卽理語。記得一聯云。四野桑麻不羨河陽花作縣。一腔冰雪偏教寒谷黍知春。語獨蘊藉。此爲頌不忘規。

常州府署中有竹樓一所。某太守題聯云。未知明年在何處。不可一日無此君。集句天成。且的是官齋中語。

成蘭生世瓊守杭州時。廳事聯云。湖山在目。玉局曾來。又七百年於茲矣。冰雪爲心。金科勿擾。斯二千石之職歟。

伊墨卿先生秉綬守惠州。倡建豐湖書院。並重修永福寺。準提閣。元妙觀。皆左近勝蹟也。宋茵灣湘紀以聯云。萬間廣廈庇來新。問秀才老屋深燈。他日幾逢賢太守。百頃平湖游者衆。看後學洙情沂思。有人重起古循州。又聯云。關心一郡衣冠。在諸公鼙鼓三年。敢言勞苦。回首十弓榛莽。見多士琴書四壁。得忘由來。自注云。此室爲書院。庀工處也。謹書其事。又永福寺聯云。往來資白業。談笑出紅塵。又準提閣聯云。文字有神揭星漢。聖賢以道證人天。又元妙觀聯云。此湖此水不深淺。放鶴招鶴成古今。又豐湖書院二門聯云。人文古鄒魯。山水小蓬瀛。又三堂聯云。從來此地比洙沂。况拓開近水天光。四面春宜風浴。自後何

人更蘇翟。只認取前峰燈火。千秋名共湖山。

伊墨卿先生在惠州。有惠政。嘗自題郡署大門云。天凜且明。尙無慙於爾室。地名循惠。用顧畏乎民岳。又題署中廳事云。合惠循爲一州。江山並美。種竹梅成三友。心跡雙清。又題永福寺云。雲鶴有奇翼。瑤草無塵根。又題陳文惠公堯佐祠云。沒世不忘真宰相。荒亭猶屬舊詩人。按宋相國陳文惠公。前守循州時。於署東建野吏亭。後人卽於亭旁立公祠。歲時祀焉。

楊硯芬希銓守惠州。集禊帖字。題永福寺云。永世有因。大悲觀自在。諸天無相。極樂仰文殊。又題元妙觀云。蘭宇旣清。竹林亦靜。諸天不老。大地長春。

惠州東坡亭。有嵇二泉承志題聯云。忠愛著朝端。卽蜚雨蠻烟。魂夢仍依北闕。文章行海外。想賦詩飲酒。勾留又在西湖。

李蘭卿都轉彥章。守思恩日。重建陽明書院。又關西邕書院。飭所屬各建勸農亭。百廢俱修。均自撰楹聯紀之。都人士集刊榕園楹帖一本。榕園者。卽都轉公餘讀書處也。今摘錄其佳者如左。講堂聯云。率土盡同文。願此邦易俗移風。欲使偏陬如上國。登堂能講學。與多士敦詩說禮。須知太守本書生。實學齋集句云。剛日讀經。柔日讀史。十年樹木。百年樹人。實用齋云。考古證今。致用要關天下事。先憂後樂。存心須在秀才時。道古軒集句云。居近識遠。處今知古。研經賞理。敷文奏懷。修志亭集句云。清坐使人

無俗氣。讀書何計策新功。山谷

藏書樓集句云。蓄得奇書且勤讀。忽逢佳士喜同游。劍南

船齋云。池

邊小屋低於艇。江上青山峭似詩。嵐漪詩屋集宋句云。能令水石常在眼。任有閑忙不負詩。玉帶橋

集詩品云。畫橋碧陰。明漪絕底。綠杉野屋。好風相從。修禊亭集宋句云。聊開禊席臨流水。又與風光作

主人。竹所集句云。別開小徑連松路。忽有朱欄出竹間。王半山詩嶼集句云。樓臺四望烟雲合。草木

一谿文字香。秦少遊明禮軒集句云。有威可畏。有儀可象。無本不立。無文不行。學文堂集劍南句云。

文能換骨餘無法。學到尋源自不疑。種桂堂云。聞木樨香。何隱乎爾。知菜根味。無求於人。惠泉義學

云。造物徧生才。直與杭人多惠比。聖功先養正。果逢山下出泉蒙。南城鐘鼓樓集宋句云。句裏江山隨

指顧。城南鐘鼓鬪清新。西邕書院正學堂云。儒館關邊城。漸戶多絃誦。士勵廉隅。快養人材爲世用。郡

齋鄰講院。喜公暇論經。夜深聞讀。不忘書味似兒時。王文成公祠云。七萬人相慶更生。計農桑教化兵

防。名世允推儒作將。十五卷共尊遺集。兼道學文章經濟。此邦尤願士希賢。紫翠樓云。頓看平地樓臺

起。忽送千峰紫翠來。豐農亭云。載酒徧催耕。願無忘兩字豐農。爲政先勞原自近。索綯仍合力。正難得

一家和氣。力田孝弟本同科。黃山谷祠云。直道莫能容。卻聽雨登樓。薄醉平生無此快。大名長不死。慕

落星結屋。論詩異代久相師。武緣縣小陸墟。新修宣讀聖諭亭云。聖訓敷言。知道在倫常。業先耕讀。民

勞思善。願人勤守隘。俗革歌墟。又馱閭等村勸農亭云。加意減租徭。十二村中爾宅爾田。保汝兒孫常

足食。赴功煩版築。三百里外。某山某水。守吾條約。卽良民。又林村勸農亭云。雍睦八家。同能服先疇。頗有鄉風。安古處。畚菑三歲。始永除後患。斷無地角累升科。賓州勸農亭云。萬二千家爲鄉。看水田再熟。洫路交流。到處爭留吾所憩。三百六旬成歲。憶春晚觀風。秋晴喜雨。連年頻與爾相親。上林縣勸農亭云。地利極膏腴。千萬山近繞澄江。今年喜雨足。田肥人和歲稔。邊情須體察。三百里親來行縣。到處得興農課士。問俗觀風。賓州新設瑯琊義學云。地稱齊魯遺風。向四覽尋源。略仿古時州有序。我勸師儒設教。視三年敬業。要求初學德之門。田州土州新設文同義學云。合十九司。猺峒人民。至今已同軌同倫。新學頓殊。魁結俗。通一萬里象胥文字。到處有佩鱗佩。邊城能識諭蒙書。杭州西湖之敷文書院。有朱竹垞先生集句聯云。入則孝。出則弟。守先王之道。以待後學。頌其詩。讀其書。友天下之士。尙論古人。

崇文書院中。新建仰山樓。胡書農學士集句聯云。閉戶自精。雲無心以出岫。登高能賦。文異水而湧泉。奉新縣馮川書院。有吳邑侯鳴鳳聯云。今科又掄元。願諸生莫作第二人想。每月來課士。卽此地可作試三場觀。按各直省解額甚寬。又豈能人人不作第二人想。此聯雖佳。出語究於理未足也。廣州城中學海堂。爲阮芸臺先生所建。以比浙中之話經精舍。先生自題一聯云。公羊傳經。司馬記史。白虎德論。雕龍文心。鄧嶰筠督部廷楨集釋山碑字一聯云。釋史誦經。思在古昔。登高望遠。顯於今時。白小

山學使銜聯云。智水仁山。在此堂宇。經神學海。發爲文章。又成果亭撫部聯云。學貫九流。匯此地人文。法海。秀開百粵。看羣賢事業名山。聞亦白所製也。

廣東省城粵秀書院。亦人文萃集之區。道光年間。有盧生同伯。桂生文耀。同肄業其中。陳厚甫山長鍾麟。最器重之。爲集句一聯曰。盧橘夏熟。桂樹冬榮。可謂天然湊泊。未幾二生並捷南宮矣。

雲南府之五華書院。有尹楚珍先生壯圖聯云。魚躍鳶飛。活潑潑地。日華雲爛。糾縵縵天。

吾閩福州府之鰲峰書院。有林青圃先生枝春聯云。坐里門內夕而朝。教不忘就爾事。習君子言尊以徧。學莫便近其人。近年吳荷屋方伯榮光。新建鳳池書院聯云。皇國需才。看鳳翥鸞翔。天下士各憑造就。仙瀛有路。佇風騫浪吸。眼中人休便徘徊。又孫平叔宮保聯云。池浴文禽。從羅含夢裏飛來。覽德苑林翔吉羽。岡鳴鸞鳳。向劉勰筆端拈出。遷喬阿閣聽和聲。

廣東雷瓊道。駐札瓊山縣。其大堂楹聯。暗藏瓊州全府州縣名色。組織頗自然。句云。定安全之策。坐鎮瓊山。開樂會以會同官。統府州縣羣僚。獨臨高位。澄邁往之懷。清揚陵水。佐文昌而昌化。理合萬儋崖諸邑。共感恩波。蓋瓊州凡領十三屬。爲瓊山澄邁定安文昌儋州昌化會同樂會臨高萬州陵水崖州感恩也。李蘭卿率所屬十二司。同建陽明書院。自兼掌教。分十齋二十六軒。而皆統於實學實用二齋。葉筠潭紹本題聯云。心學揭良知。憶當年息馬投戈。頓化遐陬成頽壁。教思追大雅。欣此日橫經鼓篋。共歌樂職。

布中和。又別建西邕書院。以課合郡童生。筠潭題聯云。賀水游遺封。八千里遠隸邊庭。文軫至今通桂管。台山留講席。二百年久陶元化。禮堂終古衍薪傳。

有題宗祠楹聯云。小宗人僅千家。念析支分族。仍共本源。害勿交讓。利勿交征。仁義而已矣。孝弟而已矣。大祭歲惟一舉。極展誠抒敬。不過信宿。孚可用禴。享可用盥。玉帛云乎哉。鐘鼓云乎哉。情文兼到。頗能動人。

江右安福李氏祖祠。舊傳木刻楹帖對語云。經傳道德五千言。出語久佚。莫能復屬。吳舫翁偶過其地。李氏乞撰出語。舫翁卽於馬上答云。臚唱兒孫三百輩。蓋唐時曾放宗人榜三百人也。

余小霞以詩人沈滯粵西末僚。亦工作聯語。近年桂林府重修廨署。與靜山太守興仁。將中外楹聯。全行更換。粲然一新。多出小霞之手。如頭門云。桂管古稱雄。聲教由來先列郡。文衣今向化。撫綏何以控諸蠻。儀門云。此是公門。裹足莫干三尺法。我無私謁。盟心祇凜一條冰。大堂云。領郡愧難勝。願閭閻俗變。飲羊人除害馬。同舟須共濟。與僚采政期馴雉。節勵懸魚。廳事云。昔有龔黃。千古名傳循吏去。賢如顏范。一麾我步後塵來。得月樓云。簿領有餘閒。退食聊爲容膝地。簪纓多俊侶。清談俱是素心人。

余小霞任三防主簿時。自製署聯云。與百姓有緣。纔來此地。期寸心無愧。不鄙斯民。嘗再任大灘司巡檢。題堂楹云。八載重來。民情愛我如當日。一枝仍借。山色迎人似舊時。又嘗撰桂林陳文恭公祠堂聯云。節

制鄉邦。桑梓至今稱百姓。贊襄綸閣。簪纓繼起有三元。蓋公以粵西人。總制兩粵。又其元孫蓮史方伯。繼昌登嘉慶庚辰科三元。皆曠世榮遇也。

毗陵周伯恬儀偉。先世豐於財。闢盟鷗館。結客極盛。家落旋售去。龔定菴羣祚來游。留一聯云。別館署盟鷗。列兩行玉佩珠簾。幻出空中樓閣。新巢容社燕。約幾箇晨星舊雨。來尋夢裏家山。

京師福州會館之燕譽堂。有舊聯云。萬里海天。臣子一堂。桑梓弟兄。是前明福清葉文忠公所撰。余於嘉慶丙子。與同郡諸君子。又創構福州新館。在虎坊橋之東。規制愈寬。人文愈盛。同郡諸君子。合撰楹帖。益蔚爲巨觀。今錄其佳者如左云。海嶠星從天上聚。長安春占日南多。又云。浴海烟開鰲背月。看花人步鳳城霞。又云。鳳窟麟洲通御氣。黃蕉丹荔憶鄉風。又云。冠蓋仍循鄉飲序。笙歌先醉社公觴。又云。室因新拓來今雨。人比分躔聚德星。又云。朱櫻紅杏開新宴。丹荔黃橙話故鄉。又云。三山佳氣瞻鰲背。九陌香塵駐馬蹄。又云。看花卻趁春三月。視草同依尺五天。又云。家園魚筍評鄉味。人海鶯花洽古春。又云。珂里雲開三島麗。金壺花發九衢春。又云。竹箭聲華當代選。梅花消息故人來。又云。佳日春秋來鶴蓋。深宵吟誦似鰲峯。又集句云。同人於門。羣賢畢至。適子之館。吉事有祥。

福州會館。每歲元宵。烟火之盛。甲於宣南。蓋自國初以來。相承不斷。其事最著。爲他郡所無。西城官民士女來觀者。喧闐街巷。直徹夜分。本館人則飲燕盡歡。都忘其爲他鄉異客矣。所製燈聯。合前後衆手爲之。

皆流麗可喜。傳誦於時。今亦錄其佳者。如云。撒荔須分海東樹。看花都向日南坊。又云。百五春歸三五月。九重天散萬重花。又云。玉京風月原無價。銀闕樓臺共此春。又云。寶燭看龍銜。萬戶笙歌無禁夜。香塵隨馬度。九衢煙月太平人。又云。列樹燦銀花。璧月珠星。迸作九天麗藻。首時調玉燭。南油西漆。蔚成五夜祥雲。又云。社火憶鄉風。海駕驚山。萬盞燈毬。爭買夜粉團。仍密讎。風和鶴餞。三更春箭正傳觴。又云。此地笙歌。恰當章曲城南。去天尺五。吾儕觴詠。獨是越王臺畔。明月三分。又云。碧海無波。總買來簫鼓千場。魚龍百戲。金臺不夜。看裝出琉璃世界。錦繡天街。

京師吳江會館。陸朗夫燿所建。題聯云。來看上苑鶯花。今日幸同良會。記省松陵文獻。他年得似何人。京中鄉祠。以浙紹爲最著。祠中聯云。鑑湖八百里。望氣遙來。書入帝城雲物。君子六千人。聞風興起。曷成王國賢材。又戲臺一聯云。地當章杜城南。鼓吹休明。共效謳歌來日下。人在榜榆社裏。風流裙屐。恍攜絲竹到山陰。

揚州郡署戲臺聯云。數點梅花橫玉笛。二分明月落金樽。是王夢樓太守文治所題。廣東武林會館。在歸德門外晏公街。杭人之商賈於粵者。恆集其中。有戲臺對聯云。一闋荔支香。聽玉笛吹來。徧傳南海。雙聲楊柳曲。問金尊把處。憶否西湖。

安徽育嬰堂落成。陶雲汀宮保題聯云。父兮生。母兮鞠。俾無父母有父母。此謂民父母。子言似。孫言續。視



猶子孫卽子孫。以保我子孫。

湖北漢口有長沙會館。陶雲汀宮保題聯云。隔秋水一湖耳。看岸花送客。牆燕留人。此境原非異土。共明月千里兮。記夜醉長沙。曉浮湘水。相逢好話家山。

歙縣會館有鮑覺生侍郎題聯云。清樽夜話黃山樹。彩筆朝題紫陌花。又有一聯云。九萬程中。三千道上。藉此館粲場苗。用萃東南之美。卅六峰下。廿四溪邊。移來綬花帶草。咸依日月之光。忘却何人所題。

# 楹聯叢話

## 卷六

### 勝蹟上

泰山理大物博。秀甲寰區。惜山中楹聯殊少。佳構最著者。岱廟中帝出乎震。人生於寅八字。對仗天然。足以俯視一切。然是廟聯。非爲全山寫照也。惟半山壺天閣。有廷曙墀郡守鑿一聯云。登此山一半。已是壺天。造絕頂千重。尙多福地。又雨花道院中。不知何名一聯云。雨不崇朝徧天下。花隨流水到人間。尙非俗筆。

余由東臬。擢藩吳中。途出泰安。楊蓉峰太守惠元。延余宿岱廟中。是夜廟中月色如畫。而絕頂白雲滂起。上下竟不相蒙。僉謂三日內必有霖雨。適廟僧索書楹聯。因爲撰句云。擎月居然凌上界。攢雲便要灑齊州。

嵩山爲中嶽。齊北瀛鯤。爲河南知府時。嘗招余往游。未果。後二十年過洛陽。去山不過兩日程。亦心嚮往而弗能至也。憶吳巢松侍講慈鶴。爲余談二室之勝。並爲述所撰聯云。近四旁惟中央。統泰華恆衡。四塞

關河拱神嶽。歷九朝爲都會。包伊洛瀟澗。三臺風雨作高山。

恆山各寺觀中扁額極多。其以四大字磨厓者亦復不少。而有楹聯者不過三四處。殊未見佳。惟南關北嶽行宮一聯云。峻嶽鎮幽燕。近翠黃圖。風雨永昭和會。靈山鍾畢昴。遙連紫塞。陰陽迭起貞元。氣象尙能相稱。

華山雄奇。甲於四嶽。余曾過玉泉院。聞山僧述嚴道甫侍讀長明有一聯云。三峰三霄通。寶掌千秋留。薛迹一嶽一石作。金天萬里蠹蓮花。

華嶽廟在華山之麓。壯麗與岱廟同。余由秦入隴。往返信宿皆在其中。庭中古樹極多。或爲商周。或爲秦漢。皆懸牌爲標識。碑刻林立。則多是宋以後物。絕無唐以前者。殊不可解。盧厚山宮保所重摹延熹碑。刻工早竣。尙橫臥地中。爲之嘆息者久之。廟僧索留楹聯。因漫書付之云。鴛瓦貼雲霄。俯挹明星兼玉女。虎賁臥庭廡。猶強周柏與秦松。廟僧未喻其意。亦不知其懸挂與否耳。

衡山遠在南服。讀衡嶽志一冊。亦絕少佳聯。錄其詞旨莊雅。足與靈山相稱者云。居艮位而踐離躔。溥雷池風穴之功。柱鎮天南。斗橫地北。列三公而配四嶽。標月館露臺之勝。帆隨湘轉。鴈到峰回。又一聯云。望望七十二峰。工部游時。詩聖有誰能繼響。遙遙一千餘載。文公去後。嶽雲從此不輕開。亦未詳何人所撰也。

京師陶然亭。康熙年間。水部郎江藻所建。取白香山詩一醉一陶然之語爲額。百餘年來。遂爲城南觴詠之地。戴蕨塘。藤陰雜記中。載沈東田方伯游陶然亭。以楹帖。慧眼光中。開半畝紅蓮碧沼。烟花象外。坐一堂。白月清風。爲韻成詩。書壁間。余尋之。不得其處。而聯語實未佳。惟有舊聯云。窗前綠樹分禪榻。城外青山到酒杯。亦是常語。竊謂曹慕堂宗丞學閔。穿荻小車。疑泛艇。出林高閣。當登山。二句膾炙人口。便可移作楹聯矣。

京師藤花最著名者。莫如海波寺街之古藤書屋。以朱竹垞舊居而重。其最古而大者。則萬善給孤寺東之呂家藤花。有元大德四年刻字。商寶意詩。所謂萬善寺。芻呂氏宅。滿架古藤翠如織。鐵幹誰鑿大德年。模糊辨是元朝植。是也。倪給諫國璉聯云。一庭芳草圍新綠。十畝藤花落古香。今宅屢易主。而藤尙無恙。庭中菊花亦盛。楊少白庚聯云。萬菊充庭秋富貴。雙藤蔓地古煙霞。

藤陰雜記云。座師王文莊公。初寓韓家潭。七月二十五日生辰。每於中秋前後張樂。次第宴乙丑同年。及門生。其戲臺對聯。最爲精切。憶己丑歲則云。十七夕彩滿蟾宮。廣隔夜霓裳舊曲。廿五載班聯鷓序。萃當年蓉鏡羣仙。庚寅歲則云。壽宇覃禧。借綠山鶴舞餘籌。更譜瑤笙。諧鳳吹。晚香勵節。集蓬島鷓班舊侶。重翻霓羽。侑鸞觴。

又云。吳文簡公囊舊宅。賜額蘭藻尙存。沈東田方伯。及祝葭堂。曹劍亭。俱會居此。相傳爲吳梅村祭酒故

宅。湯西厓少宰亦寓焉。前後皆名流也。有舊聯云。秀人錯比揚雄宅。異代應教庾信居。

孫公園後相傳爲孫退谷別業。吳白華司空官翰林時曾賃住。公讌座師王文莊公戲臺聯云。地近春明憶當年甥館清娛。幾聽後堂絲竹。序先秋禊。幸此日師門暇豫。共陪高閣簾帷。蓋宅爲茶陵彭大司馬。維新舊第。公乙丑及第後於此贅姻。宅後別一第。有林木亭榭。沈雲椒侍郎寓焉。有蘭韻堂聯云。匝地清陰三伏候。參天老樹百年餘。

孫公園前有梁家園。康熙間孫退谷龔芝麓皆讌集其中。當時引涼水河入園中。亭臺花木一時稱盛。今則殊無可觀。李雨村調元寓焉。嘗築看雲樓。聯云。檻外遠山排闥繞。樓前積水當湖看。

趙甌北簷曝雜記云。金鼈玉螭橋新修成。橋柱須鐫聯句。金在樞直擬句云。玉宇瓊樓天尺五。方壺員嶠水中央。自以爲寫此處。光景甚切合。汪文端公爲改尺五作上下二字。乃益覺生動也。

通州河樓正俯運渠。景極雄曠。程玉樵廉訪總潤聯云。高處不勝寒。滌沙烏風帆。七十二沽丁字水。夕陽無限好。對燕雲薊樹。百千萬疊米家山。

正定府龍興寺中有準提菴。梁蕉林清標題聯云。月上鬪圓光。示教禪心兼法味。風吹清梵樂。歸誠景福應真言。又題東院聯云。爲定慧。爲聲聞。布金地於祇園。六通朗徹。或淨名。或緣覺。轉法輪於鹿苑。五蘊圓明。又李致齋基和題雨花堂聯云。雲籠夜月原無礙。鳥宿秋林亦放參。

阮芸臺先生題杭州府貢院一聯云。下筆千言。正桂子香時。槐花黃後。出門一笑。看西湖月滿。東浙潮來。爲時傳誦。又衡州府石鼓書院中有淨綠閣。閣中有韓文公綠淨不可唾一詩。爲張南軒先生所書。阮先生製聯云。此真淨綠唾不可。我實薄才歌奈何。

西湖飛來峰。相傳晉咸和元年。西天僧慧理登山。嘆曰。此是中天竺靈鷲之小峰。不知何年飛來。因以爲名。又不知何時。於峰洞中多鑄佛像。以鎮慮。復飛去。則更荒唐。峰下卽冷泉亭。亭扁舊傳爲董香光所題。據西湖游覽志。冷泉二字。爲白樂天書。蘇子瞻續書。亭字今皆不可考矣。惟董香光聯云。泉自幾時冷起。峰從何處飛來。彼教中機鋒語也。又有書王右丞泉聲咽危石。日色冷青松句者。亦雅切。至七修類稿中。又載一聯云。飛峰一動不如一靜。念佛求人不如求己。則鈍相矣。

靈隱寺山門有趙松雪一聯云。龍澗風迴。萬壑松濤連海氣。鷲峰雲斂。千年桂月印湖光。今西湖志不載。西湖向無蘇公專祠。秦小峴觀察始創建之。落成後。阮芸臺先生書楹帖云。欲共水仙薦秋菊。長留學士住西湖。註云。宋時杭人呼公爲學士。不稱姓。今猶然。華秋槎瑞璜。又集公詩爲聯云。泥上偶然留指爪。故鄉無此好湖山。先生又摹公手書讀書樓三字爲額。

阮先生又集白香山句。題白公祠云。但是人家有遺愛。曾將詩句結風流。

西湖有陸宣公祠。近年所新修者。富海帆中丞富呢揚阿聯云。兩廡薦馨香。咸欽名相謨猷。大儒學問。六

橋攬風月。猶似川雲宦蹟。煙雨家鄉。

孤山放鶴亭。上有巢居閣。道光元年重建。吾鄉陳望坡尙書若霖聯云。祠傍水仙王。北宋尙留高士躅。樹成香雪海。西湖重見古時春。吳棣華廉訪廷琛聯云。華表千年遺蛻可。聞元鶴語。孤山一角。暗香先返玉梅魂。閣上聯尙多。以此二聯爲最佳。

天台之萬年寺。有王藻儒閣老拔一聯云。身比閒雲。月影溪光堪證性。心同流水。松聲竹色共忘機。又湯敦甫尙書金釗聯云。露氣春林。月華秋水。晴光淑景。芳草遠山。上方廣寺。朱倫翰聯云。四山滴翠環初地。一路聽泉到上方。阮芸臺先生聯云。以衆華爲物事。作雙樹之道場。錢竹汀宮詹大昕聯云。身似菩提心似鏡。雲在青天水在瓶。

西湖之聖因寺。本行宮。雍正五年。浙江巡撫李敏達始奏准改建。第一進爲彌勒殿。有敏達聯云。山外皆山。巒岫繞成清淨界。畫中有畫。笙歌譜就太平圖。最後爲內方丈。敏達亦有聯云。聖德遐昌。北極恩光昭北闕。皇仁遠被。西朝瑞靄接西天。然此地於康熙四十六年。恭逢變輿駐幸旬日。扁聯悉出御題。雲漢昭回之地。非臣工所當濡染其間。敏達之聯。實應撤去也。

理安寺之松巔閣。舊名法雨院。桂杏農觀察桂菴聯云。薄宦寄明湖。有夢難尋荆樹影。前因迷法雨。招魂空叩木樨禪。跋云。先兄文敏公。鞠獄粵西。道卒武昌。曹儷笙太傅夢兄曰。我與公皆理安寺僧。今當歸矣。

越日楚督奏函適至。事遂上聞。余分巡至此。因題楹柱。並誌鶴原之感。

宋錢岳父有書藏在西湖九里松。其故址已不可考。阮芸臺先生撫浙時。曾仿爲之。於靈隱寺華嚴閣後。創建一閣。取四部書各種。皮置其上。命僧守之。石琢堂廉訪。玉題聯云。著作集名流。好事毀當年。白傅文章留慧業。賞音俟後世揚雲。

朱竹垞先生曝書亭中。舊有一聯云。會須上番看成竹。何處老翁來賦詩。汪舟次檢討。輯所集杜句也。嘉慶初。阮芸臺先生督學浙江。修葺是亭。爲重刻而懸於柱。

嘉興木覺寺中。有空翠亭。乃唐僧初夢建寺時故蹟。又有三過堂。壁間有坡公三詩刻。蓋坡公嘗三過此堂。詩見集中。其前楹有唐石幢二。高二丈許。偉材也。芸臺先生有題句刻石柱云。惟唐代二幢。是峩峩山人未過前屋。此壁上三律。乃空翠亭僧初夢時詩。

温州青田縣。有石門洞。洞口有天然石門。因名。傳是劉青田讀書處也。有聯云。似洞非洞。適成仙洞。無門有門。是爲佛門。聞爲華亭沈某所題。而忘其名。

杭州有錢武肅王祠。其裔孫梅溪處士泳。有聯云。功在生民。惜傳聞異辭。信史尙留曲筆。德垂奕禩。悵播遷中葉。支流莫滌真源。此確是後裔口氣。詞旨亦落落大方。

西湖花神廟。在孤山下。跨虹橋之西。雍正九年。總督李敏達所建。中祀湖山之神。旁列十二月花神。及四



時催花使者。無不釵飛鈿舞。盡態極妍。相傳湖山正神。卽李公自塑其像。其旁列花神。皆李之姬侍。實有其人。余於嘉慶元年來游時。廟貌已敝。而花神精采。猶奕奕動人。近聞紅顏皆成黄土矣。猶記得有一舊聯云。翠翠紅紅處處鶯鶯燕燕。風風雨雨年年暮暮朝朝。曼調柔情。情景恰稱。

花神廟旁有月老祠。有金書聯云。願天下有情的。都成了眷屬。是前生註定事。莫錯過姻緣。蓋集琵琶記西廂記兩院本成句也。

葛嶺下有葛林禪院。與孤山相對。梁山舟先生集劉劭人物志語爲聯云。德行高妙。容止可法。威儀齊整。器蓋無聲。阮芸臺先生聯云。月似丹光出高嶺。鶴因梅樹住前山。

蘇州城南之滄浪亭。自宋牧仲中丞翠修後。復經長洲令許月溪遇。及吳中丞存禮。覺羅中丞雅爾哈善。三次修葺。今人只知有宋牧仲而已。余藩吳時。復加修治。增設臺榭。蔚成大觀。好事者合獻楹聯。而愜心貴當者實少。齊梅麓太守彥槐一聯云。四萬青錢。明月清風。今有價。一雙白壁。詩人名將古無儔。蓋前祠蘇長史。後祠韓蘄王也。可稱穩切。而一雙白壁字。究嫌粧點。余因輯滄浪亭志。得集句一聯云。清風明月本無價。近水遙山皆有情。上係歐陽文忠句。下係蘇長史句。皆滄浪亭本事也。然屢書皆不工。故此聯迄未懸挂。

宋牧仲尙書撫蘇時。爲唐六如修墓。建亭其旁。題曰才子亭。韓慕廬宗伯作楹聯云。在昔唐衢常痛哭。祇

今宋玉與招魂。余嘗過桃花塢訪之。其亭久圯矣。

蘇州圓妙觀七星潭閣。有集唐句一聯云。千樹桃花萬年藥。半潭秋水一房山。最熟人口。按揚州淨香園中桃花池館。亦有此聯。

虎邱亦有花神廟聯云。一百八記鐘聲喚起萬家春夢。二十四番風信吹香七里山塘。却移作西湖之花神廟聯不得。惜不知何人所撰。

李蘭卿觀察權蘇臬時。訪得蘇文忠公爲僧卓契順書歸去來辭。石刻於城東定慧寺。復尋得嘯軒故址。因修祠葺軒以存舊蹟。按定慧寺及嘯軒並在黃州。前明正統中。蘇州巡撫周文襄公。摹勒蘇書於石。太守况公捐祿。建寺及嘯軒。寺僧又繪蘇像奉之軒中。遂爲郡中名勝。歷久圯蕪。鮮有知者。至是乃一一還其舊。余於道光乙未。過吳門來游。留詩而去。後陶雲汀宮保爲之聯云。喫惠州飯。和淵明詩。陶云。吾書就一篇歸去好。判維摩憑。到東坡界。人相我相。笑看二土往來同。跋云。定慧寺有東坡書靖節先生歸去來辭。蓋在惠州時。寺僧欽長老。遣其徒卓契順爲公子致書。臨歸公以此贈之。其寄欽長老詩云。初無往來相。二土同一在。又云。請判維摩憑。一到東坡界。卽謂是也。同時林少穆撫部聯云。嶺海答傳書。七百年佛地因緣。不僅高樓鄰白傅。岷峨迴遠夢。四千里仙蹤。游戲尙留名利配黃州。陳芝楣方伯鑿聯云。翰墨溯高風。輪扶大雅。椒馨薦遺愛。鼎峙前修。蓋寺中並祀周况二公。葺爲三賢堂也。蘭卿題聯云。江海宿緣。

深片石猶留古吳郡。軒楹遺址拓。瓣香長溯舊蘇齋。時以覃溪師所藏文忠真像及所題舊詩刻石供寺中。又以王虛舟所題蘇齋二字扁懸諸楣。並摹覃溪師像奉之。

虎邱有景李堂。在白公祠內。以太白有虎邱夜游序也。堂中牡丹頗盛。彭春農學士聯云。一序證前游。太白光芒神久在三章懷絕調。牡丹時節我剛來。

吳季札墓。在江陰縣西二十五里。墓中古篆九字。相傳爲孔子所題。碑仆中斷。一夕雷雨。碑石完好如故。但微有斷痕耳。碑亭聯云。星斗光芒寒君子墓。風雷靈護聖人碑。不知何時何人所題也。

松江上海縣城隍廟中。有豫園奇秀甲於東南。水石回環。軒亭四映。各極其勝。陶雲汀督部小駐園中。各書楹帖以紀之。湖心亭云。野烟千疊石在水。漁唱一聲人過橋。得月樓云。樓高但任雲飛過。池小能將月送來。三穗堂云。此卽濠間。非我非魚皆樂境。恰來海上。在山在水有遺音。一笠亭云。游目騁懷。此地有崇山峻嶺。仰觀俯察。是日也。天朗氣清。則集蘭亭序語也。又集前人句題西廊云。放鶴去尋三島客。約梅同醉一壺春。

區田之法。傳自伊尹。潘功甫舍人曾沂。於吳下試行之。因繪圖撰說。流播遠邇。嘗於田畔臨水。構課耕樓。頗饒野趣。索余楹帖爲集成語云。側同幽人居。水木明瑟。遂存往古務。冬夏播琴。韓桂舫先生亟稱之。太倉州城有曇陽觀。祀一女仙。像設姝麗。相傳前明王文肅公錫爵之女。得道冲舉。或云湯玉茗牡丹亭。

傳奇卽演其事。眞僞殆不可辨。祠中有集昌黎少陵句爲聯云。雲窗霧閣事恍惚。金支翠旗光有無。非惟渾成。抑亦妍妙。

焦山之麓。有松寥閣。俯臨大江。雄勝之概。爲江南北第一。閣中聯句。以陳恪勤公。月色如畫。江流有聲。八字爲佳。惜字跡太弱。不稱其句。僧堂有伊墨卿太守聯云。龕收江海氣。碑出魚龍淵。下句謂瘞鶴銘也。語亦傑創。而分書尤奇偉。直逼漢京。當入焦山長物志也。

鄭板橋雙題焦山自然菴聯云。山光撲面經新雨。江水回頭爲晚潮。又云。汲來江水烹新茗。買盡青山當畫屏。

太白樓中聯句。以王有才。吾輩此中堪飲酒。先生在上莫題詩。爲最著。近人則吳山尊學士聯云。謝宣城何如人。只憑江上五言詩。要先生低首。韓荆州差解事。肯讓階前盈尺地。容國士揚眉。或云樓係一守一令重葺守性謝令

姓韓山尊特借以寓意云又閔中丞鵬元聯云。千尺青山妙句豈惟凌小謝。一龕金粟後身須信是如來。又李疇一聯

云。詩酒神仙。天自夢中傳綵筆。樓臺花月。人從江上拜宮袍。至姚興譽聯云。狂到世人皆欲殺。醉來天子不能呼。又徐立綱聯云。愛國有詩儕。杜曲報君以士識汾陽。李孚青聯云。脫身依舊仙歸去。撒手還將月放回。俗傳太白捉月而死語皆壯然。只是作太白讚耳。於樓何涉乎。又聞有集太白句云。江空欲聽水仙操。壁立直

上蓬萊峰。頗佳。近胡書農學士聯云。公昔登臨想詩境。滿懷酒杯在手。我來依舊見青山。對面明月當頭。

袁簡齋隨園中聯云。此地有崇山峻嶺。茂林修竹。是能讀三墳五典。八索九邱。是李鶴峰侍郎因培所贈。又自集唐句一聯云。放鶴去尋三鳥客。任人來看四時花。

金陵有名園。袁簡齋爲江寧令時。曾宴新入庠諸生於此。後歸邢氏。簡齋重游。贈園主人一聯云。勝地怕重經。記當年絲竹宴諸生。回頭似夢。名園須得主。幸此日樓臺逢哲匠。著手成春。

隨園詩話云。金陵太守謝鏗抵任時。索余對聯。余贈聯云。太守風清。江左依然迎謝傅。先生來晚。山中久已臥袁安。陳省齋先生繼其父署守鎮江。余代作對聯云。守郡繼先人。看江水長流。剩幾個當年父老。析薪縣世澤。願黃堂少住。留一枝此日甘棠。

揚州府署客廳中有一聯。甚雅切。句云。上客盡知名。杜牧詩才。鮑昭賦手。前賢有遺韻。魏公芍藥。永叔荷花。是王夢樓太守所題。

金陵藩署。本明中山王故邸。西偏瞻園。極樹石之勝。聞當時多從良嶽移來。余曾信宿其中。記得一長聯云。大江東去。浪淘盡千古英雄。問樓外青山。山外白雲。何處是唐宮漢闕。一作唐陵漢寢小苑春回。一作西迴鶯喚起

一庭佳麗。看池邊綠樹。樹邊紅雨。此間有舜日堯天。相傳中山王自作上半聯。而屬對不就。懸金於門。有能對者酬之。越數月。有諸生某對成。王大喜。遂鐫於柱。是此聯在勝國時已有之。今人以爲黃仲則景仁所作者。誤也。彭春農云。或又傳此聯爲錢牧齋句。上聯懷勝朝。下聯頌本朝也。未知是否。

袁簡齋續同人集云。過客贈隨園聯句可存者。如同年裘叔度侍郎云。民不能忘。始信淵雲兼政事。敏而好學。莫疑巢許是閑人。徐兆璜別駕云。廉吏可爲魯山四面牆。垣少達人知足。陶令歸來歲月多。莊念農太守云。著手成春卷。中著述皆千古。有官不仕林下道。遙見一人家。止水翰雲山。金石圖書此地可。稱三絕。循吏儒林隱逸先生自有千秋。趙雲崧觀察云。野王之地有二老。北斗以南只一人。沈凡民先生云。天爲安排看山處。風來洒掃讀書窗。又曠代仙才流下界。半天人臥在高窗。李晴江明府云。潘安仁閒可奉親。郭林宗貞不絕俗。郭運青侍講云。爲官不過六百石。著書豈止五千言。錢辛楣少詹集查初白詩云。人指所居爲福地。天留此老應文星。陶怡雲云。方朔少時二十萬言書盡讀。傅隆老去八千餘紙手親鈔。黃世壇云。二十科翰林老猶似少。一百卷文集多而能精。余自嘲云。不作公卿非無福。命都緣懶。難成仙佛。爲愛文章又戀花。又隨園詩話補遺云。上海李林松仲熙贈聯云。真才子必得其壽。謫仙人未免有情。

南野堂筆記載小倉山房題句甚多。其中有可移作楹帖者。如黃之紀云。到處自開詩世界。無人不拜老神仙。趙雲崧云。喬木十圍人共老。名山一席客爭趨。丁珠云。身閒但急千秋業。官罷還貪一縣花。黃仲則云。文章草草皆千古。仕宦匆匆只十年。葉紹楨云。偶談舊雨人俱古。能坐春風客亦佳。蒲忭云。六代雲山隨杖履。一園花鳥盡聰明。汪汝弼云。曠代誰標才子號。聞名都當古人看。孫原湘云。黃初詞賦空千古。白

下江山送六朝

隨園老人云。嘗游南明寺。見沈歸愚先生書對聯云。瓶添澗水盛將月。衲挂松梢惹得雲。未知是集成語。抑或先生自撰耶。

謝默卿告余云。乾隆中。李松雲先生堯棟守金陵時。重濬莫愁湖。陳東浦方伯奉茲題一聯云。此地曾傳湯沐邑。何人錯認鬱金堂。蓋明初以後。湖賜中山王。食其租稅。故至今湖樓奉王香火。若古樂府莫愁樂云。石城女子名莫愁。善歌謠。石城在竟陵。其曲云。聞歡在揚州。相送楚山頭。則莫愁在楚無疑。今石頭城下之莫愁湖。蓋因石城轉訛耳。方伯此聯。最可徵信也。按顧起元莫愁湖考云。莫愁村。今在承天府漢江西石城在州西。晉羊祜所建。鄭谷詩。石城昔爲莫愁鄉。莫愁魂散石城荒。亦可互證。若湖上水閣。有先生手題聯云。一片湖光比西子。千秋樂府唱南朝。自然超妙。則仍用舊說耳。

金陵淮清橋橋門。有集劉夢得韋端已句云。淮水東邊舊時月。金陵渡口去來潮。橋門之聯。當以此爲最工。

道光初。金陵有某大姓。葺治水榭。有客爲集宋人詞句。作楹聯贈之者。出語云。波暖麝香。看檻曲縈紅。簷牙飛翠。上四字。玉田句。下兩句。白石詞也。對語云。醉輕夢短。在燈前欹枕。雨外熏鑪。上四字。毛澤民句。下兩句。夢窗詞也。意匠新巧。頗傳誦於時。

金陵儀鳳門城樓聯云。聳翠流丹。千仞麗譙輝日月。縈青繚白。四圍屏障合江山。不知何人所作。

江浦縣之浦口鎮有城。城之東門。堞樓三楹。背山面江。形勢勝絕。嘉慶間。適重修工竣。陳香谷中丞桂生按閱。題一聯云。地軸轉洪濤。月湧星垂。三楚江聲分浦激。天關開重鎮。煙霏霧斂。六朝山色擁臺隍。時白小山學使。又自皖中寄題集杜一聯云。雲白山青萬餘里。江深竹靜兩三家。皆爲時所稱。

燕子磯本在江中。近因沙灘日長日寬。遂離江稍遠。有高閣凌空而立。俗所稱鐵鎖鍊孤舟者。今鐵索尙存。猶令人不可方物。芻有永濟寺柱聯云。松聲竹聲鐘磬聲。聲聲自在。山色水色煙霞色。色色皆空。忘却何人之款。

謝默卿云。吳下園亭最勝。如齊門之吳氏拙政園。閶門之劉氏寒碧莊。葑門之瞿氏網師園。婁門之黃氏五松園。其尤著者。每春秋佳日。輒開園縱人游觀。釵扇如雲。蝶圍蜂繞。裙屐年少。恣其評隲。於衣香人影之間。了不爲忤。金閶名姬。反以此增聲價焉。各園楹帖不少。今僅記網師園中有一聯云。風風雨雨。暖暖寒寒。處處尋尋。覓覓。鶯鶯燕燕。花花葉葉。卿卿暮暮。朝朝。語涉纖巧。而狀豔冶之景。如在目前。固自妙麗無匹也。按此聯與西湖花神廟一聯相仿。而簡鍊稍遜之。

蟻磯孫夫人祠。有徐文長聯柱云。思親淚落吳江冷。望帝魂歸蜀道難。相傳修祠工甫竣。董役者夢夫人諭之云。楹聯且緩製。須至某日時。有徐先生過此。求其撰題可矣。至期。文長適到。遂信筆書成。夜夢夫人



來謝近楊雪菜慶琛觀察蕪湖時亦題聯云空江蘋藻祠靈澤門額爲靈澤夫人祠故國松楸夢惠陵亦佳其妙皆在不著議論而自然雅切也考蜀書云先主爲荊州牧治公安權稍畏之進妹固好又云先主旣定益州而孫夫人還吳裴松之引漢晉春秋云先主入益州吳遣迎孫夫人夫人欲將太子歸諸葛亮使趙雲勒兵斷江留太子孫夫人事見於正史者不過如此若泛及小說演義鮮不貽笑大方矣

簷曝雜記云江陰君山以春申君得名其山臨江爲一邑勝境有聯云此水自當兵十萬昔人曾有客三千

安徽城外之大觀亭祀余忠宣公雄壯甲於皖江鄧嶸筠督部聯云樽前帆影檻外嵐光數勝蹟重重都向江頭開畫本樓上仙人閣中帝子滂游蹤歷歷又來亭畔弔忠魂按督部由湖北廉使江右藩伯擢撫安徽故次聯云爾

又有汪恩一聯云跨太白樓之上鴛瓦排雲倚畫檻一味鄉愁已漸近鍾阜晴嵐六朝城郭橫彭蠡江而西鷺濤堆雪喚沙鷗共談宦跡最難忘峨眉眉春水萬里風帆汪蓋吳人曾宦四川此聯乃守安慶時所作

又陶沅一聯云倚檻蒼茫千古事過江多少六朝山

南昌滕王閣大門有一扁云仙人舊館吾鄉李春園太守其宴所題姚鐵松中丞夔初莅任見扁極稱賞嘗向太守乞此扁改題己名太守不可乃語太守曰扁不見讓須爲我別撰一聯如不佳仍須讓扁也太

守於次日。卽呈聯句云。我輩復登臨。目極湖山千里而外。奇文共欣賞。人在水天一色之中。上聯用韓昌黎記語。下聯用王子安序語也。中丞大加擊節。遂寢前說。至今太守之扁。中丞之聯。並存。可備滕王閣一故實矣。湛淵靜語云。滕王閣舊置王勃詩序碑。當正位昌黎作重修記。居其旁。古心江公治隆興。遂遷韓本。今碑居正。退勃於旁。公嘗刻碑陰。略云。勃八代未變之文。併優語也。昌黎文一變。直至於道。舊見墨亡之。

宋牧仲先生滕王閣聯云。依然極浦遙山。想見閣中帝子。安得長風巨浪。送來江上才人。阮芸臺先生聯云。帝子長洲。仙人舊館。將軍武庫。學士詞宗。並佳。

舒白香於臘杪。游靖安之揚鶴觀。喜其高僻。遂留度歲。爲道士作春帖云。遙聞爆竹知更歲。偶見梅花覺已春。頗有山中無歷日。寒盡不知年之意。

白香游廬山天池。僧屬題寺楹。信筆作長短二聯云。一水印天心。指月證三生之果。六根無我相。飲泉清萬劫之塵。又云。天上有池能作雨。人間無地不逢年。

虎溪三笑亭。有唐蝸寄先生聯云。橋跨虎溪。三教三源流。三人三笑語。蓮開僧舍。一花一世界。一葉一如來。

相傳阮芸臺先生。於江西百花洲。集句一聯云。楓葉荻花秋瑟瑟。閒雲潭影日悠悠。既合風景。而成句。又在人人意中。所謂文章本天成。妙手偶得之。但余又聞之彭春農學士云。此語饒州燒作磁聯。其款或署

曹文恪或署先文勤公實乃舊句非芸臺師集成者。

江州白太傅祠有一聯云楓葉四絃秋根觸天涯遷謫恨潯陽千尺水勾留江上別離情頗近自然。

大庾嶺上雲封寺一名挂角寺寺門聯云山中藏古寺門外盡勞人又一聯云驛使暫停花下騎寺門深掩嶺頭雲長白觀瑞聯云挂角何時偶爲嶺上主人猶想像千秋風度舉頭欲問可許山中置我試管領萬樹梅花。

李笠翁題廬山絕頂聯云足下起祥雲到此者應帶幾分仙氣眼前無俗障坐定後宜生一點禪心又云徧廬山而扼勝者皆佛寺也求爲道觀惟簡寂觀數楹而已天下名山強半如是釋道應作平等觀不知世人何厚於僧而薄於道聊題一聯爲黃冠吐氣云天下名山僧占多也該留一二奇峰棲吾道友世間好語佛說盡誰識得五千妙論出我仙師。

瑞州府治後有鳳皇山山之左有東軒乃蘇文定公轍謫筠州監酒稅時所建瑞州在宋時爲筠州也翁覃溪師爲補題東軒二字額並爲之記復集蘇詩爲聯云天下幾人學杜甫當時四海一子由。

錢裴山中丞楷巡撫湖北甫三月卽被命內召瀕行留題黃鶴樓一聯云我去太匆匆騎鶴仙人還送客茲游良眷眷落梅時節且登樓不脫不粘却一時情景俱到他作所不能及也。

黃鶴樓聯扁極多自以錢裴山所撰爲最其餘彼善於此者如魯亮儕之裕云到來徑欲凌風去吟罷還

思借笛吹。薩湘林薩迎阿云。一樓萃三楚精神。雲鶴俱空橫笛在。二水匯百川支派。古今無盡大江流。又黃虎文云。上頭有客題詩句。隔岸何人共酒杯。又相傳有一聯云。何時黃鶴重來。且自把金尊看洲渚。千年芳草。今日白雲尙在。問誰吹玉笛。落江城五月梅花。不著議論。而自擅清新。惜未詳何人所撰也。黃鶴樓之左爲太白亭。今呼仙棗亭。游人觴讌。咸集此中。余本敦聯云。此地饒千秋風月。偶來作半日神仙。朱詠齋士彥聯云。此間可談風月。斯世豈有神仙。語皆活脫。畢秋帆先生聯云。攬勝我長吟。碧落此時吹玉笛。學仙人漸老。白頭何處覓金丹。又不知何名一聯云。宛然海上三山。藐矣安期。先我亭前探棗實。猶是江城五月。仙乎太白。與君笛裏聽梅花。

晴川閣與黃鶴樓隔江對峙。而游人題句不及黃鶴樓之多。有李拔集經語一聯。以大字磨崖云。沱潛旣道。江漢朝宗。又蕭德宣集詩句一聯云。漢口夕陽斜度鳥。楚江燈火看行船。又陳望之中丞淮聯云。靈瀆走雙龍。夾岸直疑銀漢落。仙蹤杳孤鶴。隔江但有白雲來。又陳大文聯云。傑觀飛臺。檻外蜀吳橫萬里。風帆沙鳥。天邊江漢湧雙流。又溧陽宋鑱新題一長聯云。棟宇逼層霄。憶幾番。仙人解佩。詞客題襟。風日最佳時。坐倒金尊。卻喜青山排闥至。川原攬全省。看不盡。鄂渚烟光。漢陽樹色。樓臺如畫裏。臥吹玉笛。還隨明月過江來。

湖北石首縣有繡林山。相傳漢昭烈帝納孫夫人於此。錦幃如林。因名。舊有昭烈及夫人合祠。有爲之撰

聯者云錦繡江山半壁雄心敵吳魏。風雲兒女千秋佳話掩甘糜。聯句固佳。而甘糜連用於古未聞。恐亦涉演義語。考昭烈眷屬見於蜀書者不一而足。初云呂布襲下邳。虜先主妻子。後云因先主求和於呂布。布乃還其妻子。又云至小沛。爲高順所敗。復虜先主妻子送布。後云曹公助先生禽呂布。復得妻子。又云曹公東征先主。盡收其衆。虜先主妻子。並禽關公以歸。此後不言妻子復歸之事。及當陽長坂之追。又云先主棄妻子。與諸葛亮張飛趙雲數十騎走。又云先主爲荊州牧。治公安。權稍畏之。進妹固好。又云先主既定益州。而孫夫人還吳。又甘皇后傳云先主在小沛。納以爲妾。先主數喪嫡室。后常攝事。隨先主於荊州。產後主。曹公追及先主於當陽長坂。於時困逼。棄后及後主。賴趙雲保護。得免於難。此外惟有一穆皇后。皆合葬惠陵。又糜竺傳云竺迎先主於小沛。進妹於先主爲夫人。其終亦不詳。蓋先主眷屬屢經散失。殆不乏其人。其有姓氏可考者。惟甘穆二皇后。孫糜二夫人而已。

岳陽樓中有一聯頗壯闊。句云四面湖山歸眼底。萬家憂樂到心頭。忘却何人所撰。關中周元鼎聯云。後樂先憂。范希文庶幾知道。昔聞今上。杜少陵可與言詩。亦頗自然。余謂李西涯有岳陽樓詩句云。吳楚乾坤天下句。江湖廊廟古人心。似可移作聯句。近畢秋帆先生一聯云。湘靈瑟。呂仙杯。坐攬雲濤人。宛在子美詩。希文筆。笑題雪壁我重來。則尤見意匠也。

# 楹聯叢話

## 卷七

### 勝蹟下

濟南勝景。以趵突泉爲最奇。而楹聯語多粘滯。惟石琢堂廉訪一聯云。書閣鏡中。看幻作神仙福地。飛泉雲外。聽寫成山水清音。尙不泥於跡象也。

濟南大明湖前。有匯泉寺。中有薛荔館。面湖而立。爲游人讌集之所。全湖勝概。皆在目前。今湖面爲荷塘。蘆港所隔。舟行須詰曲隨之。有舊人聯句云。舟行著色屏風裏。人在回文錦字中。據寺僧云。是前濰縣教官郭銘盤所書。尙未知何人所撰也。劉金門先生聯云。四面荷花三面柳。一城山色半城湖。孫淵如先生星筭集唐句聯云。地占百變多是水。樓無一面不當山。

大明湖中有小滄浪湖之南岸。卽學使者官署。署中池水。亦七十二泉之一。與湖相通。池上有小亭。吳巢松學使屬余分書小小滄浪一扁。賦七古一首爲謝。有荷花如城月如斗之句。余和答詩。有名流作主泉作賓之句。適成對語。因集書一小聯畀之。而學使遽歸道山。不及懸挂矣。

廷曙墀。曾官温州台州。最後守泰安。題署齋一聯云。桑麻課罷開花徑。台蕩遊還拜嶽雲。

四川天回鎮。以唐明皇幸蜀返蹕駐此。因名驛亭中。以李青蓮句爲聯云。地轉錦江成渭水。天迴玉壘作長安。

四川嘉定府城外。有凌雲山。山下有凌雲寺。爲坡公少年讀書處。有樓。塑坡公少時像。山甚峻。樓前卽大江。寺門外有集句聯云。干青雲而直上。障百川而東之。時稱其渾成切實。樓中有郭蘭石學使尙先題聯云。萬戶侯何足道哉。顧烏帽青鞵。難得津梁逢大佛。三神山如或見之。問黃樓赤壁。何如鄉郡挾飛仙。

少陵草堂中。佳聯頗多。如詩史堂聯云。水石適幽居。想溪外微吟。翠竹白沙依草閣。樓臺開暮景。結花間小隊。野梅宮柳接春城。草堂集句聯云。萬里橋西宅。百花潭北莊。獨立樓集句聯云。卽今耆舊無新詠。何處老翁來賦詩。草亭集句聯云。至今斑竹臨江活。無數春筍滿林生。恰受航集句聯云。孤城返照紅將斂。仙侶同舟晚更移。杜公神龕集句聯云。旁人錯比揚雄宅。日暮聊爲梁甫吟。陸放翁配享龕集句聯云。錦里先生爲老伴。玉霄散吏是頭銜。皆風雅可誦。以題目本好也。

何南省城。有三賢祠。在梁苑古吹臺上。祀李太白。杜少陵。高逵夫。三公。麟見亭河帥聯云。一覽極蒼茫。舊苑高臺同萬古。兩間容嘯傲。青天明月此三人。

道光乙酉。長懋亭將軍楊時齋督部。克復西域四城。蘭州同官。於黃河南岸。對金城關。在金山建樓三楹。

題額曰蕩誼。薩湘林廉訪題聯云：外域全歸，坐攬關山皆勝地；上游得據，笑談西北有高樓。余於乙未莅蘭州，則蕩誼匾猶存，而聯不可復見矣。

蘭州城南之皋蘭山，又名五泉山，山麓有五眼泉，曰甘露，曰掬月，曰摩子，曰蒙，曰惠，清冽甲於省會諸水。故又名清泉。琳宮紺宇，蔚然巨觀。余於卸藩任後，始獨游一次。翼日，卽戒行匆匆，不能成詩，僅留聯句畀寺僧，亦不知懸挂與否也。句云：佛地本無邊，看排闥層層紫；塞千峯平檻立，清泉不能濁。笑出山滾滾，黃河九曲抱城來。

蘭州城北之黃河，初從積石東下，其勢漸大。自明初建浮橋，名鎮遠橋，今因之不廢。每隆冬冰合，自成冰橋。冰泮，則以數十艘編爲浮橋。每歲二月初吉，大府率僚屬齋戒詣河瀆神，爲合橋之祀。千夫踴躍，萬民環覩，如畫圖然。余擬題橋門一聯云：天險化康衢，直如海市樓中現；不住法河壩，開畫本安得雲梯關外。作如是觀。雲梯關爲淮黃歸海之要區，由委瀆源幾及萬里。余曾筦修防者三載，臨流回憶，夷險頓殊矣。河神廟中有查九峰觀察延華聯曰：曾經滄海千層浪，又上黃河一道橋。亦自紀其所歷也。

羅浮山最深處爲酥醪觀，是安期生與神女會飲元碧酒處。觀中有樓，是道人江瀛濤所建。黃香石培芳浮山小志云：羅浮山中尠精構，惟酥醪觀中一小樓，殊擅幽勝。余題爲浮山第一樓，並題聯云：萬壑烟雲浮檻出，半天松竹拂窗來。昔楊大司馬應璩讀書洞中，恒樓居，署曰：小樓容我靜，大地任人忙。並足識也。



嘉慶甲子。吳山尊。張石蘭。典試粵西。揭曉後。百菊溪中丞。觴之七星巖。席次。中丞曰。此間不可無一楹帖。因口占一句云。地有七星鄰北斗。請二君屬對。山尊衝口而應云。人如二客伴東坡。中丞大爲擊節。因製聯。懸在七星巖壁立亭中。後署山尊名。近聞聯已不存。粵人亦無有知其緣起者。林少穆爲余述之如此。獨秀峰爲桂林主山。顏延年守郡時。賦詩云。未若獨秀者。峨峨郭邑間。山因以名。然此語但見唐人鄭叔齊所作獨秀山新開石室記。而顏遺集中。未見此詩也。山麓有講書巖。范石湖謂有便房石榻石牖。如環堵之室。顏延年讀書其中。似唐以前。府治卽在是。宋元祐中。郡守孫覽。搆五詠堂。鐫五君詠於石。今遺址皆不可考。余於道光戊戌冬。始與僚窳商復五詠堂。而以家藏黃山谷先生所書五君詠墨蹟勒石堂壁。不兩月而規撫大具。頓成壯觀。因撰一聯云。得地領羣峰。目極舜洞堯山而外。登堂懷往喆。人在鴻軒鳳舉之中。

獨秀峰中磨厓。詩字如林。以唐人鄭叔齊石室記。及孟簡題名爲最古。余因五詠堂之北。復添一廳事。同人索書楹帖。復撰一聯云。勝地如畫圖。是賢守遺區。雄藩舊館。前明入靖江王邸靈山託文字。有叔齊作記。孟簡題名。

獨秀峰下有月牙池。冬夏不涸。峰影皆倒浸其中。廊湛若赤雅。所謂山翠盡落者也。峰畔有磨厓南天一柱四大字。極雄健。蓋用唐人張固擎天一柱在南州詩語。余小霞五詠堂聯云。異代景前修。想石榻攤書。

竹林懷友。新堂還舊觀。對半潭秋水。一柱奇峰。又集孟浩然張謂句一聯云。戶外一峰秀。窗前萬木低。堂成後將一年。王孚遠方伯惟誠始到。補題一聯云。造物本無私。移來檻外烟雲。適開勝境。會心原不遠。就此眼前山水。猶見古人。頃卞竹辰方伯士雲亦寄一聯云。光祿詩文節書。大府來時開勝境。王公冕將軍。畫名山何日得重遊。蓋堂初建時。方伯適奉命都轉長蘆。故次聯云爾。又卞雅堂觀察斌聯云。勝境重開。詩采書聲延古趣。生機最樂。雀喧魚戲助天和。跋云。獨秀峰下有顏光祿讀書舊址。歲己亥。茵林中丞規度其地。卽起垣宇。刻五君詠壁間。暇則集同人於此。作放生樂事。因擬聯語。並識之。三聯今並鐫堂柱。桂林城北仙李園。中多栗樹。故俗呼爲板栗園。前明爲靖藩別業。今爲李芸甫水部所得。仍名李園。園中巖洞之勝。爲桂郡一大觀。余屢觴詠其中。所見楹聯不一。記其尤佳者。大門聯云。一帶林塘詩境界。四時花果隱生涯。傳是周山茨升桓所撰。簪碧堂中舊聯云。北院喜新成。有寒碧千層。遠青一角。東君如舊識。正庭槐垂蔭。梁燕將雛。爲商寶意盤。所題芸甫新於水竹佳處。築一茆亭。以供道暑。自題聯云。乍來頓遠塵囂。靜聽水聲真活潑。久坐莫嫌荒僻。飽看山色自清涼。有鏡亭在水中。中央。旁有舟曰恰受航。余爲集韓杜句云。灌池纔深四五丈。野航恰受兩三人。

滇南黑龍潭。距省垣二十里。古稱名勝。碩慶題聯云。兩樹梅花一潭水。四時烟雨半山雲。有薛爾望者。昆明諸生。明末偕妻妾子女七人。同盡節於潭內。後人哀之。爲立大塚。於潭旁建亭。題聯云。寒潭千載潔。玉

骨一堆香。

滇中華庭寺亦勝跡也。有楊升菴慎題聯云：一水抱城西，煙靄有無，拄杖僧歸蒼茫外，羣峰朝閣下，雨晴濃淡，倚欄人在畫圖中。

滇南省垣海心亭頗饒勝致。黃星巖奎光題聯云：有亭翼然，占綠水十分之一，何時閒了，與明月對飲而三。

勝地壯觀，必有長聯始稱，然不過二三十餘字而止。惟雲南省城附郭大觀樓一楹帖多至一百七十餘言，傳誦海內，雖一縱一橫，其氣足以舉之，究未免冗長之譏也。句云：五百里滇池，奔來眼底，披襟岸幘，喜茫茫空闊無邊，看東驤神駿，西翥靈儀，北走蜿蜒，南翔縞素，高人韻士，何妨選勝登臨，趁蠓嶼螺洲，梳裹就風鬟霧鬢，更蘋天葦地，點綴些翠羽丹霞，莫孤負四圍香稻，萬頃晴沙，九夏芙蓉，三春楊柳，數千年往事，注到心頭，把酒凌虛，嘆滾滾英雄誰在，想漢習樓船，唐標鐵柱，宋揮玉斧，元跨革囊，偉烈豐功，費盡移山心力，儘珠簾畫棟，卷不及暮雨朝雲，便斷碣殘碑，都付與蒼烟落照，只贏得幾杵疎鐘，半江漁火，兩行秋鴈，一枕清霜。按上聯之神駿，指金馬靈儀，指碧雞，蜿蜒，指蛇山，縞素，指鶴山，皆滇中實境，然用替字，反嫌粧點，且以縞素爲鶴，亦似未安。聯句爲康熙中邑人孫髯所題，聯字爲陸樹堂所書，聞阮芸臺先生督滇時，曾改竄數字，另製聯板懸之，而彼都人士，嘖有煩言，旋復撤去。近先生以改本寄示，因並錄於

右以質觀者。五百里滇池。奔來眼底。憑欄向遠。喜茫茫波浪無邊。看東驥金馬。西鷺碧雞。北倚盤龍。南馴寶象。高人韻士。惜拋流水光陰。趁蠡嶼螺洲。襯將起蒼崖翠壁。更蘋天葦地。早收回薄霧殘霞。莫辜負四圍香稻。萬頃鷗沙。九夏芙蓉。三春楊柳。數千年往事。注到心頭。把酒凌虛。嘆滾滾英雄誰在。想漢習樓船。唐標鐵柱。宋揮玉斧。元跨革囊。爨長蒙酋。費盡移山氣力。儘珠簾畫棟。捲不及暮雨朝雲。使蘇峒峇碑。都付與荒烟落照。祇贏得幾杵疎鐘。半江漁火。兩行鴻鴈。一片滄桑。

貴州省城北關外有頭橋。爲往來迎送之區。有聯云。說一聲去也。送別河頭。歎萬里長驅。過橋便入天涯路。盼今日歸哉。迎來道左。喜故人見面。握手還疑夢裏身。

揚州各勝蹟楹聯。多集晉宋及唐人詩句。蓋盧雅雨都轉見曾。屬金棕亭博士兆燕爲之。備載於李艾塘斗揚州畫舫錄中。今擇其佳者。列之於左。

揚州城北。自慧因寺至虹橋。凡三段。一爲城闔清梵。一爲卷石洞天。一爲西園曲水。慧因寺外爲香悟亭。四面皆木樨。聯云。潭影竹間動。蘇母天香雲外飄。宋之問河邊有船房。額曰南漪。聯云。紫閣丹樓紛照耀。王勃桃溪柳陌好經過。張籍稍高處爲棲鶴亭。其西廳事。額曰綠楊城郭。聯云。城邊柳色向橋晚。溫庭樓上花枝拂座紅。趙嘏過此爲勺園。聯云。移花得蝶。買石饒雲。鄭板橋所書。卷石洞天。有城闔清梵之後。卽古郎園地。今歸洪氏。人呼爲小洪園。初入爲羣玉山房。聯云。漁浦浪花搖素壁。司空曙玉峰晴色上朱欄。李羣玉沿河可

入薜蘿水榭。聯云：雲生礪戶衣裳潤。白居易風帶潮聲枕簟涼。許渾水榭之後為契秋閣。聯云：渚花張素錦。杜甫

月桂朗冲襟。駱賓王又數折為宛委山房。聯云：水石有餘態。劉長卿鳧鷖亦好音。張九齡

西園曲水。即古之西園茶肆。後歸汪氏。中有濯清堂。聯云：十分春水雙檐影。徐寅百葉蓮花七里香。李洞有新

月樓聯云：蝶銜紅蕊蜂銜粉。高隱露似珍珠月似弓。白居易又有水明樓聯云：盈手水光寒不溼。李羣玉入簾花

氣夢難忘。羅虬

元崔伯亨花園。後為洪氏別墅。洪氏有二園。虹橋修禊。為大洪園。卷石洞天。為小洪園。虹橋為王文簡賦

冶春處。後盧轉運復修禊於此。北郊佳麗。推此為最。乾隆間賜名倚虹園。中有妙遠堂。聯云：河邊淑氣迎

芳草。孫邈城上春陰覆苑牆。杜甫其右為餞春堂。聯云：鶯啼燕語芳菲節。毛熙震蝶影蜂聲爛漫時。李建勳

小洪園中有流波華館。挺入湖心。清空一片。聯云：澗道餘寒歷冰雪。杜甫浪花無際似瀟湘。溫庭筠其右數折

為小江潭。聯云：竹室生虛白。陳子昂波瀾動遠空。王維

冶春詩社。在虹橋西岸。臨水次為懷仙館。聯云：白雲明月偏相識。任華行酒賦詩樂未央。杜甫水樹間為秋思

山房。聯云：天氣涵竹氣。張說山光滿湖光。馬戴其後為槐蔭廳。聯云：小院迴廊春寂寂。杜甫朱蘭芳草綠纖纖。劉兼

最後為橋西草堂。聯云：綠竹漫侵行徑裏。劉長卿飛花故落舞筵前。蘇頌其後有亭曰雲構。聯云：山雨樽仍在

亭香草不凡。張祐

荷浦香風在虹橋東岸。一名江園。乾隆間賜名淨香園。中爲清華堂。正臨水際。聯云。菱荷疊映蔚。謝靈水  
木滿清華。謝眺其後爲綠楊灣。聯云。金塘柳色前溪曲。溫庭筠玉洞桃花萬樹春。許門外爲春禊亭。聯云。柳占

三春色。溫庭筠荷香四座風。劉威

園之左有翠玲瓏館。其旁爲蓬壺影。聯云。碧瓦朱甍照城郭。杜甫穿池疊石寫蓬壺。常元又其後爲江山四

望樓。聯云。山紅澗碧紛爛漫。韓愈竹軒蘭砌共清虛。李咸用其左爲涵虛閣。聯云。圓潭寫溪月。孫華岸上春潮

江。閣後爲浣香樓。聯云。谷靜秋泉響。孟浩然樓深複道通。柴宿

四橋烟雨。一名黃園。黃氏別墅也。乾隆間賜名趣園。園中有錦鏡閣三間。閣之西有小屋三間。顏曰竹間

水際。聯云。樹影悠悠花悄悄。曹唐晴雲漠漠柳毵毵。章閣之東有四照軒。聯云。九霄香透金莖露。于武八月

涼生玉宇秋。曹唐軒之後爲漣漪閣。聯云。紫閣丹樓紛照耀。王勃修篁灌木勢交加。方漣漪閣之北有廳事二

一曰澄碧堂。聯云。湖光似鏡雲霞熱。黃松氣如秋枕簟涼。何士一曰光霽堂。聯云。千重碧樹鎖青苑。章四

面朱樓卷畫簾。杜牧

黃園竟處有吹香草堂。聯云。層軒靜華月。諸光修竹引薰風。章安其後爲春水廊。水局極寬處也。聯云。夾

路濃華千樹發。趙彥昭一渠流水兩家分。項旁有蓮花橋。橋邊有勝概樓。聯云。奇石盡含千古秀。羅春光欲

上萬年枝。錢起

虹橋之西岸。爲吳氏別墅。其北有跨紅閣。先爲酒家。後改官園。仍令園丁賣酒爲業。有聯云。地偏山水秀。

劉禹錫酒綠河橋春。李正封

長隄春柳。卽在虹橋之西。隄畔有濃陰草堂。聯云。秋水纔添四五尺。杜甫綠陰相間兩三家。司空圖又過曲廊。

三四折。盡處有小屋如丁字。謂之丁頭屋。聯云。綠竹夾清水。江淹游魚動圓波。潘安仁

北郊之白桃花。以東岸江園爲勝。紅桃花。以西岸桃花塢爲勝。桃花塢之比鄰。有曉烟亭。聯云。佳氣溢芳。

趙孟頫宿雲澹野川。元好問

曙光樓面東。以曉色爲勝。城中人每於夏月侵曉出城看露荷。聯云。問津窺彼岸。蘇頌把釣待秋風。杜甫

韓園在長隄上。國初韓醉白別墅也。園中築小山亭。聯云。茂竹臨幽澱。李益晴雲出翠微。權德輿

桃花塢額。係石刻。內構廳事。曰疏峰館。有集章莊聯句云。千重碧樹籠青苑。一桁青山倒碧峰。館之西有。

方塘種荷。四芻幽竹。蒙翳構響廊。皮板架水上。爲澄鮮閣。聯云。隔沼連荷芰。杜甫中流泛羽觴。陳希烈

山半桃花。每春時紅白相間。花叢中有蒸霞堂。聯云。桃花飛綠水。李白野竹上青霄。杜甫又有縱目亭。聯云。地。

勝林亭好。孫邈月圓松林深。無名氏又有中川亭。四面皆山中。聳重屋。聯云。小松含瑞露。鄭谷好鳥鳴高枝。曹植

梅嶺卽長春嶺。在保障湖中。由蜀岡中峰出脈者也。嶺多梅樹。故有梅嶺春深之目。郡人程元恒志。銓築。

是嶺。三年不成。費至二十萬。後夢關帝示以度地之法。旬日而竣。因構關帝廟。廟右爲嶺上草堂。全湖在。

望聯云。碧落青山飄古韻。杜綠波春浪滿前陂。章又其右一亭依麓。額曰釣濤。聯云。浩歌向蘭渚。徐彥把

釣待秋風。甫

東園卽賀園舊址。中有春雨堂。張文敏照聯云。萬樹琪花千圃藥。一莊修竹半床書。又鄭谷口篋聯云。烟

雲送客歸瑤水。山木分香繞闥風。又江昱江梅聯云。近水樓臺開梵宇。平山欄檻倚晴空。春雨堂之北。爲

菱花亭。聯云。苔色侵衣桁。李嘉荷香入水亭。周亭之北。爲夕陽雙寺樓。聯云。玉沙瑤草連溪碧。曹石路流

泉兩寺分。白居易

夕陽雙寺樓之西。爲雲山閣。雍正間。賀吳郡君召所建。本宋陳升之呂公著舊址。今就其地重建。並因其

舊名。吳郡自爲聯云。供桑梓謳吟。幾處亭臺成小築。快春秋游覽。一隅邱壑是新開。又聯云。水曲山如畫。

羅溪虛雲傍花。甫又龔半千賢聯云。定香生寂聲。空翠滴踈樞。又魏瓜圃嘉瑛聯云。檻前春色長隄柳。閣

外秋聲蜀嶺松。吾鄉劉鄰初敬輿。亦有聯云。宛轉通幽處。玲瓏得曠觀。

賀園始於雍正。而對薇亭。則乾隆間所增建。吳郡題聯云。夜月橋邊留畫舫。春風陌上引香車。又汪文端

聯云。當階瑞色新紅藥。臨水文光淨綠天。吳郡又題踏葉廊聯云。三山入望松筠在。雙樹無言水月新。又

褚空山峻聯云。幾處好山供客座。一川寒月淨塵襟。

東園額。爲王覺斯所題。又題芙蓉泚聯云。花間漁艇近。水外寺鐘微。嵇文恭璜聯云。一泚芙蓉新出水。千



層芳草遠浮山。又程午橋夢星題醉烟亭聯云。隄畔鶯花橋畔月。竹邊歌入柳邊舟。董玉虬文驥亦用李雲書句作聯云。半在山隈半水浚。亦如石屋亦濠梁。

董彤菴文嘗守廣陵題駕鶴樓聯云。竹裏登樓風引三山不去。花間看月溪流四序如春。又潘松谷偉聯云。樓臺突兀排青嶂。鐘磬虛徐下白雲。又王護澤承先聯云。灣過茱萸松竹三霄水碧。階翻雲葉亭臺四序天香。

駕鶴樓之旁爲杏軒。震澤沈廣文斌聯云。檻外山光歷春夏秋冬。萬千變幻都非凡境。窗中雲影任東西南北。去來淡蕩洵是仙居。

李勉以詩畫擅名。與李蟬同時居揚州。稱二李。題凝翠軒聯云。終古招邀山色遠。幾人愛惜月明多。又梁聞山熾書邵康節句於凝翠軒云。雨後靜觀山意思。風前閑看月精神。按凝翠軒扁爲文三橋書。又有祝枝山四面有山皆入畫。一年無日不看花。一聯皆真蹟也。

九峰園在揚州城南。中有深柳讀書堂。聯云。會須上番看成竹。杜甫漸擬清陰到畫堂。薛遠堂後數折爲穀雨。

軒聯云。曉豔遠分金掌露。韓琪夜風寒結玉壺冰。許渾軒旁有延月室。聯云。開簾見新月。李端倚樹聽流泉。李白其

東南爲玉玲瓏館。聯云。北樹遠峰閒卽望。薛能南園春色正相宜。張謂其旁爲雨花菴。門外嵌石刻曰硯池染

翰。聯云。高樹夕陽連古巷。盧綸小橋流水接平沙。劉兼隄上有方亭。額曰臨池。聯云。古調詩吟山色裏。趙嘏野聲

飛入硯池中。杜鵑亭旁有小廳。額曰一片南湖。聯云層軒皆畫水。杜甫芳樹曲迎春。張九齡旁有小廊十餘楹。

額曰烟渚吟廊。聯云階墀近洲渚。高適亭院有烟霞。郭良其東斜廊直入水閣。額曰風漪。聯云隔岸春雲邀翰

墨。高適繞城波色動樓臺。溫庭筠再進為海桐書屋。聯云峭壁削成開畫障。吳融垂楊深處有人家。盧綸

郡城以園勝。康熙間有八家花園。所謂八座名園如畫卷是也。下園在小金山後。即八園之一。舊有王漁

洋聯云梅花嶺畔三山月。宵市樓頭一草堂。畢園亦在小金山後。用竹籬圍大樹數十株。廳事顏曰柳暗

花明村舍。方西疇聯云洗桐拭竹倪元鎮。較雨量晴唐子西。

蜀岡之東。自乾隆二十二年。開蓮花埂新河。兩岸皆構名園。北岸有奇峯。刻白塔晴雲四字。前有高屋三

間。名曰桂嶼。嶼後為花南水北之堂。堂右為積翠軒。堂聯云別業臨青甸。李嶠前軒枕大河。許渾軒聯云疊石

通溪水。許渾當軒暗綠筠。劉憲其前為半青閣。聯云纔見早春鶯出谷。韋莊更逢晴日柳含烟。蘇頌

園中植芍藥處。名為芍廳。廳後於石隙種蘭。名為蘭渚。渚上築室三間。聯云名園依綠水。杜甫仙塔儷雲莊。

馬懷書過此竹勢始大。有小室在竹中。為蒼筤館。聯云竹高鳴翡翠。杜甫溪暖戲鸚鵡。劉長卿

春夏之交。草木際天。中有屋數椽。為林香草堂。聯云歌繞夜梁珠宛轉。羅隱山連河水碧氤氳。陳上美堂之西

有小亭。為歸雲別館。聯云小院迴廊春寂寂。杜甫碧桃紅杏水潺潺。許渾亭之左為望春樓。樓前有圓池。池前

高屋五楹。露臺一方。金碧丹青。陸離照曜。額云小李將軍畫本。為王澍書。聯云萬井樓臺疑繡畫。張九齡千

家山郭靜朝暉甫

自望春樓入夾河。中有高屋數十間。為花潭竹嶼。聯云。天上碧桃和露種。高門前荷葉與橋齊。張萬頃其右

為靜香書屋。聯云。飛塔雲霄半。劉憲書齋竹樹中。李頎再進即如意門。中有清妍堂。聯云。露氣暗連青桂苑。李商隱

春風新長紫蘭芽。白居易堂之後為蒔玉居。有集杜聯云。山月映石室。春星帶草堂。又有閨風堂。聯云。紅

桃綠柳垂簷向。王维碧石青苔滿樹陰。李端又有碧雲樓。聯云。烟開翠幌清風曉。許渾花壓闌干春晝長。溫庭筠

葉竹軒居蜀岡之麓。結竹為之。四圍皆竹。蓋仿王元之竹樓遺意。聯云。竹動疎簾影。盧綸花明綺陌春。王维竹

外為藤花榭。長里許。中為藤花書屋。聯云。雲遮日影藤蘿合。韓翃風帶潮聲枕簟涼。許渾書屋之北為清遠堂。

聯云。窗含遠色通書幌。李賀雲帶東風洗畫屏。許渾

微波峽在兩山中。波路夾轉東山。構微波館。聯云。川源通霽色。皇甫冉楊柳散和風。韋應物

蜀岡之西。由法海橋內河出口。為扇面廳。廳後有石門。通含珠堂。聯云。野香襲荷芰。皎然池色似瀟湘。許渾池

長十餘丈。與新河僅隔一隄。池上為環翠樓。聯云。冉冉修篁依戶牖。包何瞳瞳初日照樓臺。薛逢池高於河隄

上築花籬。為疏櫺間之。使水氣相通。上置方屋。為玲瓏花界。聯云。花柳含丹日。宋之問樓臺繞曲池。盧照鄰熙

春臺。在新河曲處。與蓮花橋相對。聯云。碧瓦朱甍照城郭。杜甫淺黃輕綠映樓臺。劉錫上一層。額曰五雲多

處。聯云。百尺金梯倚銀漢。李頎九天鈞樂奏雲韶。王维臺後即為廿四橋矣。

三賢祠。卽篠園。乾隆乙亥。園就圯。盧雅雨與程午橋。葺而治之。祀歐陽文忠公。蘇文忠公。及國朝王文簡公。復建仰止樓。以夕陽雙寺外。春水五塘西。舊聯懸之。顧南原。藹吉隸書也。旁有蘇亭。額爲鄭板橋書。盧雅雨自製聯云。良辰盡爲官忙。得一刻餘閒。好誦史。繙經。別開生面。傳舍原非我有。但兩番視事。也栽花種竹。權當家園。按今之翠霞軒。卽三賢祠舊殿。先是祠建於康熙間。本祀韓魏公。及歐陽公。太守刁公。王公。蘇文忠公。於平山堂之眞賞樓。以國朝司理王文簡公。太守金公。刑部汪公。爲配。後居民有祀歐蘇二公。及司理王公三賢之請。其時胡庶子澗。督學江南。爲文簡門士。遂有是議。至盧雅雨始行之。而諸賢從祀。後地歸汪姓。人稱爲汪園。又撤三賢神主於桃花菴。以殿爲園中廳事。今桃花菴之神主。又經更易。非其舊矣。

桃花菴之後。爲飛霞樓。聯云。四野綠雲籠稼穡。杜荀鶴九春風景足林泉。薛樓之左爲見悟堂。聯云。花藥繞

方丈。常建清流湧坐隅。元綺樓之後爲桐軒。是軒本祀歐蘇王三賢神主。盧雅雨聯云。一代兩文忠。到處風流

標勝蹟。三賢同俎豆。何人尙友似先生。又鄭板橋聯云。遺韻滿江淮。三家一律。愛才如性命。異世同心。其

旁植牡丹百本。構翠霞軒。聯云。日映文章霞細麗。元種山張屏障綠參差。白居易

蜀岡朝旭。李氏別墅也。中有來春堂。聯云。一片彩霞迎旭日。楊巨源萬條金線帶春烟。施肩吾其東爲曠如亭。

亭外水中有雙流舫。聯云。重檐交密樹。王勃隔岸上春潮。清江過此爲高詠樓。本蘇文忠公題西江月處。周以

垂柳羃歷避暑最宜樓後築屋十餘楹如弓字一曰含青室聯云日交當戶樹蘇頌花繞傍池山祖詠一曰眺

聽烟霞軒聯云松排山面千重翠白居易日較人間一倍長陸龜蒙一曰承露軒聯云池塘月撼芙蓉浪方羅

綺晴嬌綠水洲孟浩然一曰青桂山房聯云從此不知蘭麝貴裴思謙相期共鬪管絃來孟浩然

萬松疊翠在微波峽西一名吳園廳事後多桂又築桂露山房聯云迴風入座飄歌扇李邕冷露無聲溼桂

花王建前有小屋三間顏曰春流畫舫聯云仙扉傍巖嶶皮日休小楹俯澄鮮張祐又清陰堂聯云風生北渚烟

波闊權德輿雨歇南樓積翠來李澄清陰堂之左為曠觀樓凡十二間如弓字聯云烟草青無際周伯琦溪山畫

不如杜牧又涵清閣聯云雲林頗重疊賈島池館亦清閒白居易

西岸矮屋比櫛名為倉房聯云廩庾千箱在薛存誠芳華二月初趙冬曦其前為報豐祠聯云息饗報嘉瑞顏延

年膏澤多豐年曹植祠外戲臺聯云川原通霽色皇甫冉簫鼓賽田神王維杏花村舍中有浴蠶房聯云金屋瑤

筐開寶勝崔日用小橋流水接平沙劉兼其西為分箔房聯云樹影悠悠花悄悄曹唐羅衫葉葉繡重重王建

蜀岡諸山之水宜洩歸河大起樓南以池分之千絲萬縷五色陸離皆從此出謂之練池池之東為染色

房聯云染就江南春水色白居易結成羅帳連心花青童池之西為練絲房聯云軟縠疏羅共蕭屑溫庭

筠霏紅沓翠晚氤氳孟浩然又聽機樓聯云繡戶夜攢紅燭市韋莊縑絲聲隔竹籬間項斯對岸有豔雪亭聯云

楊柳風來潮未落趙嘏梧桐葉下鴈初飛杜牧

蜀岡下陂池。爲得勝湖。程氏種荷處。築水樓三楹。額曰芰荷深處。聯云。山翠萬重當檻出。許白蓮千朵照

廊明。薛又有遠帆亭。聯云。稼收平野闊。杜甫風正一帆懸。王禪亭旁有臺。集許渾句爲聯云。朱閣簾涼疏雨過。

遠山雲晚翠光來。

蜀岡中東兩峰之間。有瀑布。築聽泉樓。聯云。風生碧澗魚龍躍。曹月照青山松柏香。盧綸環綠閣在石隙中。

聯云。碧樹鎖金谷。柳宗元。遙天倚翠岑。章莊。旁有露香亭。聯云。澤蘭侵小徑。王勃。流水響空山。法振。

余過廣陵。游蜀岡。甚草草。所有榜聯。皆未暇省記。祇從畫舫錄中。擇其尤雅者。按地編列。其畫舫錄所未

及載者。惟平山堂伊墨卿太守一聯云。過江諸山。到此堂下。太守之宴。與衆賓歡。語特壯偉。至今不忘。時

墨卿正守揚州也。近閱桃符綴語。又載一聯云。幾堆江上畫圖山。繁華自昔。試看奢如大業。令人訕笑。令

人悲涼。應有些逸興雅懷。纔領得廿四橋頭。簫聲月色。一派竹西歌吹路。傳誦於今。必須才似廬陵。方可

遨遊。方可嘯詠。切莫把穠花濁酒。便當六一翁後。餘韻流風。稍覺詞費矣。

揚州有文選巷。其南爲文選樓。考古者以爲卽曹憲之故宅。憲與魏模公孫羅等。同注文選。樓卽其故址

也。今樓中但奉昭明栗主。實誤。昭明文選樓之不在揚州。觀唐人李頎送皇甫曾游襄陽詩云。元凱春秋

傳。昭明文選樓之句。可見阮芸臺先生。於文選巷之西建家廟。又別構樓。以藏圖書。額曰隋文選樓。爲之

記。伊墨卿題一聯云。七錄舊家宗塾。六朝古巷選樓。

揚州永濟寺有詩僧題聯云。江水滔滔洗盡千秋人物。看閒雲野鶴萬念都空。說甚麼晉代衣冠。吳宮花草。天風浩浩吹開大地塵氛。倚片石危欄。一關獨閉。更何須故人祿米。鄰舍園蔬。

嚴秋槎藥欄詩話載揚州某氏園戲臺對聯云。坐客爲誰聽二分明月簫聲。依稀杜牧。主人休問。有一管春風詞筆。點綴揚州。然則此賢主人也。惜不著其名。卞竹辰都轉云。記得是江都貢生李澄所撰。

海州之雲臺山。卽山海經之郁洲。余以理蝗經山下。而未暇登陟。陶雲汀宮保按部胸陽。陟其巔。撰聯語。極壯麗云。海甸湧名山。烟複雲回。位業真靈參五嶽。洞天開福地。陽舒陰響。馨香瑞應啓三元。又題山中關帝廟聯云。義氣干霄。近指白雲開覺路。威聲走海。遙憑赤手挽洪流。又題九龍將軍廟云。倚樹論功名。爽籟流聲清澗壑。在田占利用。甘膏灑潤普桑麻。按山中舊有常建極題聯云。世外憑臨。一面峰巒三面海。雲中結構。二分人力八分天。

陶宮保云。其鄉資江南岸裴公亭。有郭頑石題聯云。代表公稱一日主人。風月江山。與此老平分千古。到石上問三生舊跡。宰官仙佛。想當年定許重來。

福州鼓山喝水崖之側。削壁深澗中。有磨厓大字一聯云。爵比郭令公。歷中書二十四考。壽同廣成子。住崆峒千三百年。字勢雄偉。每字高寬將及二尺。余嘗搨得一紙。竟無懸挂之處。按吳炯五總志云。李義山嘗謂溫飛卿曰。近得一聯。遠比邵公。三十六年宰輔。未得偶句。溫應聲曰。何不云。近同郭令。二十四考中。

書記得宋人亦以二十四考中書令對萬八千戶冠軍侯爲巧此則以神仙對富貴語更闊大矣

福州鼓山之湧泉寺建自唐時蔚然名利而楹聯多彼氏家言茲錄其稍雅者如山門彌勒座聯云日日攜空布袋少米無錢却剩得大肚寬腸不知衆檀越信心時用何物供養年年坐冷山門接張待李總見他歡天喜地請問這頭陀得意處是甚麼來由法堂聯云於一毫端現寶王刹坐微塵裏轉大法輪齋堂聯云五夜工夫鐵脊梁將勤補拙二時粥飲金剛屑易食難消

福州小西湖東偏開化寺倚城臨水擅湖壩之勝黃莘田先生集句聯云桑柘幾家湖上社芙蓉十里水邊城最爲雅切自然

余嘗再游武夷山徧歷寺觀而未得一佳聯惟天游峰前之一覽臺楹柱有遺世獨立與天爲徒一聯頗與現景相稱又小桃源徑口有石門兩旁鑿一集句聯云喜無樵子復看弈怕有漁郎來問津皆忘却何人所撰隨園詩話載一覽臺庭柱有毛大周聯云世間有石皆奴僕天下無山可弟兄則未之見也

邵武郡城中詩話樓祀嚴滄浪先生嚴本邵產也朱幼芝郡丞景英聯云千秋大雅扶輪手一片寒泉薦菊心葉筠潭學使聯云百代詩材歸品藻千秋傑閣傍溪山皆鑿貼然不若朱竹君先生筠一聯云隱釣風分七里瀨品詩意到六朝人雅切其姓且老氣紛披也



此页空白

# 楹聯叢話

## 卷八

### 格言

章鉅少承庭訓。先資政公。每作書。必爲章鉅講明其義。嘗自署書室曰。四勿齋。謂無益之念勿起。無益之事勿爲。無益之言勿說。無益之物勿食也。每爲人書楹帖。必用格言。謂章鉅曰。人來乞書。而不以格言應之。卽所謂無益之事也。一日與先伯父奉直公。爲人分書楹帖。先伯父書一聯云。欲知世味須嘗膽。不識人情只看花。公亦書一聯云。非關因果方爲善。不計科名始讀書。呼章鉅語之曰。汝知此兩聯意義之深厚乎。汝伯父所書。乃涉世良方。我所書。乃自修要旨也。終身用之不盡矣。

通行楹帖有云。謙卦六爻皆吉。恕字終身可行。先資政公最喜述之。謂章鉅曰。此是經訓。非僅楹聯而已。又集四書語示章鉅曰。敏則有功。公則說淡而不厭。簡而文。此兩語。學古服官。淑身涉世。皆宜。亦可當座右銘也。

余髫齡卽受業於孟瓶庵師。超然之門。師由吏部郎乞養歸里。時年方四十。掌鰲峰講席十餘年。終老於

家宅後有亦園亭爲讀書靜坐之地。日以懲忿窒欲自課。製楹聯云。談性命則先賢之說已多。何似求之踐履。學考訂則就衰之年無及。不如返諸身心。

七修類稿云。宏治間。吏部尙書三原王公恕。署門曰。仕於朝者。以饋遺及門爲恥。仕於外者。以苞苴入都爲羞。嘉靖間。藩司參議揚州錢公嶸。亦自撰一聯。使所屬衙門皆帖焉。句云。寬一分民受一分見祐鬼神。要一文不值一文。難欺吏卒。王之冢宰。近世難及。而錢忤當道。不久去。余謂二對近人不知。前乃真西山奏疏。後亦古語也。惜忘之。

楊文貞士奇。有子爲橫於鄉。有密友自楚中來者。每述其惡款。文貞常戒之。一日書一聯示之曰。不畏官司。千狀紙。只怕鄉民三寸刀。毫不知改。後卒以事伏法。人謂文貞此聯。可爲巨族藥石。

呂新吾先生有銓署楹帖云。直者無庸我力。枉者我無庸力。何敢貪天之功。恩則以奸爲賢。怨則以賢爲奸。豈能逃鬼之責。又公署楹帖云。青天下鑒此心。敢不光明正直。赤子來游吾腹。願言豈弟慈祥。附見呻吟語治道門。

茶餘客話云。申臬盟涵光。自見蘇門先生後。大書於門曰。真理學從五倫做起。大文章自六經分來。又題書室聯云。學古之志未衰。每日必擁書早起。干世之心已絕。無夕不飲酒高歌。觀此。則飲酒高歌。正非易易矣。

桂林府之秀峰書院。爲嶺西人文萃集之區。乾隆間。武緣劉靈溪太史定道聯云。於三綱五常內。力盡一分。就算一分真事業。向六經四子中。尙論千古。纔識千古大文章。呂月滄山長稱之。余謂此卽從申臆盟。真理學從五倫做起。大文章自六結分來。二語。衍而暢之耳。

吾閩之鰲峰書院。有林青圃先生題聯云。反己有真修。須留神檢到心身界上。加工無別法。務著力打開義利關頭。雅似先儒語錄。

王少湖敬臣云。有一先輩揭千字文爲齋室楹聯。而各加注焉。罔談彼短之下。注云。我亦有短。靡恃己長之下。注云。人各有長。此語。吾人皆當服膺也。

湯文正公答沈荳岸書云。李文節嘗言翰林官能壞人。衙門冷則易苟。體面好則易傲。無政事則易懶。無風波則易放。署中堂聯云。人重官非官。重人德勝才。毋才勝德。真座右銘也。

魏敏果公象樞。由左僉都御史。洊升戶部侍郎。一歲五遷。愈用警惕。自題一聯云。欺人如欺天。毋自欺也。負民卽負國。何忍負之。載年譜中。

柳南隨筆云。無錫杜紫綸太史詔。由詞館假歸。二十年林居。游名山。殆徧。乾隆丙辰。游西湖歸。作一絕句。授其子曰。此卽我遺令也。未半月。以微疾終。詩云。半生空自逐浮華。放浪湖山亦大差。分付兒曹無別語。讀書爲善做人家。卒之前三日。爲其七十誕辰。張宴廳事。大書一聯。榜於柱。出句爲教子課孫完我分。對

句卽用所作詩結語云。

隨園詩話補遺載或題書齋聯云。無求便是安心法。不飽真爲却病方。又過潤州時。見僧壁聯云。要除煩惱須成佛。各有來因莫羨人。又過九華寺見一聯云。非名山不留仙住。是真佛只說家常。亦彼法中之格言也。

武進趙恭毅公申喬論學以不欺爲本。官浙藩時。自署堂聯云。君不可負。只是心難負。負心者不容於堯舜。天不可欺。誰言人易欺。欺人者如見其肺肝。又湖南院署聯云。但願民安若堵。何妨署冷如冰。

姚雪門頤督學湖南時。自題使院云。虧他人便虧自己。須記朝齏暮鹽。我亦寒士。要公道。還要虛心。試看畹蕙畝。薰楚故有材。又聯云。才要真愛。名要略愛。總之己要自愛。天不可欺。君不敢欺。實於心不忍欺。吳稷堂省闈亦督學湖南。有聯云。畏簡書。並畏人言。常以無欺盟夙夜。正文風。先正士習。惟將有恥勗膠庠。吾閩沈心齋涵學使一聯云。爾無文字當安命。我有兒孫要讀書。簡而有味。翁覃溪師督學山左時。亦錄此十四字。懸於堂楹。並爲之跋云。

江南各州縣廳事多同一楹聯。據王朗川言行彙纂。乃王玉池令金鄉時所作。句云。眼前百姓卽兒孫。莫言百姓可欺。當留下兒孫地步。堂上一官稱父母。漫說一官易做。還盡些父母恩情。語質意真。妙在人人共曉。若堅瓠集所載胡可泉知蘇州。揭一聯于門外云。相面者算命者。打抽豐者。各請免見。撐廳者鋪堂。

者。撞太歲者。俱聽訪拿。則未免村氣太甚矣。

余初歷外任。卽守荊州。嘗於廳事漫題一聯云。政惟求於民便。事皆可與人言。石曉田郡丞照。逢人述之。未及一年。擢淮海監司。實筦河防。非所習也。因題廳事云。到此真成以政學。相逢但願由中行。萬廉山郡丞承紀。亦亟稱之。

金德山中丞。在粵西藩任時。作官廳對聯云。坐此似同舟。宦情彼此關休戚。須臾參大府。公事何妨共酌。商用意深厚。有名臣風味。余至粵西。訪其聯。已不可得矣。中丞復誦其鄉人徐公士林作臬司題庭柱云。看階前草綠苔青。無非生意。聽牆外鴉啼鵲噪。恐有冤魂。亦仁人之言。若宋牧仲題豫章署齋云。雲白峰青。煥發廬山真面目。蛟騰鳳起。挖揚滕閣舊風流。詞雖美而意近夸矣。

李恭毅公湖。任通永觀察時。題廳事一聯云。人苦不自知。願諸君勤攻吾短。弊去其太甚。與爾輩率由舊章。

聞廣州郡守署中一聯云。不要錢原非異事。太要好亦是私心。此所謂深人無淺語也。惜忘却何人所撰。陳最峰景登。牧晉州。自題廳事云。頭上有青天。作事須循天理。眼前皆瘠地。存心不刮地皮。蔣南莊守潁州。自題廳事云。人原是俗。非關吏。仕豈能優。且讀書。陳子瀾尹來賓。亦自題廳事云。事出於公。諸君何妨。至室。吏原非俗。我輩還要讀書。皆真樸有味。

余小霞題佐雜官廳聯云。此間只可談風月。相對何須問主賓。渾成典切。於佐雜官廳尤有味。甘肅藩署官廳。有薩湘林集經語聯云。有孚在道明功也。同寅協恭和衷哉。

桂林撫署二堂。有同年趙文恪公慎聯云。爲政不在多言。須息息從省身克己而出。當官務持大體。思事事皆民生國計所關。文恪由桂林擢督吾閩。兩地皆有遺愛。至今頌聲不衰。讀其楹聯。堪信其言行相顧也。

桂林撫署小廳中。有百文敏公聯板云。行所常行。不爲己甚。慎之又慎。未敢卽安。跋云。此庚申歲。集古人語以自勗者。余自京尹出膺外吏。所至不一載。必有遷除。以故湘南浙右。黔嶺滇池。次第轉徙。履任之暇。卽手書榜諸楹間。以爲座右之銘。去冬於五華薇署。甫刻此聯。翼日而拜粵西之命。涉歷愈深。策惕愈甚。請事斯語。殆將終身。以之爲封圻報稱也。可以之爲密勿陳謨也。可嘉慶甲子。重書於桂林節署之懷清堂。

程梓庭祖洛撫吳時。於官齋中自書一聯云。醴泉無源。芝草無根。人貴自立。流水不腐。戶樞不蠹。民生在勤。又一聯云。無多事。無廢事。庶幾無事。不徇情。不矯情。乃能得情。

桂林呂月滄瑣郡丞。隨其父在戍所十五年。始赦歸。成進士後。觀政浙中。初知慶元縣。有大堂一聯云。我也曾爲冤枉痛入心來。敢糊塗忘了當日。汝不必逞機謀爭個勝去。看終久害著自家。任奉化縣。有二堂

聯云。民心即在吾心。信不易孚。敬爾公。先慎爾獨。國事常如家事。力所能勉。持其平。還酌其通。梁山舟先生贈聯云。蒼生自是關吾分。儒者真宜做此官。

聞前明王文成公行部所至。必令二人肩二高脚牌前導。大書云。求通民情。願聞己過。議者以爲客氣不虛也。吾友林少穆爲江蘇廉訪時。嘗書此作大門楹聯是矣。

余小霞乙庚筆記云。州縣每遇命盜案出。必有蠹役陰嗾所獲之犯。使供某某爲同盜。則皆素封且慙懦可魚肉者。被供者率以賄免。而役之囊充焉。謂之開花。四川某尉署中有自撰楹帖云。若使子孫能結果。除非盜賊不開花。可謂惠出一尉矣。

吾鄉林青圃先生。歷官中外。亮節高風。一宅數畝外。囊橐無餘。余黃巷之舊居。卽先生故宅也。嘗自榜楹柱云。庭餘嘉蔭。室有藏書。天下事隨處而安。卽此是雕梁畫棟。卜得芳鄰。居成美境。黃巷又名新美境田舍翁問心已足。漫言應列鼎鳴鐘。

粵東黃翼堂紹統訓導石城。學者稱仰山先生。嘗自署楹帖云。爲倫類中所當行之事。作天地間不可少之人。

嘗見汪退谷先生書楹帖云。汲水澆花。亦思於物有濟。掃窗設几。要在予心以安。又梁山舟先生書楹帖云。能受苦。方爲志士。肯吃虧。不是癡人。



蔣心餘先生宅中大門聯云。一代翰林風月手。六朝蘭綺謝王家。聞是彭文勤公所贈句。其廳堂各聯。悉出先生所撰。皆格言也。大廳聯云。至樂莫過讀書。至要莫如教子。寡智乃能習靜。寡營乃可養生。內堂聯云。欣戚相同。爲人莫想歡娛。歡娛卽是煩惱。福命不大。處世休辭勞苦。勞苦乃得安康。饗堂聯云。富貴無常。爾小子勿忘貧賤。聖賢可學。我清門但讀詩書。又聯云。垂訓一無欺。能安分者。卽是敬宗尊祖。守身三自反。會喫虧者。便爲孝子賢孫。

紀文達師曰。門人耿守愚。喜與人爭禮數。常言士不貧賤驕人。則崖岸不立。恐益爲人所賤。余曰。此田子方之言。朱子已駁之。卽就其說而論。亦謂道德本重。不以貧賤而自屈。非毫無道德。但貧賤卽可驕人也。先師陳白崖先生。嘗手題一聯於書室曰。事能知足心常愜。人到無求品自高。斯真探本之論。兩言可以千古矣。

吳門故家廳堂有一聯云。必孝友乃可傳家。兄弟式好無他。卽外侮何由而入。惟詩書常能裕後。子孫見聞止此。雖中材不致爲非。不知何人所撰。訓詞深厚。當家家揭於堂楣。余小霞自述其舊居廳事聯云。兄弟睦。家之肥。子孫賢。族乃大。義亦闊。大。

廣州香山書院聯云。諸君到此何爲。豈徒學問文章。擅一藝微長。便算讀書種子。在我所求亦恕。不過子臣弟友。盡五倫本分。共成名教中人。

姚鐵松中丞守武昌時。撰廳事聯云。筆下留有餘地步。胸中養無限天機。蓋因舊句而改首二字也。石天基傳家寶中有一聯云。言易招尤。對朋友少說幾句。書能益智。勸兒孫多讀幾行。真傳家寶也。相傳桂林陳文恭公。自題其里第一聯云。惜食惜衣。非爲惜財緣惜福。求名求利。但須求己莫求人。或云是武進劉文定公。綸所撰。然余嘗見梁山舟學士手書此對。又云是文衡山語也。

汪龍莊云。余治刑名二十餘年。行將從宦。甥蘭啓將事讀律。請業於余。因就隣昔所究心者。書以代口。題曰佐治藥言。並撤寓齋中。舊聯授之。曰。苦心未必天終負。辣手須防人不堪。可謂仁恕矣。

彭文勤公少與蔣心餘同學。有題書房舊聯云。何物動人。二月杏花八月桂。有誰催我。三更燈火五更雞。今此聯熟於人口。而不知其爲文勤所製也。

丁自菴善慶督學粵西。誨人必先器識。而後文藝。自撰一楹帖鏤板。頒之庠序。句云。人生窮達豈能知。趁早須立此。可爲聖賢。可對帝天之志。客告是非且莫管。得閒要讀我有益身心。有關世道之書。亦可爲士林鍼砭矣。

嘗見那文毅師手書贈顧藹亭工部聯云。鷹隼入雲。矚所向。驂騑得路。慎於平。工部蓋以才自見者。故勗之如此。宦途中客。皆當服膺也。

于文襄公敏中。嘗治蔬圃。自題圃門聯云。今日正宜知此味。當年曾自咬其根。鄂文端公鄂爾泰。亦有菜

圃長聯云。此味易知。但須綠野親身種。對他有愧。只恐蒼生面色多。用意各別。皆格言也。

近人集蘭亭序字作楹帖。有極自然成格言者。如與世不言人所短。臨文期集古之長。人有不爲斯有品。已無所得可無言。盡日言文常不倦。與人同事若無能。一人知己亦已足。畢生自修無盡期。相知當不在形跡。修己豈可殊初終。清言每不及世事。靜坐可以修長生。知足是人生一樂。無爲得天地自然。每臨大事有靜氣。不信今時無古賢。與賢者游信足樂。集古人文亦大觀。信古不遷。也是昔賢知己。流陰若寄。無爲今世閒人。又有集聖教序字者。如大本領人。當時不見有奇異處。敏學問者。終身無所爲滿足時。又有集爭坐位帖字者。如修身豈爲名傳世。作事惟思利及人。大懼與衆人同數。須知保晚節尤難。名美尙欣開過友。業高不廢等身書。業高乎衆意豈滿。澤及於人功不虛。閱鶴初曰。嘗見一楹聯云。世間惟有讀書好。天下無如喫飯難。語亦沈著。惜未知作者爲誰。又桑葚甫先生授徒。輒勸人加餐食。案側懸一聯云。放開肚皮喫飯。抖起神氣讀書。想見豪情。然不若徐連峰。立定脚跟。撐起脊。展開眼界。放平心。爲個儻有致也。記余嘗薄遊永嘉。謁陳觀樓先生。昌齊於署齋。見自書一聯云。豎起脊梁立行。放開眼孔觀書。似更老氣無敵。

程月川中丞含章。每莅一任。必以自書大字。墨搨一聯。懸挂廳事。蓋讀書志在聖賢。爲官心存君國。十二字。款云。敬書朱紫陽夫子家訓語。按此是我朝崑山朱柏廬先生用純所撰居家格言。自黎明卽起。至庶

乎近焉。凡五百一十字。此其末段結語。通篇語皆切實。而此二句。尤爲賅括。允堪懸作座右銘。今人誤以  
此篇爲朱子所作。中丞亦未加深考耳。中丞又嘗書好鳥枝頭亦朋友。落花水面皆文章兩語。爲書室楹  
聯。旁亦注云。書朱紫陽夫子句。不知此乃南宋翁森所作四時讀書樂詩。並非朱子。中丞亦沿訛而不知  
也。

此页空白

# 楹聯叢話

## 卷九

### 佳話

柳南隨筆云。嚴恪字心萱。文靖公之父也。文靖公已晉尙書。而封翁猶康健。自書堂中一聯云。有子萬事足。我子作尙書。足而又足。七十古來稀。我年近大耋。稀而又稀。

松窗筆乘云。尤悔菴侗。著臨去秋波那一轉制義。流傳禁中。世祖知其爲徐立齋業師。因取觀之。歎爲真才子。及官翰林。嘗偕諸儒臣進平蜀詩文。聖祖見其名。曰。此老名士。悔菴以此二語刻堂柱。左曰。章皇天語。右曰。今上玉音。極文人之榮。

王文成公之父海日先生華官。至南京吏部尙書。致政時。值文成公平宸濠。先生自題書室一聯云。看兒曹整頓一作轉乾坤。任老子婆娑風月。如此福分。如此襟期。自當隻千古而無對。我朝桐城張文端公。及見子文和公晉揆席。自題門聯云。綠水青山任一作讓老夫消磨一作遙歲月。紫袍金帶一作紫宸黃閣看吾兒燮理陰陽。正襲海日語。按海日語。又似從謝太傅對客語中化來。特不如其蘊藉。而張語則風味又減矣。

無錫緒文敏公曾筠及文恭公父子相繼爲宰相。門聯云：王聖臣賢兩朝宏碩輔。父先子後一氣轉洪鈞。桐城張文端文和亦父子宰相。門聯云：二世三公太平宰相一堂五代富貴神仙。按我朝韋平濟美者滿洲人爲多。惟尹文恪公尹泰。尹文端公尹繼善。慶文恪公慶桂。三世蟬聯爲最盛。漢人則山左劉文正公統勳。文青公壻。及嵇氏張氏皆以父子相繼。此外無聞焉。記宋尤玘萬柳溪邊舊話載其家自文獻輝文簡。委科名接武。嘗築圃西湖。度宗幸其堂。御筆題楹間一聯云：五世三登宰輔。奕朝累掌絲綸。朝野榮之。知盛事亦自古所僅見矣。

殷彥來譽慶贈王漁洋一聯云：天下文章莫大乎是一時賢士皆從之游。其時亦惟漁洋足以當之。聞錢名世初游京師。除夕以聯送漁洋云：尙書天北斗。司寇魯東家。由是知名。後送權貴句云：分陝旌旗周太保。從天鐘鼓漢將軍。因之謫官。

科第世家以江南爲盛。我朝溧陽史氏。崑山徐氏。兩家祠堂長聯熟在人口。不但今世所稀。蓋自古亦罕遇矣。按史氏聯云：祖孫父子兄弟叔姪。四世翰苑蟬聯。猶有舅甥翁壻。子午卯酉辰戌丑未。八榜科名鼎盛。又逢己亥寅申。攷溧陽史氏自康熙丁未。史鶴齡始入翰林。至壬戌。其子史夔繼之。庚辰。其孫史貽直繼之。乾隆乙丑。其姪孫史貽謨繼之。己酉。其曾孫史奕簪繼之。此外則其壻金壇于小謝。其甥于敏中。丹徒任蘭枝。陽湖管幹珍。並前後爲翰林。世謂海內無第二家也。若次聯所云。則史鶴齡爲丁酉舉人。丁未

進士。史夔爲辛酉舉人。壬戌進士。史夔之弟史普爲己卯舉人。庚辰進士。史隨爲戊子舉人。己丑進士。史貽直爲己卯舉人。庚辰進士。史貽謨爲甲子舉人。乙丑進士。其弟史貽簡爲癸卯舉人。□□進士。又史鶴齡之曾孫史奕簪爲己酉舉人。戊辰進士。史光啓爲壬申舉人。史應曜爲丙午舉人。八榜科名。彬彬可考。而合史光啓之壬申計之。實爲九榜。惟己亥寅三榜尙闕有間。則末語又逢己亥寅申云云。亦尙須細考耳。

崑山徐氏祠堂聯云。教子有遺經。詩書易春秋禮記。傳家無別業。解會狀榜眼探花。按徐健菴尙書乾學。係順治甲午拔貢。庚子舉人。康熙庚戌探花。徐果亭閣學秉義。係康熙己酉舉人。癸丑會魁探花。徐立齋相國元文。係順治甲午經魁。己亥狀元。並無解元會元榜眼。聯語亦不過渾括言之。然三兄弟並登鼎甲。並列崇班。不可謂非難能可貴耳。至上聯所云。語乃質實可風。健菴尙書著有讀禮通考。果亭閣學著有經學識餘。立齋相國著有含經堂集。而傳是樓藏書之富。甲於寰區。教子遺經。豈虛語哉。

徐健菴先生。以大司寇謝病歸。御書光燄萬丈扁。以寵其行。時人贈聯云。萬方玉帛朝東海。一點丹誠向北辰。

紀文達師曰。先師介野園先生。嘗四主會試。四主鄉試。其他雜試。殆不可縷數。嘗有恩榮宴詩云。鸚鵡新班宴御園。摧頽老鶴也乘軒。龍津橋上黃金榜。四見門生作狀元。于文襄公贈以聯云。天下文章同軌轍。



門牆桃李半公卿。可謂儒者之至榮矣。

溧陽史文靖公貽直七十壽辰。獻聯者充門。惟許刺史佩璜云。三朝元老裴中令。百歲詩篇衛武公。及袁簡齋先生云。南宮六一先生座。北面三千弟子行。爲公所許可。

乾隆末。漳浦蔡文恭公。予告歸里。小住福州。所主者爲余戚黨家。時余方齠髻。嘗從人於屏後竊覘之。記得先資政公言。有一客贈聯甚莊重切實。句云。主恩前後三旋里。天語丁寧再入朝。似是中朝達官所製。彼時但能述其語而已。不能舉其名矣。

乾隆六十年中。各直省奏報壽民壽婦。五世同堂。親見七代八代者。屢見邸抄。然未有如長洲蔣氏之盛者。乾隆丙申春。內閣中書應焜之祖文源。年九十。配張氏。年八十九。翰林院編修元益之祖文涵。年八十九。配顏氏。年八十八。俱五世同堂。親見八代。應焜元益。同日給假回籍祝壽。海內榮之。時徐雨峰巡撫。士林製聯稱祝云。登甲登科。七代兒孫繞膝。難兄難弟。九旬夫婦齊眉。洵盛事也。

嘗見劉文清公爲紀文達師書聯云。兩登耆宴今猶健。五掌烏臺古所無。蓋吾師自撰句也。梁山舟學士贈聯云。萬卷編成羣玉府。一生修到大羅天。

英煦齋師恩福堂筆記云。先文莊公。掌容臺者十二年。與達香圃。紀曉嵐。劉青垣。三宗伯同事。余於嘉慶庚申。追隨三先生。亦列春官。迨癸酉。重任時。乃鐵冶亭。王春圃。兩先生爲大宗伯。秀楚翹。胡西庚。汪瑟菴。

爲少宗伯。鐵出王門。胡汪秀三公及余。前後皆出鐵門。其時有春官六座六師生之諺。因製聯留署。句云。典禮奉寅清。粉署重來。愧說箕裘延世業。同堂聚師弟。薪傳遞衍。始知桃李屬春官。按是年適爲王春圃先生八十壽辰。合署稱觴。屬章鉅爲儷體序文。中有官分兩座。座中以座主爲尊。賓列四門。門下之門生。疊至旬時。春圃哲嗣蓮甫先生。亦繼爲少宗伯。每對同官亟誦之。

恩福堂筆記又云。曹文敏公文壇。以右庶子視學江西。適曹文恪公家居。獻一聯曰。韓愈官爲右庶子。莊周篇有大宗師。彭文勤公視學浙江時。杭州守爲邵公齊熊。公贈聯曰。杭州太守湖山美。康節先生安樂窩。皆可云典切。前輩於應酬文字。不苟如此。

梁文莊公詩正。旣相後。嵇文恭公贈聯云。秋圃黃花韓相國。春風紅杏宋尙書。臺閣頌揚語。又何其妍麗也。

山左劉文清公在相位。其太夫人九十壽辰。仁廟賜壽。備極恩榮。阮芸臺先生撰聯寄祝云。帝祝期頤。卿士祝期頤。合三朝之門下。亦共祝期頤。海內九旬真壽母。夫爲宰相。哲嗣爲宰相。總百官之文孫。又將爲宰相。江南八座太夫人。蓋其時文清以兩江總督。遙執相權。而信芳先生已官太宰也。此與崑山徐氏溧陽史氏家祠中聯。皆無第二家足以當之。

直隸真定府試院後樓五楹。合祀關帝文昌。乾隆中。吳白華先生省欽視學。適奉召回京。代者卽令弟稷

堂先生在真定交替時白華先生撰一聯云文武一龕如在上弟兄同節此登高蓋恰值重九日可云巧合。

慶蕉園宮保慶保爲廣東將軍時王省厓尙書鼎贈聯云恩衍章平祖父子孫三宰相家傳忠孝弟兄叔伯四將軍巨製鴻題足以稱其家乘。

揚州喬椿齡字樗友善易數雖至友不輕爲卜詩文之格唐以下不屑仿也其弟子阮芸臺先生已貴未嘗通一札及先生視學山左禮請衡文乃往卒於青州嘗榜其齋云四方名士皆知己八座門生正少年英煦齋師六十壽辰適近七夕有呈壽聯者最著稱人口而忘却何人所作句云四海仰雙星六秩衍大撓甲子二難躋八座九天錫媧氏笙簧時公子奎耀奎照皆躋貳卿內府錫樂部爲壽云。

阮芸臺先生五十歲時在漕帥任衍聖公孔治山先生贈以壽聯云鼎甲連科皆屬公門桃李下淮揚列郡更開軍府梓桑間蓋先生揚州人正漕帥轄下也。

阮芸臺先生於道光十八年以大學士引年予告返居廣陵里第瀕行奉恩諭有怡志林泉之語舉朝羨之潘芝軒相國贈聯云四海具瞻尊爲山斗同朝欽羨望若神仙。

吳興沈均堂世楓由湖北方伯告歸其子希人學士官內閣亦請假歸省有同人以聯贈行云鶴鳴在陰其子和鴻飛遵渚我公歸。

朱建三生於七月七日。所居之里名百花巷。李笠翁壽以聯云。七夕是生辰。喜功名事業從心。處處帶來天上巧。百花爲壽域。羨玉樹芝蘭繞膝。人人占却眼前春。

笠翁五十歲生男。自題楹聯志喜云。一生好事無雙日。百歲閒身得半時。

康熙間有某相國家。擅園林之勝。相國亦雅有文望。李笠翁贈之聯云。朝罷獨行春。踏去不知三徑遠。公餘時讀史。坐來便覺五雲多。

李笠翁贈李坦菴相國聯云。名世天生五百年。爲福黎民。特使早居黃閣上。元老人稱二十載。宜增華髮。誰知正在黑頭時。蓋相國年未及三旬。卽登揆席也。

李笠翁有壽方太夫人七十聯。自爲之序云。夫人爲何芝嶽相國之女。方坦菴宮詹之配。樓岡學士。邵村侍御。與三孰四世五孝廉。暨謙六任子之母。茹齋奉佛。兼禮列仙。句云。出宰相之門。入宮詹之室。居學士侍御。孝廉胃子之堂。足不履民家戶闕者。七十年於此。繼麻姑之跡。追王母之蹤。證如來觀音文殊普賢之果。口偏食人間烟火者。八千歲猶然。

又壽陳太夫人八十聯。自爲之序云。此蕉鹿先生之母也。時畫錦歸來。專爲稱觴一事。太夫人七十時。令子猶爲外吏。今則內擢司農矣。句云。踰古稀又十年。喜當時令子高遷。幾度錦衣歸闕。去期頤尙廿載。看後茲文孫繼起。滿堂牙笏頌岡陵。

梁文莊公乞假養親。賜萊衣晝永四字扁額。又賜詩云：翻祝還朝晚，卿家慶更深。天語肫摯如此，可謂備極恩榮。嵇文恭公贈聯云：花宴瓊林，溫仲舒由大魁秉政，堂開畫錦，王文獻以宰相養親，亦莊麗得體。無錫鄒小山宗伯一桂，有門生某，弟兄皆詞林，二子並登甲科，而其母則以側室受封者也。七十誕辰，求公撰壽言，公令諸門生擬之，俱不稱意，蓋不難於頌揚，而難於得尊者之口氣也。公乃自撰聯句云：有子有孫，都成名進士，多福多壽，是謂太夫人。於是執筆者咸歎服。又張船山太守問陶爲吳穀人先生錫祺之太夫人撰壽聯云：惟善人現壽者相，有令子爲天下師，亦質樸有味，時先生方爲國子祭酒也。隨園詩話補遺云：乾隆庚寅，余在杭州，訪蔣茗生太史，聞寓湖州，太守張公處，卽具名紙往投，蔣未見，乃先有一峩冠者拱出，心知是太守，素無交，而其意甚親，未免愕然。太守笑曰：先生不識我耶？我早識先生，並識先生之夫人，貌作何狀？令姊貌作何狀？歷歷如繪，余益驚問故。太守曰：當年公作翰林，住前門外橫街，我年九歲，與公陸氏二甥同在蒙館讀書，每放學後，嬉游公家，公姊及夫，夙梳頭，常在旁，手進梳篋，公過，猶呼餅餌啖我，公竟忘耶？余謝曰：事實未忘，不料昔日聖童，今爲公祖也。惜二甥早亡矣。相與唏歔者久之。從此遂別，更二十年，太守之子惠堂孝廉來，權知溧水，又是余改官江南第一次捧檄之所，重重春夢，思之慙然。其前事迹，已作古詩一首，贈蔣梓入集中矣。今年衰不能再贅，乃作一聯，留惠堂廳事云：後我卅年，同爲此地親民宰，通家兩代，曾見而翁上學時，蓋實敍平生佳話，非敢挾長也。

梁山舟學士於嘉慶十六年冬患髮疽危篤中見有人持楹帖入其句云萬里烟雲開瘴戶一天風雨護神鑪病遂愈因自號新吾長翁後九十誕辰夫婦齊眉清健張岐山問萊贈壽聯云人近百年猶赤子天留二老看元孫時人稱其工切

梁山舟學士最工爲壽聯得之者無不樂其雅切如壽吳太夫人八十云八座起居令子宮袍慈母綫重闌燕喜南陽仙菊北堂萱自注令子方開藩河南故用南陽菊事又壽嵇文恭公八十云螭均舊齒符天壽鴈塔新題冠佛名時公以萬壽年生日重宴瓊林也又壽王述菴侍郎昶八十云盾鼻弓衣行世文章皆事業屏風團扇還山官府卽神仙又壽許小范六十云甲子從頭開上壽神仙自古有曾孫時許已有曾孫也又壽趙次乾云東方先生善諧謔南極老人應壽昌又壽汪西瀨沆云國門舊價千金重鄉社新圖九老尊又壽博羅蘇明府云會翻李委南飛曲曾領朱明大洞天又壽博羅成明府云鼓琴自擅寰中手飛鳥來看海上山又壽姚宗伯是年與千叟宴者云履鳥殿庭千叟上台光角亢兩星間又壽陝西何中丞未及年而與千叟宴者云家傳玉節仍分陝天賜瓊筵預杖期又壽袁簡齋先生云藏山事業三千牘住世神明五百年又壽直隸梁制軍云旌麾畿甸尊宗袞杖履耆英壽國楨又壽閩中丞奉使本籍識獄者云玉節承天南斗靜錦衣行晝使星明又壽尹文端之子爲福州將軍者云龍門世澤華附盛鯨海威名草木知

廣東馮潛齋成修。幼牧牛。夢有持扇爲障日者。扇上有貴州學政四字。因奮志讀書。年三十四。始遊庠。逾年登賢書。聯捷成進士。由庶常改部曹。典蜀試。又典嶺試。嗣督學貴州。旋罷歸。好論文。有馮八股之目。年九十餘始卒。乾隆壬寅八表。與夫人同庚。康健無恙。屆結褵周甲之期。親友門生。駢集稱慶。重行花燭。交拜之禮。自署門聯云。子未必肖孫未必賢。屢忝科名。只爲老年娛晚景。夫豈能剛妻豈能順。重諧花燭。幸邀天眷。錫遐齡。至乾隆壬子。重赴鹿鳴。洵美談也。

趙甌北先生。早賦歸田。不與外事。惟以著作自娛。劉石菴先生手書贈聯云。務觀萬篇。半皆歸里作。啓期三樂。全是達生言。趙得之甚喜。

顏魯輿伯謙。巡撫滇南。署堂聯云。彩雲見處。先後六十年中。三世建牙。宜何如効涓埃。以肯堂構。淇露承來。縱橫八千里外。百蠻稽首。所願與興禮讓。而廣農桑。王霞九觀察贈芳云。出語公自紀實。殆黔國公所僅見者。

廬陵劉古菴。上舍宗輝。買舟滕王閣。爲舟子書聯云。有客臨舟懷帝子。何人下榻學陳公。時商邱陳望之。江西巡撫見之。笑曰。奇士也。命延之入。且曰。爲君下榻矣。一聯之遇合亦奇。

陶雲汀宮保。開府大江南北者。十有餘年。名位兼隆。吏民翕服。潘功甫舍人。有祝五旬壽聯云。能文翰林。能言御史。能任封疆贊翊聖化。有真經濟才。公論出朝士口。爲國籌運。爲民興利。爲我鄉里表彰賢達。得

大光明壽妙法現宰官身。又齊梅麓太守祝六旬聯云。八州都督。五柳先生。經濟文章。千古心傳家學遠。六甲初周。一陽來復。富貴壽考。百年身受國恩長。蓋宮保誕辰。在黃鐘之月也。又程春海侍郎寄贈一聯云。海涵地負之才。文章博辨。議論雄偉。春溫秋肅之政。動用縣解。靜專直方。合諸名流之語觀之。其人之生平可定矣。

歙縣曹文正公。由戶部侍郎晉工部尙書時。其門下士徐訪巖廉訪寶森贈聯云。再世宮銜。太保少保。兩朝宸眷。司徒司空。



此页空白

# 楹聯叢話

## 卷十

### 挽詞

秋雨菴隨筆云。輓聯不知起於何時。古則但有輓詞。卽或有膾炙人口二句者。亦其項腹聯耳。惟石林燕語載韓康公得解過省殿試。皆第三人。後爲相四遷。皆在熙寧中。蘇子容輓之云。三登慶曆三人第。四入熙寧四輔中。此則的是輓聯之體耳。

恩福堂筆記云。紀文達師。輓朱笥河先生一聯云。學術各門庭。與子平生無唱和。交儕同骨肉。俾予後死獨傷悲。二公所學。具見於此。而語尤真摯。且非笥河先生不能當斯語。非文達師亦不敢作斯語也。

恩福堂筆記又云。乾隆戊戌。余隨侍先文莊公赴閩撫任。道出杭州。值先文莊公六十壽辰。中丞學使。分日爲賀。此余得瞻彭文勤公之始也。迨余入詞垣。適公爲大教習。勗余曰。向讀之經書。不可拋荒。已讀之詩文。仍未足用。應將文選及唐宋詩醇文醇。盡卷熟讀。可爲好翰林矣。余因是加勵。迨嘉慶壬戌。遂與公同掌院事。一日公告余曰。內子昨問新院長爲誰。答曰。乃曩在杭州。汝亦見過甫八歲之英世兄也。二老

同深嗟歎。故癸亥公捐館時。余哭之痛。獻聯云。榕嶠奉行輿道。出臨安。絳帳振衣纔八歲。蓬山陪末座。職猶弟子。玉堂撰杖忽千秋。蓋紀實也。

紀文達師輓劉文正公統勳聯云。岱色蒼茫衆山小。天容慘淡大星沈。句奇語重。非文正公不足以當之。成親王輓福文襄郡王福康安聯云。大名諸葛身先死。異姓汾陽帝不疑。我朝以異姓封王者。如定南王孔有德。義王孫可望。靖南王耿繼茂。襲義王孫徵淳。平南親王尚可喜。海澄公贈王爵黃芳度。皆在國初年間。雍正乾隆以來。惟福文襄一人而已。

福郡王薨於湖南軍營。時苗疆所在建祠。紀文達師撰聯云。汾陽王名位相同。功業常新。萬里有將軍壁壘。忠武侯經綸未盡。英靈如在。百蠻拜丞相祠堂。

彭春農曰。先文勤公出董文恪公邦達之門。嘉慶丁巳。文恭公誥丁太夫人憂。高廟遣官奠酒。加賞陀羅經被。文勤公輓聯云。心愴老門生。執饋縫衣。憐雪立。恩醴賢宰相。酸卮經被報春暉。時紀文達師亦文恪門生。輓聯亦以老門生與賢宰相作對。歸語其孫薊林曰。惟我兩人所見略同也。

董文恪公之夫人沒於京師。時文恭公已登揆席。文達師作輓聯云。富春江萬古青山。阡表長留。慈訓能成賢宰相。聽雨堂九年絳帳。食單親檢。舊恩最感老門生。桃符綴語載此聯。以爲陶太史撰。蓋誤。

紀文達師因誦某詩云。浮沈宦海如鷗鳥。生死書叢似蠹魚。戲謂此二句。可作我他年輓聯。劉文清公云。

此惟陸耳。山副憲足以當之。未幾而陸訃至。蓋方被命赴藩陽。覆校四庫書。以天氣驟寒。裘衣未到。凍僵於旅寓中也。時以爲語識。

紀文達師輓彭文勤公聯云。包羅海嶽之才。久矣韓文能立制。繪畫乾坤之手。惜哉堯典未終篇。蓋文勤方專司高廟實錄藁本。未能竣事而薨也。

沈歸愚尙書德潛輓桑弢甫調元云。文星酒星書星。在天不滅。金管銀管斑管。其人可傳。

畢秋帆自營生壙於鄧尉山。並自作輓聯云。讀書經世卽眞儒。遠問他一席名山。千秋竹簡。學佛成仙皆幻相。終輸我五湖明月。萬樹梅花。

昌平陳紫瀾宮詹浩。與錢唐陳句山太僕兆崙。並負重名。時有南北二陳之目。宮詹有輓吳澁山中丞士功聯云。使節轉閩疆。舊雨追思鄂渚蘭。言如昨夢。耆英推洛社。生芻遙奠謝庭玉樹總層霄。中丞爲香亭侍郎之父。曾撫吾閩。與宮詹爲摯好。此聯淒婉動人。寫作雙美。侍郎爲我撰成卷。備徵同人題識。新建曹文恪公。仁和胡文恪公。富陽董文恭公。及吳白華褚筠心。延璋陸費丹。叔。謝蘊山。啓昆諸公。皆有跋。以一聯而集成巨觀。蔚爲墨寶。宜中丞之孫紅生舍人葆晉。珍祕若球璧矣。

梁山舟學士所撰輓聯極多。茲擇其尤著者錄之。輓梁文定公國治云。天北掩台垣。聞說槐音中夜斷。江東失宗袞。心傷荆樹一時摧。時其弟冲泉亦沒也。輓其姑夫張藻川侍郎云。朝無諫草家有賜書。卅載清

聲光簡冊。公應騎箕。我悲陟謁。一時血淚灑葭葦。輓盡素亭河督云。帝畀以河。三策勤勞著。淮北臣心似水。四知風節。媿關西。輓錢竹汀宮詹云。名在千秋。服鄭說經。劉杜史。神歸一夕。仙人骨相宰官身。錢籀石先生載。以上書房侍郎致仕。山舟學士輓以聯云。青宮授兒。洛社圖形。官府神仙。皆慧業。遂尊備三絕。藝擅四儒。林文苑。並傳人。自注云。昔人以文與可。騷書詩畫爲四絕也。

山舟學士之妹夫湯畫人。辛未庶常。未及散館而沒。年僅四十。生母猶在堂。學士輓以聯云。四十年生有自來。身到蓬瀛天邊。召三千里沒而猶視。心傷桑梓母何依。又輓其師莊對樵云。孝思盡宦海家園。榮親養親一笑生。天證佛果。道望齊太山梁木。吾仰吾放。幾人入座哭春風。又輓陶篁村云。萬里兒啼。此日愁攀賢令轍。卅年老淚。隔江空盼少微星。時篁村之子方宦黔中也。輓其兄春淙云。一品承恩。魂魄長依華屋。九重念舊。馨香宜徹幽泉。輓明中和尙云。書裏傳衣。夙契偶同永長老。山中賦蓋。前塵誰證衲禪師。自注云。余畫過去僧像。師爲補衲。又師與先人同人詩社。輓佛裔和尚云。竹萎蕉枯。此日是師真面目。焚香灑水。當年惟我舊朋儔。自注。次句指恒公寂時事。

山舟學士輓孔谷園。聯云。臨去詩成。寫照髯仙。明月清風人已遠。平生墨妙。瓣香冰叟。虹樓瀛海世爭傳。自注。谷園沒之前數日。有題蘇尺牘詩。明月清風。卽詩中語。天瓶居士張文敏公爲谷園婦翁玉虹樓。谷園齋名瀛海仙址。帖天瓶書也。

邱南屏侍郎樹棠。以事降調。未補官而卒。時辛卯上元日也。是日值月食。彭春農以聯輓之云。大空暫作  
閒雲。風規自在。元夜頓成長夜。月魄同虧。

陳荔峰侍郎。爲內閣學士。閱二十年。始擢少宗伯。旋攝少宰。少農駭駭乎大用矣。以病乞假。調理已就。痊愈。是日。讌客至中夜。衆賓甫退。始就寢。不逾時起坐。咯血數口而沒。彭春農輓聯云。撒手了無難。夜寔方  
闌歸碧落。傷心將大用。夕陽雖好近黃昏。

平湖吳臺卿顯德。松岡協揆之猶子。山舟學士之甥也。幼聰敏。年十六。受知於朱文正師。補博士弟子員。  
才藻冠時。謂取青紫如拾芥矣。乃十上鄉闈。未離席帽。鬱鬱不得志。遂遁而學仙。日從事乩鸞。叩長生之  
術。年未四十。以瘵卒。太夫人猶在堂也。學士輓聯云。天道何知不許阿嬭留李賀。神仙安在翻教老淚哭  
羊曇。讀之令人酸鼻。

山舟學士與其德配汪恭人。俱登大年。恭人長學士一歲。先學士二年卒。學士輓聯云。一百年彈指光陰。  
天胡靳此。九十載齊眉夫婦。我獨何堪。逾二年。學士始卒。年九十三。沒前數日。手書訃稿。遺命不治喪。不  
刻行狀。同里衆紳士輓聯云。棗殿奉絲綸。四百紙述事記言。史館猶傳六手筆。明湖思俎豆。九十載清風  
儉德。邦人長想古衣冠。

鮑覺生先生桂星。才氣冠時。徒以傲兀凌人。爲世所嫉。臨終自撰輓聯云。功名事業文章。他生未卜。嬉笑

悲歌怒罵。到此皆休。遺命懸於靈几之前。則仍是本色語也。

浙中蘇子齋。釋由翰林改官侍御。以公過鑄級。捐復刑部副郎。轉正郎。出守山西朔平。以憂歸。起復。守山東青州。卒於官。有素交官於廣東者。聽其訃。痛之。寄聯輓之云。譽美西清。望重西臺。又威肅西曹。出治懋勳。兩省春風。思太守。耗傳東浙。心傷東魯。奈身羈東粵。招魂長歎息。一江秋水哭先生。

徐秋崖孝廉廷焄。於會試場中得病。十四日而沒於邸舍。時令嗣訪齋。亦以會試隨侍京寓。封翁來若先生。年八十。猶在堂也。梁小槎比部。輓以聯云。十四日病莫能興。幸喬梓相依。屬纊尙能親含玉。三千里沒而猶視。痛桑榆垂暮。倚閭猶自盼泥金。

道光乙酉。德清徐倪氏之案。自巡撫以至典史。一城之官。盡呈吏議。王小華廉訪。惟詢以急欲平反此案。遂至自裁。蔡生甫學士之定。輓以聯云。剛毅木訥近仁。生原無忝。聰明正直而一。沒則爲神。頗肖其爲人。然以三品大員。爲此無名之死。論者惜之。

許周生駕部宗彥。病中語人云。夜來曾作詩。記得二句。頗切近狀。句云。厭聞家事常如客。愛看名山悔不僧。今繙鑑止水齋集。無此二句。蓋偶得句而未成篇也。駕部沒前三日。自撰輓聯云。月白風清。其有意。斗量車載。已無名。可謂了然於去來者矣。

秋坪新語。載紀文達公長子汝侏。中乾隆乙酉孝廉。卒時。公甚爲之神傷。語客曰。今乃知因果之說。或亦

有之。蓋孝廉病絕而蘇者屢矣。忽一日聞其聲。宛山西人也。問故。曰某來索逋。茲已償清。仍欠若干。可與焚楮鏹如數。當去。家人輩如言焚之。遂瞑。方環哭間。又蘇。張曰。所乘馬後足顛蹶。弗良於行。可易一匹。則乘之去矣。衆茫然。公之三女哭告曰。誠有之。兄氣絕時。所焚馬。吾見其後足紙損。或卽其故駒。因別製一具焚之。乃不復蘇。公於靈帷書一輓聯云。生來富貴人家。却怪怪奇奇。祇落得終身貧賤。賴有聰明根器。願生生世世。莫造此各種因緣。蓋孝廉素性揮霍。錢刀到手輒盡。又緣事被褫。公以其過不檢攝。禁弗使出。日給資用。無小溢。孝廉深苦其拘。罄所有付之質庫。卒之日。蓋不餘一物云。

紀文達師與龔匏伯先生禪身。同校四庫書。最相契。後先生以軍機章京。觀察滇南。終於位。師寄輓聯云。地接西清。最難忘樞密院旁。公餘茶話。恩深南徼。惜空留昆明池畔。去後棠陰。

彭文勤公輓鍾碧溪大令聯云。匪特薦蘿親。誓同筆研相將老。空懷松菊志。家少田園竟不歸。

粵東張儀坡庶常翱。恃才放蕩。未及三十。卽以酒色殞其生。其師花曉亭方伯杰。甚慟之。輓以聯云。與人何尤。可憐白髮雙親。養子聰明成不幸。自古有死。太息青雲一瞬。如君搖落更堪悲。

余撫桂林。延呂月滄郡丞。主秀峰書院講席。士論翕服。余常就諮地方利弊。兼以政暇談藝。皆獲益良多。惜其驟歸道山。繼主講者。爲黃春亭邑侯暄。亦佳士。有輓呂聯云。德合荀君。久以範模孚梓里。文追白傅。豈惟政事在杭州。爲時所稱。余旣爲撰墓志。亦輓以聯云。三管失斯人。癸水辰山都閤淡。千秋存定論。鄉



賢名宦竹馨香。蓋月滄品學俱優。曾官兩浙。有循聲。尤長治獄也。時合省之士大夫。以請祀鄉賢祠環顧。余已爲擬定疏稿。適同官有違言。遂閣不行。亦可歎矣。

盧厚山宮師。嘗總督兩廣。兩湖。巡撫江南山西。觀察廣東。山東。湖南。又於丁憂伏處時。奉特旨起家。管西域軍需局。駐劄肅州。凱撤後。遂巡撫陝西。其沒也。由宮保晉宮師。加輕車都尉世職。諡敏肅。余甲寅同年。中勳名之盛。未有如公者也。裕魯山廉訪。寄聯挽之云。曠典邁千秋。帶礪台衡。天錫殊綸。榮衛霍。仁恩周十省。韜鈴黼黻。人從華屋。仰皋夔。

劉星槎司馬。台斗寶應名進士也。由水部通守烏鎮。以督運終於官。舒白香哭以聯云。學究天人。祇曾博文章一第。才堪公輔。僅試官丞。倅三年。

同年李服齋廉訪文耕。雲南人。由山左縣令起家。清節循聲。上達宸聰。不數年。遂秉臬齊魯。移官黔中。以老病引退。終於家。余壬戌同榜中。不乏俊異之才。而言坊行表。必推公爲巨擘。詢之滇人士。亦無間言。王孚遠方伯輓以聯云。道學風高。望推南詔。循良績著。念切東人。方伯山左人。故抒其去思如此。

四川李墨莊太史鼎元。客死揚州。貧無以斂。吳山尊輓以聯云。百金囊盡揚州死。萬里魂歸蜀道難。

鄭雲軒孝廉天衢。與余同肄業鯨峰書院。復同舉甲寅恩榜。實余之妻叔外舅。鄭蘇年師之弟也。甫踰四十而沒。時節母廖太孺人尙在堂。師哭以聯云。緣盡先離。傷心冊載荆枝。漫說來生還有約。事多未了。回

首七旬萱蔭。敢言已死便無知。一字一淚。情深於文矣。

徐兩松中丞嗣曾撫閩。有惠政。其培植鼇峰書院士子。尤繫去思。聞其易簀前數日。自撰輓聯云。仗我佛慈悲指示。方悟得無我無人。做吾儒切實工夫。巴結到而今而後。可謂了然於來去者矣。

薩檀河邑侯玉衡。雄於文。尤工詩。皆不屑拾人牙慧。嘗爲一縣令之母輓聯云。民是賈兒。甘棠歌衆母。母官真佛子。妙蓮現法身。身可云別致。余嘗借以應一達官之求。遽遭齒冷而置之。

紀文達師於乾隆癸未甲申間督閩學。時余家自先大父及先嚴暨諸伯父叔父皆及門受業。師訪知余家自前明以來十五代秀才相繼不斷。特書書香世業一篇爲贈。先資政公因製堂聯云。近承十五葉囊箱。闡發金書玉字。遙印千乘侯矩矱。優游聖域賢關。千乘侯爲聖門七十二賢。叔魚公鯉封號。實吾家遠祖也。余於嘉慶壬戌成進士。適又出文達師之門。一門三代皆爲門生。皆登詞館。師每對人舉爲美談。是秋聞先資政公之訃。設位於京邸。師親來拜奠。並手製輓聯云。十五傳蘭玉相承。授硯三看入芸館。六千里泥金甫報。撫楹一笑返蓉城。

道光乙未入都。以所撰樞垣紀略。質之長懋亭公。公閱之甚喜。爲辨析疑滯數事。且爲述乾隆年間樞直舊聞。娓娓不倦。蓋是時軍機老輩。無有在公之前者。丙申再入都。見公益矍鑠。堅坐久談。有後生所不逮者。因叩公調攝之方。公笑曰。十年前有星士相我。將來名位可及阿文成。惟年壽少遜耳。文成年八

十一。今我已七十九。雖矍鑠。又可恃乎。余以他語解之。而公果於次年元旦告終。聞除夕。向家人查詢。歎縣曹文正公終於何日。衆對曰。正月二日。公曰。我不可居其後。逾日遂逝。故徐星伯松輓聯云。易簣預知時。一日期先曹太傅。蓋棺先定論。千秋名並阿文成。時余在桂林。接公訃書。亦寄聯輓之云。出將入相。垂五十年。功比汾陽。壽同潞國。掃穴犁庭。越三萬里。昔追定遠。今媿章佳。亦紀實也。

彭春農曰。曹文正公自勝衣。卽受業於先文勤公。故與賓從談時。輒舉文勤公詩文言行。以示後進。諸君皆以爲聞所未聞。公之沒也。賜諡之旨。專舉睢州湯公。大興朱公作配。予輓公聯句云。帝眷老成人。直追溯昭代前賢。當之克配。師承先大父。從此問昔年遺事。知者其誰。上聯舉國恩之大。下聯述私交之密也。彭文勤公有女。許字同里曹文恪公之子。曹氏子殤時。女年甫十齡。卽矢志守貞。生平究心經傳。不似閨秀之僅以詩文表著者。文勤公病篤。曾割股以進。故奉仁廟特旨旌獎。誠異數也。未幾遂沒。劉金門先生輓聯云。名父名翁名女士。大貞大孝大完人。

余秋室學士集悼亡聯云。濟艱辛。嘗險阻。貧家婦信難爲。痛今朝鏡破。釵分。欲圖夢影重圓。除異世再同青玉案。習荆布。厭綺羅。半生儉應可法。奈塵海颿馳電掣。贏得褶痕如舊。到秋宵。怕檢縷金箱。哀怨纏綿。不愧才人之筆。

黃蕉卿巽。錢唐梁紹壬之室。隨梁入粵。間關渡嶺。未及半年而沒。梁輓以聯云。四千里累爾遠來。父在家。

母在殯。翁姑在堂。屬纊定知難瞑目。廿三年乘余永訣。拜無兒。哭無女。繼承無姪。蓋棺未免太傷心。蕉卿有聽月樓詩。不減慧業文人。宜紹壬之有餘痛也。

靖安天香居士舒夢園。字白香。負才名。其配李湘紘。亦婉慧。有才子佳人之目。李以中秋夜化去。白香悼傷甚。所作秋心集。中有輓辭錄一篇。稱堂中輓聯。以襲西原太守爲最。句云。仙去何之。燒鼎白雲。淒斷壑。神傷已甚。著書黃葉。冷空山。真才子筆也。又載陳果堂聯云。千佛禮鳩摩。名士案頭。廢味且。五更驚蛻羽。天香館畔。咽秋風。胡果泉中丞聯云。蟾鏡掩清輝。歎當年。玉宇瓊樓。難覓靈丸。延壽藥。鹿車隨大隱。知此後。故盍遺掛。重哦寒夜。悼亡詩。劉星槎司馬聯云。家有詩仙。惜到處名山。未能偕隱。身常禮佛。覺往生淨域。確有明徵。吳蘭雪中翰聯云。奔月訪姮娥。忍令天香。虛舊館。持花歸淨土。徒煩松雪。禮中峰。汪巽泉學士聯云。仙娥明月是前身。想歸真翠水丹林。桂蕊靈香同郁烈。名士秋風添別恨。漫寄意繩床經案。蟲絲落葉共淒清。皆名筆也。

韓芸舫中丞克均。巡撫吾閩。其夫人以四月八日。卒於官廨。僚屬公輓。多頌揚語。先生俱不愜意。惟孫平叔督部一聯云。解脫拈花。剛佛日。證明因果。在仙霞。韓見而歎曰。畢竟名士吐屬。與衆不同。

余由蘇藩引疾假歸。後一年。卽遭亡室鄭夫人之痛。百事俱廢。不但悼亡詩不能成一字。並輓聯亦無之。惟手書影徂心在四字於靈帷而已。憶程春海侍郎寄聯云。淑德稱女師。孝著鄭經。禮修梁案。令名相夫。

子澤流三黨。絮被萬家。語特矜重。足令泉壤生輝。又林少穆撫部寄聯云。相夫垂四十載辛勤。出處同心。畫錦歸來猶並轡。濟世具萬千緡功德。熾昌啓後。夜臺化去合生天。則隱括余行狀語也。又門人祝秋臺侍讀春熙長聯云。千里萼羹。方偕歸隱。三間茆屋。幸免賃春。卅八載鴻案相莊。痛半世釵荆。彤史遽亡賢德曜。鑑鑿才思。葭末心欽。書帶家聲。蘭馥耳熟。廿六年鯉庭陪侍。對後堂絲竹。絳帷望斷老彭宣。亦紀實之詞。尙非輓聯俗套。

陶雲汀宮保。由徽撫蘇撫。晉督兩江。前後將二十年。以勞瘁終於金陵。賜諡文毅。入祀賢良祠。余壬戌同年中。勳名之盛。未有如公者也。卓海帆尙書秉恬。哭以聯云。天下大事公可屬。江南遺愛民不忘。京中同人。皆以爲切當。余亦寄聯輓之云。尹文端厚澤深仁。重見江鄉說遺愛。陳恪勤精心果力。方知楚產信多才。蓋宮保狀貌雄偉。方口豐髯。酷似其鄉陳恪勤公。余藩吳日。因修陳公祠。拜像而知之。曾紀以詩云。省識鬚眉如有悟。始知從古楚才優。宮保聞之。亦頗自喜。此聯猶前詩意也。

朱詠齋太宰士彥。亦余壬戌同年。一生以樸誠爲上所倚任。其直上書房時。尤以嚴氣正性自持。斷斷辨論之聲。達於中外。上在乾清宮時。每遙識之。比年奉命讞獄。周歷各省。不敢告勞。甫還朝。未久卽卒。賜諡文定。加宮保銜。可謂備極哀榮矣。余寄聯輓之云。師範重三天。警欬聲猶留殿陛。皇華周四國。樸誠望早式班聯。無溢美也。

陳芝楣中丞鑾。由鼎甲翰林。出爲江南郡守。初權江甯府。補授松江府。旋調蘇州府。取白香山詩句。鐫小印曰。自出承明三領郡。余藩吳時。芝楣適守蘇州。文采風華。傾其流輩。以於余有推薦之誼。執弟子禮甚恭。踰年。卽擢監司都轉。陳臬開藩。遂被開府豫章之命。旋移吳中。權江督兼河督。近科詞臣名場之快利。未有如公者也。聞其擢浙臬時。初覲京師。引對甚稱旨。有此後前程不可限量之褒。乃嚮用方殷。而修文遽召。年實限之。謂之何哉。余以聯寄輓之云。儀表稱科名。帝許雲程難限量。文章兼政事。我慚風義託淵源。

哀輓通用之聯。亦有佳者。如悼亡云。春江桃葉鶯啼溼。夜雨梅花蝶夢寒。寶瑟無聲絃柱絕。瑤臺有月鏡奩空。總帷忍痛安仁句。椎髻難忘德曜風。戚友云。氣數不言仁者壽。性情猶見古之愚。誄文作自先生婦。遺稿歸於後死朋。蘭亭少長悲陳迹。玉局風光歎化身。素車有客奔元伯。絕調無人繼廣陵。雲深竹徑樽猶在。雪壓芝田夢不回。文章卓犖生無敵。風骨精靈沒有神。白傳事業已歸前輩錄。典型留與後人看。坡公稱觴尙憶登堂事。挂劍難爲過墓情。十載名場成勁敵。九重泉路盡交期。達官云。峴山碑墮羊公淚。浚縣圖留陸子型。處士云。桃花流水杳然去。明月清風何處游。上界由來足官府。西風何處哭文章。墨雲香冷來禽館。薤露寒生賦鵬文。不作風波於世上。別有天地非人間。又八字云。未弭前思頓作永別。追尋笑緒皆爲悲端。一代傳人鄭虔三絕。十年循吏楊震四知。

又十二字云。象應少微星。彩落蕭辰悲夜月。名傳耆舊傳。芳流梓。憶春風。小別遽招魂。始信憂勞能損壽。高堂久忘世。那堪遲暮轉摧心。叔輓姪云。別室具銅盤。期爾從容光素業。中庭摧玉樹。愁余遲暮哭窮途。兄輓弟云。同氣遽分途。原隰秋風魂不返。異時誰共被。池塘春草夢難通。兄輓妹云。勁節勵冰霜。定卜瀧岡終有表。衰年鮮兄弟。可堪雷岸更無書。甥輓舅云。有淚灑州門。千古白眉增太息。無才成宅相。廿年青眼益酸辛。婿輓翁云。浮白自慚蘇子美。垂青空憶李文公。弟輓師云。問字感當年。重謁元亭空灑淚。傳經珍此地。載瞻絳帳暗摧心。

曹薺原宮保文。於乾隆末。乞養里居。歿於嘉慶三年。彭文勤師輓聯云。人爵貴。天爵更尊。解組學烏巢。反哺。帝星升。臣星先隕。騎箕爲龍馭前驅。

富陽董文恭公。身爲太平宰相三十年。曾兩次畫像紫光閣。勳名之盛。一時罕有倫比。而身後清況。乃似寒門。潘芸閣學士錫恩。有輓聯云。珠玉自天題。計兩番紫閣圖形。早有丹青傳相業。樓臺無地起。綠卅載黃扉翊化。惟將清白表臣心。

楹聯叢話

卷十一

集句集字附

漢碑句皆質重蔚然古香余齋所藏頗多因偶集為楹聯云蘭石之姿清少之行晉珪璋其質芳麗其華

夏承踏規履信立德隆禮范根道核藝抱淑守真景佐時理物天與厥福見承舍和履仁帝賴其勳

孔宙德惠旁流鬯芳遠布劉雅度宏綽廣學甄微晉敦詩悅禮藐然高厲耿勳琢質繡章耀此聲香

校官紹聖作儒貢登王室孔鈞河摘洛象與天謨史學為儒宗行為士表晉冠乎羣彥簡乎聖心鄭

衡方聲無細聞雖遠猶近張勞而不伐有實若虛孔純龢之德仁義之操晉孝弟於家忠饗於朝衡舍

和履仁天與厥福見發號施憲民說無疆孔彪舍和履仁見永享年壽孔應期作弼入參文昌倉頡

下民康濟順如流水尹宙羣公憲章穆若清風衡方温然而恭慨然而義婁忠以自勗清以自修鄭

近人集句楹帖有可喜者五言云山公惜美景小謝有新詩李嘉祐即事已可悅賞心還自怡杜

脚著謝公屐身披萊子衣李白名香播蘭蕙妙墨揮巖泉岑九齡江山助磅礴文物照光輝陸堅



光

深情託瑤瑟。逸興橫素襟。李白。閱古宗文舉。臨風懷謝公。盧綸。跌宕孔文舉。風流賀季真。諸

義李。誰將佳句並。真與古人齊。楊巨源。雅琴飛白雪。逸翰懷青霄。杜正倫。智勇冠當代。卓犖觀羣

書。盧滿。結交指松柏。述作凌江山。孟浩然。朗抱開曉月。高文激頽波。孟郊。學業醇儒富。文章大

雅存。杜甫。積照涵德鏡。素懷寄清琴。孟郊。鵬鷲勵羽翼。龍鸞炳文章。李光弼。草木含清色。巖廊

挹大猷。儲光羲。知音在霄漢。高步躡崑崙。孟浩然。江山澄氣象。冰雪淨聰明。高適。汲古得修綆。開

懷暢遠襟。韓愈。文章輝五色。心跡喜雙清。杜甫。端居喜良友。獨立占古風。韋應物。披雲鍊瓊液。坐

月觀寶書。李羣玉。聲華滿冰雪。節操方松筠。高適。酒香留客住。詩好帶風吟。白居易。名香播蘭

蕙。雕藻邁瓊琚。岑參。蘊真愜所遇。振藻若有神。杜甫。溪靜雲生石。窗虛日弄紗。姚合。心同

孤鶴靜。節效古松貞。呂涓。名香泛窗戶。遠岫對壺觴。許渾。墨研清露月。琴響碧天秋。李洞。地迴

雲偏白。亭香草不凡。張祐。接垣分竹徑。微路入花源。張說。美花多映竹。喬木自成林。孟浩然。邱

壑趣如此。鸞鶴心悠然。錢起。柳深陶令宅。月靜庾公樓。李白。苔石隨人古。山花拂面香。張九齡。長

笑對高柳。貞心比古松。李頎。願持山作壽。常與鶴為羣。武三思。荷鋤修藥圃。煮茗就花欄。王維。澗

松寒轉直。碧海闊逾澄。王績。誰知大隱者。乃是不羈人。韓愈。詩思竹間得。道心塵外逢。元稹。暗水

流花徑。清風滿竹林。杜甫。從來多古意。可以賦新詩。杜甫。徑隱千重石。園開四季花。杜甫。隔沼連香

菱緣巖覆綠蘿。李德裕 琴將天籟合。幔卷浪花浮。趙冬曦 野翠生松竹。潭香聞芰荷。李浩然 頗得

湖山趣。不知城市喧。吳長孺 短歌能駐日。閒坐但聞香。宋之問 高松來好月。野竹上青霄。杜甫 松

風清耳目。蕙氣襲衣襟。孟郊 七言云。川原繚繞浮雲外。臺榭參差積翠間。盧綸 松間明月長如此。

身外浮雲何足論。宋之問 窗含遠樹通書幌。風颭殘花落硯池。李賀 四野綠雲籠稼穡。一庭紅葉

掩衡茅。杜甫 常愛此中多勝事。更於何處學忘機。劉長卿 松持節操溪澄性。山展屏風花夾籬。李

白。閒看秋水心無事。靜聽天和興自濃。皇甫冉 陽羨春茶瑤草碧。蘭陵美酒鬱金香。錢起

楹帖中亦有所謂臺閣體者。五言集句云。大賢秉高鑒。上德表鴻名。孟郊 天與三台坐。儒開百代宗。

張九齡 謀猷歸哲匠。詞賦引文雄。王維 羽儀呈鸞鷲。藻思煥瓊瑀。劉禹錫 麟筆刪金篆。霓裳侍

玉除。盧綸 一經傳舊德。八座起文昌。張元宗 雲山起翰墨。星斗煥文章。王璠 三光懸聖藻。一氣轉

洪鈞。沈佺期 道爲詩書重。心緣啓沃留。杜甫 七言云。功名待寄凌烟閣。霄漢常懸捧日心。杜牧 千

秋籙紀朱鸞。誥五色光生綵鳳毛。李義府 瑞氣迴浮青玉案。清名合在紫微天。耿漳 仰賀斯文歸

朗鑒。惟將直道歷崇班。齊己 聖代科名酬志業。中朝品秩重文章。方干 勳業定應歸鼎鼐。文章誰得

到罨罨。徐寅 三千士裏文章伯。十二樓前侍從臣。盧綸 彩筆祇宜天上用。五雲多繞日邊飛。貫休

瑞草惟承天上露。繡衣却照禁中花。王建 萬卷圖書天祿上。四時雲物月華中。李白 更榜紫微瞻北

斗還將綵服詠南陔。薛逢花迎綵服離鶯谷。閣倚晴天見鳳巢。羅七德龍韜開玉帳。三千犀甲

擁朱輪。駱賓王身應山河分岳瀆。功銘鼎呂繪麒麟。于尹耕

梁山舟學士所書楹帖。多係集句。有鈔輯成本者。今錄其佳者如左。四言云。斧藻其德。言竹柏之懷。水

注。五言云。名隨市人隱。心與古佛閒。蘇竹石得幽秉。壺觴多雅游。文同六言云。讀書不求甚解。陶

節。鼓琴足以自娛。莊七言云。我書意造本無法。蘇此老胸中常有詩。陸眉宇之間見風雅。笑談與世

殊白科。山谷文章或論到閩奧。梅聖俞笑談與世殊白科。見萬卷藏書宜子弟。山谷三田聚寶真生涯。

蘇。官如草木吾如土。東坡舌有風雷筆有神。見胸中已無少年事。門外猶多長者車。山谷張顛草

聖雄千古。焦遂高談驚四筵。遺山名高北斗星辰上。王廷圭詩在千山烟雨中。張孝祥輕鷗白鷺定吾友。

山谷。綠竹高松無俗塵。劉公是縑成白雪三千丈。荆公淨掃清風五百間。蘇更築園林負城郭。荆公

先安筆研對溪山。放翁蹙踏飽謝跨徐庾。蘇網羅秦漢近唐虞。傅察八言云。行道有福。能勤有繼。居

安思危。在約思純。左傳冰生於水而寒於水。荀子雲出其山。復雨其山。詩如此風神。惟須飲酒。北既佳光

景。當是劇棋。南史小窗多明。使我久坐。入門有喜。與君笑言。易德有潤身。禮不愆器。顏延年玉輶庭照。蘭

生室香。庾子山平理若衡。照辭如鏡。動墨橫錦。搖筆散珠。文心雕龍山水有靈。亦驚知己。水經性情所得。未

能忘言。庾子山閉戶自精。開窓有彥。任彥昇垂露在手。清風入懷。柳子厚碧山人來。幽鳥相逐。金尊酒滿。奇

花初胎詩。脂粉簡編冠纓圖史李義山句。糠粃禮義錙銖功名王績。九言云如良金美玉無施不可漢說

非精墨佳筆未嘗輒書裴行儉傳。十言云無江海而閒不導引而壽莊子。乃邦家之光非閭里之榮歐文

吳青士郡丞廷榕自吳中錄寄集句八字聯皆古雅可愛今擇錄其尤佳者如左云赤野生姿青田矯翰

唐婁師德吳苾明碑。白雲怡意清泉洗心李邕葉有道碑。蘊智成囊舍明作鏡唐劉待價令狐仁政碑。憑春灑翰席月抽琴北魏高

如筠斯清比蕙又暢唐宋詹報友書。逢岑愛曲值石憐歆魏姜質亭山賦。器重南金才橫東箭高后碑。辨雕春園德瑩

秋天唐太宗訪。綴響蘭深緝言瓊祕謝莊武帝册。沈思泉湧華藻雲浮魏卞闓贊。鳥嘯歌來花濃雪聚庚

馬射賦。雲隨竹動月共水流陳後主夜庭度雁賦。春水兩派晴山數曲大隱。朱輪十乘紫誥千篇幽居。薛引山茵

荷抽水蓋王勃東廬山池賦。琴號珠柱書名玉杯庾信小。激揚碩學誘接後進南史張融傳。甄明政術曉達公方唐

宗訪才能詔。經緯區宇彌綸彙憲文心雕龍。抑揚人傑雕繪士林契必明碑。綴響蘭深緝言瓊祕謝莊武。秉仁嶽峻

動智淵明崔敬龜碑。修風曉逸德星夕映謝莊武帝册。祥禽輩作瑞木朋生鮑照河清頌。澤雨無偏心田受潤簡文

法頌表。慈雲旣擁智海亦深簡文與智炎書。抗心希古任其所尚含毫命素動必依真隋姚察名畫記。源露飛甘舒雲

結慶謝莊武帝册。貞筠抽箭潤壁懷山王融贈叔詩。壯思風飛逸情雲上謝眺七夕賦。朗姿玉暢惠風蘭披宋孫康團扇賦

謝默卿邑侯元淮自梁溪錄寄集句各聯皆工穩附錄於左云井竈有餘處林園無俗情。揮茲一觴未

知明日事遠之八表正賴古人書以上集陶詩。精義測神奧清機發妙理遠想出宏域高步超常倫集文選句

讀吟垌野。金石雲陞。棟梁文囿。冠冕詞林。文心雕龍。庚開府集。芝洞秋房。檀林春乳。桂深冬燠。松踈夏寒。庚開府句。

舉頭望明月。盪胸生層雲。集李杜句。楓葉荻花秋瑟瑟。浴鳥飛鷺晚悠悠。集白杜句。家醞滿瓶書滿架。山花如

繡草如茵。集唐杜句。蝶銜花蕊蜂銜粉。犀辟塵埃玉辟寒。集李義山句。碧苔芳暉如有佳語。綠杉野屋良彈美

襟。集司空表聖詩品。下同。隔溪漁舟。幽鳥相逐。亂山喬木。奇花初胎。妙機其微。是有真宰。遠引莫至。忽逢幽人。

娟娟翠松。上有飛瀑。蕭蕭落葉。人間清鐘。紅杏在林。幽鳥相逐。碧桃滿樹。清露未晞。蓄素守中所

思不遠。返虛入渾。其聲愈希。神化攸同。控物自富。性情所至。著手成春。與古為新。載瞻星氣。其曰可

讀。如寫陽春。

焦氏易林中。語多吉祥。有集句為聯語云。砥德礪才。為國藩輔。布政施惠。生我福人。含和履中。駕福乘

喜。年豐歲熟。政樂民仁。論仁議福。保我金玉。達性任情。樂其安閒。道德神仙。增榮益譽。福祿歡喜。長

樂永康。

余小霞有集句聯云。隨遇而安。因樹為屋。會心不遠。開門見山。又云。天半朱霞。雲中白鶴。山間明月。江上

清風。予曾集蘇句為聯贈之云。勸子勿為官所腐。知君欲以詩相磨。又一聯云。筆老詩新疑有物。水清石

瘦亦能奇。

聞有集前人句題酒家樓者云。勸君更盡一杯酒。與爾同消萬古愁。可謂工絕。

黎湛溪河帥廳事有桂未谷韻分書集句一聯云。天根月窟閒來往。麤沙大石相磨治。余每進謁。屢目之。河帥曰。君賞其書乎。惜集句殊不倫不類也。余曰。桂作此時。初不爲公。自今觀之。則所集殊雅切。河帥詰其說。余曰。上語謂公治易。對語謂公治河耳。同僚尙未喻。余曰。上語謂作河上易注。對語謂辦碎石坦坡耳。衆始靦然。

吳信辰集司空曙李頎一聯云。翠竹黃花皆佛性。清池皓月照禪心。以題佛寺恰好。

李爾卿守思恩時於賓州建聽荷小閣。集句聯云。眼明小閣浮烟翠。身在荷香水影中。跋云。道光丁亥六月。按試賓州。以是月二十四日作荷花生日。時阮春畚刺史。重葺是閣方成。而申漁溪。陳紫瀾。劉夢庭。三明府。皆不期而會。一時之盛。衆賓俱驩。余題扁榜曰。荷花世界。並集東坡誠齋詩句。懸於閣柱。

達誠齋達三權稅粵關。喜談文字。頗通易學。有別業在署旁。名淨芳園。權使自爲集句一聯云。閒坐小窗讀周易。每依南斗望京華。

相傳徽州城中有戲臺初成。徽之巨商撰聯。得一句云。聲爲律呂身爲度。久不能對。曰。有能集成語對者。當厚酬之。時方朴山先生。命其子德往對曰。雲想衣裳花想容。徽商酬以百金。先生笑曰。七字百金。李太白惠我無疆也。按對句勝於出句。出句呂字添出。身爲度三字。亦無著。適成其爲徽商本領也。

近人有集句楹帖云。大兒孔文舉。小兒楊德祖。前身陶彭澤。後身韋蘇州。以東坡詩對禰衡傳。天然比偶。

惜無人能當此語耳。

石墨文字以石鼓文爲最古。近有集爲篆聯者云。道藝工於寫華柳。秀靈時或載淵魚。不華不樸同所好。旣安旣甯樂適時。寧樸毋華以康我道。旣安適樂共寫其天。道旨淵微深於四子。詞華工秀大如六朝。

桂林城中巖洞以風洞山爲最。卽疊綵山也。山中座落。又以景風閣爲最。葉琴柯中丞紹樞集禊帖字爲聯云。林間虛室足觴詠。山外清流無古今。余亦擬集韓句一聯云。粉牆丹柱動光彩。高厓巨壁爭開張。

余編梓聯話將竣。適賀耦庚中丞郵信來。以集句兩聯索書。一七字云。行不得則反求諸己。躬自厚而薄責於人。又八字云。視履考祥。其旋元吉。清明在躬。氣志如神。因附識之。以下集字。

西嶽華山碑。前明已燬。今海內只有三拓本。余所藏者華陰郭允伯舊物。曾歸朱笥河先生者也。碑爲蔡中郎所書。近人有集碑字爲楹帖者。如云。漢壁秦珍千歲品。光風嘉月四時春。和平峻望中書令。典則高文太史公。歲星仙氣原方朔。璧月新詞是義山。玉堂修史文皆典。香案承書望若仙。

陳曼生郡丞有集三公山碑字一聯云。老屋三間可蔽風雨。空山一士獨注離騷。

柳誠懸所書元祕塔銘。雄偉奇特。最宜於作楹聯。有集字成句者云。山靜日長仁者壽。荷香風善聖之清。窮經安有息肩日。學道方爲絕頂人。情詞超邁高常侍。書法清圓趙集賢。

敬客所書王居士博塔銘。乃褚派也。近人喜學之。姿態橫生。惟以作大字。則規撫稍有不足。亦有集字爲楹帖者云。天然文吐春雲潤。悟後心如秋月超。明月超然懷遠鑒。緒風和處覺春生。書求往迹得其化。文有真宗鑒乃神。風節爲貞金樂石。心神如秋月春雲。

顏魯公爭坐位帖。字不及寸。而拓作大字。則有雄偉之觀。勝於臨摹他蹟。近有集帖字爲楹聯者。語亦岸異不羣。七言云。身向尺天崇位業。人從香海望才名。恬然清行同南部。積有文才是左思。一誠有定同葵向。百故皆恬若海容。校書長愛階前月。品畫微聞座右香。清時盛治人同仰。名世高文衆所師。

其書莫廢文明道。不爵而尊禮衛身。畏友恨難終日對。異書喜有故人藏。月寮烟閣標清興。文府書城縱古今。書到右軍難品次。文如開府得縱橫。滿室古香人有會。當階清蔭月初中。立志須如三古盛。爲書自起一家言。八言云。立功德言有三不朽。尚齒爵位無一非尊。功冠凌烟紀綱文武。才高畫日損益古今。立德立功居之以敬。友直友諒尊其所聞。有集顏魯公多寶塔碑字爲楹帖者。近刻成板聯。墨搨亦頗可觀。句云。天然深秀檐前樹。自在流行檻外雲。脫俗書成一家法。寫生卷有四時春。顏魯公書東方朔像讚字。莊嚴合矩。在多寶塔之上。有集字成聯者云。德星人是東方朔。雄辨文如石曼卿。作者多大方家。數望之如神仙中人。清而不矯。心無滓。儉以爲節。家之肥。學以精神通廣。大家從清儉足平安。



釋山碑原石已不可考。今所傳本乃五代鄭文寶重刻。而典型具在。殊可臨摹。近有集碑字爲聯云。追古思今。道在作者。登高望遠。時復樂之。爲樂及時。令德無極。去古不遠。直道在斯。日有所思。經史如詔。久於其道。金石爲開。山澤高下。理所著。金石刻作。臣能爲。

王右軍蘭亭敍字。執筆者無不奉爲矩型。近人有集字爲楹聯者。亦自巧思綺合。五言云。暢懷年大有。極目世同春。室有山林樂。人同天地春。惠日朗虛室。清風懷古人。風竹引天樂。林亭集古春。六言云。今趣豈異於古。天聽可期諸人。文情生若春水。絃詠寄之天風。七言云。有足春隨惠風至。無懷人合盛時生。游春人若在天坐。聽曲情隨流水生。文生於情有春氣。興之所至無古人。情文俯仰懷遷固。述作風流契老彭。流水永無風浪作。春情時以管絃和。絲竹放懷春未暮。清和爲氣日初長。寄興在山亭水曲。懷人於日暮春初。遇事虛懷觀一是。與人和氣察羣言。與絃作契風生竹。列坐爲情水抱山。觀水期於無盡地。生天當是有情人。隨羣流。觀極盛事。欣樂歲。述古初言。得趣在形骸以外。娛懷於天地之初。流水情文曲有致。至人懷抱和無同。極清閒地是蘭若。觀自在春於竹林。追隨永日情殊暢。坐領春風氣不羣。坐隨蘭若幽懷暢。游及竹林躁氣清。靜坐不虛蘭室趣。清游自帶竹林風。隨所遇時將靜悟。老於文者不陳言。得山水樂寄懷抱。於古今文觀異同。放水流長觀其曲。爲文氣盛集於虛。虛懷視水人咸悟。和氣爲春天與游。將合萬類爲一己。每以內觀當外游。

知足一生得自在。靜觀萬類無人爲。大文間世有述作。至樂在人無古今。山水之間有清契。林亭以外無世情。虛竹幽蘭生靜氣。和風朗月喻天懷。羣然和者幽蘭曲。快哉當之修竹風。古與爲懷稽作者。興隨所引契天然。風人所詠託於古。靜者之懷和若春。清風有信隨蘭得。激水爲湍抱竹流。室因抱水隨其曲。竹爲觀山不放長。亭間流水自今古。竹外春山時有無。山有此生未能至。竹爲一日不可無。八言云。畢生所長。豈在集古。閒情自託。亦不猶人。不次之遷。人同品峻。及時爲惠。情與春長。今古畢陳。趣生一室。人天興感。文可萬言。誕妄不生。虛無視事。幽閒自得。清靜爲修。林氣映天。竹陰在地。日長似歲。水靜於人。小有清閒。抱絃懷古。隨其時地。修己觀人。清氣若蘭。虛懷當竹。樂情在水。靜氣同山。春水初生。係懷左右。清風惠及。盛領情文。九言云。今文與古文。期其一是。無極爲太極。化可萬殊。

近吾鄉鄭雲麓觀察開禧。有知足齋集禊序楹帖一帙。刻於粵東董琴南爲之序。亦集帖中字。所稱既極自然。又有生趣者。信不虛也。茲擇其尤佳者錄之云。生當稽古右文日。老作觀山樂水人。人品清於在山水。天懷暢若當風蘭。世間清品至蘭極。賢者虛懷與竹同。時契幽懷同靜氣。因觀流水悟文情。有時自向竹間坐。無事一至蘭若游。爲人不外修齊事。所樂自在山水間。隨時靜錄古今事。盡日放懷天地間。修己可知有樂地。作文自合舍陳言。作文每期於古合。寄懷時或與天遊。萬類靜觀咸

自得。一春幽興少人知。世情豈盡能相合。賢者所爲固自殊。人品若山極崇峻。情懷與水同清幽。大賢自合爲九列。清風可以流萬年。信之爲言有諸已。文亦不外生於情。盡日山游得風趣。一生浪迹契天隨。老可情懷常作竹。少文樂事在游山。述古期同彭不作。臨風若遇惠之和。昔時嘗品惠山水。異日期爲少室游。自古在昔有述作。當今之世咸清賢。懷仁聖教序本集。右軍遺字而成。近復有集序中字作楹帖者。古雅可喜。五言云。鹿門多大隱。花洞有長春。雲霞生異彩。山水有清音。波綠生春早。雲歸注雨遲。有雨雲生石。無風葉滿山。七言云。黃昏花影二分月。細雨春林一半煙。明月不離光宅寺。清風常渡出山鐘。清華詞作雲霞彩。典重文成金石聲。勝地花開香雪海。妙林經說大羅天。一藏梵聲濤在口。滿林花影月苞山。九萬里風斯在下。八千年木自爲春。天機清曠長生海。心地光明不夜燈。承恩淇露三春重。被體香羅九夏輕。機雲才學有天趣。王謝風流本性成。法雨慈雲窺色相。清池明月露禪心。萬里波濤歸海國。一山花木作香城。座攬清輝萬川月。胸涵和氣四時春。八體六書生奧妙。五山十水見精神。松濤在耳聲瀾靜。山月照人清不寒。紫薇華省承綸誥。金粟香風舞綵衣。書成花露朝分潔。悟對松風夜共幽。珠林墨妙三唐字。金匱文高二漢風。謝傅心情託山水。子瞻風骨是神仙。燈火夜深書有味。墨花晨湛字生光。

歐陽率更書體泉銘。字最方整。臨作楹帖尤宜。有集字成聯者。七言云。月沼觀心清若鏡。雲房養氣潤於珠。德取延和謙則吉。功資養性壽而安。西清恩挹三霄露。東觀文成五色雲。一室圖書自清潔。百家文史足風流。巖前鍊石雲爲質。檻外流泉月有聲。爲學深知書有味。觀心澄覺寶生光。功深書味常流露。學盛謙光更吉祥。八言云。氣淑年和。羣生咸遂。冰凝鏡澈。百姓爲心。良玉潤珠。精神流照。吉金樂石。左右交輝。甘露卿雲。於斯爲瑞。珠輝玉照。蓋代之華。瓊質金相。當時之寶。頌經風緯。冠世而華。近張澥山方伯岳崧集字書聯見贈云。鳳質龍文。光華相映。景風淑氣。仁壽同登。室臨春水幽懷朗。坐對賢人躁氣無。此姚姬傳先生齋集禊帖字聯以贈羅子信太史者。

此  
页  
空  
白

# 楹聯叢話

## 卷十二

### 雜綴諧語附

朱竹垞先生在京師除夕。署門聯云。且將酩酊酬佳節。未有涓埃答聖朝。脫盡名士習氣。而未嘗不傳誦於時。所謂言以人重也。又罷官後。集句爲門聯云。聖朝無棄物。餘事作詩人。其實詩人二字。尙不足以盡先生耳。

彭文勤公自書京邸春聯云。門心皆水。物我同春。日下士大夫。頗以出語爲話柄。不過以門心二字強捏耳。然古人此等句法甚多。唐賈島題長江廳詩。有言心俱好靜之句。意境正與相似。則用之楹帖。有何不可。况對句甚渾成乎。後汪銳齋儀曹德錫仿其意云。臣心如水。王道猶龍。則青出於藍。而不能青於藍矣。京師宦宅。所製春聯。每喜以本歲干支分冠於首。如乙未云。乙近杏花袍曳紫。未勻柳色綬拖黃。丁酉云。丁歲觀光慙國士。西山探祕識奇書。皆有湊泊痕迹。莫如戊寅歲一聯云。吉日維戊。太歲在寅。爲自然也。畫舫錄云。岳大將軍鍾琪。以名將兼通文墨。嘗訪舊好蜀僧大岳於揚州樂善庵。卽席贈以聯句云。有月

卽登臺。無論春秋冬夏。是風皆入座。不分南北東西。庵卽譯經臺舊址也。或以此聯爲李笠翁所撰。英煦齋師曰。余未諳習內典。臨摹古人所寫佛經。偶有會心。如比邱尼。豈非尊我孔子乎。居馬蘭峪工次。時工人於舊寺中添建三教聖人殿。求作聯語。遂書與之云。西域談經。心仰尼山。思竊比。東周問禮。語傳柱史。戒深藏。

吾鄉林樾亭先生喬蔭。淇深經史之學。復工駢儷之文。有壽其姊夫李志漢封翁一聯云。寶樹蔚彤雲。知諸出有陽元。望他日成吾宅相。華堂盈紫氣。滌厥初於聃耳。喜長生本自家傳。封翁爲李研雲鴻瑞之父。蘭卿都轉之祖。宅相信不虛矣。

王夢樓先生贈蔣心餘聯云。前輩典型。秀才風味。華嵩品格。河海文章。汪劍潭端光亦有贈聯云。沾酒近交鄉父老。解衣平揖漢公卿。

阮梅叔亨。爲芸臺先生介弟。文采風流。不愧難弟之目。曾撰瀛舟筆談十二卷。皆雜紀先生撫浙時事也。洪稚存先生亮吉。於嘉慶戊辰八月十三日。游曲江亭。始與定交。用篆書楹帖贈之云。第五之名齊票騎。十三此夜訂心交。梅叔甚喜。卽附記於瀛舟筆談中。

張南山松軒隨筆云。高要莫善齋廣文元伯。以學行聞於時。馮魚山先生敏昌。贈以楹帖云。奉母孝經看。在手。教兒文選讀。從頭。

吳興包果峰敬堂。有著作才。阮芸臺先生最賞異之。嘗贈聯云。吳興山水。古來清遠。包咸論語。今尙流傳。李松雲先生。少年科第。後頗偃蹇。年六十時。猶官成都知府。自壽聯云。三館六曹。十七科。競稱前輩。一官萬里。二千石。遂老斯人。

秋雨菴隨筆云。子建之才八斗。我得一斗。天下共分一斗。以斗論才。奇矣。有曹姓人爲彭澤令。其友人贈一聯云。二分山色三分水。五斗功名八斗才。運典恰切。

蘭州府城西火祖廟。元宵燈火最盛。余曾於公餘往觀。記得吳信辰一聯云。鑽燧木先春。食德飲和。且自披星朝赤帝。觀燈天不夜。衢歌巷舞。何妨捧日待黃人。

王孚遠方伯述爲滇臬時。每赴城外監視行刑。必就其地關廟行香。此廟僻在郊垌。且非有行刑事。直爲人跡所不到。寺僧乞製廟聯。因以意撰句云。度一切衆生於夢幻後。存千秋大義在天壤間。可謂不卽不離。又言浙江桃花嶺有關廟。縉雲程教諭文溢撰聯云。當時諸葛大名荒祠古柏。嗟回首萬牛。何如漢壽亭垂徧開蘭若。此地洞天小有。絕壁修篁。肅臨風千纛。休比武陵源藐。空說桃花。據云。此聯在浙東。頗膾炙於人口。然上聯無端壓倒諸葛公。已屬無謂。下聯祇敷衍得桃花二字。實非佳構也。

西湖詩僧小顛。有萬峰山房稿。預爲涅槃塔院。嘗於所居榜一聯云。老屋將傾。只管淹留何日去。新居未卜。不妨小住幾時來。



張南山爲余述武后廟聯云。六宮粉黛無顏色。萬國衣冠拜冕旒。武后何以有廟。廟亦不知在何地。而聯語則亦莊亦諧。精切不易矣。

李笠翁云。李申玉廣文家有聲樂。余贈之聯云。門多桃李。案少簿書。別宦恐無此樂。前列生徒。後益絲竹。今時復有其人。又申玉之內子。生於元旦。是日稱觴。卽令家姬試演新劇。余亦有聯云。元旦卽稱觴。鶴算龜齡齊讓早。歲朝先試樂。鶯歌燕語盡翻新。

笠翁芥子園門前二柳。門內二桃。桃熟時。人多竊取。因戲書一聯於戶云。二柳當門。家計遜陶潛之半。雙桃鑰戶。人謀慮方朔之三。人以爲諠而不虐。又題歌臺云。休縈俗事催霜鬢。且製新歌付雪兒。又題大門云。孫楚樓邊觴月地。孝侯臺畔讀書人。孫楚酒樓。爲白門古蹟。太白觴月於此。周處讀書臺。則與芥子園適相鄰也。

賈膠侯中丞。有大園亭。棄而不居。改爲鄉館。凡山右名賢之客都門者。皆得寓焉。李笠翁贈之聯云。未聞安石棄東山。公能不有斯園。賢於古人遠矣。漫說少陵開廣廈。彼僅空懷此願。較之今日何如。

柯岸初居臺諫。幾二十年。李笠翁贈聯云。諫垣彌久望彌尊。看此際三公。都是當年等輩。封事愈多功愈懋。卜將來一擢。盡補往日淹留。

笠翁有除夕贈程焦鹿文宗一聯云。世間桃李。盡出公門。何須臘盡始芳菲。滿眼無非春色。天下魚龍。都

歸學海不待時來方變化。啓口卽是雷聲。

嘗見劉文清公書楹帖云。鏡裏有梅新晉馬。釜中無藥舊唐雞。不知所謂。或云是錢東澗句。隨園詩話補遺云。對聯之佳者。或題禪堂云。無法向人說。將心替汝安。佛座云。大護法。不見僧過。善知識。能調物情。題虎邱書春册店門云。一陰一陽之謂道。此時此際難爲情。題戲臺後云。做戲何如看戲樂。下場更比上場難。或見贈云。天上何曾有山水。人間樂得做神仙。

秦澗泉學士請假南歸。卜居於武定橋畔。相傳爲前明何尙書汝寵故宅。取東坡瞻望玉堂如在天上之意。名其園曰瞻園。園中有東山樓。自爲聯云。辛勤有此廬。抽身歸矣。喜鳥啼花笑。三徑常開。好領取竹簾清風。茆檐暖日。蕭閒無箇事。閉戶恬然。對茶熟香溫。一編獨抱。最難忘別來舊雨。經過名山。

江寧董觀橋制府教增。督閩浙時。愛西湖山水之勝。買宅於杭城之三撥營。擬解組後。作平泉之墅。榜其門云。聖代卽今多雨露。故鄉無此好湖山。妙偶天然。人多誦之。後制府未及予告。而已歸道山矣。

京中宣武門外之方壺齋。本戲園。今改爲官宅。余叔父太常公。首賃居之。公出視學廣西。余妹婿龔小峰。豐穀居之。獻歲自題門聯云。家傳渤海箕裘遠。春到方壺雨露新。一切姓。一切地。李芝齡宗叻亟稱之。費西塘京兆錫章。以召試舉人。歷登清要。中年興高采烈。晚乃漸識夷塗。嘗於書室中自撰一聯云。酒闌興倦。事往情遷。祇不忘遊過名山。別來舊雨。此與秦澗泉學士語相同。近吳山尊自撰聯句亦用之。或者襲學士語耳。春去仍歸。人老難復。吏

休詫殿前起草。海外題詩。蓋京兆久爲軍機章京。以才望著名。及居諫垣。又曾奉命充冊封琉球使者也。秋雨菴隨筆云。葛秋生慶齋中懸一聯云。書似青山常亂疊。燈如紅豆最相思。語極清新。青山句。秋生自擬紅豆句。則許滇生太史乃善所對也。

宣武門外上斜街趙象菴舍人家。菊花最盛。自號菊隱。花時過客如織。聞其初未著名時。來觀者率不通謁。亦不問主人爲誰。一日劉金門先生同京朝官。借其園亭賞菊。酒闌。主人出素紙求先生楹帖。且乞新製。問主人有何好。答云。無他好。惟愛菊如性命耳。先生信手書云。祇以菊花爲性命。而未有對語。復問主人何姓。答云。姓趙。乃一揮而就云。本來松雪是神仙。一座歎其工敏。

秋雨菴隨筆云。伊犁有過復亭。蓋爲謫官而設。劉金門宮保過之。題一聯云。過也如日月之食焉。復其見大地之心乎。運用成語。天造地設。

有以義園求劉金門先生撰聯者。先生集四書云。逝者如斯夫。掩之誠是也。確切不移。吾鄉福州會館屋後。有野地一區。自前明卽立義園。每春秋兩祭。同鄉之在京師者咸集。聞鄉老言。舊有小亭。前明葉文忠公有聯云。滿眼蓬蒿游子淚。一盂麥飯故鄉情。悽婉動人。自余入京師。則亭久圯。聯亦不存矣。

余偶見一薙髮店中。懸整容堂扁。旁有聯云。雖然毫末技藝。却是頂上工夫。雖巧而不傷纖。又桃符綴語中載一聯云。不教白髮催人老。更喜春風滿面生。又秋雨菴隨筆中載一聯云。到來盡是彈冠客。此去應

無搔首人。皆頗自然。又牙行市肆通用聯云。其交以道。其接以禮。同聲相應。同氣相求。亦頗撲不破語也。大路邊茶亭。或題一聯於柱云。四大皆空。坐片刻。無分爾我。兩頭是路。喫一盞。各自東西。淺語頗有禪理。又杭州湧金門外藕香居茶室聯云。欲把西湖比西子。從來佳茗似佳人。集蘇句恰切。可入西湖志餘。鄭板橋六十自壽聯句云。常如作客。何問康寧。但使囊有餘錢。甕有餘釀。釜有餘糧。取數葉賞心。舊紙放浪吟哦。與耍闊皮耍頑。五官靈動勝千官。過到六旬猶少。定欲成仙。空生煩惱。祇令耳無俗聲。眼無俗物。胸無俗事。將幾枝隨意新花。縱橫穿插。睡得遲。起得早。一日清閒似兩日。算來百歲已多。板橋解組歸田日。有李嘯村者。贈之以聯。板橋方宴客。曰嘯村韻士。必有佳語。先觀其出聯云。三絕詩書畫。板橋曰。此難對。昔契丹使者。以三才天地人屬語。東坡對以四詩風雅頌。稱爲絕對。吾輩且共思之。限對就而後食。久之不屬。啓視之。則一官歸去來也。咸歎其工妙。厲樊榭先生鶚。葬於杭州西溪王家塢。不久。遂爲榛莽。後四十餘年。何春渚琪游西溪。見草堆中有樊榭及姬人月上栗主在焉。因取歸。偕同人送至武林門外牙灣黃山谷祠中。掃灑一室。以供之。按月上。姓朱氏。烏程人。王蘭泉先生題其楹云。丈室花同天女散。摩圍詩共老人參。見蒲褐山房詩話。有集四書語爲典肆聯云。以其所有。易其所無。四境之內。萬物皆備於我。或曰取之。或曰無取。三年無改。一介不以與人。亦自穩切。

吳山尊有題友人某別業云。淥水漾丁簾。增我輩閒中風致。名園依丙舍。祝君家看到雲仍。雖無深意。而情文斐亶。自足動人。

聞吳山尊嘗於歲暮向孫淵如先生貸金。先生方自製室內桃符。謂山尊曰。君能代我成一佳聯。便當如所請。山尊應聲曰。上相教除名士氣。至尊親許讀書人。蓋上句乃董文恭公勗淵如之言。對句乃先生出試差復命時所親承天語也。先生喜其雅切。卽如所請。金數與之。山尊之善於譽人。皆此類也。

趙雨樓光祿與余同直樞地。同膺察典。而後余八年始出守鎮江。謁余於吳門。索書楹帖。余戲拈宋人句贈之云。醉中擲筆金鑾殿。睡起鳴笳鐵甕城。雨樓甚壯其語。然出句有倨侮之嫌。雖成語亦不敢落筆也。程春海侍郎最工作聯語。余守荊州之明年。卽擢淮海監司。適侍郎奉使督學黔中。過荊時。手揮一聯見贈云。南中喜得秦淮海。天下願識韓荊州。人皆服其工敏。後余擢藩吳門。侍郎主白下講席。贈聯云。名輩出樞垣。本杜斷房謀。陶甄南國。鴻才領詞坵。有歐書韓句。濡染東吳。乙未之秋。余奉召復出授甘藩。瀕行。侍郎贈聯云。霖雨東興。樞密上才開遠略。好風西笑。湖山秀句帶邊聲。次年。余擢撫桂林。入覲時。侍郎復贈聯云。洪容齋隨筆成書。實著作之淵海。范致能驂鸞有錄。比宦游於神仙。適余方以退菴隨筆呈正。故出聯云。爾時同覲入京者。有賀耦庚中丞。侍郎亦贈聯云。以孝去。以忠來。到處蒼生望霖雨。是賢臣。是學者。一編經世出名山。蓋耦庚由江藩告養回籍。此次亦奉召復出。次聯謂所撰皇朝經世文鈔也。

春海贈林少穆督部聯云。理事若作真書。絲密無間。愛民如保赤子。體會入微。少穆最工作小楷。故出聯自然關合。次聯亦能酷肖其生平。

龔闇齋觀察麗正。七十生辰。其子定菴儀部。求壽聯於春海。春海信筆書與之云。使君政比龔渤海。有子才如班孟堅。余亦寄一聯云。桑世紀羣交。憶蘭省樞垣。齊向後塵趨軌范。傅家召杜譜。喜皖峰滬瀆。共聽兩地頌臺萊。蓋觀察初由禮部入軍機。於余皆爲前輩。而余宦江南。又適值觀察由安慶守擢蘇松監司也。

余福州老屋在黃巷。唐校書郎黃德溫先生璞故里。黃巢所稱儒者之宅。相戒勿犯者也。屋之對門爲酒壚。憶初入宅時。先叔父九山公。手書杜句作門聯云。座對賢人酒。門聽長者車。後酒家酒漸不售。遂歸咎此聯。以爲賢人語含譏諷。公因復集杜句改署於門曰。宅入先賢傳。門聽長者車。乃不踰年而酒家歇業。有一僮父奄有其地。改換門庭。後四十年。余由蘇藩假歸。遂卜居焉。

黃巷新宅之西。有小樓。余始葺而新之。黃巷中以此樓爲最古。因卽榜爲黃樓。集同人作詩張之。近以詩稿示余小霞。爲寄題一聯云。白傅早歸。一代福人居福地。蘇公再見。千秋黃巷重黃樓。

余於五十八歲。引疾歸里。有口號云。擇里仍居黃巷宅。辭官恰及白公年。李蘭卿以此十四字。作分書楹聯相贈。時方得文衡山芝南山閣畫卷。余自書芝南山館扁於廳事。蓋寓知難而退之意。並自製一聯云。

歷中外卅年身宦海扁舟。萬頃驚濤神尚悚。就高低數弓地。儒宮環塔。三竿曉日夢初醒。嗣於東園中葺藤花吟館。又製一聯云。有客醉無客睡。福簡簡吁可愧。長歌粗短歌疎。詩平平聊自娛。此二聯頗聞於時。江南僚友有以爲妒者。又有百一峰閣爲園中最高處。余所手建。並題聯云。平地起樓臺。恰雙塔雄標。三山秀拱。披襟坐霄漢。看中天霞起。大海瀾回。客有誦此聯。決余必當復出者。

百一峰閣之左。有樓三楹。余輯全閩詩鈔於此。因以爲樓額。其聯則集前人句云。藏名詩酒間。竹屋紙窗清不俗。養拙江湖外。風臺月榭悄無言。樓之下爲寶蘭堂。因皮褚蘭亭石刻於此。卽集蘭亭字云。隨遇自生欣。暖日和風入懷抱。靜觀可娛老。崇蘭幽竹有情文。

桂林太守興靜山。以四月四日。周甲初度。余以聯壽之云。宜民頌起延年後。壽世筵開浴佛先。一切其官。一切其時。同人咸以爲工巧。蓋顏延年曾居此官。聊借用二字以寓壽意。尙不覺喫力也。

廣西節署之東南隅。有銅鼓亭。皮大銅鼓一。壁上嵌謝蘊山錢裴山二先生銅鼓詩石刻。其上有樓。因呼爲銅鼓樓。地勢最高。宜於登眺。桂林千峰百嶂。盡在眼中。迄今七十餘年。樓漸剝落。樓下榛莽塞徑。無過問者。余莅任之明年。始捐俸重修。並拂拭銅鼓。時幕府諸君皆能詩。因共和謝錢韻張其事。僚案亦以次繼聲。遂有銅鼓聯吟集之刻。樓旣新。僉謂宜有聯。因憶前人有集山谷東坡句云。全以山川爲眼界。故應賓主盡詩人。若移作此中聯語。情景俱合矣。因書而懸之樓楹云。

桂林棲霞山中有寺。由寺後穿山腹。可達七星巖。上有碧虛亭。爲范石湖舊蹟。亭前兩石柱刻聯云。先文穆風流宛在家。學士邱壑偶然。款署范時崇。蓋康熙中。曾爲粵西藩伯者。先文穆是石湖家學士。則不知所指。徧詢之都人士。並檢志乘中。皆不得其人。存以俟考。

堅瓠集云。泉州府學某教授。南海人。頗立崖岸。一日設宴於明倫堂。演西廂雜劇。有無名子書一聯於學門云。斯文不幸。明倫堂上。除來南海先生。學校無光。教授館中。搬出西廂雜劇。某出見之。赧然自愧。故態頓除。以下諧語。

堅瓠集又云。常熟桑民悅。憚。以才自負。居成均時。爲邱仲深所黜。後就教職。書對於明倫堂云。文章高似翰林院。法度嚴於按察司。

又云。天啓中一巡按。爲逆璫造生祠。題楹柱云。至聖至神。中乾坤而立極。允文允武。並日月以常新。有錄其詞以獻魏忠賢者。忠賢讀之不解。問左右何事。說到黃閣老。蓋黃立極者。同時宰相之名也。左右曰。某御史與爺作對耳。忠賢艷然變色曰。多大御史。敢與我作對。趣召緹帥拘之。左右爲之再三解晰。始喜。又云。吳郡吳文之初名濟。方九歲。卽工屬文。嘗自書對聯云。移門欲就山當榻。補屋常愁雨溼書。與同里張濟同塾讀書。客聞其才。出對云。張吳二濟聯床讀。文之應云。嚴霍同光問世生。客善繪事。自撰句云。畫草發生。頃刻工夫非爲雨。文之應云。筆花燦爛。須臾造化不關春。客喜。卽以爲畫室楹聯云。



又云。吳門有富翁鄉居者。求楊南峰書門對。此翁之祖。曾爲人僕。南峰題云。家居綠水青山畔。人在春風和氣中。上列家人二字也。見者無不匿笑。

董文恭公有族人某居京師者。廳事懸一舊人所書聯云。賢者亦樂此。卓爾末由從。其字甚雄偉。寶之二十餘年矣。一日紀文達師偶過之。詫曰。此聯殆不可挂也。某詰其故。師曰。上聯首著賢字。下聯首著卓字。非君家遙遙兩華胄耶。某始爽然撤去。

京師戲園。每演一劇。必分開數日。始了其緒。蓋勾留觀者。使不能中途而輟也。有集聯云。把往事。今朝重提起。破工夫。明日早些來。可稱工切。又鄉村戲臺聯云。父老閒來消白晝。兒童歸去話黃昏。又有集四書句云。聞絃歌之聲。賢者亦樂此。見羽毛之美。鄉人皆好之。上聯謂崑腔。下聯則亂彈武戲也。又一聯云。或爲君子小人。或爲才子佳人。登場便見。有時歡天喜地。有時驚天動地。轉眼皆空。語雖質俚。亦自隱括。近有集禊帖字云。稽古昔。畢類其人。賢以生爲。趣由丑作。託清閒。咸臨此地。情隨事感。曲有文聽。又吳立甫拔貢大本。醉後爲人促作戲臺聯。因集句付之云。古今人何遽不相及。天下事當作如是觀。又有作戲臺後一聯云。凡事莫當前。看戲何如聽戲好。爲人須顧後。上臺終有下臺時。則幾於格言矣。

京師慶寧園戲臺聯云。大千春色在眉頭。記當年翠暖珠香。曾游膽部。五萬鶯花如夢裏。念此日丁歌甲舞。重睡崑崙。詞意在可解不可解間。或云是乩筆。大抵戲臺聯。莊諧並宜。但忌俗耳。或集經語云。治世之

音安以樂。君子有酒旨且多。則莊重不佻。用於官廨尤宜也。

余紫松提戎步雲曰。記得圓明園有一戲臺聯云。堯舜生湯武淨。五霸七雄。丑末耳。伊尹太公。便算一隻耍手。其餘拜將封侯。不過搖旗呐喊。稱奴婢。四書白。六經引。諸子百家。雜說也。杜甫李白。會唱幾句亂談。此外咬文嚼字。大都緣街乞食鬧蓮花。似此大識力。大議論。斷非凡手所能爲。或以爲自大內傳出者近之。

對聯有可解頤者。康熙時。廣東詩僧住海珠寺。交通公卿。寺塑金剛與彌勒環坐。對聯云。莫怪和尚們這般大樣。請看護法者。豈是小人。又楊蘭坡題倒坐觀音像云。問大士緣何倒坐。恨凡夫不肯回頭。又江西某君題養濟院云。看諸君腦滿腸肥。此日共餐常住飯。想一樣鐘鳴鼎食。前身都是宰官身。

乾隆庚子歲。二藏活佛來朝。供帳極盛。住雍和宮。遠近僧徒叅謁者。日以千計。活佛高坐跏趺。無少動也。未幾以出痘死。有好事者。送一輓聯云。渺渺三魂。活佛竟成死鬼。迢迢萬里。東來不見西歸。時傳爲笑話。魏善伯徵士題范觀公中丞廁聯云。成文自古稱三上。作賦於今過十年。廁不必聯。然如此雅切大方。亦自可喜。若一夕話所載。莫道輪回輸五穀。可儲筆札賦三都。又但願生民無殿屎。不慙宰相受堂餐。又官司不令多中飽。燕飲應知無後艱。則又遜前語矣。

繆蓮仙塗說云。安徽無爲州老諸生。得欽賜舉人。自作一堂聯云。並未出房。虧得白頭髮。秀士何嘗中式。

倒做了黑耳朵舉人。蓋俗以衙門中未上名而幫差者爲黑耳朵。故戲用之。又有一廩膳生得欽賜副榜者。亦自書一堂聯云。說甚功名。只免得三年一考。有何體面。倒少了四兩八錢。末句蓋言廩祿也。

袁簡齋先生云。或傳程魚門編修督芳。京中移居詩云。勢家歇馬評珍玩。冷客攤錢問故書。予笑曰。此必琉璃廠也。詢之果然。因記商寶意移居。周蘭坡與萬晴初訪之。見門對云。豈有文章驚海內。從無書札到公卿。萬曰。此必商君宅矣。詢之亦果然。

續消夏錄云。張明經晴嵐除夕前自題門聯云。三間東倒西歪屋。一個千鎚百鍊人。適有鍛鐵者。求彭信甫書門聯。信甫戲書此二句與之。兩家望衡對宇。見者無不失笑。二人本辛酉拔貢同年。頗契厚。坐此竟成嫌隙。所謂凡戲無益。此亦一端也。

魯亮儕觀察。性粗豪。而所居屋狹。自署其門聯云。兩間東倒西歪屋。一個南腔北調人。見茶餘客話。堅瓠集載漳浦趙從誼。知獨山州。州城極荒涼。衙署尤陋。趙自題楹柱一聯云。茅屋三間。坐由我。臥由我。里長一個。左是他。右是他。

柳南隨筆云。崑山歸元恭先生。狂士也。家貧甚。扉破至不可闔。椅敗至不可移。則俱以緯蕭縛之。遂書一扁曰。結繩而治。又除夕署其門楹云。一鎗戳出窮鬼去。雙鉤搭進富神來。其不經多此類。時人呼之爲歸癡云。

陳文恭續訓俗遺規內載一事云。常州一老布衣。平時奸狡。自號清客。書門對曰。心中無半點事。眼前有十二孫。有人續寫其下云。心中無半點事。半生不曾完糧。眼前有十二孫。十個未經出痘。見者絕倒。有一縣令自題其署外大門云。愛民若子。執法如山。實非良吏也。他日有無名子續寫其後。成一長聯云。愛民若子。牛羊父母。倉廩父母。供爲子職而已矣。執法如山。寶藏興焉。貨財殖焉。是豈山之性也哉。記得宋漫堂筠廊偶筆中載一年老令君。大書縣治之前曰。三不要。下注一不要錢。二不要官。三不要命。次日視之。則每行下各添二字。不要錢下曰嫌少。不要官下曰嫌小。不要命下曰嫌老。蓋與此同一惡謔也。有某太守清苑人。曾令涇縣。以貪酷聞。一日晨起。見廳事貼一四書集句聯云。彼哉彼哉。北方之學者。何足算也。戒之戒之。南人有言曰。其無後乎。前明袁擇菴于令。以荊州守罷歸。流寓金陵。落魄不得意。大書門聯云。佛言不可說。不可說。子曰如之何。如之何。亦自謂以經對經也。

明末有海中渠魁。至普陀山設齋一月。手題楹柱云。自在自觀觀自在。如來如見見如來。其字至今猶存。公牘中字義多不可解。嘉應湯滋圃游幕南陽時。戲作聯云。勞形於詳驗關。咨移檄牒。寓自在。欽蒙奉准。據爲承。亦所謂以不解解之也。

嘉慶間粵洋有巨盜郭學顯者。乳名郭婆帶。雖剽掠爲生。而性頗好學。舟中書籍鱗次。無一不備。船頭一

聯云。道不行。乘桴浮於海。人之患。束帶立於朝。在洋驛騷多年。官兵莫敢捕治。後爲百菊溪制軍招降。予以官。辭不受。於羊城買屋課子。以布衣終。

嘉慶間。周蓮塘大宗伯兆基薨。德州盧南石師代之。時費西墉爲京兆尹。與周至好。往弔日。一哭而殂。京師戲爲周作輓聯云。一品頭銜讓南石。三聲腸斷失西墉。

李艾塘云。揚州虹橋東岸。有靈土地廟。其前爲過街亭。凡喪殯出城。廟僧輒有路祭。禮拜誠敬之意。如所親暱。以此爲終歲孟飯計。惟風雪苦寒。不能出戶時。但於枕上聞千百人履聲及笑語歌喏。不絕於耳。每生寶山空回之感。廟中有集聯云。到處雲山到處佛。當坊土地當坊靈。上語爲金冬心農登嵩雜述詩句。對語爲鄭板橋題如皋土地廟聯句云。鄉里鼓兒鄉里打。當坊土地當坊靈。

青春鸚鵡。楊柳樓臺。司空表聖詩品句也。陳曼生郡丞集二句爲對云。綠綺鳳凰。梧桐庭院。注云。張子野詞。請梁山舟學士爲書楹帖。學士愛其工麗。欣然書之。後徧考子野詞。並無此二句。蓋竟屬郡丞杜撰也。嘉靖末。宜興大疫。有二青衿俱死。同上閻王殿。一從東廊。一從西廊。各相眄以目。王察其籍。皆以無罪放回。從東者述所見柱上聯語。爲天道地道人道鬼道道道無窮。恨不見西柱對。從西者述所見云。胎生卵生。溼生化生。生生不已。其餘所見皆同。

福州鄉俗。每逢端午節。既於朔日懸蒲插艾於門庭。而五日午時。又必用紅箋書對句。貼於楹柱。謂之午

時書蓋自前明已然。亦桃符之別調也。相傳徐振烈即徐自作門前午時書云。門幸無題午。人慚不識丁。曹石倉先生以此賞異之。近日通行之語。如海國中天節。江城五月春。及保艾思君子。依蒲祝聖人。語尙近雅。時人又有自出新製者。未免纖佻。其用艾旗招百福。蒲劍斬千邪。及蒲帶榮封一品。艾旗捷報三元。舊語者。蓋十家而九。則墮入惡道矣。

程春海侍郎在京邸續娶。黃左田先生贈聯云。調羹定識威姑性。灑翰應增呂子書。陳石士前輩用光亦贈聯云。博議書成臨月按。合歡酒熟對花斟。皆自謂雅切。續娶時亦頗傳誦之。按此沿用俗傳東萊博議成於新娶一月。事實未考也。本書自序謂屏處東陽之武川里。有從游者談餘語隙。波及課試之文。乃取左氏書理亂得失之迹。疏其說於下。旬儲月積。浸就篇帙云云。無一語涉及新娶者。又考呂公年譜。初娶韓元吉女。在紹興二十七年。時居信州。不居東陽。後乾道三年。持母喪。居明招山。學子有來講習者。四年已成博議。五年二月除服。乃繼娶韓氏女弟。則是書實成於喪制中。流俗所傳。不足辨矣。

此  
页  
空  
白

# 楹聯續話

## 卷一

### 故事

余輯楹聯叢話前編應制門。所錄野獲編中袁文榮撰嘉靖齋醮對聯。洛水元龜云云。實當改入故事門。今考鈕玉樵琇觚臚亦載此事云。崑崙山人初入都。客淮南李公春芳所。時世宗齋居西宮。建設醮壇。敕大臣製青詞一聯。懸於壇門。春芳使山人爲之。山人走筆題曰。洛水靈龜初獻瑞。陽數九。陰數九。九九八十一數。數通乎道。道合元始天尊。一誠有感。岐山威鳳兩呈祥。雄聲六。雌聲六。六六三十六聲。聲聞於天。天生嘉靖皇帝。萬壽無疆。李以進呈。深加獎賞。由是公卿互相延譽。其本傳謂大臣應制青詞。多假手山人者。以此乃他人移之別氏。則以雕蟲爲山人諱也。按此與野獲編所載互異。前編所錄元龜丹鳳。此作靈龜威鳳。尚可兩存。而前編作雄鳴雌鳴。則係傳寫之誤。自應從此作雄聲雌聲。以與三十六聲相應也。周櫟園書影云。坡公嘗言奉使西邸時。見書此數句。愛而錄之云。人間有漏仙。兀兀三杯醉。世上無眼禪。昏昏一枕睡。雖然沒交涉。其奈略相似。相似尙如此。何況真個是。汴人劉酒者。無名字。人卽以酒呼之。已



亦以自名。能畫人物。賣畫得錢。則與酒家。余見之七年。無夕不醉。醉中作畫。酒氣拂拂。從十指間出。嘗乞余顏其草堂。余取坡公語。題曰略似菴。以人間有漏仙。三杯兀兀。世上無眼禪。一枕昏昏。爲楹聯。酒得之。殊自喜。

施愚山矮齋詩話云。龍濟寺。在吉水城東南。踞東山勝處。蘇長公初到嶺外。曾過此寺。題聯云。天上樓臺山上寺。雲邊鐘鼓月邊僧。手書刻於柱。明末猶存。或曰。此坡老詩中一聯也。惜未見其全篇。

先資政公曰。凡著述一書。無論大部小種。皆須有益於世。有益於人。使讀者有所感發而興起。乃爲可貴。記得先四代祖司訓公諱珪。雪園雜紀中有一條。真齊家寶訓也。其言云。前明南京禮部尙書餘姚孫忠烈公燧。殉宸濠之難。其子文恪公陞。續娶楊夫人。花燭日。前妻三子。鐘 鑿鐘 不出拜。文恪甚怒曰。我家一

門忠孝。今無禮若此。非吾子也。使家人覘之。則皆在書塾中相持而哭。楊夫人親往塾中見諸子。喜曰。他日皆大器也。文恪怒爲之解。文恪訓子嚴。尋常不得出書塾。每晨至門首。加鎗而去。一日楊夫人偶至其處。自窗隙潛窺。三子皆不在其中。而門扃如故。乃開門入視。最後見壁上懸一畫。畫後一門通焉。察之。則並未外出。乃各與其妻聚談耳。楊夫人亦不語。惟手書一聯懸於壁云。愛惜精神。留此身擔當宇宙。蹉跎歲月。將何日報答君親。諸子見之。皆發憤。後皆顯達。其季子鑛。楊夫人所出。世所稱月峯先生者。官尙書。亦母教也。

周樸園閩小紀云。侯官林太守春澤。正德甲戌進士。爲戶部主事。疏諫南巡。遷員外郎。以司藏失盜。鐫秩。復歷南京刑部郎中。出知松番府。免歸。公生於成化庚子。至萬曆己卯年百歲。有司建人瑞坊。子應亮。以戶部侍郎侍養。亦年七十矣。起拜嬰鑠如壯年。應亮子如楚。工部侍郎。公嘗率少司農少司空田中觀耘。鄉人立碑紀之。一時以爲盛事。其大門有自撰楹聯云。四十登科。甲戌還登甲戌榜。五旬生子。長孫又抱長孫兒。至癸未十月卒。年百有四歲。其百歲時。猶生一女。適雲南督學鄧原岳。三代進士。五代同堂。一時有東西林之稱。東林居林浦。卽三代五尙書之家。西林居南嶼。卽人瑞翁宅也。

雪園雜紀云。林浦林家。有七科八進士。三代五尙書之稱。林文安公澐。爲第一代尙書。子二。康懿公廷楫。文僖公廷機。文僖子文恪公懌。及其弟煒。亦俱接武爲尙書。祠堂中有一聯云。國師三祭酒。宮保五尙書。羅景綸大經。鶴林玉露云。杜成己爲相。以日見賓客。疲神妨務。無益於事。乃不復見客。但設青櫃於門。有欲言利害者投之。越旬日。並櫃撤去。有題一聯於府門者曰。杜光範之門。人將望而去矣。撤暗投之櫃。我且卷而懷之。夫題門者薄矣。而成己此舉。亦未之思也。

陳白沙先生行狀。載有李某。裹糧自嘉魚數千里。從學白沙。凡二年。先生服食行纏。待之如子弟。後築楚雲臺以居之。臺榜一聯云。有月嚴光瀨。無金郭隗臺。其欲來天下之善蓋如此。

施愚山矩齋雜記云。董思白。陳眉公。以詞翰相推重。董年八十五。臨終。索婦人紅衫絳繻爲服。陳年八十

三將逝之前。辟穀數日。盛爲詩歌。以書別親友。仍自題一聯云。啓予足。啓予手。八十年臨深履薄。不怨天。不尤人。三千界魚躍鳶飛。擲筆而逝。亦可謂了然於去來者矣。

又家風輯略云。天啓丁卯閒。余季父祇園公。受知於督學使者賈侍御。補邑諸生。先考述明公贈之楹聯云。誦鼎上辭。長願景行正考父。任天下事。可能遙揖范希文。其相勸之意深矣。

陳眉公繼儒見聞錄云。翟公欒嘗自製對聯云。靜亦靜。動亦靜。五臟剋消夫慾火。榮亦忍。辱亦忍。平生不履於危機。常熟嚴公訥輔政時。封公尙在其門。聯云。堂上雙親壽。朝中一品家。申公時行。解相印歸。其堂聯云。無毀無譽。三代直道而行。知止知足。四時成功者退。陸文裕公在京邸中。則榜世廟御撰一聯云。抑人是自抑。揚人其自揚。都城鄭宮保敬庵諱紳者。以工部尙書告老。其堂聯云。世多君子扶皇極。天放閒人養太和。翟中丞諱鵬者。其堂聯云。徒有寸丹懸帝闕。竟無尺素達權門。王中丞璣。更號六陽山人。嘗榜其堂曰。偶爾謝上天富貴。歸來作平地神仙。又有天上有人扶日月。山中安我老漁樵。吾鄉包公節與弟孝。以兄弟進士。爲南北兩臺。其門聯云。兄進士。弟進士。一天雨露。南御史。北御史。兩地風霜。湯東谷廳事春聯云。東坡居士休題杖。南郭先生且濫竽。後廳曰。片言曾折獄。一飯不忘君。蓋東谷嘗從興濟伯楊忠定公奉迎鑾輿。故云。其東偏曰。暫拄西山笏。閒開北濟尊。其西偏曰。長身唯食粟。老眼漸生花。豪俠之氣。可以想見。

前輯楹聯叢話中已採入周暉金陵瑣事茲覆閱之尙有三條可補入者如云太祖賜駙馬梅殷府門春聯云人間塵俗不到處闕下恩榮第一家又云成祖殺方孝孺於聚寶門外有門人廖鏞廖銘檢其骨葬之不封不樹莫可認識今諸搢紳立方祠於永甯寺後山又聚土爲墳上海徐鯨刻一聯於華表云十族遺骸埋聚寶千年孤塚表長干又云有士人因病出神入閻羅殿記得殿中楹柱一聯云是是非非地明明白白天

興化府志云正統間東鄉王常字大經以御史言事左遷知莆田縣事政務嚴明嘗書聯署楹云牧民猶帶舊風霜見者咸以爲佳其妻黎氏通書史語常曰風霜御史職也君今出牧奈何專尙嚴乎請易猶帶二字曰無事何如常欣然遂改之

甯德縣志云主簿丁大全因旱令人以銀瓶乞水於百丈龍潭取之得瓦瓶歸大全疑之復造銀瓶躬往投之又得瓦瓶大全祝曰龍神有靈若吾後當顯貴幸示靈異潭中果露龍爪大全後登宰府奏封龍王架石爲亭題聯云龍從百丈潭中起雨向九重天上來今亭址猶存

相傳明末倪鴻寶詣呂晚邨呂揭一聯於堂楣云囊無半卷書惟有虞廷十六字目空天下士只讓尼山一個人後呂詣倪倪亦揭一聯於堂云孝若曾子參纔足當一字可才如周公旦容不得半點驕兩人之優劣見矣

孫柳君孝廉衍慶辛廬隨筆云。前明嘉靖間。湖州潘時良司空季馴。最敬關帝。督南河時。有二蛟爲患。公夢帝許助以神力。遂斬之。今蛟首一在高家堰關帝廟中。一藏公家。每歲於昆山麓祀帝時。必陳之。當昆山廟落成日。衆擬撰楹聯。未就。忽一素不識字之田夫。入座提筆。大書漢壽亭侯廟五字扁。又署楹聯云。悠悠乾坤共老。昭昭日月爭光。十二字。不署款而去。人或追問之。則自云不知所爲也。書體絕似虞永興。今猶存廟中云。

王漁洋隴蜀餘聞云。劉以平字近塘。猗氏人。爲諸生時。夢入宮殿中。有王者命坐對弈。又至一所石門。懸聯句云。鸚鵡能回千載夢。麒麟空臥萬年秋。不解所謂。既登進士。爲潞王府官。王敬禮如賓師。遷陝西行太僕卿。過武后墓。墓上石刻一聯。卽夢中所見也。

又香祖筆記云。廣州城南長壽庵。有大池。水通珠江。潮汐日至。池南有高閣。甚麗。可以望海。其下曰離六宮。主僧某。乞余製爲楹聯。余題句云。紅橋映海三更月。石澗通江兩度潮。紀實景也。又云。康熙時。上駐蹕杭州。時山陰耆民王錫元。同胞兄弟五人。見於行宮。長次係雙生。皆年八十歲。三者七十八歲。四者七十六。五者七十五歲。率子姪凡十七人。孫十八人。賜宴賜緞。又賜扁額云。一門人瑞。皇太子賜聯云。五枝錦樹榮今代。百秩仙籌萃一門。

鈕玉樵曰。茗中吳磐家饒於費。工書博學。甲申後。絕意進取。學使者張安茂。題其居爲才人節士之廬。然

負氣甚高。未能韜晦。順治中。官方山備兵。吳興與之友善。因重修逸老堂。乞其長句一聯。鐫懸堂柱。吳走筆書云。山川無恙。歎前輩風流何處。但古道斜陽。冷煙衰碣。儘悲涼人物。止剩寒鴉。臺閣重新。問蒼穹英雄誰是。有補天巨手。回日瑀戈。待整頓乾坤。再來杯酒。詞旣悲壯。書復蔚跂。有怨家潛錄其語。以吳陰蓄異謀。首之帥府。禍幾不測。方山知之。乘夜撤去。力爲回斡。費千餘金。事乃已。

秋燈叢話云。夏太史力恕。孝感人。康熙庚子。夢謁闕帝廟。帝諭之曰。廟聯多不愜余意。如三分忠義等字。適足增余痛。好另爲作對。將元爾矣。授以巨筆。夏書云。英雄幾見稱夫子。豪傑如斯乃聖人。帝稱善。醒而識之。遂謹鐫板而懸於廟。是科鄉試。果第一。按英雄十四字。熟在人口。而不知其出於夏也。

茶餘客話云。孫藩使舍中。太翁爾周宰浙時。獨行杭州城外疏村中。一望土冢壘壘。見粉牆。卽往索茶。一小婢舉竹椅出。令坐。捧苦茶一盞飲之。須臾去。呼之不出。見門上一聯云。兩口居山水之間。妻忒聰明夫忒怪。四面皆陰燐所聚。人何寥落鬼何多。嚴問樵曰。此歸元恭所自署聯云。兩口寄安樂之窩。妻太聰明夫太怪。四隣接幽冥之地。人何寥落鬼何多。

鈕玉樵曰。故友王師石嘗言嘉靖丁清惠公爲南畿操江時。巡視郭外。偶過刻字店。頤指左右呼其人來。而肩輿已行。閱三日。中軍押一人投之階下。曰。刻字店主到。公已忘之。熟視良久曰。汝店所刻扁字。筆畫有訛。呼汝令改耳。無他也。其人自公呼。隨被銀鐺鎖至軍府。迨三日後還家。中人之產已費其半矣。是知

慎爾出話爲民上者。尤所宜慎。子他日學成而仕。尙其念之。故余宰白水。題一聯於後堂云。丹毫一點。乃吾民利害攸關。須念悖入。白日三竿。卽爾室公私畢照。莫謂知顯不在知微。念故友之箴言也。紀文達師閱微草堂筆記云。明永樂二年。遷江南大姓實畿輔。始祖椒坡公。自上元徙獻縣之景城。子孫繁衍。析居崔莊。在景城東三里。今土人以仕宦科第多在崔莊。紀不過舉其盛耳。而余族則自稱景城。紀不忘本也。椒坡公故宅。在景城崔莊間。兵燹久圯。其址屬族叔棻庵家。棻庵從余受經。以乾隆丙子舉鄉試。擬築室移居於是。先姚安公爲預題一聯云。當年始祖初遷地。此日雲孫再造家。後室不果築。而姚安公以甲申八月棄諸孤。卜地惟是處吉。因割他田。易諸棻庵而葬焉。前聯如公自識也。又云。劉念臺先生官總憲時。題御史臺一聯云。無欲常教心似水。有言是覺氣如霜。

蔡佛田鴻遠紫荊樹館雜著云。康熙間。蔡屏山王楨。由內閣中書。改四川仁壽縣令。當謁選之初。夢至一所。左右皆遭火燬。復歷荒草頽垣中。則關聖帝像在焉。肅拜畢。仰觀楹間有聯云。打開義利關。具見英雄過人氣概。參透天人路。便是聖賢行己工夫。此壬辰春事。迨乙未莅縣事。一一如所歷。適士民修廟工竣。因書前聯以獻云。

袁簡齋曰。吳江徐布衣靈胎。有權奇倜儻之名。余嘗訪之於吳下。年近八旬。語猶風生泉湧。所居隣太湖七十二峯。招之可到。署其門云。一生那有真閑日。百歲仍多未了緣。又預營生壙。自題其墓門云。滿山靈

草仙人藥。一徑松風處士墳。

祖舫齋師曰。前明葛屺瞻。寅亮督學吾閩。士林頌之。官至少司農。甲申後。樂浦城山水之美。避居於此。四方耆宿。日來造訪。自署其門云。豈有文章驚海內。漫勞車馬駐江干。州府屢勸之入都。遂閉門不出。李劍溪太僕光雲曰。吾鄉京宦前輩。有延師課子者。於本宅近處。另闢精室一區。聽館師出入自便。乃其師好嬉游。無日不到城外戲園中聽劇。同鄉知好。有訪之者。十有八九不得晤。因新歲換寫桃符。何念修少宰逢傳。適知其事。因戲書一聯懸於門云。園日涉而成趣。門雖設而常關。次日館師見之。卽襆被而去。

### 應制

繆蓮仙良塗說云。乾隆四十五年。七旬萬壽時。聖製有七句。天子古六帝。五代孫曾予一人之聯。其時臣工之撰燈聯者。皆敬本此意。以爲闡釋。誠千載一時也。謹按漢世宗孝武皇帝。在位五十四年。壽七十一歲。梁高祖武皇帝。在位四十八年。壽八十六歲。唐高宗神堯皇帝。在位九年。壽七十一歲。唐元宗明皇帝。在位三十二年。壽八十歲。六帝皆年踰七十。若五世同堂。則曠古帝王所未有矣。豈不盛哉。朱緘三孝廉乘銘曰。聞乾隆五旬萬壽時。京師經壇有聯云。四萬里皇圖。伊古以來。從無一朝一統。四萬里。五十年聖壽。自茲以往。尙有九千九百五十年。氣象高闊。設想奇創。對仗亦新而穩。與尋常楹聯蹊徑。迥乎不同。相傳爲紀文達公所撰。否則必屬彭文勤公。他人無此手筆也。



黃霽青太守安濤曰。乾隆甲辰高宗南巡。浙江杭城人家有懸桃符者。句云。一歲雙春三月閏。六巡兩浙萬民歡。又五十五年恭遇八旬萬壽。民間有頌聯云。自古罕聞聖天子。八旬萬壽於今方見大皇帝。五代一堂。兩聯語意雖質。卻極自然穩貼。可以見草野芹曝之忱。

程春廬曰。乾隆五十五年恭值八旬萬壽。京中有一經壇燈聯。極典麗。又極渾成。竟如天造地設者。句云。八千爲春。八千爲秋。八方向化。八風和慶。聖壽八旬逢八月。五數合天。五數合地。五世同堂。五福備正。昌期五十有五年。相傳是河間紀文達公手筆。蓋信非吾師不能也。

鄭仁圃太守瑞麒曰。嘉慶己巳恭祝五旬萬壽。福州經壇設在鰲峯書院。余曾擬一聯云。沙數恆河合十佛。稱無量壽。潮音大海呼三聲。協不周風。又擬戲臺聯云。曲譜四詩。天保九如篇第一。舞分兩向。太平萬歲字當中。時院課卽以此命題。余此兩聯曾爲游彤卣師錄用。至己卯恭祝六旬萬壽。經壇亦設鰲峯書院。所有燈聯俱周蒼士廣文嘉璧擬作。如云。屆二十四年初週斗極。祝萬八千歲。遠紹天靈。又云。如大海潮音。衢歌祝聖。比恆河沙數。壽寓添籌。又云。呼萬歲者三。康彊逢吉。等百王而上。福祿來崇。又云。帝命式九圍。俾緝熙于純嘏。皇斂時五福。用敷錫厥庶民。又云。功旣成矣。世旣貞矣。參天貳地。鑿乎鼓之。軒乎舞之。蹈德詠仁。按乾隆年間兩次慶典。經壇燈聯。聞俱係陳秋坪登龍黃耦賓世發張燮軒經邦及吾師鄭蘇年光策林暢園茂春諸先生所擬。余少時尙見先大父手錄成本。極其壯麗。喬皇。今此本不知何時

失去屢向他處訪覓副本。杳不可得。惜哉。

道光辛丑八月。吳郡紳士於元妙觀。恭設經壇。祝六旬萬壽。時朱蘭坡侍講。瑋方爲紫陽書院山長。撰次燈聯數付。具見精思。如云。六位仰時成。六龍御世。六鳳儀廷。聖德備膺。九五福。十華啟券。錫。十寶孚恩。十全繼續。慈闈懽溥。萬千觴。此於每句分嵌六十兩字也。又云。元符根太極。五百歲爲春。五百歲爲秋。春秋筭協福壽。八葉椿開無量壽。妙果證長生。三千年一花。三千年一實。花實數周星。紀九重桃獻大羅天。此於首句分用元妙兩字也。又云。大地歡騰。庶道統際重熙。六葉升恆。萬國萬年長拱極。清時盛譜和聲。光天歌復旦。十華紉縵。壽星壽寓徧騰輝。此每句首一字。合成大道光六十萬壽也。又云。八音節。八風和。月輪正滿。十瑞臻。十章獻。日馭方中。此兩聯中分用八月十日字也。

### 廟祀

蘇州泰伯廟中。無佳楹帖。惟齊梅麓彥槐。有題泰伯墓柱一聯云。志異征誅。三讓兩家天下。功同開闢。一坏萬古江南。語殊壯闊。曾見近人筆記。亦載此聯。脫卻志異功同八字。又以爲齊眉樓所撰。殊可笑也。安溪李文貞公。爲直隸巡撫。祈雨於關廟。有應。謝以聯云。我意祈麥秋。澤隨地徧。公靈震華夏。日在天中。按此切事成文。而麥秋華夏。對仗自然工穩。語亦正大相稱。

常州荆溪縣。有關帝廟。楹帖皆不佳。齊梅麓作宰時。易以新聯云。威鎮雄州。野樹尙含荆浦綠。神游故國。

夕陽偏照蜀山紅。荆浦蜀山皆縣中地。關合亦尙渾成。又撰一聯云。志在春秋。孔聖人未見剛者。氣塞天地。孟夫子所謂浩然。頗得意然。余終嫌志在春秋語。非正史所有也。

黃右原比部爽曰。記得關廟聯。尙有兩家可錄者。忘爲何人所撰。一云。王業不偏安。拒操和權。諸葛猶非知己。春秋大一統。帝蜀寇魏。紫陽乃許同心。一云。生蒲州。輔豫州。保荊州。鼎峙西南。掌底江山歸統馭。主元德。友翼德。仇孟德。威鎮華夏。眼中漢賊最分明。按原本作兄元德。弟翼德。近於演義。陳壽志雖有義同兄弟之語。並無孰兄孰弟主名。改本較爲妥協。

趙甌北有關廟聯云。乃聖乃神。乃武乃文。扶四百載承堯之運。自西自東。自南自北。如七十子服孔之心。余於聯話前編偶遺之。

浦城西陽嶺上有關廟。邑人朱緘三孝廉有一聯云。至誠之動。孚及豚魚。雖阿瞞莫敢不服。大義所歸。堅如金石。惟使君乃得而臣。孝廉之子春門茂才。篋亦獻聯云。前杜氏而好春秋。仗義宣威。此老原非徒左癖。後岑侯而鎮荆楚。奉詞伐罪。彼蒼何忍聽彭亡。詞氣並岸異不凡。

朱蘭坡曰。關廟聯多用生前事。遂成俗套。余曾擬製一聯。但言尊崇顯赫之意云。帝爽有昭明。當朝諡號增崇。奉戴儀同文廟。肅神功無代謝。亘古河山作鎮。靈長運過蔣侯奇。按此與吾鄉龔海峯先生所撰。命意正同。可謂異曲同工。不落窠臼者矣。

蘇鰲石廷尉。廷玉曰。涿州張桓侯廟聯。多狀其雄糾語。究屬莽夫氣象。於尊崇之義未合。惟方葆巖維何作直藩時。有聯云。使君乃天下英雄。誼同骨肉。壽侯爲人中神聖。美並勳名。以先主關帝兩人夾出。恰稱身分。按帝曾封漢壽亭侯。壽侯二字似未協。尙應酌易也。

四川成都城外有丞相祠堂。楹聯林立。鄂潤泉督部鄂山聯云。望重南陽。想當年羽扇綸巾。忠貞扶季漢。澤周西蜀。愛此地浣花濯錦。香火擁靈祠。又蔣礪堂節相攸銛聯云。曰宮曰殿曰幸且曰奔。詩史留題千古猶存正統。書吳書魏書漢不書蜀。儒臣特筆三分豈是偏安。

四川寧遠府有丞相祠。戴羨門督部三錫聯云。籌策在攻心。當年化洽賓幃。冠帶百蠻歸典屬。安邊曾叱馭。此日風清甌脫。雲霄萬古仰宗臣。聞是湖南湘鄉令嚴麗生學淦代撰。嚴本才士。搖筆故自不同。又聞嚴麗生作湘鄉縣龍王廟聯云。春耕夏耘。秋收冬藏。萬物育焉。鬼神之爲德。雷出地奮。雲行雨施。百室盈止。膏澤下於民。亦可謂取鎔經義。自鑄偉詞者矣。

蘇郡文昌宮之旁有太陽宮。向不入祀典。亦不在朔望行香之列。道光十一年。霖雨數十日。郡人士始請余詣禱。升香之日。旋即暢晴。後卽定爲常祀。齊梅麓爲之聯云。光天開糺縵之祥。雨非恆雨。陽非恆陽。二十四氣成四時。羣生並茂。化國衍舒長之祚。朝不廢朝。夕不廢夕。三百六旬有六日。庶績咸熙。又撰風神廟聯云。龍虎忌爭行。廿四番花信吹餘。致雨興雲。勿張旗鼓。豚魚占利涉。七二候箕神簸後。飛芻輓粟。

好送帆檣。時以狂風匝旬。礙漕運。率屬虔禱有應。故以此爲報云。又撰龍神廟聯云。九土足農田。但期膏不下屯。霖雨徧敷天下望。三吳稱澤國。吏願流無旁濫。江河長向地中行。

鄭仁圃喜爲楹聯。時見意匠。有題天后宮聯云。補天媧神。行地母神。大哉乾。至哉坤。千古兩般神女。治水禹聖。濟川后聖。河之清。海之晏。九州一樣聖功。想見精心結撰。思與神通也。

楊飛泉郡丞鶴書。曾知雲南師宗縣。後由浙省委辦銅差。復至滇中。題天后宮一聯云。三十年宦海平安。旦夕焚香。惟求利濟。一萬里慈雲庇蔭。閒關行役。重許瞻依。

四川灌縣城隍廟。有蔡佛田手題聯云。聰明正直之謂神。清夜焚香。惟願斯民敦孝弟。雨暘寒燠以成歲。豐年報享。長期列部頌昇平。又成都府城隍廟戲臺聯云。善惡報施。莫道竟無前世事。利名爭競。須知總有下場時。恰是城隍廟戲臺。不能移易他處。

蔡佛田曰。佛寺聯語極多。記得有二聯。語極雋永。句云。願將佛手雙垂下。摩得人心一樣平。又云。彈指聲中千偈了。拈花笑處一言無。

明邛州人余昂。有題海會寺聯云。終日解其頤。笑世事紛紜。曾無了局。經年坦乃腹。看胸懷灑落。卻是上乘。按此聯詞旨超脫。似比吾閩鼓山寺一聯。較爲雅馴。

福州有慶城寺。中有鐵佛一尊。極其雄偉。係僞閩時所鑄。廟中有前明曾弗人異譚一聯云。古佛由來皆

鐵漢。凡夫但說是金身。雋永有味。陳畏民筆談。徐价人閩游詩話。並載其語。惜余未得見其聯。

蘇州光福。有觀音大士廟。祈晴禱雨最靈。林少穆巡撫三吳時。題聯云。大慈悲能布福田。曰雨而雨。曰暘而暘。祝率土豐穰。長使衆生蒙樂利。諸善信願登覺岸。說法非法。說相非相。學普門功德。祇憑片念。起修行。又因督濬劉河。小憩劉河鎮之天后宮。題聯云。八百年寰海昭靈。滂涓嶼飛昇。九牧宗風。榮廟祀。四萬頃具區分派。喜婁江新濬。三吳水利沐神庥。又題上元縣署中程明道先生祠云。愛物爲心。一命於人。亦有濟得民以道。千秋斯統不虛傳。又題福州文藻山朱文公祠云。道統闡薪傳。洙泗真源今未墜。儒型垂梓社。滄州精舍此重開。又題嘉定縣歸震川先生祠云。儒術豈虛談。水利書成。功在三江宜血食。經師偏晚達。篇家論定。狂如七子也心降。

桂林城外。有臨水文昌閣。極明瑟之致。朱勳楮觀察榮題聯云。水月盡文章。會心時原不在遠。星雲燦魁斗。鍾靈處定非偶然。

朱子生於延平之尤溪。故小字沈郎。沈水名。卽尤溪縣。亦因此得名也。後人皆誤以朱子字沈郎耳。其地有公山文山。朱子誕生之日。兩山俱發火光。現出文公二字。今就其地建文公祠。周力堂學使學健撰聯云。前公山。後文山。一氣蜿蜒。知天地精華所萃。始小學。終大學。真源脈絡。統聖賢體用之全。塗說云。江南侯竹愚先生在粵時。嘗題韓文公祠楹帖云。蘇學士前傳謫宦。孟夫子後拜先生。殊工切。

漢口有桃花夫人廟一聯云。列女傳從劉向定。夫人心祇息侯知。議論自在言外。惜不知何人所作。虞山有白蘇二公祠。齊梅麓卽集白蘇語爲楹聯云。中有仙龕虛一室。更邀明月作三人。上聯香山句。下聯東坡句也。跋云。香山詩。近有人從海上來。海山深處見樓臺。此海虞立白公祠之公案也。虛一室。固待公也。自公言之。卽謂待坡公也可。又坡公題樂天身心問答三詩後云。而今月下三人。他日當成幾佛。以更邀明月句。移奉白蘇二公祠。頗有根據。非同泛語也。按常熟縣之白蘇二公祠。建於道光丁酉年。在昭明讀書臺之側。董其成者。蔣伯生因培。楊芸士文孫也。芸士爲之記。

齊梅麓宰宜興時。撰周孝侯廟聯云。朝有奸黨。豈能成將帥之功。若教仗鉞專征。蛟虎猶非對手敵。世無聖人。不當在弟子之列。誰信讀書折節。機雲曾作抗顏師。詞意激昂。可當一首周處傳論。

甘露寺中有三賢祠。不知建於何時。祀唐李文饒。宋蘇東坡。米海嶽三公也。李蘭卿撰聯云。溯後先三百載游蹤。異代同堂。能結有情香火。冠今古第一流人物。文章事業也。如無盡江山。

謝默卿曰。無錫惠山之麓。有張睢陽廟。額曰顯忠。余莅任時。適邑人修建落成。請爲楹帖。因撰句付之云。抗節濟時艱。論當年守禦聲威。實先郭汾陽。李臨淮。功存廟社。顯忠關世教。考茲土。烝嘗舊典。當與伍子胥。陳武烈。氣壯湖山。按張睢陽。伍子胥。及隋司徒陳杲仁。其事皆不在錫山。而縣中皆有祠廟。香火甚盛。亦可見忠烈祀典。出於秉彝攸好之同矣。

江西九江府有五顯廟。中有一集句聯云。九江孔殷。以享以祀。五人爲伍。乃聖乃神。詞義俱極穩愜。不知何人所撰。俟晤鄭仁圃時詢之。

蠓磯廟聯。思親淚落吳江冷。望帝魂歸蜀道難。人皆知爲徐文長所撰。惟繆蓮仙塗說。謂此與采石磯李太白祠聯云。我輩此來惟飲酒。先生在上莫吟詩。並傳爲徐文長手筆。而余經過二地。得見二聯。皆無文長題款。惟署谷口鄭篋書。後聞蠓磯聯爲方茶山先生體感夢而作。仍疑莫能明也。按方茶山年代甚近。而此聯熟在人口。實出茶山之前。後說恐仍是因文長事而誤演耳。

金龍四大王。爲北方河道尊神。廟中楹聯。鮮有傳者。惟齊梅麓一聯尙壯麗。句云。志節慕睢陽。憂國讀書。尙記金龍山在。英靈同伍相。飛芻輓粟。正須白馬潮來。

錢棣溪曰。唐張旭曾爲常熟縣尉。故縣城南有草聖祠。今爲文廟土地之神。新立一祠於大成門之右。廣文屬余書一聯。一額。余曰。聯句尙易。額甚難也。再四思之。總未題就。偶憶韓文公優入聖域四字。因書付之。並撰一聯云。書道入神明。落紙雲煙。今古競傳八法。酒狂稱聖草。滿堂風雨。歲時宜奠三杯。或嫌三杯字。太涉廟祀套語。余應之曰。杜詩張旭三杯草聖傳。豈忘之耶。海州板浦。爲濱海斥鹵地。自道光年間。陶雲汀宮保。改行票鹽。民販趨之如市。蕃昌殷賑。儼然一都會焉。宮保按部海州。兩駐其地。登雲臺山。並於山中建陶靖節祠。今商販居民。又合詞籲建陶文毅公祠。謝默卿撰長句楹聯云。改釐法。近悅遠來。試觀



淮浦連年浩浩穰穰。豈惟追齊相夷吾。府海功施稱再造。薦飶馨。春祈秋報。况對郁洲勝境。熙熙皞皞。真可繼晉賢靖節。名山祀典配三元。

成都北門外歡喜庵。奉德將軍楞泰像。係乾隆金川凱旋時。爲士民所建。楹聯云。萬里版開圖。雲棧星郵。任來下拜功臣像。百蠻碑在口。渝歌竇舞。歡喜常存故老思。又冠履肅丹楹。似丞相祠堂。柏鬱森森承雨露。聲威通紫塞。憶將軍幕府。旌揚熠熠壯風雲。旁爲得勝庵。卽阿公祠。同時所建。聯云。纏井絡以界坤維。天府奧區。皇極會歸雄帶礪。控荆蠻而引秦隴。巖疆重任。臣心寅畏凜冰淵。

朱蘭坡曰。宛陵城內有東平王廟。祀唐張睢陽。余少年應試時至其處。見一楹帖云。祿山慶緒。悍然其無君父。當年卽破孤城。効忠亂賊。曾邀富貴之幾時。令狐尹奇。不幸而有子孫。今日試登雙廟。下拜先生。將置祖宗於何地。余最喜其詞氣激昂。今約五十餘年。猶識不忘。但不記爲何人所作耳。

涇縣會館中奉朱文公木主。朱蘭坡爲題一聯云。刪定贊修。直千古同功。較漢唐訓詁諸儒。仰高山而倍切。德性問學。原兩端並舉。任陸王紛紜異說。撼大樹以何能。朱文公聯語亦多。無如此之沈著穩括者。閩浙分畛之處。爲楓嶺。俗呼爲五顯嶺。實卽黎嶺。古稱黎嶽。祀唐太守李頻。李蘭卿題聯云。地是名山宜廟食。民思賢守本詩人。五顯廟中楹帖極多。皆遜此之雅切也。

黃右原曰。相傳藥王廟戲臺聯語。一切戲。一切藥。頗有慨乎其言。上聯云。名場利場。無非戲場。做得出潑

天富貴。冷藥熱藥。總是妙藥。醫不盡徧地炎涼。按潑天富貴。仍是從藥王廟生情。非泛泛戲臺語也。呂月滄郡丞璜曰。宋梅生觀察鳴琦。撰桂林城隍廟聯云。地獄卽在眼前。莫到犯了罪時。方纔省悟。業鏡雖懸臺上。只要過得意去。也肯慈悲。又齊梅麓撰宜興城隍廟聯云。時雨時暘。玉女銅官皆有慶。好事橋蛟山虎總無驚。宋作係仁人之言。齊作爲才人之筆。

吾閩有石佛嶺。佛像係就大石琢成。陳望坡尙書未第時。將棄舉業。過此嶺求籤。詞意許其必遇。三過三問。皆一籤。貴後乃獻一聯於寺云。心到虔時佛有眼。運當亨處石能言。信乎佛之能前知也。嚴問樵保庸曰。吾鄉出痘。謂之出果。種痘謂之種苗。余嘗撰痘神廟楹聯云。一點心苗。汝那裏好生培養。十分善果。我者邊總肯周全。

柳州柳侯祠聯句。前集已載數家。而愜心者殊少。近聞伍實生撫部長華。觀察右江時。曾集柳文成句爲聯云。潔廉爲心。忠信爲仗。文章在冊。功德在民。十六字頗典重。而至今尙未懸挂。不知何故。

此  
页  
空  
白

# 楹聯續話

## 卷二

### 廨宇

徐州府爲古彭城。今爲河漕重地。專設監司筦之。蓋兵備道而兼筦河防者也。宛平張觀察鼎。自撰道署楹聯云。地當黃運之中。水欲治漕欲通。千里河流涓滴皆從心上過。官作軍民之主。寬以恩嚴以法。一方士庶笑啼都到眼前來。又武威孫太守治。自作府署楹聯云。官有典常。任一日則盡一日之心。况兼地廣事繁。敢不夙興夜寐。民供正課。寬幾分則受幾分之惠。縱使時豐歲稔。常如怨暑咨寒。皆不失仁人之言。勝於挾張形勝者矣。

揚州厲氏舊族也。其宗祠柱聯云。二百載青氈。蟬聯八世。兩三間白屋。鶴隱千秋。聯係史望之尙書所書。其句則未詳孰撰也。

戴葭塘歸藤陰雜記云。護國寺西。先爲桐城張文和公第。後改西華門內。此第遂以賜溧陽史文靖公。余癸未出錢塘王文莊公門下。曾於此第謁見。有江山勝地皆行部。臺閣崇班半屬僚之聯。

京師正黃旂官學中有楹聯云。業精於勤。修其孝弟忠信。學優則仕。以爲黼黻文章。  
蔡研田本後曰。安溪李文貞公宅有小園。自集句爲聯云。有水園亭活。無風草木閒。

彭芝庭啓豐自訂年譜云。余曾三任浙省學政。因在貢院題聯云。蓉鏡重開。漫向湖山尋舊迹。桂枝擢秀。相期月旦識眞才。

浙江學署。面對吳山。右鄰郡庠。西出湧金門。卽西湖也。劉金門先生題大堂聯云。使節壯湖山。東南壇坫。文光拱奎壁。咫尺宮牆。

黃右原曰。有潤州太守。新修廳事。執贄於吳山尊學士。求作楹帖。學士不假思索。卽對客揮毫。上聯用金山銀山。組織成文云。山色壯金銀。惟以不貪爲寶。以譽太守廉能。觀者歡呼。亟請其下聯。學士率爾操觚。實未有以對也。適幕賓郭香生明經曰。想是江流環鐵石。居然衆志成城。蓋以鐵甕城爲金陵石頭城門名。竟成強對。遂書以應。學士旣服其敏。且有解圍之功。因以所得筆潤分贈之。

揚州羅茗香士琳曰。各省育嬰堂中。有舊傳聯句云。子不子。亦各言其子。委而棄之。是可忍也。孰不可忍也。先王斯有不忍人之政。幼吾幼。以及人之幼。比而同之。有以異乎。曰無以異也。大人不失其赤子之心。集語頗能渾成貫串。惜不傳作者何人也。

謝默卿曰。清節堂始於吳下。由紳士捐建。以居嫠婦之貧苦無依者。經費漸充。規制盡善。各府州皆仿而

行之誠善舉也。曹良甫比部樛堅。主講泰州時。撰堂聯云。任卹重周官。集一方秉穗餘資。門題行義。幃幃同夏屋。完幾輩冰霜苦節。臺築懷清。

齊梅麓婺源人。嘗作婺源考棚聯云。漬種必苗。蕪蘭必香。千家茆屋書聲。定有幾枝大手筆。登高自下。陟遐自邇。萬里蓬山雲路。先從一邑小文場。

嘉慶末。福州大修貢院。規製恢宏。適林少穆督部。奉諱里居。所有楹聯。悉出其手。亦極一時壯觀。精思吾鄉人多能口誦之。如云。皇路許馳驅。舉孝興廉。海嶠人文羅福地。天門同誅蕩。蜚聲騰實。蓬瀛才望奮清時。又云。達四門四目四聰。我有嘉賓。莫負文章華國選。書六德六行六藝。烝哉髦士。要兼孝弟力田科。

又云。初日照三神山。看碧海珊瑚。盡收鐵網。長風破萬里浪。喜丹霄銀榜。早兆珠宮。又集杜句一聯云。鄉賦念嘉賓。彩筆昔曾干氣象。持衡留藻鑑。文昌新入有光輝。

王輔銘練音集云。嘉定王丹思敬銘。於康熙丁酉。典試江西。以公慎自矢。嘗題試院協一堂柱云。三條官燭。棘闈辛苦廿年。苟以溫飽負平生。斯誓有如江水。一介儒冠。玉署光榮兩世。能取文章報恩遇。此行方識廬山。

嘉慶戊寅恩科。時鄧嶰筠督部。方爲西安太守。值貢院鼎新。曾撰楹聯數十對。皆極結撰之工。陝中爲之紙貴。如察院門云。恩湛鸞坡。環海臚歡歌曼壽。名標雁塔。曲江高會洽羣仙。又云。地是周京。廣進吉人歌。

引翼制循漢室。特頒明詔選賢良。大門云。門對南山。看太乙峯高。華國雄文爭氣象。恩迎北闕。值長庚星朗。作人雅化頌龐洪。東大門云。左席羅珍。羣仰星槎來左掖。東門顛俊。試看奎曜麗東垣。西大門云。運際右文。鳳起蛟騰連右輔。門迎西極。星輝雲爛照西京。大觀門云。科重西京。盛世作人徵壽考。躔逢南極。祥暉絢采接文昌。連三門云。地接龍門。多士須聯魚貫隊。恩開虎榜。嘉賓同拜鹿鳴歌。明遠樓云。地重棘闈。看雲裏翬飛。四面軒窗增壯氣。輪圓桂殿。聽月中舞羽。一番鼓吹接仙音。又云。樓起層霄。是明目達聰之地。星輝文曲。看筆歌墨舞而來。至公堂云。戊茂協菁莪。璧月圓時同壽寓。寅清收杞梓。璫雲多處朗文星。又云。恩被賢良。聽天語鸞銜。朶殿絲綸承北極。科聯甲乙。喜人文鵲起。辟雍鐘鼓振西京。此以戊寅恩科四字冠首也。精白堂云。函關東。玉關西。萃兩省人文。手提珊瑚。使星內。台星外。合一時。宗匠心澈冰壺。又云。精白一心。入手恍聽蠶食葉。丹黃萬卷。到頭佇看鹿銜苹。衡鑒堂云。典重求賢。蕩節分持宣漢詔。堂開顛俊。輪軒親到採秦風。監臨堂云。地鎮中權。看露冕宣風。玉鑑冰壺同朗照。才登上選。聽霓裳咏月。祥麟威鳳共騰輝。內簾云。岌業龍門。雷浪可容輕躍過。分明蟾窟。霓裳未許竊聽來。又云。擔弛戴星。且共岑岑吟夜月。文披垂露。便看玉筍坐春風。收卷所云。稱心好句欣先覩。入手奇文豈漫藏。彌封所云。姓氏不妨借豹隱。光芒終許看龍騰。謄錄所云。絢采文疑堆錦繡。研朱筆合架珊瑚。對讀所云。顧誤辨訛須守黑。分章析句合塗黃。按此外尚有兩主考。及提調監試各聯。皆各切其

人之官階科分里貫言之。移地移時。俱不適用。茲不俱錄云。

林少穆督部。總制兩廣時。海禁方嚴。督部於城外新建一演武廳。精選督撫兩標勁卒數百人。親往督操。自題廳柱一聯云。小隊出郊。願七萃功成。淨洗銀河長不用。偏師成壁壘。看百蠻氣懾。煙消珠海有餘清。

鄂城臬署。有鄧嶰筠督部一聯云。官要虛心。總能發伏。釐奸須識。我得情。勿喜。民宜守分。若到違條犯法。可憐汝無路求生。仁人之言。出乎肺腑矣。

英觀察煥堂。守登州時。構小園既成。屬嚴問樵代撰楹聯云。願他十邑諸公。清風扇野。容我一年四季。明月鋤花。

杭州北新關。較各關尤爲嚴切。商民多裹足不前。阮芸臺師撫浙。兼管關務。自製一聯。懸於關署大門云。上古關無徵。後世不得已。而權關。慎勿失其初意。本朝稅有額。小民如其分。以納稅。何可使有怨言。

四川成都將軍署中。有阿文成公題聯云。拱北星辰兼上將。征西部屬半通侯。

四川彭水縣。有摩雲書院。在山半。陶文毅公任川東觀察時。道經其地。書聯贈山長云。化雨無私。憶往歲踏雪來過。曾話春風一席。摩雲有志。願諸生凌霄直上。勿忘燈火三更。蓋公先曾以典試過此也。

蔡佛田撰各憲署官廳聯云。片刻聚談。此地無分賓主。一時樞謁。其間原有後先。又撰巡捕官廳聯云。得



月快爭先共仰樓臺近水望風齊向上欣看冠佩如雲。

齊梅麓居婺源之冲麓有敦彝堂大祠自題聯云得氏營邱源李唐同朝二相在野三公下迄宋元明代有文人光海國卜居冲麓看梅里排闥四山環村一水甲於皖歙婺源天開圖畫賽瀛洲又一聯云大夫不敢祖諸侯表海雄風莫問遙遙華胄途人其初本一體敬宗收族當思密密連枝。

朱蘭坡曰余曾爲同邑江氏祠堂撰聯文云梁貴胄唐遺忠易姓前徽崇一本歙僑居涇奠宅敦宗後嗣敍三支蓋江本蕭也昭明太子之裔復顯於唐末以避難改姓居歙之黃墩南宋徙涇總稱黃泥灘江氏稽其派則有三焉婺源江氏慎修先生實與同宗人皆不知先生爲蕭姓余聞諸江石生大令又代製同邑王氏宗祠聯云孝友著華宗遠追竹港遷居十三枝共聯闕閔牲盛隆茲祀新仰松楹旅設千百世長聚簪纓我涇曩有十三王之稱竹港者其始居地名先世曾以孝友聞又曰余先世本在蘇唐末遷歙復遷婺源宋代始遷涇嘗爲宗祠聯云遷移自吳歙婺而來氏族清嘉斯地奠安稱梓里裔嗣踰宋元明以後詩書啓佑幾人騰翥詠梧桐又云茶院溯遙宗傳三十世有奇閭巷相聯敦仁敦讓李村鄰舊宅閱百千年無替歲時並集奉醴奉盛茶院公乃與文公同出之始祖也初遷涇居李村其舊宅已六七百年尙存宗祠地正相近又爲支祠聯云追古寮六世遷居中越十傳森出喬支綿緒久歷昭代兩朝構宇後垂千禩蔚成盛族綰綸多案古寮卽茶院公也六世爲遷涇之祖拙翁府君蓋文公之伯曾祖復十世則

支祠分祖用鑑府君子姓獨多科名仕宦亦較盛祠宇在本朝由順治至康熙間始建數聯雖常語然非他姓可以移置也又云春有心于露秋有心于霜遵戴記遺規欽崇典祀父之貴者慈子之貴者孝式文公懿訓篤念倫常此出聯尙可通用對語本文公家訓固仍切合矣

吾鄉林青圃先生德性嚴重所作楹帖亦不肯作尋常語主鼇峯講席時曾手書講堂一聯云坐里門內夕而朝教不忘就爾事習君子言尊以徧學莫便近乎人

此聯已載前編

後陳恭甫編修壽祺亦撰一長聯意欲

媲美前修而兩小股墨卷時眩徒成話柄而已今明倫堂頭門聯云方千里育賢之地第一重入聖之門亦青圃先生所撰也

有集文選句爲祠堂聯者云蹈德泳仁發祥流慶與廉舉孝署行議年又一聯云秩元祀禮莫愆繼禰繼祖繼高曾孝思不匱屢豐年歲其有奉性奉盛奉酒醴明德惟馨皆可爲家祠通用之楹帖

朱蘭坡家有小園甚隘僅栽桂一株洪稚存題扁曰金粟山房蘭坡自爲聯云曲彙三弓庾信有園難拓地連蜚一本劉安之樹可留人

劉松嵐大觀爲州牧時自題署齋一聯云袍笏呼來先拜石管絃麾去獨聽松爲翁覃溪師書或云卽翁撰句以贈者新警逋削使事無痕殆非吾師不辦也

蘭溪縣城中邑令署頭門聯云明月雙溪水春風滿縣花雅切蘭溪而有餘味惜未詳何人所題

余於五十八歲請假歸田。在福州黃巷新宅。所撰楹帖。已載入叢話前編。茲於壬寅秋。復引疾得請。僑居浦城。因購得荒地數弓。縛茅架屋。暫爲受廬之寄。時異事遷。因就舊詞。稍更新意。以存一時情事云爾。中堂聯云。歷宦海兩朝身。萬頃驚濤仗忠信。借他鄉一廬地。卅年此屋亦辛勤。韓詩辛勤三十能敦。因寄所託。擇鄰焉得智。且住爲佳。宅左有園。額爲北東園。以福州舊宅有東園也。園中有池。有樓。池上草堂聯云。客來醉客去睡。老無所事。吁可愧。論學粗論政。疎詩不成家。聊自娛。又一聯云。地價不妨多。明月清風本無價。物情何足校。近水遙山皆有情。此聊紀近事。而借歐陽文忠及蘇子美詩語以解嘲也。又書空中一聯云。平地起樓臺。流寓依然吾土美。著書多歲月。退思未報主恩深。

勝蹟

閔鶴瞿敘粵述云。桂林七星巖下。有壽佛洞。僅容旋馬。內有古壽佛石像云。土人有見老僧者。跡之。至此洞。得遺像。遂剏爲菴。楚僧本符。號渾融者。建爲棲霞寺。起藏經閣。其下爲靜慧堂。旁爲聽月亭。余有慰賢二字題石。而集唐句爲聯云。白雲回望合。青靄入看無。按今棲霞寺座落。與此所述互異。舊趾紗不可尋。志乘中亦未採此書。而題名與亭聯。更無有能指其處者矣。

無錫北門外。有皇甫墩。在芙蓉湖中。四面皆水。飛樓縹緲。極似西湖之湖心亭。窗戶軒檻。皆九龍山翠所涵演。登覽勝概。甲於通邑。樓中聯榜尙多。惟孫平叔宮保聯云。燈火春星浮北郭。雲霞朝景攬西神。秀整

雅切。邑人盛稱之。西神卽九龍山也。

山陰石屋。在香爐峯之半山。有楹聯云。花雨欲隨巖翠落。松風遙傍洞雲寒。錢唐于謙題。見小倉山房詩集。

或傳梅關一聯云。不必定有梅花。聊以志將軍姓氏。從此可通粵海。願無忘宰相風流。按梅關卽梅嶺。又名庾嶺。史記索隱謂相傳以梅將軍名。而南康記又云。前漢南越不賓。遣監軍庾姓者討之。築城於此。因之爲名。則兩說皆可通。南康記又云。庾嶺多梅。亦曰梅嶺。高一千三百五十丈。唐張九齡奉詔開鑿。按張有開嶺路序。又有詩。故嶺巔有曲江祠。此聯穩括大意。面面俱到矣。

林少穆觀察杭州時。曾修孤山林處士祠。又葺梅亭。題亭柱一聯云。世無遺草真能隱。山有名花轉不孤。林少穆有集句題京師陶然亭聯云。似聞陶令開三徑。來與彌陀共一龕。亭中楹帖。當推此爲第一。

貴陽城外有圖雲關。不知誰氏一聯云。兩脚不離大道。喫緊關頭。須要認清岔路。一亭俯看羣山。占高地步。自然趕上前人。亦見道語也。

徐修梅茂才汝塘。曾游黔中。錄憶數聯。有飛雲洞聯云。洞關幾時。問孤松而不語。雲飛何處。輸老鶴以長閑。爲天門巽學海所題。又鎮遠大王灘亭聯云。到岸猛回頭。聽灕陽第一灘聲。浪與篙爭。好仗神威資利濟。順流須努力。看黔國萬重山水。峯隨舵轉。全憑忠信涉波濤。

聞福州永福縣之方廣巖。奇景天開。余屢欲往遊而不果。友人江心葵景陽爲述一聯云。石室天開。見大地山河。三千世界。水簾風捲。露半天樓閣。十二闌干。心葵所居。距巖甚近。余四十年前。卽有同游之約。每爲之神往云。

九江府庾樓。爲一郡大觀。屹立郡署之後。前襟大江。後枕匡廬。樓額爲蘇齋師所書。江心卽望見之。樓中聯語多不稱。郡守張子畏寅聯云。如此江山。何幸不才來領郡。亦談風月。每逢嘉興卽登樓。語稍穩貼。尙不如洪稚存先生亮吉一聯云。半壁江山。六朝雄鎮。一樓風月。幾輩傳人。足與斯樓相稱。鄭瑩圃太守以爲名下無虛是也。

余初游平山堂。在嘉慶元年。草草一過而已。後讀曝書亭集。中有鄭谷口隸書平山堂扁長歌。悔彼時不及留心賞玩。問之曾游平山堂者。亦俱若無覩。道光壬寅初夏。寄居邗上。重登此堂。則前後相距已四十餘年。堂中扁字。係歐陽文忠公之款。疑款字甚劣。非歐公所爲。而鄭谷口所題。亦渺不可得。不知何故。徧繙郡志。則不但無歐陽題扁事。並鄭谷口之扁亦未載。豈竹垞先生之詩欺人哉。頃與錢梅溪談及梅溪。乃言。曾親見谷口原扁。後爲吳中徐友竹堅者。易以歐款。記得是乾隆年間第六次南巡時所爲。梅溪今年八十有四。多見舊事。所言當不虛也。平山堂並無他扁。谷口所題。又易爲歐款。可謂兩失。而伊墨卿隸書聯句。遂獨出冠時矣。余前編所錄墨卿句。誤隔江爲過江。茲特正之。余亦新製一聯云。高視兩三州。

何論二分月色。曠觀八百載。難忘六一風流。質之阮芸臺師。甚壯其語。朱蘭坡同年亦曰。平山堂詩。以王荆公一堂高視兩三州首爲最。平山堂聯。以伊墨卿隔江諸山十六字爲最。今君此聯出。真可鼎立而三矣。因亦用隸體書就。送懸堂楹。王荆公遠矣。未知墨卿空中笑人否耳。

張伯治曰。揚州大儒坊董祠之左近。有集賢樓。下臨城河。形勝絕佳。記得有一集句舊聯云。桃花潭水深千尺。明月揚州第一樓。不知畫舫錄何以遺之。

前編所載揚州楹帖。多據畫舫錄。比來寄居邗上。新有聞見。亦佳聯也。如陳曼生鴻壽題康山云。春水綠波揚子渡。梅花明月狀元山。洪桐生梧題東門城樓云。風月天高樓臺地迴。雲霞海曙梅柳江春。又題南門城樓云。東閣聯吟。有客憶千秋詞賦。南樓縱目。此間對六代江山。

相傳河南南陽府城樓。舊有楹聯云。真人白水生文叔。名士青山臥武侯。對仗渾成。允稱傑構。或疑諸葛應稱忠武侯。但曰武侯。恐未盡善。然古人二字三字諡。後人止稱其一字者甚多。如衛之叡聖武公。只稱武公。貞惠文子。只稱公叔文子。楚之頃襄王。只稱襄王。秦之昭襄王。只稱昭王。諸葛之稱武侯。亦其例耳。北固山甘露寺之左。舊爲多景樓。俯挹全江。最稱雄勝。樓址久荒。李蘭卿觀察。曾捐資重建。工甫竣。旋圮。觀察撰聯云。天與雄區。欲游目騁懷。一層更上。地因多景。喜山光水色。四望皆通。後曾文荻邑侯承顯。就北固山之後麓。建江東勝概樓。重書觀察聯語。懸諸前楹。而於後楹自撰一聯云。形勢拓南徐。對秣陵樹。

色。瓜步江光。何處平分吳楚。畫圖開北固。有米老菴存。衛公塔在。依然映帶金焦樓之右。又有小樓。正對金山。有南昌彭文勤師聯云。兩點金焦。到山者不如望。一菴海嶽。懷古者見其人。蓋寶晉書院。正當其前也。

九江府之南。卽廬山。其城南正對廬山之雙劍峯。歷朝皆於府治前建三層高樓以鎮之。名爲匣劍樓。樓前開二池。直丈餘。橫數尺。名爲匣劍池。鄭仁圃太守初莅任。修濬一新。自製樓聯云。排闥兩峯青。欣輪奐齊雲。環雉堞更上一層。盡見匡廬真面目。干霄千丈紫。恐鋒鏖過露。斂龍光深藏什襲。如羅星宿壯心胸。蘇州潞墅關北望亭。卽入金匱縣境。河中舊有豐樂橋。齊梅麓宰金匱時。鳩工重修。蔚爲勝地。因題橋門一聯云。水遠天長。萬古川原連泰瀆。年豐人樂。四時風景勝滌陽。又杭州城外之半山。桃花最盛。花時游船麇集。秋後紅葉亦極可觀。旁有小橋。橋門一聯云。欲泛仙槎向何處。偶傳紅葉到人間。皆橋門聯之極超脫者。

清江浦勝蹟。以河帥署中爲最。有方池甚寬。上爲荷芳書屋。擅水木之勝。時張芥航河帥。得董思白大字。挂屏十二幅。錢梅溪爲集屏中字作一聯云。大隱寄淮壩。十畝芳塘涵德水。高懷擬綠野。滿園花木繡春風。

成都府城外。有諸葛丞相祠。旁有臺榭。爲大僚飲餞公所。蘇鼈石延玉集杜句爲楹帖云。諸葛大名垂宇

宙元戎小隊出郊坰。按此前明黃才伯所集。見朱竹垞靜志居詩話。

唐陶山仲冕有集。唐句題陶隱居祠云。門前學種先生柳。嶺上長留處士墳。

滕王閣中有裘可亭。郡丞行恕聯云。隔岸眺仙蹤。問樓頭黃鶴。天際白雲。可被大江留住。繞闌尋勝蹟。看樹外煙波。洲邊芳草。都憑傑閣收來。

采石太白樓中。有齊梅麓集句一聯。甚偉。出語云。紫微九重。碧山萬里。卽太白集中句。對語云。流水今日。明月前身。則司空表聖詩品中句耳。

黃右原曰。揚州三賢祠。舊以王漁洋繼歐蘇後。已不甚稱。後更奉伊墨卿太守長生祿位於旁。而議者益起。自裁撤鹽政後。湖上園林。歲修無主。頽廢不堪。李蘭卿樞使。獨能捐廉重修江山文選樓。桃花菴各處。而別建載酒堂於祠側。以祀漁洋。於是香火始正。樞使並爲之聯云。畫了公事。夜接詩人。得句皆堪作圖畫。修禊虹橋。訪碑禪智。此才真不負江山。

自浙入閩。第一重嶺爲蘇嶺。嶺頂有關廟。殿後一亭。境極幽靚。有朱笥河先生手書一聯云。雲石江將疑字浙。風篁嶺若誤髯蘇。跋云。過蘇嶺留句。乾隆庚子十二月廿日。笥河居士朱筠。余每過此。必熟賞此聯。寺僧亦知寶之。寺中又藏有朱文正師詩卷。卽爲此聯而作。和題者有譚蘭楣光祥。及吾鄉林樾亭先生。王蘭陔紹闈中丞。中丞復作長跋紀之。謂此聯句奇而筆適。若有靈氣光怪。足以永鎮山門者。洵不虛也。



黃州赤壁以坡公二賦傳耳其實周郎用火攻處在今嘉魚也人皆議坡公之誤朱蘭坡題聯云勝蹟別嘉魚何須訂異箴譌但借江山據感慨豪情傳夢鶴偶爾吟風嘯月毋將賦詠概生平

雲南附郭之大觀樓中有孫髯所製長聯懸挂已久道光初阮芸臺師總制滇黔時為酌易數字另製聯板懸之滇人嘖有煩言余曾於前編述之昨接吾師來函云孫髯原聯以正統之漢唐宋元偉烈豐功總

歸一空為主豈不駸駸乎說道我朝故改為曩長蒙會遞到吳三桂等人身上所以扶正而消逆也嘖有煩言者蒙會未達耳按原聯及改本前編已並全錄今必須重錄改本以質觀者使知吾師所以須改

之故以釋滇人之疑而已改本云五百里滇池奔來眼底憑欄向遠喜茫茫波浪無邊原本作披襟岸幘喜茫茫空濶無邊看東驤金馬西翥碧雞北倚盤龍南馴寶象原本金馬作神駿碧雞作靈儀倚盤龍作走蜿蜒馴寶象作翔縞素高人韻士惜拋流水光陰

原本作何妨趁嶼嶼螺洲襯將起蒼厓翠壁原本作梳裹更蘋天葦地早收回薄霧殘霞原本作點綴莫辜負四圍香稻萬頃鷗沙原本作晴沙九夏芙蓉三春楊柳數千年往事注到心頭把酒凌虛歎滾滾英雄誰

在想漢習樓船唐標鐵柱宋揮玉斧元跨草囊鬢長蒙會原本作偉費盡移山氣力儘珠簾畫棟捲不及暮雨朝雲便蘚碣苔碑原本作斷都付與荒煙落照原本荒祇贏得幾杵疎鐘半江漁火兩行秋雁一枕

清霜原本作兩行鴻雁一片滄桑

廣西宜山縣為黃山谷先生謫居地城中有山谷祠堂查儉堂撫部守慶遠時重新之並製聯云忠孝振

綱常黨籍編名。氣節宛如東漢。文章垂宇宙。詩家衍派。門庭別啓西江。公誕辰在六月十二日。李蘭卿權守時。率諸生爲公設祭。如坡公生日故事。祠內舊有寶華亭墨池諸勝。今已湮廢。蘭卿亦製聯云。載酒爲公來。率儒服儒冠。仍似舊開詩屋宴。儻居無地住。占宜山宜水。卻教長祭墨池田。

福州城外。由江達海之路。以羅星塔爲關鍵。塔據山巔。四面皆波濤洶湧。其由閩縣達長樂。則必以羅星塔山下爲暫泊候潮之所。蓋海潮由此而分也。塔上舊有七字聯。不知何人所撰。其句云。朝朝朝朝朝朝夕。長長長長長長消。過客皆不知所謂。康熙中有一道人到此。讀而喜之。衆請其說。道人笑曰。此山爲海潮來往之區。此聯出語。第一第二朝字。上平聲。第三朝字。下平聲。通作潮字。第四朝字。亦下平聲。第五朝字。上平聲。第六朝字。又下平聲。對語。第一第二長字。平聲。第三長字。上聲。第四長字。是平聲。第五長字。是上聲。第六長字。又是平聲。如此讀之。自不煩言而解。不過是言潮汐長消而已。言訖。道人遂不見。或以爲純陽祖師現身也。

河南輝縣城外。有古百泉。發源蘇門山中。匯爲巨池。詩所謂泉源在左是也。歷代名人。多隱居其上。左有孫夏峯先生祠。程梓庭中丞題聯云。勝地集名儒。軼姚許趙竇。以抗宗傳。羣仰夏峯作喬岳。熙朝開理學。繼濂洛關閩而昌後裔。從教睢水得淵源。謂姚雪齋。許魯齋。趙復竇。及我朝湯文正公也。

### 格言

道光癸巳引疾里居。日向街巷舊書攤中。搜求故紙。忽得孫寄圃閣老楹帖一對。閣老手蹟。余所認識。非他手所爲。而筆法腴潤。是作翰林時書。不如後此之蒼勁也。句云。甘守清貧。力行克己。厭觀流俗。奮勉修身。款云。天池年伯大人製句命書。濟甯愚姪孫玉庭。乃知此聯。係爲先大父天池公所作。閣老與先叔父九山公。爲乙未同年。此必係九山公同居館職時。爲先大父索書者。因急購歸。重加裝裱。先代訓言。藉茲不墜。當拳拳服膺。如日侍先大人嚴正之容。非僅作墨寶珍皮也。

香祖筆記云。余家自高曾祖父以來。文房正廳。皆置兩素屏。一書心相三十六善。一書陽宅三十六祥。所以垂家訓。示子孫也。又各房正廳一聯云。繼祖宗一脈真傳。克勤克儉。教子孫兩行正路。惟讀惟耕。

余前編聯話。敬載先資政公常書楹帖云。非關因果方爲善。不計科名始讀書。此吾鄉習傳之語。不知撰自何人。言極切近可守。渾然無弊。後閱亡友顧南雅菴思無邪齋遺集一條云。嘗見陳句山先生所書楹聯。作不關果報方行善。豈爲功名始讀書。二語殊未了。古今果報之爽者。十有八九。若此念未忘。其阻善機者多矣。至於功名二字。在三不朽之列。正讀書人所當念念不忘者。以爲立功立名之地。此殆誤以科名當之耳。茲爲人書楹帖。特改六字云。必忘果報能爲善。欲立功名在讀書。其義乃圓云云。其實科功名名。義各有當。未見句山之必誤也。

謝默卿曰。虎邱山後女墳湖北。風景幽絕。岸旁一古刹。懸一聯於客堂云。乾淨地常來坐坐。太平時早去。

修修語極冷雋。畫舫往來。笙歌鼎沸之外。忽聽此禪窟機鋒。真如暮鼓晨鐘。發人深省。

桂林呂月滄。掌秀峯書院。嘗擬題講堂一聯云。先有本而後有文。讀三代兩漢之書。養其根。竢其實。舍希賢莫由希聖。守先正大儒之說。尊所聞。行所知。甫欲製板懸挂。而驟歸道山。其門弟子尙有能述之者。

唐陶山家有果克堂。自題聯云。克己最嚴。須從難處去。克爲善必果。勿以小而不爲。

彭文勤公有集句堂聯云。立身行道。揚名於後世。夙興夜寐。無忝爾所生。

齊梅麓集詩經語。作宗祠聯云。凡今之人。不如我同姓。聿修厥德。無忝爾所生。又敬思堂聯云。曲禮蔽

於無不敬。逸詩刪以未之思。又一長聯云。士恆士。農恆農。工恆工。商恆商。族少閒民。便有興隆景象。父是父。子是子。兄是兄。弟是弟。門無乖氣。方爲孝友人家。

丹徒張伯治巡檢。偕其嘉耦錢蓮。因女史守璞。並以詩畫擅名。論畫則伯治爲精。論詩則蓮因尤健。粵西邊瘠之區。蓮因閒關隨宦。能相其夫。甘於末秩。不以富貴利達薰其心。不愧女士之目。嘗因伯治豪飲健談。爲手書楹帖於座右云。人生惟酒色機關。須百鍊此身成鐵漢。世上有是非門戶。要三緘其口學金人。以閨媛能爲此格言。真不愧女士也。

揚州馬氏小玲瓏山館中。有鄭板橋所撰楹帖云。敲定幾句有用書。可忘飲食。養成數竿新生竹。直似兒孫。以八分書之。極奇偉。後歸淮商黃姓。始擬撤去。復有愛其文義者。乃力勸留存。

黔中巡撫署齋有顏惺甫檢手題一聯云。兩袖入清風。靜憶此生宦況。一庭來好月。朗同吾輩心期。殊有理趣。而措詞蘊藉。不涉腐氣。故佳。

漢口有同善堂。所以施惠。新立規制。冀垂久遠。邑人乞朱蘭坡聯句。題云。同德卽同心。從教救病噓枯體。天意好生而布惠。善終如善始。願得提綱挈領。遵聖言。思永以圖功。又銅陵大通鎮設救生船。亦爲其局中製聯云。博愛之謂仁。當知拯難扶顛。愷惻常同施補救。見險而能止。但願風帆浪舶。倉皇轉得報平安。太傅朱文正師。視學浙中時。因原籍紹興。特榜其門楹曰。鐵面無私。凡涉科場。親戚年家。須諒我鏡心普照。但憑文字。平奇濃淡。不冤渠。

姚文僖公文田督學時。每試院輒題一聯云。科場舞弊。皆有常刑。告小人毋撻法網。平生關節。不通一字。誠諸生勿聽浮言。又自撰堂聯云。世上幾百年舊家。無非積德。天下第一件好事。還是讀書。語皆近質。而實足以訓俗。

張蘭渚先生喜書格言爲楹帖。爲閩撫時。嘗屬余書一長聯云。戒之在鬪。戒之在色。戒之在得。職思其居。職思其外。職思其憂。或疑先生此時。何以尙須戒鬪。余曰。聖賢言語。徹上徹下。可以自警。可以警人。且聖人所謂鬪。豈必在角膂力。逞戈矛。凡口給禦人。文字抵觸。皆與鬪無異。居高位者。尤宜慎之。庶不招尤。不債事耳。

張仲甫中翰應昌。蘭渚先生哲嗣也。最恪謹守家法。近手錄先生所集經語楹聯見寄。如云有忍乃有濟。無愛卽無憂。上句出尙書。下句則四十二章經中語也。又一聯云。洗心曰齋。防患曰戒。循法無過。修禮無邪。上句出易繫辭注。下句則戰國策中語也。

張仲甫齋中亦有自撰聯句云。貪嗔癡卽君子三戒。戒定慧通聖經五言。自注卽定靜安慮得此以釋語爲儒書注脚也。又一聯云。陰陽風雨晦明。受之以節。夢幻露電泡影。作如是觀。此湊合左氏傳周易語。以對佛經也。蓋仍是蘭渚先生家法。又有一聯云。掃地焚香。清福已具。粗衣淡飯。樂天不憂。則純是儒家語也。

萬廉山郡丞承紀。嘗製大篆一聯見贈云。仁仁義宜。以制其行。經經緯史。乃成斯文。見者皆以爲寫作俱工。余嘗入其書室。讀其自集子部語作篆聯云。凡避嫌者內不足。有爭氣者無與辨。是極好格言。賀耦庚盛喜之。惜其字句未能勻稱。平仄亦尙未諧耳。

黎湛溪河帥。喜拈要辦事。莫生事。要任怨。莫斂怨。四語。嘗請節相孫季圃公作對語。公應之曰。可興利。毋近利。可急功。毋喜功。藥石之言。正河帥所宜省勉也。河帥卽屬陳曼生郡丞。分書爲聯。懸之署齋客位。云。黃右原曰。有客贈聯云。每思於物有濟。常愧爲人所容。又云。似病始知求藥誤。衰年方悔讀書遲。又云。過如新竹芟難盡。學似春潮長不高。皆格言中雋語。

花曉亭曰。有贈宣刺史瑛一聯云。辦事人多能事少。愛民心易治民難。下七字。獨沈著有味。眞格言也。今

人但從事其易者。已爲好官耳。又一聯云。凡事總求過得去。此心先要放平來。亦言淺意深。可銘座右。朱蘭坡家塾中。有培風閣。自題聯云。仿君子懋修。志無怠。功無荒。箴游觀。所其無逸。求古人陳迹。經有程。史有課。警稼穡。乃亦有秋。又有志勤堂聯云。士所尙在志。行遠登高。萬里鵬程。關學問。業必精於勤。博聞強識。三餘蛾術。惜光陰。字字沈實。足以型家矣。

林少穆自題廳事一聯云。海納百川。有容乃大。壁立千仞。無欲則剛。名臣風矩。惟其有之。是以似之。接近見一廳事。有書此十六字爲聯。而兩句乃上下互乙。遂以對語爲出語。其意則同。但不應掩其名而用其句耳。

少穆卸兩廣督篆後。有引疾歸田之意。嘗豫撰書樓一聯云。坐臥一樓間。因病得閒。如此散材。天或恕。結交千載上。過時爲學。庶幾炳燭老猶明。寄書囑余爲作隸字。余謂此願未易酬。且俟他日把臂入山時。再了此案可矣。

孫寄圃節相玉庭。由湖北布政使入覲睿廟。有爲守兼優之諭。公於大堂敬題楹聯云。領三楚雄藩。來旬來宣。問何以推心赤子。承九重懿訓。有爲有守。要無慚對面青山。

余陳臬山左。薦泰安令徐樹人宗幹爲卓異。聞其所至有政聲。其宰武城時。遇歲歉。頻年緩征。又以病乞假。手製一聯懸之廳事云。惟貧病相兼。乃稱寒士。並錢漕不取。纔算清官。復聞其宰任城楹聯云。老吏何

能有訟不如無訟好。小民易化。善人終比惡人多。皆可以勸。

陳家相明府桂齡。爲河南襄城令時。建汜川書院。費耕亭太守庚吉聯云。聞使君講院新開。說禮敦詩。名相風流推後起。願諸生賢關早闢。讀書論道。大儒理學有真傳。蓋明府爲桂林陳文恭公後裔也。

嚴問樵曰。余宰棲霞。每奉家君子手諭。諄諄以立身居官爲勗。蒙賜一聯云。職在地方。但無忘該管地方。卽爲盡職。民呼父母。倘難對自家父母。何以臨民。庸受而謹書之。懸之廳事。朝夕自勉。因復推廣其意。撰聯書於堂楹云。暗室中自有鬼神。倘鑒余少昧天良。甘爲一錢誓死。公堂上誰非父母。最憐爾難寬國法。苦從三木求生。又曰。有一縣令自題其訟堂云。有一日閑。且種汝地。無十分屈。莫入吾門。亦書一聯懸之。



此页空白

# 楹聯續話

## 卷三

### 佳話

臨海王芝圃廣文世芳。生於順治己亥年。一百十歲時入都慶祝。賜侍講銜。都人呼爲王壽星。扶持者爲其第三子。白髮飄蕭。背轉僂僂。問其長子。曰不幸夭亡矣。問夭亡之年。曰八十五歲。當年屆七旬時。孫曾已盛。百齡外。孫曾復舉。曾孫壽星大喜。自題楹聯云。身歷四朝沾浩蕩。眼看七代衍孫曾。

槐廳載筆云。崑山徐太翁。當明末。土寇竊發。擄婦女數十人。藏於徐氏。賊將他出。屬太翁善守之。歸若少一。當取汝命。賊甫去。太翁卽各詢其夫家母家。親送還之。婦女皆叩頭流血去。太翁亦自焚其屋而逃矣。國初定鼎後。土寇削平。太翁三子。長乾學。次秉義。三元文。皆鼎甲八座。其門對一聯云。侍郎尙書都察院。狀元榜眼探花郎。皆太翁陰德之報云。

沈椒園廷芳贈董文恭公聯云。著書臺迥名繁露。入畫山多學富春。一切姓。一切地。又切其善畫也。

李雨村調元制義科瑣記云。章孟端爲御史。多所彈劾。中貴忌之。罷歸。諸子連中進士。爲京官。同處一邸。

書聯於壁云。四壁金花春宴罷。滿床牙笏早朝歸。人多羨之。

桐城張文端公。父子端揆。文和公自撰堂聯云。兩世三公。太平宰相。一堂五代。富貴神仙。或謂十六字中。惟神仙二字落空。不知公家詞臣接武神仙之福。較富貴之稱。尤爲可艷耳。

王楷堂比部廷紹。北直人。屢與春秋闈。分校所得。多南省佳士。陳蓮史三元。卽出其門。林少穆督部。贈以聯云。南士淵源承北學。秋曹門館坐春風。又張雲巢鹽政青選。罷官後。就杭州買宅而居。適得其喆嗣。館選之信。少穆贈以聯云。清門甲第傳兒輩。舊部湖山屬寓公。蓋雲巢曾久令於浙中也。

歙縣曹文正公。贈吳崧圃參知聯云。白髮盈簪。凡內外將相公卿。咸識三朝元老。黃河如帶。徧東南兒童父老。共欽六筮宣防。公會三任東河。三任南河。本朝河臣中所未有也。龔季思尙書守正。亦有聯云。節制兩河。德水廿年瞻福曜。耆英七袞。恩綸初吉貴中樞。蓋公官大司馬時。曾於二月初一日蒙賜壽云。

嘉慶乙亥二月三日。上命王蓮府少宗伯宗誠。爲其父文僖公懿修。豫稱八旬之觴。黃左田尙書錢贈聯云。謝恩孫代趨朝杖。上壽兒歸聽講筵。蓋是日上御經筵。蓮府時以禮部侍郎。職司典禮。而文僖公至景運門謝恩日。上先諭令率孫扶掖也。

戴羨門督部三錫七十賜壽。花曉亭時爲蜀臬。獻聯云。帝壽股肱。九霄錫額。民歌父母。八座齊眉。

陳望坡尙書七十賜壽。京邸知交。祝聯甚多。惟曹文正公振鐺一聯云。帝命汝作士。惟明克允。天錫公純。

遐俾壽而康。最爲人所稱。又鄭仁圃太守一聯云。望重達尊。北斗尙書南極老。恩承敬典。天朝著舊地行仙。

陶雲汀督部駐節金陵。六十賜壽。齊梅麓獻聯云。八州都督。五柳先生。經濟文章。百代心傳家學遠。六甲初周。一陽來復。富貴壽考。兩朝身受國恩長。蓋稱觴之辰。值黃鍾之月也。

諸城劉文清公之太夫人。九十壽辰。阮芸臺師所製壽聯。膾炙人口。已載前編。近晤黃右原。知吳山尊學士。曾爲朱文正師。代製一聯云。夫作宰相。子作宰相。佇見文孫成宰相。古今一品太夫人。能有幾個。天許長生。帝許長生。更聞多士祝長生。富貴百年曰壽考。請增十齡。與芸臺師句意相仿。似流麗有餘。而莊雅稍遜也。

鮑覺生侍郎桂星。爲富陽董文恭公七十壽聯云。聽履承家。秉鈞杖國。卷阿頌爽。嵩嶽生申。莊嚴典麗。蓋非文恭不足以當之。

浙江德清徐氏。六世翰林。曹地山宗伯秀先。有贈徐西灣楹聯云。前生慧業摩麟角。六世清聲冠鳳池。吳玉松太守雲。早歲辭官。逍遙里社。所受業女弟子。多至數十人。年八十。其子藹人學士。已乞養在家。顧南雅通政蕪。寄聯壽之云。泉石衍箕裘。名心早淨雲封岫。翠鈿圍杖履。笑口常開雪避髭。

錢梅溪履園叢話云。莊本培學士培因。少時自負才華。不作第二人想。乾隆己丑。其兄方耕少宗伯存與。

榜眼及第時。學士猶未捷南宮。作詩調之云。他年小宋魁天下。始信人間有弟兄。後果中甲戌狀元。潘芝軒尙書未第時。與其兄樹庭中翰。咸爲名諸生。其封翁雲浦先生。索余楹帖云。老蘇文學能傳子。小宋才名不讓兄。後芝軒中乾隆癸丑狀元。樹庭頗惡此聯。爲易去之。亦詩兆也。

桂林陳蓮史方伯繼昌。爲文恭公元孫。登嘉慶庚辰科三元。時繼蓮龕方伯繼昌。適維藩粵西。手贈楹帖云。高祖當朝一品文孫及第三元。雖渾成終覺太質而鮮味。後蓮史歷官中外。洊至直隸藩伯。潘芝軒閣老贈聯云。畿輔爲屏。越五百里。科名蓋代。第十三人。則傳誦於人口。按歷代至今。登三元者。唐有張又新。崔元翰。宋有王曾。宋庠。馮京。王巖叟。孫何。楊真。金有孟宗獻。元有王宗哲。明有商輅。我朝則已有錢棨。陳

繼昌兩人。趙甌北賀錢湘舲三元詩云。累朝如君十一个。是繼以錢陳共十三人也。然其閒如張又新。在

當時實稱爲張三頭。謂進士狀頭。宏詞敕頭。京兆解頭。見崔元翰爲京兆解頭。禮部狀頭。宏詞敕頭。制

科三等敕頭。則是四元。見王巖叟以明經科。鄉舉省試。廷對皆第一。則是明經。非進士科。見宋史。金史

楊伯仁傳。謂孟宗獻發解第一。伯仁讀其程文。謂當成大名。是歲宗獻府試省試。廷試皆第一。則當時稱

爲孟四元。蓋金時尙多一府試耳。及又見歸潛志。是三元故事。又各徵有不同也。又按雞窗剩言記黃觀。洪

武甲子。南京解元。辛未會試第一。廷對禦戎策。太祖擢置狀元。後殉建文之難。亦見傳維麟。明書忠節傳。

似洪武中已有一三元。不獨商文毅一人。然明史黃觀傳。但云以貢入太學。洪武二十四年。會試廷試皆

第一而選舉志亦謂三試第一者明代惟商輅一人則黃觀之三元似又未確實故趙甌北止云十一人程春海贈朱蘭坡聯云東壁仰儒風正色卻邪蒿之籟南天培士氣高文扶大雅之輪蓋蘭坡曾侍學三天又方爲吳中掌教也

洛陽令鄒堯廷之太夫人九十壽辰秦荅溪太守伯度屬陳東橋孝廉應元代撰一壽聯云愛日佇期頤蘭階早釀十年酒慈雲周海嶽萊綵猶栽一縣花蓋令之尊人石泉太守貽詩曾官閩中三十年至今去思未艾當時太夫人皆隨任也

吳中有令長之母以三月三日六十壽者嚴問樵製聯云衆母奉壽母江南大母三春祝千春上巳長春孟瓶菴師德配何太恭人七十壽辰余伯兄虛白公際昌獻聯云人間賢母曾推孟天上仙姑本姓何恭人素通詩禮得之甚喜

程梓庭總督閩浙時其封翁九十壽辰程春海侍郎以聯寄祝云六秩翁侍九重親况伉儷偕老子孫賢問內外貴僚誰同大福七閩歌兼兩浙舞合竟豫去思吳楚頌願東南吉曜直麗中台蓋梓庭曾旬宣山左巡撫中州楚南吳下封翁皆就養云

道光辛卯江南大水文闈改期九月時梓庭中丞爲監臨中丞本徽產卽前此戊午年魁江南榜者因於首場題一聯於至公堂柱云矮屋策高文九天升九淵沈九轉丹凝多士出身在此九月九日秋闈醒春

夢三藝競三場竟三條燭燼一官回首於今三十三年。

周石芳侍郎系英。視學江南。自榜一聯於堂上云。縣考難。府考難。院考尤難。四十八年纔入泮。鄉試易。會試易。殿試更易。二十五日已登瀛。蓋自道其名場甘苦之味。然吾鄉陳望波尙書。以七月入泮。九月登鄉薦。次年四月成進士。得館選。前後不過十閱月登瀛。尤爲得意也。

程定甫同年贊清。於道光乙未。重游泮宮。時龔季思爲江蘇學政。贈以聯云。二分月下真耆宿。六十年前舊茂才。是年余適過揚州。定甫招飲。遂卽席書一聯贈之云。想當年發跡雞窗有餘味。是他日重歌鹿野之先聲。此皆羌無故實也。定甫得之甚喜。

鎮江有某離商。欲求阮芸臺師書楹帖。師未許也。而某商愈欲得之。師令人語之曰。我有兩部舊書。應歸鎮江人刊行。如肯成此美事。必書楹帖以報之。某商首肯。師卽日以七字聯句獎之云。古籍待刊三十載。舊聞新見一千年。跋云。嘉慶閒。余得宋嘉定。元至順。鎮江府志兩部。皆四庫未收之書。曾經進呈。得蒙恩鑒。因以底本貯之焦山。書藏三十餘年。無過而問者。歲辛丑。丹徒包怡莊學兄。請付棗梨。鎮江之書。歸鎮江人珍護。甚善。不意歸田老眼。尙見此書之成。乃知書之行世。及刊書之人。遲早皆有福命焉。因喜而記之。節性齋老人阮元撰。並書。時年七十有八。聞此書近已刻成一部。其一部亦已開雕矣。

陳仲雲藩伯嘉樹。道光壬寅年正月初十日六十歲。膝下有八子。是年正月十三日立春。羅茗香祝以聯

云有才子八人。綵獻萊衣。林壬大備。先立春三日。釐延柑酒花甲。初周巧思。濬發可謂獨出冠時矣。  
葉小庚申。薊守洛陽。自署儀門聯云。郡望舊京畿。金谷豪奢函谷險。物華真秀麗。伊川山水洛川花。又客  
坐聯云。芸館忝題名。三紀聲華留日下。莎庭閒坐嘯。六年宦績在天中。又一聯云。宦品宜適中。居職忝爲  
二千石。壯齡方筮仕。服官瞬過三十年。

潘榕皋奕雋。以八十六歲。赴瓊林重宴。萬浣雲邑侯臺贈聯云。泮藻重游。萃筮重聽。瓊林重宴。老子壽星。  
哲嗣德星。賢孫文星。語質而確。時其子理齋農部世瑛已請終養。廿年餘。理齋之子新入泮宮云。

嚴問樵官山左時。寅好中聯對。多出其手。如石耀卿大令尊甫官山右司馬。七十壽聯云。西人慈母。東人  
大父。北極湛露。南極壽星。又侯理庭太守之母夫人。九月初十日九十壽聯云。開上壽初筵。九十曰耄。後  
重陽一日。八千爲秋。又理庭之公子新婚曹氏賀聯云。雀屏妙選今公子。鴻案清芬古大家。又蔡仰齋州  
判夫婦五十雙壽。其門下士以七夕稱祝聯云。屈指三秋。天上又逢七夕。齊眉百歲。人間自有雙星。

百文敏公百齡。總制兩廣。平定海氛。有世襲輕車都尉之賞。其時公子尙未育也。蔣伯生獻聯云。天子知  
從無事日。郎君貴在未生時。文敏逢人輒誦之。

王惕甫。孫將赴華亭教官之任。吳穀人先生以聯贈之云。儒以道得民。此官不賤。學而優則仕。如日之  
升。又鄭六亭兼才自題學署云。天子命之教。人才繫此官。皆可爲司鐸。閒曹吐氣也。



相傳有學署舊聯云。漫道官閒。二十一史繁難頻判案。誰云署冷。三五六經。鼓吹自排衙。亦自新穎可喜。

挽詞

洪桐生掌教揚州之梅花書院。終於講席。時城內安定掌教吳穀人先生。輓以聯云。十載共皋比。舊夢荒涼。梅嶺樹。諸兒蒙教澤。春風慚愧杏林花。蓋先生諸兒。皆肄業梅花書院。而西穀清鵬。正探花及第也。吳穀人先生。亦終於安定講席。吳山尊輓以聯云。仕隱追隨。頽景相憐如一日。師生骨肉。名山可許附千秋。劉金門侍郎。時寓居揚州。亦輓以聯云。正味在文章。凡識字人同一哭。清風論出處。擬私諡者定何辭。蓋先生詩文集。名有正味齋也。

畢秋帆先生總制兩湖時。值剿捕流寇未歲。功而薨。趙甌北挽以聯云。羊祜惠猶留峴首。馬援功未竟壺頭。此不但峴首壺頭。用典精切。而羊祜馬援。亦成佳對。且切合時事。開合俯仰。尤見情餘於文也。按此聯甌北亦自得意。後衍成挽詩。編入全集內矣。

浙中錢東生學士林。文筆敏贍。而古貌古心。毫無時俗態度。人皆知其能到陰司判事。而口絕不談。余嘗同扈從盤山者數日。行帳相接。每退直。必相晤語。微叩其端。皆笑而不答也。未及中壽而化去。戚蓉臺太史。入鏡。挽以聯云。福慧並清華。能靜自兼仙佛意。死生都了徹。不談終是聖賢心。足以傳學士矣。游彤占侍御光祿。輓陳質齋侍郎云。對宇望衡。回首燕臺真似夢。素帷丹旌。傷心吳苑不成春。蓋游與陳。

在京邸久爲鄰。陳奔喪歸。沒於蘇州也。

鱗鱗飛應甲。輓石曉田煦之兄云。老泪我無多。數落落晨星。從此驂騑空冀北。雄才君未盡。歎茫茫泉路。相隨鴻雁到荆南。時曉田官荊州郡丞也。

陶雲汀宮保丁父憂。其座主陸平泉尙書以莊寄輓以聯云。能仕教之忠。有子詩書將食報。欲養親不待。類余風樹早銜悲。

姚亮甫中丞輓章文簡公煦聯云。箕尾黯星躔。詔語天嗟遺老一。衣冠崇洛社。典型人失達尊三。又輓張蘭渚侍郎聯云。奏賦共螭坳。譜誼同敦。感西湖四十七年爪印。寫經飯鹿苑。禪心早定。付南屏一百八下鐘聲。出句謂乾隆甲辰。同召試於西湖事。次句謂侍郎素耽禪悅。易簣時尙有南屏僧數十人環繞榻前。代宣佛號也。

有某公輓陳雪田聯云。志在名山。不作公卿緣好學。文能壽世。非求仙佛自長生。此蓋襲用袁簡齋先生句而稍變其意者也。

翰林張某者。新婚甫兩月而病沒。太夫人猶在堂也。其婦翁輓以聯云。逝矣修文郎。縱玉堂傳舍。金粟空花。回首能忘垂老母。傷哉薄命女。僅三日同牢。六旬嘗藥。斷腸永作未亡人。語極沈痛。

常熟令某之父。與蔣伯生因培山左同官舊好。後就養常熟。卒於官舍。伯生輓聯云。治譜付佳兒。感頻年

惠愛吾鄉。白叟黃童都淚下。頽齡逢舊雨。歎此日招尋勝蹟。青山紅樹也魂銷。

道光閒。吳中耆舊。以潘榕皋先生爲冠冕。曾重宴鹿鳴。重宴瓊林。受其姪芝軒尙書一品封誥。年登九袞。始卒。龔季思輓以聯云。九十年魯殿巍然。記會同世父春闈。先公秋賦。甲乙榜鼎科籍甚。已重沐桂林燕。齊杏苑恩榮。齊梅麓亦有聯云。爲學爲修。爲恂慄。爲威儀。有斐爲文。九十年華。盡衛武一生之事。曰壽曰富。曰康寧。曰攸好。考終曰命。三千世界。集箕疇五福而歸。

林少穆督部。工爲楹帖。而於挽詞尤能曲折如意。各肖其人。如挽蔣礪堂節相收銛云。合兩朝宰輔封圻。第一流人終不忝。培四海賢才俊。又在三師事有同悲。蓋嘉道兩朝諸巨公。好汲引人才。宏獎善類者。惟公一人。斯聯洵能舉其大也。又挽孫文靖督部爾準云。海徼樹豐功。水利邊防。廿載宏宣經世略。宮銜隆晉錫。易名延賞。九原還切報恩心。又挽盧敏肅督部坤云。十年三建戎功。帝賴重臣。回斡蠻獠皆懾魄。九省七膺節鎮。人懷遺愛。山河嶺海總銘恩。又挽陶文毅督部澍云。大度領江淮。寵辱胥忘。美謚終憑公論定。前型重山斗。步趨靡及。遺章慙負替人期。自注云。公遺疏。有林則徐才識十倍於臣之語。讀之汗下。又挽韓桂舫尙書封云。西曹法律。南紀封圻。溯三朝中外勳猷。范富歐陽同著望。閩嶠稽帷。吳趨杖履。憶冊載因緣香火。李張皇甫愧知名。自注云。公嘗提刑閩中。某爲諸生時。卽以國士相待。又某官吳門。值公里居。尤欣親炙云。又挽陳石士侍郎用光云。德性秉忠。蘇兩入瓊林。稽古榮躋卿貳貴。文章崇

軌範。七持玉尺。愛才羣仰老成型。又挽張蘭渚侍郎云。感恩知己兩兼之。擬今春重謁門庭。誰知一紙音書。竟成絕筆。盡忠補過今已矣。憶平昔雙修儒佛。但計卅年宦績也。合生天。又挽顧南雅通政云。風節樹朝端。鳴鳳聲高。爲感恩慈。酬再造。文章驚海內。登龍望峻。更餘書畫重千秋。又挽郭蘭石廷尉。尙先云。三十年人海才名。帝簡方隆。天已召。六千里家山歸夢。親心難慰。子誰依。又挽陸心蘭藩伯言云。臺館式前型。溯中外回翔。直節清嚴。猶在望。藩屏聯宦轍。悵老成徂謝。名賢言行未終編。自注云。時公方輯名賢言行錄也。又挽俞陶泉都轉德淵云。拯溺舊同心。才德兼資。如此循良。曾有幾。籌巖今盡瘁。設施未竟。畢生懷抱向誰開。又挽李蘭卿都轉彥章云。卅三年才不虛生。帝簡方隆。誰料謫仙歸紫府。重五節。縷難續。命名心未瞑。應教詞客祀紅橋。又挽廖竹臣郡丞鴻苞云。卅年來同譜同舟。忽魂歸縹緲。峯前轉悔。量移空借箸。一門內難兄難弟。竟望斷逍遙堂後。不教舊約踐連床。蓋郡丞爲儀卿觀察。鈺夫尙書之兄。適調任太湖同知。卽終於官廨云。又挽游春樊中翰興詩云。薇省早抽簪。憶卅年健戶獨居。清品咸推無玷玉。粉鄉常設帳。悵五集編詩未就。蕭辰忽折後凋松。又挽吳和庭邑侯觀樂云。遺愛遙傳三竺外。吟魂應在二梅閒。蓋和庭令浙中有善政。歸里時卜居謝古梅學士之二梅亭也。又挽江石生邑侯之紀云。去思何武留遺愛。死孝王戎本至情。石生居母喪。以毀終云。

岳小瀛宗伯起。以江蘇撫部引疾。旋晉少宗伯。嘉慶己巳薨于位。宗伯居官公正清廉。有伯道之感。爲睿

廟所知。特命公之夫人擇族人之子爲嗣。先是宗伯因族人寥寥無當意者。具遺摺以聞。至是夫人亦不願。容廟亦不之強。乃命大宛兩縣于春秋致祭以爲例。洵曠典矣。紀文達師以聯輓之云。剛峯原不隨流俗。孝肅何須有後人。非此大手筆。不能相稱也。

孫寄圃相國。輓黎襄勤河帥世序。聯云。隻手障狂瀾。立德立功。水土平成君不朽。八年聯舊雨。如兄如弟。芝蘭凋謝我何堪。相國不以書名。而手寫此聯。大字如斗。莊嚴合矩。儼如其人。時余官袁浦。曾親見之。史望之尙書。與康蘭皋中丞紹鏞。同年相好。中丞卒。尙書寄聯輓之云。同譜最相親。憶白髮青燈。昨歲尙陪連夜話。名山期共往。歎太行盤谷。此生無復並驂游。

謝默卿曰。陶文毅公之薨也。獻輓聯者。以數百計。佳者不可悉數。最後聞人傳述一聯。獨能舉其大。徵其實。惜忘卻撰者姓名也。句云。答眷恩。智勇忠勤。凡如籌海運。策河防。改鹽政。諸大端。皆我公力。瘁封疆。事業稱三江柱石。持政體。和平寬厚。尤以培士氣。察民隱。勵官方。爲先務。聽此日。哀聞衢市。英靈仰萬古雲霄。按齊梅麓輓陶文毅公聯云。以寬厚孚民望。以忠誠結主知。敬賓朋。體僚屬。教育英才。二十年節鉞尊嚴。未改書生面目。爲畿輔急糧儲。爲東南興水利。拯災黎。化梟徒。恤慈孤幼。數千里旃幟。蔭庇何殊菩薩心腸。亦傑構也。

陶雲汀陳芝楣。先後沒於江南任所。龔季思輓陶聯云。節署久宣勞。公爾忘私。盡瘁遽聞歌薤露。草廬留

賈翰賞延于世。印心好爲嗣。芸香蓋公所居。印心石屋。曾奉御筆親題也。又輓陳聯云。廿載報君恩。眞不負。日下探花。江南秉節。卅年敦友誼。最難忘。吳中分袂。漢上題襟。陳爲季思典。試湖北所得士。又季思視學江南時。陳維藩吳下。曾連日侍從游山云。

揚州羅茗香。由大江溯流而上。訪陳仲雲藩伯於江西行省。而藩伯已先期歸道山。茗香哭以聯云。追思患難相依。感適館授餐。談經講學。薪傳已閱卅年。詎者番頻阻風帆。致我遲來。空展遺容成沒世。可惜封圻未轉。算巡方煮海。陳臬維藩。棠蔭僅留三省。慟此際纔停露冕。值君小極。誤投蠲痺喪斯文。蓋藩伯患臂痛。醫家誤用蠲痺湯十劑。遂不起。故末語云然。

王文簡公引之。丁其父懷祖先生憂去位。服闋還朝。署工部尙書。未幾卽薨。英煦齋師輓以聯云。下筆已千秋。稽古共知尊漢學。還朝能幾日。考工惜未補周官。

劉芙初同年嗣綰之夫人。卒於七夕。適值立秋。齊梅麓輓以聯云。河漢隔雙星。可是仙家好離別。梧桐飄一葉。若爲詞客助詩懷。

屠琴鵬倬以儀徵令引疾家居。忽奉旨特授九江府。未赴。卽客死揚州。齊梅麓輓以聯云。一病負殊恩。九派清江懷太守。十年成大覺。二分明月弔詩人。

陳雲伯邑侯文述之母。終於吳中。齊梅麓輓以聯云。丸熊助苦。封鮓資康。有是母。乃有是子。隔幔傳經。居

樓授史聞其語。今見其人。

王竹嶼都轉鳳生爲葑亭給諫之子。長於吏治。由丞倅驟晉監司。未竟其施。旋登鬼錄。齊梅麓輓以聯云。受寵轉愁顏。歷官河北淮南。濟世經綸殊未展。訂交從總角。重過三山二水。賞心詩句與誰論。

萬小廉啓昀。廉山郡丞之子。甫由部郎擢御史。遽卒。遲一月而廉山亦逝。齊梅麓輓以聯云。三尺好頭銜。執簡無緣。報國空懷萬言疏。一家大手筆。修文有命。奉親先赴九重泉。

郭韻泉文匯。薨於粵西臬任。先十日已擢方伯。韻泉不及見也。其易簣日時。悉與誕辰相合。余初囑余小霞代製一聯云。寅誼託苔岑。持平遠比于公獄。漢郭宏治獄平允。人比東海于公。法星沈桂管。遺愛應刊有道碑。下二語

皆切其姓也。後數日而部行新命始至。復令改製一聯云。來去有前因。遺範難忘聯襪日。寬嚴能並濟。新恩惜在蓋棺時。則面面皆到矣。陳蓮史方伯聯云。知醫卻老。執法忘劬。看塵牘丹爐。晷影苦無清暇候。優許養疴。殊榮晉秩。緬匡廬庾嶺。星文竟墮碧雲閒。亦旁皇周浹之作也。

朱蘭坡輓顧南雅聯云。魏闕鑒誠衷。建議詞臣追汲黯。滇池施善教。酬恩祀典泣侯芭。一言其在翰林。屢上封事。一言其督滇學時。教士如親子弟。滇人感之。爲力請入名宦祠也。又周敬修督部天爵爲蘭坡所得士。其母封一品夫人。年踰九袞。督部緣事譴戍。將出塞。旋發往粵東軍營効力。在途聞訃。奉旨准回家穿孝百日。然後行。蘭坡寄輓以聯云。珈服寵榮多。上壽始教歸葑府。墨纓軍旅亟。中途猶許泣護幃。

何玉田孝廉。輓方茂才壯猷聯云。傷心酒國流光短。回首名場恨事多。方好飲。人有抄其文登第者。故云。齊梅麓有自題生壙詩。蔣伯生極爲歎賞。謂可抵梅花萬樹。近二人同建白蘇祠。屬梅麓爲聯云。中有仙龕虛一室。更邀明月作三人。甫書寄而伯生已逝矣。梅麓寄以輓聯云。丹青徧鄧尉羅浮。繞墓植梅花。來去原從衆香國。俎豆傍白公坡老。作祠倚修竹。海天還有一仙龕。蓋仙龕一室。遂成讖語。亦奇矣哉。近人孔孝廉傳金爲其庶母持三年服。集經語爲輓帖云。慈母如母。貴父之命也。顧我復我。鬻子之閔斯。字字如生鐵鑄成。可謂不刊之作。

鄭仁圃曰。里黨中有林姓婦。素通文理。中年遽卒。相傳其自輓一聯。出語告夫。對語教子。悱惻動人。亦可傳也。其詞云。我別君去。君何患無妻。倘異時再叶鸞占。莫謂生妻不如死婦。兒隨父悲。兒終當有母。願他日得酬烏哺。須知養母卽是親娘。又饒心耕有輓其妻聯云。本八字安排。以致累卿貧到老。作一番打算。自然先我死爲佳。此合前一聯讀之。皆堪酸鼻也。

鄭仁圃素工楹帖。里居福州時。凡親朋輓聯。多其手製。知余欲續編聯話。因錄其舊作相寄。中有曲折盡意者。如挽何玉田孝廉云。君乃長於情者。爲戚友關心。終歲勞人草草。文固無如命也。以孝廉沒世。當今天道茫茫。又云。閱歷名場。終竟才人無福命。消磨心力。祇緣文債與親情。又云。人情欲贈方千第。天意原慳李賀年。又輓許畫山邑侯作屏云。披叔重舊文。馴雉歸來經笥富。游旌陽遺愛。化鼻仙去口碑傳。



又輓林鈍村孝廉一桂云。三千卷勤抄。耄學宛如沈麟士。八二齡老宿。典型頓失魯靈光。又輓張洲山明經登瀛云。吟成三影清詞。但化竟同蝴蝶夢。謝卻九秋芳信。催歸忍聽鷓鴣聲。明經時客光澤。因赴秋試。抱病歸。至家一日而卒。又挽言可樵邑侯朝標云。千里銜哀。奉靈輿言遄。驚說莪詩初罷誦。廿年遺愛。悵絃歌遽息。慘教棠樹不成陰。時邑侯正丁憂。將扶柩歸里也。邑侯常熟人。言子賢裔。又輓許子密茂才作樞云。庚宿掩霜晨。黃菊叢中添淚雨。卯橋嗟月夕。紫藤庵畔景光風。茂才家有紫藤花菴。卽許甌香先生友舊蹟也。又輓廖封翁云。卿鸞煥朱門。石奮郎君皆貴仕。仙風飄絳節。劉綱夫婦並歸真。封翁夫婦。一月中相繼而逝。卽鈺夫儀卿二太史之父母也。又輓林母云。教成諸子盡揚眉。咸使備寶興德藝。看入三場纔瞑目。不教遲喆嗣科名。時有子四人皆應舉。母沒於八月十四夜。則諸子皆入闈矣。何仙槎尙書凌漢終於位。賜諡文安。謹考我朝諡文安。前此僅有兩人。一爲孟津王尙書鐸。一爲掖縣張閣老端。蓋百十年來易名之典所僅見也。汪少海仲洋輓以聯云。踐道一身兼貫乎言功者德。易名當代少止於義理曰安。又錢心壺給諫儀吉聯云。淵雲大文趙張爲政奮建家風。時望兼漢廷數子。省臺故事。都邑謳思。門牆述訓。令名傳荆國家風。贈尙書輓聯者甚多。皆二三十字巨製。惟此兩聯。更爲沈著耳。潘雲浦封翁芝軒相國之父也。相國以尙書乞養十年。而封翁始歸道山。張蘭渚中丞挽以聯云。一品荷崇封。北斗尙書徵燕翼。八旬尊上壽。西方生佛想螺容。

朱蘭坡曰。余嗣母貞節汪太宜人棄養。同宗同年寶應文定公寄輓聯云。在女而貞。何異西山采薇。未仕抱爲臣之節。誨子能似空令南陔菽黍。曰歸與失母之悲。又同年李芝齡總憲輓本生母趙太宜人云。記事圖成。百日孤兒。紉雪夜。陳情疏達。三年兩母。痛泉臺。此聯一謂余三月餘而孤。本生母鞠育之苦。嘗作雪夜紉兒圖以記其事。一謂在上書房遞摺告養。竝言兩母仰蒙恩准。未至家。已聞貞母之訃。踰二載而本生母又逝也。切當不易。讀之猶涔涔淚下。

吳門陳竹士之室金。纖纖才女也。聲震一時。著有瘦吟樓稿。早卒。汪宜秋女士輓以聯云。入夢想從君。鶴背恐嫌凡骨重。遺真添畫我。飛仙可要侍兒扶。人爭誦之。其繼室王梅卿亦工詩。合卷之夕。詩僧懶雲戲製一聯云。幾生修得到。一日不可無。可稱雅諷。

嚴問樵有一妹。適余生。次年三月產一女。隨以四月八日亡。問樵哭以聯云。佛不慈悲。失乳忍聽遺女哭。兄兼負病。傷心更恐二人知。

嚴問樵有姬人沒於清江。問樵哭以聯云。不合時宜。惟有朝雲能識我。獨彈古調。每逢暮雨倍思卿。

此  
页  
空  
白

# 楹聯續話

## 卷四

### 集句集字附

羅茗香曰。朱竹垞先生。舊有集句楹帖云。人道君如雲裏鶴。自稱臣是酒中仙。惜未詳所贈何人。劉金門先生。自出塞至賜環。凡閱三載。歸後集杜句作聯云。三年奔走空皮骨。萬古雲霄一羽毛。所至皆懸於壁。見者無不稱其工妙。然次句究嫌其夸也。

萬廉山郡丞。喜蓄奇石。大有米海岳之癖。嘗以峨眉積雪石。自鑄此四字。贈唐陶山方伯。方伯集句爲聯。以謝之云。何當報之青玉案。可以橫絕峨眉巔。

謝椒石曰。真州察院。舊爲鹽政按部時。掣鹽公所。內有戲臺。曾賓谷中丞煥。有集句聯云。粉澤大猷。元黃裨說。雲霞萬影。絲竹千聲。戲臺聯之莊麗。無踰此者。

阮芸臺師。有別墅在邵伯湖之北。湖壩植柳三萬株。自額所居曰南萬柳堂。以別於京師之萬柳堂也。沿湖魚利。甲於江北。師嘗集句自題堂聯云。君子來時。葺貫及柳。牧人乃夢。衆惟魚。以石鼓文對毛詩。自然名

貴。

黃右原比部。索余撰句贈聯。比部博學好文。在淮商家為別調。余集韓詩外傳。及漢書河閒獻王傳語與之云。虛己受人。彼其之子。殊異乎族。實事求是。夫惟大雅。卓爾不羣。邗上人多不知所謂。惟芸臺師以為無虛譽也。

余前編叢話。有輯漢碑句十餘聯。黃右原比部見之。以為未盡。因手錄一帙示余。蓋余前據敝齋現藏搨

本為之。右原則從隸釋隸續中推廣得之。今亦擇錄如左。彌覺古香襲人也。其四字云。令儀令色。允武允

文。達盛碑。魯峻碑。為國楨幹。配曜岳嵩。范鎮碑。郭仲奇碑。敦詩悅禮。含謨吐忠。西陝頌。孔憲碑。剛毅多略。文雅少疇。丁勳

仲奇碑。種德收福。幹國棟家。張公神碑。州輔碑。廣祈多福。博覽羣書。孟郁碑。魯峻碑。姿兼申甫。德侔產奇。張納碑。劉熊碑。

智舍淵藪。絜如珪璋。唐尙碑。度扶頌。比蹤豹產。膺姿管蘇。魯峻碑。范鎮碑。為國楨幹。作主股肱。郭仲奇碑。樊安碑。行義高

劭。體性溫仁。費鳳碑。孟郁碑。文艷彬彳。風耀穆清。趙國令碑。祝睦碑。翔風膏雨。左書右琴。孟郁碑。馬江碑。射樂術藝。擊斂

吉祥。丁勳碑。華山碑。剖演奧藝。恬忽世榮。凌官碑。侯成碑。鈞河撻維。奉魁承杓。史晨碑。石門頌。應運挺度。通神達明。郭究

祝睦碑。篤禮崇義。抱淑守真。高彪碑。景君碑。天與厥福。世有令名。禮器碑。耿勳碑。八字云。躬潔冰雪。夷然清皓。性發

蘭石。生自馥芬。祝睦後碑。帝堯廟碑。學為儒宗。行為士表。愛若慈父。畏若神明。魯峻碑。劉熊碑。內懷溫洞。外撮強盾。功

綿日月。名勒管絃。魯峻碑。帝堯廟碑。以義抑強。以仁恤弱。乃台吐曜。乃嶽降精。唐扶頌。杜震碑。威隆秋霜。恩躡冬日。言

合雅譚慮中聖權魏殺碑 十字云言不失典術行不越矩度威以懷殊俗德以化圻民魏純碑

黃右原又錄其集句集字楹帖見示因復擇其尤佳者如左如云鵲笑鳩舞大喜在後麟子鳳雛和氣所

居桂柏棟梁麟鳳堂室雍涼朱草文山紫芝遠性任情得其歡樂布政施惠拜為公卿以上焦氏易林 金

石九莖木禾六秀明珠一寸白玉四環鮑照河清頌 瑞林朋生祥禽輩作卿雲似蓋甘露如珠鮑照

勸進表頌徐陵 珠角擅奇山庭表德天球並價日觀同光商隱獻集賢相公啓 論史可聽談元愈默幽居

少事野性多閒宋之問禊飲序 璣鏡照臨山河容納風質洞遠儀止祥華約齊司空行狀 立行可

模置言成範徽猷克著聲績聿宣沈約齊昭王碑文 組織仁義琢磨道德棟梁華夏舟楫江河劉峻

交論庚信 鏡文虹於綺疏浸蘭泉於玉砌握珠胎而冠月振瓊樹而韜霞王融曲水詩序 玉樹以珊

瑚作枝珠簾以玳瑁為押赤雁與斑麟俱下醴泉與甘露同飛徐陵玉臺新詠序 又集唐人句云四時

最好是三月萬里誰能訪十洲韓偓李商隱 金鈴玉佩相磋切珠蕊瓊花鬪剪裁李紳 黃金盒裏盛紅雪

碧玉盤中弄水晶王建 又集蘭亭序字云將相風和天地靜修齊事大古今同契古風流春不老懷

人天氣日初長今居古稽極樂事外和內峻大賢風流水長亭春風靜宇幽蘭一室修竹萬山修

竹抱山春亭映水幽蘭得地虛室當風遷固同文惠列殊抱管樂佐世老彭引年臨類咸和取諸無

妄隨時觀感咸與同人合室能文自是盛事放生為樂可得大年虛能引和靜能生悟仰以察古俯

以觀今。

鄭仁圃寄余集句聯數紙。中有可錄者。如云。左酒右漿。喜壘其室。伯歌季舞。福爲我根。合匏同牢。宴樂

有緒。駕福乘喜。昏悅宜家。以上焦氏易林。小園新展西南角。和氣先熏草木心。放翁半山。平生獨以文字樂。此日

翛然水竹居。宛陵朱子。煙樹遠浮春縹緲。風船解與月徘徊。文潛朱子。深林閒數新添筍。殘燭貪看未見書。放翁

山五畝自栽池上竹。一尊徑醉溪中雲。東坡誠齋。

道光改元。詔開孝廉方正科。吳江縣以翁君海村應舉。羣稱公允。有以集句聯贈之云。聖代卽今多雨露。

先生有道出羲皇。

鄭仁圃嘗擬作軍機直房春聯集句云。春爲一歲首。月傍九霄多。同人皆以爲工。惜未懸挂。又嘗集句作

閩浙分水嶺。交界處。聯云。半嶺通佳氣。他鄉有勝緣。亦擬而未挂。又於九江府天后宮牆外集句一聯云。

潮平兩岸闊。花滿九江春。蓋牆外臨大江。牆陰則花圃也。

姚亮甫中丞。由豫藩量移山右。時汪碧山方伯如淵。集詩經句贈之。聯云。旣傲旣戒。惠此中國。來句來宣。

至於太原。中丞極稱其工切。

京師和春部戲館門外。有集句聯云。和聲鳴盛世。春色滿皇州。天然莊麗。云是張船山太守問陶所撰。

孫柳君錄寄所集古樂府五七言聯。古雅可喜。如。晤言紛在矚。惠心清且閒。巫山高。南隅行。端景緣直表。

茂實偶英聲。上邪篇永明樂。恪勤在朝夕。俯仰愧古今。蒲生行猛虎行。金石響高宇。桂松比真風。遠期篇白頭吟。智理周

萬物。遠懷柔九州。伯益鯁篇。清川含藻景。丹華耀陽林。日出東南隅子夜四時歌。春秋補小月。山水有清音。折楊柳

子夜四時歌。語默寄前哲。邂逅承清塵。折楊柳行定情篇。仁聲被八表。妙花開六塵。朱鸞篇永明樂。含情結芳樹。捻香

散名花。芳樹篇折楊柳行。平生懷直道。大化揚仁風。白頭吟上邪篇。沙棠作舟楫。浮雲似帳月如鈎。梁元帝烏

帝烏棲曲。凝華結藻久。延立彈琴鼓。瑟聊自娛。白紵歌白鳩篇。縈絃急調切。流徵迎歌度。舞遏歸風。趙瑟秦箏。

余在桂林。習見陳蓮史。所作楹帖。語多古異。閒詢之。始知其暇中。輯有五七言舊句三百餘聯。手寫一帙

見贈。茲擇其尤佳者。錄之如左。五言云。容光無不照。懷古亦何深。張曲江陶靖節。衛門羅戟棨。遂性各琴尊。韓

之蘇東坡。榮華肖天秀。談笑安邊隅。韓蘇。天材任操倚。經訓乃蓄畬。蘇韓。文章自娛戲。忠義老研磨。蘇韓。文

章開窈奧。節制收英髦。杜。避人焚諫草。彈劍拂秋蓮。杜李。遠意發孤鶴。恩波起涸鱗。杜蘇。傳家有衣鉢。

聽履上星辰。蘇杜。經綸皆新語。鸞鳳本高翔。杜韓。上客能論道。虛懷只愛才。右丞杜。奇書窺鳥跡。賜茗出

龍團。放翁蘇。高文有風雅。新渥照乾坤。杜右丞。肝膽不楚越。眉宇真天人。杜李。塵襟諒昭洗。賢路不崎嶇。

朱子杜。雲霞成伴侶。冰雪淨聰明。杜右丞。頃來樹佳政。時還讀我書。陶東野。銘心對敬器。含笑看吳鈎。

萬化如大路。一字皆華星。遺山杜。丹青不獨任。心跡喜雙清。袁暉杜。風騷共推激。華實相芬莩。杜樞載之。

荊州愛山簡。刺史似寇恂。杜。颯爽動秋骨。廉折配春溫。蘇杜。心在水精域。直如朱絲繩。鮑昭。高才食



舊德流藻垂華芬蘇子建。桑竹垂餘蔭。珪璋滿清班陶。計闊道愈密。實大華亦榮蘇韓。曠懷掃氛翳。公

論懸日星杜。春夏各有實。魚鳥亦相親杜。朗鑒諒不遠。清言得未嘗蘇韓。時節不可翫。風期誰復

賡韓。文章有定價。邂逅得初心韓。卽事已可悅。賦詩何必多杜。所得靜而簡。其人勇且英陸。放

意弄晴快。叩奇獨冥搜蘇東野。唱妍酬亦麗。我適物自閑蘇韓。草聖祕難得。詩人思無邪杜。得盡所歷

妙。應緣不耐閑蘇。永路當自勗。清光應更多杜。得句忍不吐。好古意所耽蘇。量力守故轍。盪胸生

層雲陶。守道不封已。擇交如求師杜。且從性所翫。庶以善自名陶惠連。佳句喧衆口。古人惜寸陰陶。

春耕庶秋穫。茶興復詩心薛能。殊姿各獨立。素志庶可求蘇。發興自我輩。賞心惟良杜。知杜。達

生幸可託。得句不妨清蘇康樂。蘊真愜所遇。澄慮觀此身杜。與道本無隔。將詩莫浪傳杜。自得高蹇

嶮。永言銘佩紳李韓。始得觀覽富。特以風期親李韓。各勉日新志。能爲歲寒姿蘇康樂。力守非有黨。心清

得奇聞蘇。爲學務日益。將詩待物華杜。好語時見廣。此身良自如蘇。未曾一日悶。猶有五湖期香。

或製閒居賦。新編雜體詩右丞。試吟青玉案。如登黃金臺李。士生要宏毅。情在強詩篇杜。堅

委聊自傲。素履期不渝蘇。虛白道所集。靜專神自歸蘇。黃卷真如律。素琴本無絃杜。竊騰坐

可致灑掃今其初杜。幽人常坦步。稚子總能文杜。掬水背花氣。讀書此雲房方元英。縈情無

餘澤。揚論展寸心杜。逸氣感清識。良辰入奇懷陶。服理辨昭昧。秉心識本源杜。興來每獨往。

道集由中虛。右丞新詩如洗出。好鳥不妄飛。蘇卽事須嘗膽。論詩一解顏。杜大哉霜雪幹。得之煙

山春。右丞偶值棲遁跡。何異清涼山。杜兼入竹三昧。時有燕雙高。蘇餘心無采績。對書不籀纓。

牧之鳥鳴時一再。家住水東西。陸飛鳥逐前侶。好峯隱半規。右丞石壁開精舍。瑤華振雅音。江

盈長歌白石澗。高臥香山雲。蘇葦管畫柿葉。瓦瓶擔石泉。蘇虛舟任所適。飛鳥相與還。襄陽

荷鋤覘泉脈。移石動雲根。右丞海石分棋子。江波近酒壺。少陵彈琴復長嘯。讀書仍隱居。右逢

人覓詩句。留客聽山泉。遺山翰墨三餘隙。陂塘五月秋。盈川疎峯抗高館。穩字入新聯。康樂雲岫

不知遠。花房未肯開。東坡詩眼自增損。德容自清溫。東坡曬書因閱畫。閒坐但焚香。司空圖七言

云。光芒六合無泥滓。濡染大筆何淋漓。少陵別裁僞體親風雅。徧謁名山適性靈。少陵官職聲名俱

入手。風崖水穴舊聞名。白回看屈宋猶年輩。遠追甫白感至誠。義山詩筆離騷亦時用。文章爾雅稱

吾宗。蘇鐘鼎山林各天性。風流儒雅亦吾師。杜詩情逸似陶彭澤。勳業終歸馬伏波。夢得文學縱

橫乃如此。金石刻畫臣能爲。山谷守道還如周柱史。著書曾學鄭司農。牧之憶事懷人兼得句。引杯

看劍坐生風。義山曲江山水聞來久。庾信文章老更成。韓數問舟船留製作。更無書札到公卿。少陵

英亦能畫馬窮殊相。欲遣吟人對好山。少陵自把新詩教鸚鵡。戲拈秃筆掃驂驢。陸但酌此泉勝

酌酒。勸栽黃竹莫栽桑。放翁千首新詩一竿竹。牆西明月水東亭。陸詩翁愛酒常如渴。草堂少花今

欲栽蘇杜重之不減錦繡段。邀我共作滄浪篇。少陵永叔作詩賀我得石友。曲肱聽君寫松風。石湖山谷萬卷

藏書宜子弟。一日過海收風帆。山谷少陵春工遇物初不擇。酒聖于吾亦庶幾。放翁牧之一家喜氣如春釀。小

築幽棲與拙宜。蘇陸酒令雖嚴莫噴虐。草書非學聊自娛。山谷東坡每聞佳士輒心許。不辨仙源何處尋。放翁

右丞前身應是梁江總。百歲須齊衛武公。義山牧之

楊芸士亦錄寄所集古樂府楹聯。與孫柳君所錄寄者。十有八九相同。殆皆有所本。故不復登。其集易林

八字聯云。大福允興。主母喜舞。長樂受庇。使君延年。歡喜堅固。保我金玉。福祿祺祉。樂以笑歌。千歡

萬悅。貴壽無極。五福四利。喜慶大來。皆吉語也。又集古詩句五言云。典墳探奧旨。詩禮挹餘波。錢起盧綸

知音在霄漢。時分占風煙。耶士元白居易聽琴知道性。避酒怕狂名。姚合李德裕李杜文章在。荀陳地望清。錢起盧綸鳳

棲常近日。鶴夢不離雲。錢起盧綸文章負奇色。事業富清機。陳子昂杜少陵翰墨緣情製。山林引興長。孟浩然杜少陵

七言云。合沓聲名動寥廓。縱橫逸氣走風雷。杜李功業須當垂永久。行藏爭不要分明。李牛融李咸用花房露

透紅珠落。桂樹風吹玉簡寒。溫庭筠曹唐雲生欄戶衣裳潤。窗近花陰筆研香。香山黃庚

張仲甫中翰應昌。聞余續輯聯話。亦以舊時集句十餘聯錄寄。如靜坐觀衆妙。端居味天和。太白朱子松柏

有本性。林園無俗情。公幹靖節結念屬霄漢。委懷在琴書。康樂靖節萬事已華髮。一身爲輕舟。常建東坡江湖萬

里水雲闊。草木一溪文字香。林景熙汪元量入妙文章本平淡。逸羣翰墨爭傳誇。戴復古僧惠洪玉琴瑤瑟倚天半。

白波青嶂非人間。誠齋東坡文章清逸世少比。胸次廣博天所開。穎濱半山園中草木春無數。湖上山林畫不

如。東坡詩墨淋漓不負酒。江山雄麗洵宜人。林景書春能蘊藉如相識。風入襟懷只自知。方岳寒香

嚼得成詩句。新月邀將入酒杯。方岳又集得一聯云。陰陽風雨晦明受。之以節。夢幻露電泡影作。如是

觀亦以經對經。渾成可喜。

鄭仁圃曰。曾見黃莘田先生有集句數聯。極工整。如平生能著幾兩屐。長日惟消一局棋。數點雨聲風約

住。一枝花影月移來。柳搖臺榭東風軟。花壓闌干春晝長。勸君更盡一杯酒。與爾同消萬古愁。

蔡佛田工作楹帖。亦喜集成語為之。今從紫荆樹館雜著中錄其佳者。如集詩品云。水流花開晴雪滿竹。

柳陰路曲過雨采蘋。紅杏在林如有佳語。碧桃滿樹良彈美襟。落花無言幽鳥相逐。可人如玉清風

與歸。明月雪時金尊酒滿。風日水濱。碧山人來。紅杏在林。疎雨相遇。碧桃滿樹。清露未晞。脫帽看

書生氣遠出。杖藜行歌。妙造自然。流鶯比鄰。如有佳語。晴雪滿竹。冷然希音。如氣之秋。窈窕深谷。猶

春于綠。荏苒在衣。畫橋碧陰。觀化匪禁。綠杉野屋。幽行為遲。夜渚月明。所思不遠。柳陰路曲。妙造自

然。集元遺山句云。且從少傅論中隱。擬問靈君乞上池。寄楊弟正卿白雪任教春事晚。貞松惟有

歲寒知。寄答飛卿空谷自能生地籟。吟毫端合染溪光。空山七重寶樹圍金界。千里名山入酒船。應州

寺太白獨酌圖。世外原無衆香國。花陰真是小華胥。雲巖醉貓圖。搖筆尙堪凌浩蕩。題詩端爲發幽妍。明日作

撐腸文字五千卷。試手清涼第一篇。

寶章小集  
臺山雜詠

玉樹瑤林照春色。物華天寶借餘光。

送仲梁出山  
別幕府諸君

又

集宋人句云。藏書萬卷可教子。買地十畝皆種松。

山谷  
堯臣

萬壑松風和澗水。十分煙雨簇漁鄉。

誠齋  
和靖

日

消殘醉閒吟裏。夢入青藤古木閒。

朱

盡捲簾旌延竹色。想銜杯酒問花期。

石湖  
半山

榜花行酒發新唱。解

帶量松長舊圍。

君謨  
放翁

養氣不動真豪傑。居心無物轉光明。

放翁  
朱子

酌酒賦詩相料理。種花移石自殷勤。

草齋  
半山

謨議軒昂開日月。文章浩渺足波瀾。

樂圃  
半山

吾山自信雲舒卷。片心高與月徘徊。

放翁  
希文

幾多怪

石全勝畫。無限好山都上心。

詹中正  
余紫芝

林花經雨香猶在。芳草留人意自閒。

萊公  
永叔

林罅忽明知月上。竹

梢微響覺風來。

放翁  
真山民

能招過客飲文字。亦把湍流替管絃。

半山  
後村

是處登臨有風月。略無蹤跡到波

瀾。

放翁  
賈牧

樓臺近水涵明鑑。琴酒和雲入舊山。

簡齋  
半山

已辦青鞋爲老圃。細傾白墮賦新詩。

朱子  
簡齋

舊書

不厭百回讀。佳客時來一座傾。

東坡  
道潛

山泉釀酒香仍冽。芳草留人意自閒。

誠齋  
永叔

除卻讀書無所好。恍

如造物與同游。

放翁  
復古

要知作詩如作畫。但願對竹兼對花。

復古  
宛陵

供家米少因添鶴。送酒人多不典衣。

放翁

紫荊樹館雜著中。又有集句一聯云。積善云有報。在涅貴不緇。上句陶淵明飲酒詩。下句崔子玉座右銘。

最爲名貴。按此十字。余曾於紀文達師廳事見之。忘其署款何名。似不始於佛田。

何子貞太史紹基工書。無帖不摹寫。尤喜臨爭坐位帖。每集帖字作楹聯至百十付。茲擇其尤工穩者錄

之如左云。心同佛定香煙直。目極天高海月升。美富文才傳左國。清微畫品數南宗。直諒喜來三徑友。縱橫富有百城書。未須百事必如意。且喜六時長見書。眞輔相才葵向日。大光明地月當門。聖業須參齊魯論。尙書並校古今文。校書得理目如電。直節能光心比金。今既見心卽見佛。子安知我不知魚。知人其難九德貴。聞過則喜百世師。家藏古史存疑是。天與高文割愛難。畫本紛披來野意。文辭古怪亦天真。指麾文府才思盛。冠冕人倫道德尊。金臺名士高前席。紫府眞人校異書。同心不隔一片月。時論惟高尺五天。兩京六朝富文史。三高八及挺才名。俛仰情文今與昔。縱橫論列直而和。心光明定得初月。畫本依微來晚煙。情文欲共尊彝古。志節應爭日月光。人傳三異眞名吏。古者九能可大夫。正言須比魯宗道。高士爭如張志和。長官且喜傳三異。宰相還同論十思。人品比南極出地。此心如大月當天。無端開合電明野。不事安排月到天。月寮煙閣標清興。文府書城縱道心。身修天爵貴無比。心有菩提香益清。特立獨行有如此。進德修業須及時。悅心未厭無名畫。積行唯收有用書。友來輒入論文座。書就還思作跋人。入世須才更須節。傳家積德還積書。子瞻卻喜文與可。魯直深知李伯時。當如曾子日三省。更爲張公加半思。烟清忽見一勾月。人定微聞百和香。厭心悅目情文極。入地參天理數明。習勤不置能損欲。聞過則喜眞得師。居安思危介節見。積疑得悟清光來。前席爭傳宣室對。等身唯守魯堂書。五香佛海眞無地。百尺書城半倚天。愛

道天開文府貴。無心月到畫堂深。聞道何時常恐莫。置身有地未辭高。事到從容能合度。路當偏側敢依人。深堂有月同參佛。清畫無人自檢書。聞道真人在姑射。願從古佛入菩提。謹其常而權自足。深於情者才始真。名書古畫不易得。月閣煙寮相與清。郤爲今疑思苦悟。須從異論見同心。書有魚傳人咫尺。門唯爵到地清高。到從月地參真佛。且據書城作寓公。清香滿堂佛應喜。明月出海天爲高。才名挺出如東野。佛理清深是子瞻。率意不知行徑晚。遂心時得異書藏。尙論情深容竊比。清修道合悟真如。九品論存中正意。六書理悟史皇初。高士還如戴安道。鄉侯合置王無功。功名蓋世不矜伐。道德積身惟敬誠。誠存修省取諸震。德積高大貴能升。置身古人敢不勉。美利天下終無言。開尊忽見前身月。用世猶存半部書。兩世勳名郭僕射。一家書畫李將軍。才名震溢李供奉。畫理清深王右丞。道心尙見今猶古。辭令能無抗與卑。校理異文天祿閣。從容清績蓋公堂。古文獨祖衛東海。八分特數師宜官。高位尙須聞過友。美名不廢等身書。姜小枚明經舉。有集蘇數聯。亦尙渾成。如高懷尙友漆園叟。後學過呼韓退之。仙心欲捉左元放。大草閒臨張伯英。前身自是盧行者。伴直難呼孟浩然。小詩試擬孟東野。款段曾陪馬少游。且與揚雄說奇字。要令安世誦亡書。書似西臺差少肉。詩如東野不言寒。成佛莫教靈運後。作詩猶是建安初。行樂及時惟有酒。無言對客本非禪。元亮本無適俗韻。東坡也是可憐人。沽酒獨教陶令醉。狂言

屢發次公醒。萬事會須咨伯始。一班我亦愧真長。高會日陪山簡醉。題詩誰似皎公清。  
魏春松侍御成憲。欲集一齋聯。先有杜句云。古來才大難爲用。而難得對句。其姪滋伯廣文謙升。用放翁  
老去詩名不厭低。句足成之。

雜綴諧語附

柳南隨筆云。馮定遠。嗜酒。適學使者歲試。扶醉以往。學使以後至詰之。蓋猶在酒所。不知所云也。學使  
大書一醉字於卷面以授之。隸人扶入號中。據几酣睡。至放牌。聞砲聲。然後驚醒。四書題爲今夫奔之爲  
數小數也。定遠因作弈賦一篇。經文五篇。伸紙疾書而出。案發。名列六等。定遠大書一聯。榜於中堂云。五  
經博士六等生員。

鈕玉樵曰。康熙中。顏方伯敏。裁缺家居。久不得調。嘗語人曰。吾向在西秦。元旦假寐。夢乘官舫。舫中白榜  
青書。有月臨波作案。雲倚樹爲屏之聯。出觀兩岸。紳士稠雜。皆云迎方伯公者。行已至廣西界矣。十年前  
曾有此兆。異時當補粵藩。他非所望也。未幾果然。

蘇州府屬之崑山新陽。兩縣同城。而新陽本由崑山分出者。適有蘇邑侯於城隍廟內。構舒嘯堂新成。曹  
地山先生爲題楹帖云。縣析崑山。此地可名瑤圃。人來子美。有亭重問滄浪。人皆稱其工切。

黃右原曰。楹聯叢話前編。載吳山尊題友人別業楹帖云。淥水漾丁簾。增我輩閒中風致。名園依丙舍。祝



君家看到雲仍。按別業卽巴園。本與塋地相近。故對話有丙舍云云。園中牡丹最盛。原作花節。過了香。喜我至剛逢穀雨。名園依丙舍。願君家看到仍雲。蓋語語關照牡丹。而丙丁雲雨。屬對尤爲工緻也。

鄭仁圃曰。吳緒五邑侯。久權九江府參軍。與余寅好最篤。復兩權德化令。遂實授。余贈以聯云。十年庾亮樓頭。曾許登牀同玩月。兩度陶潛徑畔。未能愛菊且栽花。緒五得之。甚喜其雅切。

宋悅研侍郎銓。觀察皖中時。嘗書一聯贈某人云。看梅子熟時。箇中人酸甜自得。聞木樨香否。門外漢坐臥由他。侍郎素奉佛。精通梵筌。用彼法語絕工。

黃右原曰。從來聯語。紙書居多。或刻以竹木。或用漆加雲母石。且有嵌牙玉者。至吳山尊學士。始出意製玻璃聯子。一片光明。雅可賞玩。惟字畫不能無反正之嫌。學士又運其巧思。使之表裏如一。其句云。金簡玉冊自上古。青山白雲同素心。上製一橫額。題幽蘭小室四篆字。又請孫淵如觀察。以雙款篆書山尊先生孫星衍七字。正面反面。並是一樣。其巧不可階如此。

羅茗香精於算學。粵東黎見山。應南。贈以楹聯云。紹仁卿漢卿絕詣。兼曉菴勿菴苦心。蓋中法之勝於西法。以天元四元爲最。其術始於宋元時。李仁卿治測圓海鏡。朱漢卿世傑四元玉鑑。自明季算事寢失。國初吳江王曉菴錫闡。宣城梅勿菴文鼎。挈幾探蹟。絕學復昌。今惟茗香能治其書。故黎見山據實稱之。見山乃李四香高弟。皆數學名家也。阮儀徵師相。亦贈茗香楹句云。推步大圓立元以四。理董小篆建一爲

崑茗香近有春秋朔閏異同考。余曾讀而敍之。

彭春農學士邦疇。六十壽聯。少常其意者。學士意欲切彭姓。並欲切江西黃右原比部。適在其門。因考彭姓之非其先族者。惟前明彭先生公望最著。非但如本朝蘇州彭氏。僅以科名起家也。乃獻一聯云。詩集擅千秋。宰相祖風開八百。易堂宗九子。翰林鄉望邁尋常。學士以杜詩尋常對七十。此聯寓望七之兆。得之甚喜。

謝椒石曰。金瓶芍藥三千朵。玉軸琵琶四百弦。此宋教坊大使袁綯句。見於浩然齋雅談。乾隆閒。揚州游客。有書作柱聯以謁某商者。商喜。遂厚贈之。想見彼時商家窮泰極侈。故於此等語獨有當也。若今時則不然矣。

有爲關帝廟戲臺聯云。顧曲小聰明。當日可憐公瑾。搗鼓大豪傑。至今猶罵曹瞞。此的是關廟戲臺。若移向他廟戲臺。則不知所指矣。

楊蓉裳芳燦。爲隨園老人弟子。最工倚聲。錢梅溪贈之聯云。百首新詞填白石。一枝妙筆補倉山。兩淮都轉署中戲臺聯云。新聲譜出揚州慢。明月聽來水調歌。最爲雅切。移向他處。便無謂矣。

鄭板橋有贈焦山長老聯云。花開花落僧貧富。雲去雲來客往還。今此聯墨蹟。猶存山中。

陶文毅公贈錢次軒先生拭聯云。人言此老古開士。我生之初新翰林。蓋錢爲戊戌翰林。而公適生於戊

戊也。

蔡佛田當四十九歲時。集宋句爲聯云。四十九年窮不死。三百六日醉如泥。語意曠達。其實佛田家不甚貧。飲酒亦未嘗及亂也。

英煦齋師集蘇句贈廖儀卿鈺夫昆弟聯云。高才何必論勳閥。壽骨遙知是弟兄。殊工切。吳門滄浪亭畔有大雲菴。六舟上人主之。六舟名達受海寧人。精於金石篆刻之學。收藏甚富。雲臺相國以金石僧呼之。兼工書畫。陳芝楣中丞延主斯席。齊梅麓太守贈以聯云。中丞教作滄浪主。相國呼爲金石僧。嚴問樵邑侯亦爲撰一聯云。商彝周鼎漢印唐碑。上下三千年。公自有情天得度。酒膽詩腸文心畫手。縱橫一萬里。我於無佛處稱尊。

長洲沈玉生基席上舍齋中懸一聯云。願與不解周旋客。飲酒難爲不識姓名人。作書乃壽光李崔生所書。錢唐江秬香跋云。此桂未谷集史書中語也。

元和黃穀原貳尹均工書畫。嘉慶閒供奉內廷有年。後出官湖北。淡於進取。引疾歸里。小有園林。日以筆墨自給。有辭官賣畫小印。嚴問樵嘗製一聯爲贈云。關心夜雨疎簾費半盞。寒鏡爲來日謀朝齋夕韭。回首春風上苑。賸一枝秃管。與諸君寫近水遙山。穀原大喜曰。此卽余賣畫招牌也。

涇縣包慎伯邑侯世臣擅美才而有狂名。余在江南數年。獨闕延攬。僅讀其所撰中衢一勺。皆治河之崇

論宏議也。近聞其齋中自題一聯云：喜有兩眼明，多交益友，恨無十年暇，盡讀奇書。其胸次可想。朱朶山殿撰昌頤未第時，見其叔父虹舫閣學侍兒名多多者，心悅之，未敢請也。適此婢索書楹帖，因信筆製一聯云：一心祇念波羅蜜，三祝難忘福壽男。爲閣學所見，欲以婢賜之。婢謂九郎若中狀元，吾當歸焉。明年朶山果大魁，閣學爲成其事。當時傳爲佳話云。

貴陽譚太守光祜有詩名，又善吹鐵簫。程春海學使贈聯云：赤手拔鯨牙，卅載詩名傾海內；深心托鳳口，九天簫響落人間。

又鄭夢白祖琛由兩淮都轉擢江西廉使，春海贈聯云：玉敦主詩盟，正東閣梅開，墨花全溼；篠驂迎使節，適西山雲起，甘雨重來，蓋夢白方輯錄乾嘉詩，又曾任江西守令也。

石曉田照官楚北，有循聲適喪其兄，悲戚形於色。皖江卓振清贈聯云：至性至情，得天者厚，實心實政，感人也深。後俞陶泉德淵在蘇奉諱歸，軍民攀戀不忍舍，平樾峯翰錄此以贈，賀耦耕中丞曰：此兩人皆不愧斯語也。

張伯治曰：記得從前移居，得一楹聯云：到門莫問姓名，花草一庭欣有主；入室自分雅俗，圖書四壁可留人。又曰：陳曼生嘗書一聯見贈云：冷澹古梅如老衲，護持新笋似嬰兒。蓮因絕愛之，卽仿其意擬得一聯云：古梅蓋屋多盤錯，新筍出林自展舒。余和之云：佳卉移栽如選色，異書借錄抵徵歌。又云：奇書貪錄

如增產佳卉分培當樹人意皆相類。

嚴問樵曰嘗習見書春聯者云槐爲奕世承恩樹杏是春風及第花不知此乃王夢樓先生自署門聯也原句作槐爲王氏傳家樹杏是唐人及第花先生又構一樓題曰夢樓爲演家樂之所集句聯云人世難逢開口笑老夫聊發少年狂前輩風流發人遐想

花曉亭方伯有贈人一聯云騎驢尋梅一天風雪對竹思鶴萬古雲霄俊語可喜

蔡鴻遵選官桂林挈妻赴任道出湘江其伯岳嚴麗生邑侯手書一聯贈之云我所思兮雙引鳳君之出矣小驂鸞自然雅合不愧才人之筆

蔡鴻遵本莆陽人宋忠惠公後裔明末遷吳中自署門聯云家藏東漢傳經字世守西山講學編又云字體琴聲中郎世業茶牋荔譜學士家風

齊梅麓有女弟子張雲裳襄張麗坡參戎之女也歸湯价人觀察之子才貌雙優事梅麓如父梅麓贈以聯云幾生修到梅花骨一代爭傳柳絮才又一聯云前身來自衆香國佳句朗如羣玉山雲裳屢爲余題畫冊畫卷余亦爲雲裳題其鄧尉探梅玉照並報以聯云清才足敵黃崇嘏生世都疑萼綠華

徽商以木植生意爲最盛故各省皆別建木商會館大抵皆傍長江大河爲之以便於發運也館中有一聯頗雅切句云桑梓同敬恭伐木歌詩求我友波濤仗忠信涉川占卦利同人

季時菴廣文鳳沛。文筆瀟灑。教授蘇州時。自撰大堂一聯云。掃雪呼僮。莫認今朝點卯。轟雷請客。都知昨日逢丁。凡司鐸者。皆當爲發一笑案。

孫柳君言其鄉有一縣令王姓。其名寅。姓極貪鄙。有夜題其門一聯者。句云。王好貨。不論金銀銅鐵。寅屬虎。全需雞犬牛羊。見者無不嘖然。

董文恪公未第時。游京師。甚困。偶於薙髮店中書一聯云。相逢盡是彈冠客。此去應無搔首人。一日某親王過而見之。大加歎賞。延之入邸。遂以書畫聞京師。又相傳有一薙髮店。乞聯於狂士者。大書云。磨厲以須。問天下頭顱幾許。及鋒而試。看老夫手段如何。數日間。客皆裹足不前。其店頓閉。

余里居。聞人述王萃華都轉耀辰。客座中自題一聯云。君子之交淡如水。大夫無故不殺羊。初不之信。時余方引疾。不入州府。亦無由與都轉周旋。嗣因奉召復出。都轉餞余於官廡。則此聯實在楹間。詰其命意。笑而不答。

嚴問樵曰。道光初元。江南有嘲舉孝廉方正者。大書於其門云。曾是以爲孝。惡能廉。可欺以其方。奚其正。雖涉輕薄。實工切也。

廣陵有鄭醫者云。居杭州時。嘗由瓶窰入山。三十里許。至一觀。榜云清真殿。供老氏像。門楔有一聯云。蠶蠶雲內神仙府。踣踣山中道者家。不識上四字。見一羽士。年近百齡。詢之云。出句上二字。音沾都。雲厚貌。

下句上二字音吃磬。山多貌。按字典。靈徒罪切。音慈。岫所急切。音接。又音都。磬音異。餘二字亦無考。姑錄之以俟博雅君子。

道光辛卯。歷下城中。新建江南會館落成。鄉人公觴於此。乞戲臺對語於嚴問樵。援筆立書云。東土徵歌。問表海雄風。今樂何如古樂。南宮奏曲。聽遏雲高響。雅音原是鄉音。大爲劉眉生方伯所賞。

王楷堂老於曹郎。家計甚窘。宅邊馬棚。門臨大道。自撰一聯懸於門柱云。馬骨峻嶒。喫豆喫藜兼喫草。車聲歷碌。拉人拉馬不拉錢。過而見者。無不蹶然。

吳江仲子湘秀才。爲壽板舖春聯云。夢且得官原瑞物。呼之爲壽亦佳名。溫雅可誦。

嚴問樵曰。道光癸未甲申閒。余以會試留都。暇日輒製新曲。付梨園歌之。傾動一時。彼中人多有以師事者。余嘗有句云。偶緣我作逢場戲。竟累人爲舉國狂。紀實也。一日逢余初度。羣優畢集。同人戲以桃李門牆四字書扁爲祝。余笑曰。既有扁。可無對乎。因大書一長聯云。儒爲戲。生旦淨丑外副末。呼十門腳色。同拜一堂。重道尊師大排場。看破世情都是戲。學而優。五六工尺上四合。添兩字凡乙。平共成七調。唱余和汝小伎倆。卽論文行已兼優。同人爭賞之。歡讌竟日。後爲長懋亭協揆所糾。何戡雖在。不敢復唱。渭城矣。又曰。余所製紅樓雜劇中有巾緣一折。敝花襲人嫁蔣玉函事。詰旦將登場矣。曲師來請云。場上鋪設新房。尙少一扁對乞書之。余卽書玉軟花嬌四字爲額。對語屢思不屬。正躊躇閒。忽見雛伶二人。翩然而

至者。則其徒也。一名天壽。字眉生。一名仙壽。字月生。卽同習此劇者。意有所觸。卽成一聯云。好兒女天仙雙壽。小團欒眉月三生。

昔歲初編聯話時。吾鄉某生。有錄寄其師某明經聯句者。余嫌其詞太俚。未之錄也。茲復有續話之輯。某生知之。復丐人來探。似以前聯爲必應採入者。蓋某明經本一村學究。乾隆末。頗有文名。授徒甚衆。某生尤篤信其說。其表章師門之意亦甚勤。茲不忍重違其意。姑附於諧語中。俾覽者如見其人。且資談助也。其自題齋室兩聯。一云。架一把茅。不過些些風月。闢半弓地。也成小小軒窗。一云。不成農。不成工。不成商。並不成士。未能琴。未能棋。未能畫。亦未能書。憶余爲諸生時。曾與明經同肄業。鼇峯書院。日接其言論風采。又嘗同應經古之試。明經居然冠軍。遂餼於庠。是秋復報舉優行。俛得而復失。一日忽揚言於衆曰。我近於齋室新製一聯云。何以廩。何以優。自問不知所謂也。無愆也。無孽。還須再看將來。諸君以爲何如。旁有爲之擊節稱工者。然匿笑者。亦不知凡幾輩矣。此則某生所未及錄寄者。因並存其語。而特隱其名云。京師有某主事。家中失竊。鳴官控追。後經訊出。乃其家丁從內作弊。有其同鄉好事者。特製一聯贈之云。主事何堪爲事主。人家切莫信家人。

紀文達師府中。屢爲庸醫所誤。恨之次骨。適有爲醫家求題扁者。公立書明遠堂三字與之。或私詰其說。公曰。不行焉。可謂明也已矣。不行焉。可謂遠也已矣。此醫只當祝其不行。便是無量功德耳。或曰。萬一彼



復來求題聯。又將何以應之。公曰：我有撰成五七言兩聯。一係乙轉孟襄陽詩字云：不明才財作借主棄。多故病人疎。一係集唐人詩句云：新鬼煩冤舊鬼哭。他生未卜此生休。

鄭仁圃曰：閩縣義嶼鄉正月燈聯最盛。每以諺語相嘲戲。有戶族某調停某事。衆疑其受私。某力辨其無。適賽神作燈聯。某卽以吾鄉諺語解嘲焉。其聯曰：燭問燈云：靠汝遮光作門面。鼓對鑼曰：虧儂空腹受拳頭。

嚴問樵曰：金德輝工度曲。向會供奉景山。以老病乞退。粗通翰墨。喜從文人遊。一日請於余曰：某老矣。業又賤。他無所願。願從公乞一言。繼柳敬亭蘇崑生後。余感其意。爲書一聯云：我亦戲場人。世味直同雞棄肋。卿將狎客老。名心還想豹留皮。又曰：邗上徽商某荒於色。嘗製一床。備極華麗。牀柱上懸一小聯。摘卿須憐我。我憐卿之句。榜諸其門曰：有能屬者予千金。或以色卽是空空。是色對之。立擲其金以去。按此語不但工切。兼寓箴規之義。千金非倖獲也。又曰：嘗過揚州一妓館。見小室中懸一聯云：雪月梅花三。白夜酒燈人面一紅時。歎其天然雋妙。亟詢姓名不得。至今耿耿。又於某處見一集句云：明月自來還自去。暫時相賞莫相違。亦致爲雅切。

吳青士曰：秦淮河房中有一才士集句爲聯云：千種相思向誰說。一生愛好是天然。上句用西廂記下句用牡丹亭。銖兩恰稱。側艷無比。

塗說云。有項某自署其門聯云。一門三學士。四代五尙書。過客見之。疑近代顯宦中無此姓。意其先世或居是官。因造門而問焉。項對曰。吾家父子三人。並弟子員。各占杭州仁和錢唐一學。且祖若父生前曾舉明經。合四代皆習尙書。故曰一門三學之士。四代有五人習尙書耳。上聲君無讀破句別字也。問者大笑而退。

此  
页  
空  
白

# 楹聯三話

卷上

揚州舊聯

隱居通議云。賈似道鎮維揚日。上元張燈。客有摘古句作燈門聯者曰。天下三分明月夜。揚州十里小紅樓。衆稱其切。余嘗以爲此必葑州廖瑩中手筆。唐人詩曰。天下三分明月夜。二分無賴是揚州。又唐人登第詞曰。揚州十里小紅樓。盡捲上珠簾一半。皆本郡事也。

逸老堂柱聯

鈕玉樵觚臚載。若中吳磐家。雄於貲。博學工書。前明甲申後。絕意進取。學使者張安茂。題其居爲才人節士之廬。順治初。官方山觀察吳興。與之友善。因重修逸老堂。乞其長句一聯。鐫懸堂柱。吳走筆書曰。山川無恙。歎前輩風流何處。見冷煙衰碣。古道斜陽。儘悲涼人物。止剩寒鴉。臺閣重新。問蒼穹。英雄誰是有補天巨手。迴日珥戈。待整頓乾坤。再來杯酒。詞旣悲壯。書復蔚跂。有怨家潛錄其語。以吳陰蓄異謀。首之帥府。禍幾不測。觀察乘夜撤去此聯。力爲斡旋。費千餘金。事乃已。

卷上

二六一

江陰綵聯

江陰縣志載明宏治八年乙卯科中式十五人。知縣黃傅製綵聯云。入國朝一百廿年。未有此科之盛。總直省九十七學。誰爭吾邑之先。

廬山道院聯

江右胡梅心廣文元鼎告余曰。吾鄉廬山道院勝處。皆被富僧佔爲佛寺。只留正中老君殿一所。爲李道士住持。郡僧尙百計謀。遂賄囑官司判毀。道士幾無以自存。適安溪李文貞公舟過湖口。道士爲公族叔。急奔告求援。公許以到山謁廟。因大書舊聯留山中云。天下名山僧佔多。也須留一二奇峰。供吾道友。世閒好語書說盡。曾記得五千妙諦。出我宗傳。語旣恢奇。書復壯麗。不一日而傳徧九江城中。適各官皆來參謁。公曰。此閒道士吾叔也。供奉此山已久。希君等照拂。於是僧計阻而殿得存。

竹垞先生聯

余在邗江得朱竹垞先生大書隸字一聯云。愛畫入骨髓。吐詞合風騷。筆致奇偉可寶。嚴問樵見之云。此是竹垞先生集句贈程友聲鳴者。見王漁洋帶經堂詩話。

戲樓舊聯

京中慶和園戲樓舊有聯云。大千春色在眉頭。尋徧翠煖珠香。重遊瞻部。五萬鶯花如夢裏。記得丁歌甲。

舞。曾醉崑崙。豪情逸致。飄飄若仙。相傳爲乩筆者近之。或以爲吳梅村祭酒所作。

### 夢中聯兆

吳中蔣古愚學博。琴南觀察之父也。觀察與弟學萃俱成進士。惟長子學文尙困諸生。乾隆甲申元旦。古愚忽夢家中新換廳聯云。長子克家。居易俟命。下聯云。二人同心。誦詩讀書。款署鍾離。子彭錢書。覺而異之。次年乙酉。學文果舉京兆書經房南元。從弟禹邁同榜。以詩經房次題。君子居易以俟命一節。主考則彭芝亭大司馬。及滿洲鍾公名音也。夢兆之奇驗如此。

### 武聯佳話

提督楊愷。儀徵武進士也。康熙間。奉召入南書房。與何義門。蔣南沙。諸公同校書史館。後出爲兩湖提督。晚年歸老。許登瀛觀察贈一聯云。天祿校書名進士。岳陽持節老將軍。亦武職中佳話也。

### 滄洲黃鶴樓聯

棗堂節錄云。滄洲之滄酒。得名久矣。相傳呂祖來飲於此。城外亦有黃鶴樓。祀呂祖像。樓柱有聯云。黃鶴偶乘滄海月。白雲常帶楚江秋。運用崔顥詩語。亦頗自然。相傳是呂祖乩筆。

### 樗園所錄佳聯

樗園消夏錄。載楹帖之佳者。如歸元恭贈某公云。居東海之濱。如南山之壽。汪舟次題山陽學署云。昌黎

起八代之衰。想當年首蓓齋中。不過尋常博士。文正以天下爲任。問今日齏鹽隊裏。可有此等秀才。有客集杜句題隨園云。中天懸明月。絕代有佳人。蔣伯生書齋自署云。熟讀離騷。便可稱名士。涉獵傳記。不能爲醇儒。郭頻伽自題海棠花研齋云。瓦屋只三閒。士龍住東。士衡住西。端溪藏片石。真手不壞。真研不損。皆余前話所未及也。

筠亭所仿舊聯

徐筠亭閒居偶錄云。同年趙米垣。曾誦隱士山居聯云。一二畝瘦田。雨笠烟蓑朝起早。兩三閒破屋。青燈黃卷夜眠遲。余館東楚張氏書屋。仿其意作一聯云。寄跡此山中。數畝芳田。日看犁雲耕雨。忘機斯世外。三閒古屋。時欣弄月吟風。見者謂較之原聯。意境更別。

隨園所錄佳聯

隨園詩話云。對聯之佳者。龍雨蒼見贈云。羲皇以上懷陶令。山水之間樂醉翁。余自題云。讀書已過五千卷。此墨足支三十年。按此亦余前話所未及者。

沭陽縣人瑞聯

相傳王某爲沭陽令時。因公事赴鄉。忽見一家有門對一聯云。一妻十七妾。百子半千孫。心異其語。乃停輿。遣人入問其家姓氏。並詢此聯語。必非無因。少頃。還報云。其家姓呂氏。世爲鄉農。聯句乃實事。此翁現

在。尙可相見。令因降輿入。與之接談。年八十餘。精神矍鑠。藹然可親。問其百子五百孫。均在膝前否。翁答曰。五百孫者。中有曾孫玄孫在內也。人丁旣繁。食指愈衆。故家居者少。出外謀食者多。士農工商。四民俱備。念我老。皆不忍遠遊。相距不過二三百里。令復詢。一年中當以何時會集。答曰。會集甚難。此往彼來。斷不能一時並到。如果同時回家。不但屋少難容。卽備一堂餐。已形竭蹶。令曰。我願分廉俸。爲爾作東道主。以□百金相贈。每□百□十千錢。每人約有□百文矣。請卽訂期。將子孫之在外者。悉數喚回。使我一見可乎。翁欣然許之。不數日而子孫畢集。所差者幼小十餘人耳。乃稟知縣令。請次日來鄉。是晚分二十竈。各具雞黍。祖孫五代。席地而坐。開懷暢飲。至半酣。老翁樂甚。謂諸子孫曰。今日一家團聚。此生恐不能再得。非賢宰之德不至此。宜彼此痛飲。於是撫掌歡呼。一笑而逝。次晨令至。有人迎報。請還輿。令仍登堂行弔。果見兒孫挨擠跪泣。竟不能指數。厚賻而去。此乾隆年閒事。山陽學博雷存齋。爲廖菊屏守備述之如此。

### 城隍廟聯

王凝齋秋燈叢話云。吳縣王某。初任寧夏邑倅。夢本邑城隍謂曰。適奉蘇郡檄。有事須質。當速行。王以路遠辭。神曰。有馬可乘。俄一卒控馬立階下。促王乘之。疾如電。瞬息抵蘇。至城隍廟。見大門懸雕金聯句。光輝奪目。書處世但能無死法。入門猶可望生還。殿上楹柱。又書地獄空留點鬼簿。人心自有上天梯。神謂



曰爾伯沒後爾叔不撫諸孤利其田產爾曾出不平之語其信然乎王以年遠不能記憶對神曰卽事而論曲在誰王曰曲自在叔神曰若然則案定矣悟後差人抵家探問其叔已故卽夜夢之次日也王乃親書聯句送懸廟中

南浦橋聯

浦城縣志潘賜字錫文號容庵永樂二年進士授行人奉使日本假歸故里適南浦橋成作爲楹帖分題橋柱流連往跡憑弔古人其警句云上相名邦百族自知朝北闕眞儒繼統千秋誰復並西山喬木參天半點雲香生大石懸崖籠霧千尋瀑布出高泉阜蓋朱幡遠指羣侯元鶴壠金章紫綬近傳相輔白羊墳仙境微茫安得玉爐丹九轉客途高曠尙懷寶匣鏡重磨綠水橋邊金石足齊交友渡白雲鄉畔山川猶護陸親亭畫角聲中彩帳題詩思夢筆青燈影畔玉壺攜酒想觀瀾古洞聯翩畢嶺舊存仙杵妙清溪浩蕩總章新過客帆多四野無虞詩禮競推長樂里庶民有慶謳歌爭出太平坊書院沉沉綠水半灣連渡口仙樓翼翼白雲一抹護山腰載酒攀花月夜乘舟過水北囊琴採藥霜天被褐過郊陽莪衍名儒霽月遠涵蓮葉渡傳成烈女清風高拂桂林橋橋柱凡八百四十有八懸聯俱徧相傳以爲一夕所作人咸歎其敏捷云

林少穆督部所撰廟聯

林少穆督部。最工作聯語。余於續話中所採獨多。茲復從友人齋頭錄出若干條。愛莫能舍也。因分別附載於後云。題蘇州呂祖祠。時爲開河祈晴酬謝云。仙蹤曾現宰官身。濟世度人水利農田蒙惠澤。道力能廻元始劫。通靈贊化和風甘雨錫康年。丹徒橫閘金龍大王廟云。南宋滌忠門。香火傳來猶似錢塘江上。東吳恬德水。帆檣駛過免經鐵甕城頭。時糧船回空。悉由橫閘遶過府城也。余在蘇州。修韓蘄王碑塋。督部繼余爲建饗堂。題聯云。祠廟肅滄浪。更尋來一萬字穹碑。新煥巖阿棖桷。威靈震吳越。還認取七百年華表。遙傳江上旌旗。

### 武廟戲臺聯

相傳每朝之興。必有尊神爲之護國。前明爲岳忠武。我大清則奉關帝爲護國。二百年來。武功之盛。震疊古今。神亦隨地顯靈。威震華夏。故朝廷尊崇封祀。洋溢寰區。浙中吳山頂廟。爲道光壬寅重建。見有集唐句題戲臺一聯云。聖代止戈資廟略。衆仙同日詠霓裳。武廟隨處皆有。亦隨處皆有戲臺。而楹柱之聯。未有壯麗工切如此者。惜忘卻何人所撰。出語係李羣玉句。對語係李義山句也。

### 于蓮亭觀察所述廟聯

于蓮亭克襄曰。張桓侯廟有聯云。春雨樓桑無限落花悲。帝子秋風劍閣有人灑淚。弔將軍妙在不卽不離。惜未攷何人所撰。又相傳豫章樵子廟。據土人云。光武避難時。有樵子代死。故立廟祀之。廟中聯云。漢

家樵子亦英雄。漫說雲臺列將。莽世簪纓真草芥。可憐祿閣書生。子雲真堪愧死矣。又言淮陰墓。在山右。霍山縣。嶺高十餘里。土人名爲韓侯嶺。嶺上有冢巍然。所葬乃其元也。墓前卽祠。有聯云。生死一知己。存亡兩婦人。頗能隱括淮陰生平。

褚河南祠聯

嚴問樵云。杭之褚塘。有褚河南祠。土人以助聖廟呼之。案公諡文忠。見唐會要。又唐彥卿集。言褚河南之柩。至咸通中。始得蒙恩歸葬陽翟。其時以平徐肆赦。賜其孫八品官。扶護以歸。蓋文忠賜諡。亦在此時。而新舊唐書不載。故後人莫攷。余作楹帖書之。俾易名大典。昭示來茲云。廟食褚塘。大節一生垂史冊。魂歸陽翟。易名千古表文忠。

東甌王廟聯

溫州祠祀。以東甌王廟爲最先。王名驍。搖越王句踐七世孫。與閩王無諸。分理東南濱海地。而雄才大略。殆有過之。嗣與無諸俱爲秦所併。王獨率其民。從衆諸侯滅秦。又從漢滅項籍。至惠帝三年。復封東海王。沒葬甌浦山。國人羣稱爲東甌王。史記封禪書。亦言東甌王。壽至一百六十歲。蓋秦漢之際。一異人也。余初至溫州。卽訪王廟。值郡人庀工修飾。輪奐一新。荷平成者思明德。享粒食者頌思文。王之得茲美報宜矣。顧自漢迄今。千有餘年。鮮有歌詠其事者。惟國初朱竹垞先生五排一首云。九牧維揚外。三江霸越餘。

入關從漢約。遵海裂秦墟。豪俊宜如此。艱難氣不除。策功夷項籍。分壤接無諸。萬古開王會。孤城拱帝車。靈旗存髣髴。過客盡欷歔。側想風雲會。乘時草昧初。遠途今日暮。下拜獨躊躇。足以存王之英概。余拜瞻之餘。恍於崔顥在前。不能成句。謹獻一聯云。嘗瞻臥薪。早有雄心。繩祖武。芟嬴夷項。獨膺奇壽。奠王基。

### 張睢陽廟碑

徐筠亭棗堂節錄云。張睢陽廟。余邑處處皆有之。所見柱聯。切當者殊少。豈王之忠勇。難以名言乎。惟前明進士李春熙一聯云。孤忠百戰江山血。一死千秋天地魂。庶幾盡之。按余過京口日。聞都天廟會甚盛。廟卽祀睢陽。因停權兩日。縱觀。並入廟瞻仰。至邗上。爲雲臺師述及師言。甲辰年新修廟時。鄉人請製楹聯。因手書付之曰。顏許同名。唐代人倫維氣類。李韓論定。熙朝廟貌屹江淮。當時奸臣。曾勸睢陽以天道。公罵曰。不識人倫。焉知天道。此人倫二字所本。語頗沉著。且人倫廟貌。皆雙聲字也。

### 史閣部祠聯

余在揚州。拜史閣部祠。同人多請予題楹柱。余因閱嚴問樵一聯。爲之閣筆。按史閣部母。夢文信國而生。閣部見明史本傳。我高宗皇帝。亦謂史可法卽比之文天祥。實無不可。故嚴問樵聯云。生有自來文信國。死而後已武鄉侯。自是天造地設語。他有作者。不能出其範圍矣。按祠中舊有聯云。佩鄂國至言。不愛錢。不惜死。與文山比烈。曰取義。曰成仁。又云。梅花下有衣冠葬。席帽時知社稷臣。

睢陽張許二公祠聯

魯山令鄭子研鑿。撰睢陽張許二公祠楹聯云。儘孤城四百餘戰。功艱李郭。力障江淮。憫當時妾醢僮烹。列帳啣吻聞鬼哭。同畢命三十六人。祠號協忠。史稱雙廟。問何時鬚張背裂。登堂凜凜見神威。鄭爲揚州興化人。由魯山令請養親歸。服闋不出。聞其著述甚富云。

牛總管祠聯

鄭子研將去魯山時。建宋牛總管祠於泰山宮側。因題楹聯云。小朝廷難與圖功。看戰壘千層。遇毒含冤。知魂魄不忘故土。舊令尹行將歸去。借泰山片壤。題楹志別。願威靈長衛吾民。

何恭惠祠聯

山陰何恭惠公。由淮陽監司。洊歷河南巡撫。東河總河。有名臣風概。其身後祠聯云。所謂大臣。行己也。恭養民也。惠厥有成績。荆河惟豫。淮海惟揚。一分切其諡。一隱括其官。可稱傑作。惜忘卻何人所題。

江陰典史祠聯

江陰野史云。有明之季。士林無羞惡之心。居高官。享重名。以蒙面乞憐爲得意。而封疆大帥。無不反戈內向者。獨江陰陳明遇。閻應元。新舊二典史。乃於一城死義。向使守京口者。皆如是。則江南何至拱手獻人乎。時爲之語曰。八十日戴髮效忠。表太祖十七朝人物。六萬人同心死義。存大明三百里江山。今陳閻二

典史祠卽以此爲楹帖。按此聯已見前編。而不言陳明遇。

### 西湖帥公祠聯

西湖平湖秋月之左。有帥仙舟師生祠。蓋師撫浙有遺愛。士大夫感不能忘。故立祠以報之。姚亮甫中丞題楹柱云。報國有同心。兩地風波皆夢幻。還鄉傳舊德。千秋涕淚滿湖山。自注云。感舊書懷。緣道光二年。與余同遭誣陷也。按仙舟師爲道光閒名巡撫。時京中有輿評云。今天下需才孔急。而有兩好巡撫。一聾一瞽。皆投閒置散。甚爲可惜。一指吾師。一指亮翁也。宜兩人相契之深矣。又按同人中有微議亮翁所撰楹聯語太近樸者。余曾見其贈周刺史檀菴一聯云。望君似歲窮黎隱。與物胥春豈弟懷。以豈弟對窮黎。得不謂之新穎乎。

### 英濟廟楹聯

温州瑞安門俗呼大南門。出城半里許。有英濟廟。俗呼白馬廟。相傳神爲昭明太子。旣無舊碑可考。里人亦無能詳其原委者。廟中有潘宗耀楹帖云。白馬溯光儀。綵仗霓旌。尙振英風。昭旰蠶。黃麋談故事。仁漿義粟。長傳闔澤。濟嗷鴻。跋云。英濟廟神靈最著。里俗相傳。梁昭明太子拯飢來此。時乘白馬。故又稱白馬廟云。按郡志未載此事。前史亦無可徵證。昭明何以來溫拯飢。事屬茫昧。惟此聯尙非俗筆。因附錄之。

永嘉忠義節孝祠楹聯

永嘉縣學之東偏。舊有忠義節孝祠。嘉慶初爲颶風所圯。嘉慶末始重建。朱滄湄觀察文翰爲碑記其事。又各爲之楹聯。忠義祠云。近聖人之居。容光必照。遵海濱而處。明德惟馨。節孝祠云。兒女盡能之一點熱腸。三分血性。家庭常事耳。察乎天地。通乎神明。皆佳構也。

甘露寺聯

北固山甘露寺爲古來勝蹟。而殊少佳聯。惟正殿中間聯云。紫極煥璇題。瑞露凝甘留淨域。丹輪開寶相。香巖擁翠俯晴江。款署長白高晉題。又有一聯云。露降何年。蘿徑石門開法界。寺臨無地。海雲江月擁祥輪。款署葉河薩載題。皆乾隆三十九年所作。頗能壯麗稱題。然總不如甘露寺頂上大殿聖製一聯云。地窄天寬。江山雄楚越。漚浮浪卷。棟宇自孫吳。涵蓋一切。足與北固山並壽矣。

建隆寺李公祠龕聯

建隆寺本後周李招討重進舊宅。宋師入城。招討力不能支。合室自焚。因勅建爲寺。卽以建隆年號爲名。近僧小支手輯建隆寺志。並欲於寺中西偏募建李招討祠龕。徵余楹柱之語。余集唐劉兼陸龜蒙詩句應之云。萬疊雲山供遠恨。一家煙雨是元功。近但雲湖都轉。亦題一聯云。宋史何妨稱叛宋。周親畢竟欲存周。亦有味也。

桃花庵三賢祠聯

揚州名勝以平山堂爲最著。平山堂詩以王荊公一堂高視兩三州一律爲最佳。平山堂楹聯以伊墨卿太守隔江諸山十字爲最壯。余於壬寅夏初來游。曾撰一聯。錄在前編。謝椒石同年見而嘲之曰。聯句實佳。然二十二字中。用數目字。多至七八。非古人所譏卜算子乎。余笑置之。丙午年。重至邗上。遊桃花庵。登三賢祠堂。與黃右原比部。羅茗香茂才。商撰楹聯。右原乃雜舉東坡志林。墨莊漫錄。避暑錄事。爲合擬一聯云。四朶兆金甌。是二千石美談。不因五色書雲。誰識名流皆五馬。萬花停玉局。惟六一堂如舊。若湖三賢謚典。合將祠額署三忠。時羅茗香亦擬一聯云。勝地景芳徽。卅載三賢俱典郡。同龕昭祀典。兩文一獻共稱忠。按韓忠獻之守揚。在慶曆六年。歐陽文忠則在慶曆八年。距蘇文忠之元豐守揚時。恰三十餘年。此前後兩聯。俱見典雅。非不學人所能辦。當不讓李蘭卿獨步於前矣。李蘭卿舊聯有謚並稱忠語。故卽其意而衍之。署余名。以後聯署恭兒名。懸之壁間。而疏其緣起如此。越日。茗香又擬一聯云。楊柳拂隄隄。追溯前徽。於宋歷仁宗兩世。桃花徧祠宇。傳來美謚。至今合文獻三忠。亦佳製也。

南鎮廟聯

南鎮廟坊上書。天南第一鎮廟。前匾曰表甸南疆。大殿有南鎮神像。後殿有南鎮夫人像。上首側殿有神像。旁聯曰。姬孔情思。說了物色。卽幻卽真。作千古神聖明良之合。一雙蝴蝶。頃刻邯鄲。何君何牧。狗人世。



窮通得喪之占。下首側殿。有二郎神勾元帥像。前有匾曰幻其所真。旁聯曰李母占星驚太白。謝公臥月上西堂。按此是據一斑錄所載。似爲占夢神祠而撰。俟更訪之。

招寶山聯

一斑錄又曰。招寶山大小。可比崑山玉峯而稍高。孤注鎮海城外東北角。江海之交。三面皆水。與東岸對峙。隔海面約一里餘。名蛟門。爲鎮海一邑險要。卽爲寧波一郡外障。拾級而上。至半山。有碑曰第一山。有亭懸聯云。仙緣到此無多路。福地原來別有天。登其巔。有小方城。城門上題曰威遠城。旁聯云。踞三江而扼吭。看遠近層巒秀聳。碧浪濼。永固浙東之鎖鑰。俯六國以當關。任往來寶藏雲屯。牙檣林立。會同海壘之共球。入城卽寺門。上題曰寶陀寺。內有大觀樓聯云。天與水無涯。萬舶遠循鯨柱麓。地隨山共盡。十洲環向海陀峯。

普陀山聯

普陀一山。周四十餘里。在大海中。山中地。全屬於廟。並無糧賦。無乞丐。亦無婦女居住。其佃種僧田。與開小店生理者。皆不攜妻室。全山廟宇。不下數十。而惟佛頂山前寺。後寺。三處爲大廟。前寺有聯云。卽心卽佛。但從彼岸問迷津。渡頭寶筏開時。慈航有路。是色是空。誠向茲山瞻法相。洞口祥雲護處。變化無方。款署葉赫實誠沐手敬題。按此據一斑錄所載。錄中僅載此一聯。此外如紫竹林。法華洞。朝陽洞。佛頂山。

法雨寺梵音洞等處亦必各有佳聯容更訪之。

淨慈寺大殿楹聯

杭州西湖淨慈寺大殿歲久損壞道光庚子烏敬齋中丞籌款重修於乙巳年工竣是年恭逢皇太后七旬聖壽紳商於此寺虔設經壇祝釐時梁楚香中丞撰殿聯云依淨土以印淨心回峯現億萬化身覺悟羣迷成淨果引慈航而宏慈量慧日照三千法界莊嚴重耀證慈緣即用淨慈二字分疏經言關合聖壽莊雅工切羣相讚誦尤妙在回峯卽雷峯慧日卽寺後峯名本地風光靈妙無比矣。

送子觀音殿聯

杭州天竺山中送子觀音殿有查聲山先生舊聯云天上錫麟兒此是世尊親抱送山中聞梵唄原從靈鷲早飛來近人章次白黼有一聯云湖山本毓秀之區看桃華開落燕子西東蠢爾未銷情欲障天地有好生之德願嘉門善祥明神祐助螽斯無妬子孫多。

靈衛廟聯

錢塘有朱金祝土穀神祠入於祀典志稱靈衛廟南宋咸淳臨安志有封顯忠侯卽此神也魏滋伯聯云南宋三忠古社粉榆隆報賽西湖半壁大招風雨降神靈。

花神月老聯

西湖有花神月老祠。魏滋伯聯云：廿四風吹開紅萼，悟蜂媒蝶使，總是因緣。香國無邊花有主，一百年繫定赤繩。願穠李夭桃，都成眷屬。情天不老月長圓，麗語柔詞，與題相稱矣。

三清殿聯

吳山元妙觀三清殿聯，亦魏滋伯所撰。句云：廣殿啓通明，高捧五雲香案，層霄仰宗動，來朝羣帝珠璣。此題合作此縹緲之語，所謂言各有當矣。

出海觀音龕聯

接待寺毗盧閣上出海觀音神龕。魏滋伯聯云：香象奉金仙，傑閣凌雲，日麗中天通上界，煙霄騫鐵鳳，華鐘度水，風回大海引慈航。

厲樊榭神龕聯

西溪交蘆菴內有厲樊榭先生鴨神龕聯云：香火因緣，彌勒同龕如是住，溪山幽勝，吟魂此地盍歸來。情文相生，亦此題合作也。

蘇公祠聯

西湖蘇公祠橫翠閣中有一聯云：圖畫香山，風流玉局，荷花世界，楊柳樓臺，閣在白蘇二公祠之間，前對柳堤，俯矚荷花。此聯情景，甚爲穩切。

林處士祠聯

西湖孤山林處士祠。林少穆督部於杭嘉湖道任內曾經修葺。迄今二十餘年。又當重修矣。督部有題祠一聯云。我憶家風負梅鶴。天教居士領湖山。可稱雅切。督部又曾於放鶴亭前補種梅花百十本。手題楹柱云。世無遺草真能隱。山有名花轉不孤。

徐中山王樓聯

金陵莫愁湖上有勝旗樓。相傳明太祖與徐中山王賭棋於此樓。以湖輸與徐氏。聽其收租。樓中懸中山王畫像一軸。楹有聯云。先世著勳猷。憶當年龍虎風雲。楸枰一局。熙朝隆享祀。忻此日蘋蘩澗沼。湯沐千秋。

潘功甫三聯跋

余與潘功甫舍人曾沂別踰十年矣。今夏在東甌郡齋。忽接其手函。如同晤對。喜不自勝。並承封寄楹聯三副。索余題跋。不遠千里之遙。而汲汲爲此迂緩之事。自非相契有素。斯焉取斯耶。三聯者。一爲蘇州滄浪亭放生碑而作。余宜有辭。一係西谿護生菴聯。一係石梁雨來亭聯。則皆余所未經之地。余爲揮汗一應之。此翰墨良緣。亦楹聯佳話也。滄浪亭放生碑聯云。大德曰生。仁心爲質。字極壯偉。下截款云。長樂梁茵林方伯重修滄浪亭之次年。戊子孟夏廿又七日。吳門諸君子有放生之舉。大會於斯亭。適余過吳。

偶訪潘功甫舍人。因悉其事。舍人出楹帖。書此二語爲紀。云德清蔡之定並識。余加跋云。道光戊子孟夏。潘功甫舍人。大會吳中諸君子於滄浪亭。屬余爲放生會碑。顧南雅書之。刻石藏於茲亭。今歲戊申。舍人復摹刻此聯。懸之柱間。爲放生之券。因記始末於旁。前撫吳使者長樂梁章鉅識。西谿護生菴聯云。須知天地常生育。總要人家善護持。八分書款阮元。無年月。余加跋云。西谿護生菴。爲慕鶴鳴先生令錢塘時所建。道光戊戌。潘功甫舍人重葺。同陳碩甫。趙雪門。項梅侶。邵魚竹。諸君。復千金池。放生於此。梅侶爲之記。茲功甫復以儀徵太傅師護生菴柱聯。屬爲旁跋。因紀始末於後。時戊申。長夏。長樂梁章鉅識。石梁雨來亭聯云。甘雨時零。亭成志喜。嘉禾善養。歲慶占豐。大楷書款云。道光戊申。春仲。芝軒潘世恩。余加跋云。道光戊戌。石梁曇華亭被燬。適潘功甫舍人過此。始議集貲興修。有紀事一絕句云。平章事業江河大。有漏涓涓自不知。七十二蓬參徧了。曇華亭上雨來時。蓋此亭創於南宋賈似道。僧因請易名曰雨來亭。天台山田多旱。名此以志喜也。尊公太傅爲書寄雨來亭柱聯。余因記始末於旁。時戊申。長夏。長樂梁章鉅識。按蔡生甫學士書放生碑聯。時在道光戊子之夏。時年已近八十。潘芝軒太傅書雨來亭聯。卽今年春仲所作。則年正八十。阮太傅分書護生菴聯。雖未署年月。以字勢度之。亦必在八十前後。三公皆以高年老筆。撐拄寰中。洵與勝區並傳不朽。而功甫所以必索余跋者。殆以余亦年踰七十以外。尙能握管。肩隨諸老之後。是可合爲希世美談也。因並記之。

福州貢院柱聯

道光初福州新修貢院各聯多出少穆督部之手有四聯已入續話茲更記得一聯云攀桂天高憶八百孤寒到此莫忘修士苦煎茶地勝看五千文字箇中誰是謫仙才此聯尤爲傑作

四川全省試院柱聯

錢塘蔡麟洲太守撰武督學四川時曾手撰全省試院楹帖付梓成書其小序云蜀中試院歷任皆有楹帖然率就省署一聯分布各棚無專指其地者惟前學使周石芳前輩於重慶俞荅琴前輩於敘州有專聯西陽試院落成吾師吳梅梁少空亦撰一聯而全省未備殊缺憾也使者不揣固陋於各棚校士之暇採取志乘大略參以管窺綴成此編非敢與前人爭能亦以見此邦山川人物各有所長俾生斯地者聞風興起也駢征倥偬琢句未工弁鄙之譏知所不免彙而存之冀留他年鴻爪云爾道光丙午仲秋督學使者浙西蔡振武記成都府云江漢鍾靈二千年天府廓名都看大雅扶輪淵雲嗣響峨岷擢秀廿四屬人文循正軌詔諸生鼓篋鄒魯同風重慶府云誦左思蜀都賦江漢炳靈文物媿西京郡合有茂才異等讀王勃益州碑資渝變俗儒風被東魯客休歌下里巴人保寧府云秦棧連雲看砥路同遵劍閣塵清不用青天歌蜀道巴山話雨喜故人出守玉堂墨妙乞將粉本繪嘉陵時同年徐新齋太史出守巴西提調試事欣而題此順慶府云史筆晉稱良何事陽秋尊魏統儒林宋有傳欲將剽銳化資人敘州府云到此開三水通流

激濁揚清。試向岷江分上下。念當日諸戎卽敍。詠仁蹈德。至今夔道被文章。夔州府云。倒峽瀉詞源。孰障東川。惟有韓文凌八代。乘槎來使節。每依南斗。莫吟杜句悵三秋。龍安府云。居廉讓之間。莫教風俗移人。盛名難副。綜歲科而試。敢曰權衡在我。僻地無才。寧遠府云。聲教訖南天。滇海通波。玉斧畫河。嗤往代文章。溯西漢。邛都按部。錦衣諭蜀。豔當年。雅州府云。名蹟問邛峽。爲孝爲忠。與爾輩沈吟出處。邊謠採黎雅。恆風恆雨。願斯文感召和甘。嘉定府云。萬壑秋雲。看挹翠浮藍。露冕風前迎九頂。一江春水。願紆青拖紫。霓裳天際會羣仙。潼川府云。移孝卽爲忠。在昔颺言嘉學士。讀書先識字。莫將干祿笑平原。綏定府云。州升爲府。增二邑於隣。舊治號通川。多士顧名。嚴辨夫聞也。達也。歲兼以科。閱三旬而畢。新知培藝圃。諸生勤業。慎戒乎暴之寒之。眉州云。千載詩書域。坐修竹林中。盡饒佳士。四賢桑梓地。問斜川集後。誰嗣高文。邛州云。地接蓉城。前哲仰遺型。有講學名臣。尙留書院。帖傳竹杖。此邦挺高節。笑尋源使者。不貢人才。瀘州云。雁塢表鴻題。千佛蟬聯。試數涇南文盛。馬山欣驥附。一時驂靳。行看冀北空羣。敘永廳。附試於此。忠州云。桃李種新陰。佳士如林。異日期爲華國選。梓桑懷讓節。前賢在望。諸生莫負大州名。唐陸宣公吾鄉嘉興人。以疏論裴延齡貶忠州別駕。酉陽州云。絕磴躡天梯。烏道窮幽。惜此地未來靈運。駕名山留洞府。龍威探祕。問諸生誰是茂先緣。按四川全省二十四屬。除松潘理番兩廳。資綿茂三州。附成都考棚。敘永廳。附瀘州考棚。石碛廳。附忠州考棚外。實按試者共十七棚。每棚皆係新撰楹帖。典切工雅。足以軼後空。

前時余方輯楹聯三話。與太守相晤於杭州。承以此冊惠讀。因思各直省擁絳帷。持玉尺者。不乏其人。使皆有好事之人生花之筆。豈不蔚成巨觀。大爲此編生色乎。跋余望之。

無錫縣署楹聯

錫金識小錄云。武公承謨。始赴無錫任。於受篆前一日懸聯。四鄉人皆聚觀。其照壁聯云。罔違道。罔咈民。真正公平。心斯無忤。不容情。不受賄。招搖撞騙。法所必嚴。頭門聯云。視民如傷。錫邑蒼生皆我子。修己以敬。東林前輩是吾師。儀門聯云。工堪比官。斧斤利刃。隨手攜來。因材而用。醫可喻政。硝磺猛劑。有時投下。看病何如。大堂聯云。人人論功名。功有實功。名有實名。存一點掩耳盜鈴之私心。終爲無益。官官稱父母。父必真父。母必真母。做幾件懸羊賣狗的假事。總不相干。時先聲所奪。平日紳衿之出入縣庭者。皆悚息危懼。有避至他省者。又張公燦在任時。有一聯云。陽奉陰違。天有難遮之眼。民窮財盡。地無可剝之皮。語雖粗而特爲警確。又王公喬林任金匱時。嘗有一聯。忘其兩起句。其下句云。半點模糊。已耗民財於暗地。一毫偏陂。卽推赤子入危途。尤臨民者所不可不知。

廬州郡署楹聯

仁和孫笠帆豫元官廬州太守。自製大堂一聯云。法堂下。無非士。無非農。無非商賈。敢任性縱情。漫道我。惟行我法。廬州境。也有山。也有水。也有田園。試探風問俗。斯來吾亦愛吾廬。頗爲時所稱。



溫處道署楹聯

溫州分巡道署東偏有園。康熙閒。三韓高公其佩所築。高公本號且園。故卽以爲園名。乾隆閒。三韓徐公綿擴而充之。分爲十景。曰冠綠軒。曰銜遠山亭。曰筠廊。曰藤花徑。曰亦舫。曰養竹山房。曰小春草池。曰蓮勺。曰梅花書屋。曰松化石齋。今惟冠綠軒扁尙存。嘉慶閒。歙縣朱滄湄先生繼任此閒。撰聯云。妙作畫圖看。五色目迷高鐵嶺。恩叨江海住。三年心醉白香山。則聯已無存。惟冠綠軒中尙懸一長聯云。與古相於。緬當年謝草王池。共仰風流獨步。從吾所好。占此地荷亭竹榭。還期心跡雙清。則南豐劉方伯斌所題也。

溫州郡署楹聯

溫州府署。本宋高宗駐蹕之區。規制崇宏。爲兩浙十一府署之冠。惟自外堂以至內廡。無一佳聯留題者。豈以前官斯土者。皆不屑爲此耶。考昔賢守此郡者。以王右軍謝康樂爲最著。故縣中有王謝祠之建。惟此閒山海要區。今昔情形頓異。有未可以王謝之臥理概之者。余以就養來此。令恭兒隱據此意爲之。越日恭兒卽擬句呈云。要地寄一麾。須常念海山深阻。舊堂共千載。敢但希王謝風流。雖亦係常語。而尙質實不浮。因卽令其揭諸堂楹。以詒觀者。

寧波郡署楹聯

寧波府郡署規模宏壯。與蘇州郡署相仿。真海疆名郡也。署中楹聯云。念厥職匪輕。休戚與六邑相關。曰

慎曰清曰勤敏。求斯心可問。是非惟羣言是度。不寬不猛不因循。又一聯云。名郡冠東南。山連奉象。海環鎮定。江抱鄞慈。赫赫巖疆。雄浙水。循聲稽史冊。唐有黃羊。宋稱吳趙。明紹張蔡。巍巍芳躅。想前賢。

河東道署楹聯

山東河東道。專理鹽政。道署面中條山。薰風洞。每歲南風至。則池鹽旺產。署大門有一聯云。薰弦一曲留天地。山色中條閱古今。可稱雅切。

熊氏堂聯

吾師熊謙山尚書公。本南昌舊族。自其祖始遷鉛山。祖卒時。遺五孤。皆幼而家極貧。有諷其祖妣章氏改適者。章誓之曰。吾非不能潔身以殉。顧念五子如椒。豈無一辣者。惟常煢煢撫孤耳。其族衆遂以五椒名其堂。至公以進士出身。官至大司寇。公之子。或由諫垣典郡。或由詞垣開藩。至今門材鼎盛。公嘗承召對詢家世。以務農答。上稱爲耕讀人家。祖塋在河口鎮之衢。有九山環拱。如獅形。堪輿家以爲吉壤。所居在鵝湖山。嚴問樵爲撰堂聯云。獅嶺播椒馨。節生孝。孝生忠。豈獨簪纓誇世胄。鵝湖炊稻熟。子承父。父承祖。但憑耕讀作人家。熊竹村指揮常銑謙山師之孫也。僑寓邗江。善治房屋。問樵亦爲撰堂聯云。辭家祇爲稻粱謀。憶老屋湖邊。耕讀敢忘祖德。作客劇饒詩酒興。過平山堂下。典型如見鄉賢。

勤教堂聯

張仲甫曰。先倉侍公遺命。以菰城老屋勤教堂。改爲支祠。手撰楹聯云。士勤於讀。農勤於耕。工勤於藝。商賈勤於執業。一事可資生。族少遊閒。便是興隆氣象。祖教其孫。父教其兒。兄教其弟。伯叔教其猶子。百年思式穀。堂瞻名義。勉爲孝友人家。按此聯亦本前人。而以勤教二字強對。工力悉敵。似較通用舊句爲佳。

相府新舊門聯

雲臺師舊宅。在舊城之公道巷。自回祿後。始遷居新城南河下康山草堂之右。余於數年前。初到揚州。卽謁師於舊宅。巷口有石碑樓。大書福壽庭三字。大門口貼八字大聯云。三朝閣老。一代偉人。時觀者多以爲疑。謂師之枚卜。在道光年間。何以有三朝閣老之稱。不知師於乾隆六十年九月。已授內閣學士兼禮部侍郎。則閣老之稱。由來已久。或又疑一代偉人四字。頗嫌自誇。余初亦無以應之。後讀雷塘菴主弟子記。乃知師於嘉慶五年。在浙江巡撫任內。奏陳籌海捕盜等因。曾奉有顯親揚名。爲國宣力。成一代偉人之諭。此是敬錄天語。並非自誇也。後吾師亦微聞人言。遂於新宅大門改書云。三朝閣老。九省疆臣。則更不招擬議矣。按王蘭泉先生湖海詩傳中。吾師詩下小傳。有年華正盛。嚮用方殷。加以開物成務之功。進之以誠意正心之學。洵一代偉人云云。似亦敬本褒嘉之語。而吾師究以爲涉於自炫。故改書之。老臣謙抑之盛心。可以風矣。

節孝總坊聯

陶文毅公撫吳時。剏爲節孝總坊之事。余與賀耦庚方伯。極力襄成之。大江南北。數百十年來。殆無不闡發之幽光矣。揚州節孝祠前總坊。有阮雲臺師撰聯云。稽揚州千百人。合成節孝崇坊。質聖賢以彰風化。逢大清億萬載。恩許春秋典祀。感天地而動鬼神。莊重不佻。與題相稱。時桂丹盟太守超萬。亦有聯云。共話慰窮愁。耐過冰霜逢雨露。相觀勵名節。免教巾幗笑鬚眉。亦情文深至語也。

### 水倉門聯

揚州城內街巷。多設水倉。以備鬱攸之驚。他處所宜仿行者也。孫春洲爲作門聯云。事有備而無患。門雖設而常關。羅茗香云。此聯原本出句。係井用汲以受福。後始改事有備以無患。余又改爲事前定則不給。近又別擬一聯云。玉瓚何煩裨竈禳。金蓮永免祝融災。

### 紅船門聯

今大江來往之船。以雲臺師巡撫江西時所製紅船爲最穩。且最速。嘉慶十八九年間。始創爲於滕王閣下。後各處皆仿造。人以爲利。今湖北安徽。以迄大江南北。吾師所製之船。隨在而有。船中小扁。多師所手題。有滄江船。木蘭身。曲江舫。宗舫諸號。數十年來。利濟行人。快如奔馬。開物成務之功偉矣。吾師嘗爲余述在江右時。偶以事遣家丁回揚州。恰值風水順利。朝發南昌。暮抵瓜州。若非紅船。斷不能如此快速也。因製一聯。懸於舟中云。揚子江頭萬里浪。滕王閣下一帆風。

## 焦山陳恪勤聯

焦山水晶菴中有長沙陳恪勤公手書一聯云。山月不隨江水流。天風時送海濤來。跋云。此山中舊聯。不知爲何人所作。今久無存。山僧數爲吟誦。余甚愛之。以屬對不甚工。或亦傳述之譌。因以江月易作山月。流水易爲江水云云。而自然菴中林少穆尙書亦書此聯。作江月不隨流水去。天風直送海濤來。跋云。此朱文公句。陳恪勤不審所出。易江月爲山月。流水爲江水。又誤以直作時。今重書以正之。按陳恪勤固以意輕改舊句。而少穆亦偶未審也。此宋趙忠定公汝愚同林擇之。姚宏甫游吾鄉鼓山詩句。朱子喜之。爲天風海濤四字。大書磨厓於劣巔峯頂後。後人又建天風海濤亭。今亭久圯。而摩厓字猶存。此句亦長在人口。不知者遂誤以爲朱子詩。今趙詩載鼓山志。厲樊榭宋詩紀事亦錄之。此聯以題鼓山固佳。今若移題焦山。則情景尤真切。故樂爲辨之。記得水晶菴壁。又有入室果同水晶域。開門正對石公山。一聯。殊工雅。忘卻何人所題。石公山卽象山。正與焦山相對也。又記得乙未夏。余游焦山時。借菴詩僧猶健在。前一年是其八十誕辰。借菴索余補贈聯句。時從遊者已停橈相待。乃手揮十四字與之云。山中鶴壽不知紀。世上詩聲早似雷。句雖未工。而意頗切。借菴稱謝不絕口。而余則久忘之。今此聯尙懸海西菴壁。閱之如同隔世矣。

## 望湖樓聯

望湖樓以坡公一詩著名。卽論景亦擅一湖之勝。余屢欲題一楹聯而不能成句。魏滋伯廣文一聯甚佳。恐同人皆當閣筆也。句云。三十里湖鏡峯屏。鑿笛可無人坐月。廿八字雨珠雲墨。凭闌依舊水如天。滋伯又有藏經閣一聯云。芬誦旃檀深入華嚴文字海。函尊榆櫨兼賅菩薩聖賢心。亦工麗可喜。

### 第一樓聯

陳琴齋廣文偕徐鐵孫司馬過孤山第一樓旁酒肆。見洪稚存先生題篆聯云。第一樓邊浮大白。初三月上盪空青。一老嫗曰。此三十年前酒客留題。司馬卽購得之。今鈎摹懸第一樓中。又第一樓中有錢小謝廷炤題聯云。卽景親風月。隨時篤詩書。蓋集尹宙碑字也。

### 橫翠閣聯

張仲甫曰。孤山蘇公祠門側。近歲起一閣。適當吳山橫處。汪少海大令取蘇詩內橫翠二字額之。又集句爲聯云。今日重來問鷗鷺。故鄉無此好湖山。對句係蘇詩人所熟知。出句則何巖叟潛齋集中句也。

### 理安寺聯

余來往西湖。踰五十年。熟聞理安之勝。而游蹤迄未能到。今年中秋。始與趙蓉舫學使。固蓮溪將軍。爲看桂花。同涉理安之頂。踰旬餘日。又挈恭兒英兒蕙婦儔孫再往游。前數十年所欲一到而不能者。今兼句而再至其地。不可謂非勝緣。曾賦詩紀之。末聯云。果否真靈關位業。清涼亭畔一盱衡。自注云。相傳覺羅

桂文敏公歙縣曹文正公皆由理安寺僧度世。實未詳其事也。第二游始登松顛閣。讀桂杏農觀察一聯。並跋語。方悉其原由。聯云。薄宦寄明湖。有夢難尋荆樹影。前因迷法雨。招魂空叩木犀禪。跋云。甲戌春。先宮保文敏公。鞠獄粵西。道卒於武昌行館。太傅曹儂笙師。忽夢兄曰。我與公皆理安寺僧。今當歸矣。愕然而覺。越日。楚督奏函適至。遂以上聞。辛卯。余分巡浙西。攜真菴弟。同詣理安。修篁疊嶂。夢又成空。爰題楹誌。鴿原之感。覺羅桂菖識。並書。按曹文正師騎箕之前數日。相傳亦有夢徵。則真靈位業。殆非虛妄。惜無好事者。合塑二像於閣中。以張其事。使無觀察此聯。則何人更能理其說乎。

見山閣聯

張仲甫舍人杭州老屋書齋。額曰彝壽東軒。歲久傾圮。近重加葺治。增一樓。樓旁更增一小閣。面西。得見南北兩高峯。及北山一抹。樓牆罅處。並見保俶塔。題曰見山閣。魏滋伯贈一聯。乃汪孟文女史玢所書十字。曰一塔遠出樹。衆山青到門。汪爲陳扶雅孝廉善佳耦。大小行楷皆工。中年遽殞。此聯乃滋伯收藏舊蹟。恰合此閣之景。滋伯又自書集句一聯云。喜無多屋宇。幸不礙雲山。仲甫皆甚珍之。

辛峯一角樓聯

履園叢話云。長白斌侍郎良。爲前兩江總督玉公德第八子。曾官蘇松糧道。駐劄常熟。署後卽虞山也。有小樓可以望遠。題曰辛峯一角樓。與吳中諸名士讀畫論詩。殆無虛日。自題一聯云。羣彥集東南。有溫李

詩才。荃熙繪事。高樓占西北。對石梅香月。辛嶺晴雲。

### 小礫山莊聯

隨園詩話云。陳豹章有別業在廬江。曰小礫山莊。依山結屋。吟嘯其中。自題聯云。王伯輿終當爲情死。孟東野始以其詩鳴。

### 江心寺樓聯

江心寺樓上。楹帖甚多。余同年李芝齡尙書一聯。最爲時所傳誦。句云。青山橫郭。白水繞城。孤嶼大江雙塔院。初日芙蓉。晚風楊柳。一樓千古兩詩人。此外朱滄湄觀察亦有句云。長與流芳一片當年乾淨土。宛然浮玉千秋此處妙高臺。亦頗超脫。又樓外小柱上。有沈茂才步雲集唐人一聯云。潮平兩岸闊。江上數峯青。亦尙自然。此則聞之孫雨人學博。余兩度登樓。實皆未見此聯也。按芝齡尙書初日晚風八字。是合謝康樂孟襄陽言之。二公皆與孤嶼有關。可稱巧合。而徐鐵孫權守榮一聯云。衆山遙對酒。孤嶼共題詩。則直書孟襄陽之句。且跋云。以實孟樓之名。是爲小峴先生揚其波。殊可不必矣。余前游有詩而無聯。近始補製一聯云。風景不殊。四十餘年舊鴻雪。江山如許。二千里外小金焦。

### 尺五莊柱聯

京師城南之尺五莊。風景頗似南中。地主爲恆心農太守。亦頗風雅。興化鄭子研有聯贈之云。何處無明



月清風半郭。半村裴綠野。此地有茂林修竹。宜詩宜畫。謝青山主人得之甚喜。

錦屏山亭聯

鄭子研曾任河南令。於錦屏山建亭。題柱一聯云。樹栽棠作舍。山製錦爲屏。蓋宜陽本乃伯甘棠舊治。此雖僅十字。而自然工切。即可不磨。

黃鶴樓楹聯

余前錄黃鶴樓楹帖。獨遺卻吾師翁覃溪先生一聯。近讀吾師年譜。急補錄之。吾師於乾隆壬子科。充湖北鄉試正考官。有黃鶴樓圖記云。榜發後重九日。開讌於黃鶴樓。樓前設屏。插菊花數千萬枝。以侑酒。酒罷。題一聯於樓柱曰。千古題詩到崔李。本朝制義在熊劉。余官湖北時。嘗三度登黃鶴樓。而皆未見此聯。豈當時並未鏤板。而墨跡遽爲人所匿耶。使不讀吾師年譜。竟無人知有此聯矣。名流手蹟。其湮沒如此者。蓋不尠哉。

琵琶亭聯

董雲巖題琵琶亭聯云。一彈流水一彈月。半入江風半入雲。張仲甫爲余述之。自然可喜如此。

江心寺門聯

孫雨人學博永嘉聞見錄云。江心寺外門。舊有聯云。雲朝朝朝朝朝朝朝朝散。潮長長長長長長長消。

旁題宋狀元梅溪王十朋書題。余謂此等似巧實拙。斷非梅溪手筆。卽如聯意。亦止須雲朝朝朝散。潮長長消。何煩重疊至八字耶。並引蔡葵圃之言曰。題曰宋狀元。本人斷無此款式。其爲好事者假託無疑。憶四十三年前到寺。亦曾目擊此聯。以其費解。笑置之。旋里後。乃知烏龍江之東山上羅星塔。舊有七字聯。不知何人所撰。其句云。朝朝朝朝朝朝夕。長長長長長消過。客皆不知所謂。相傳康熙中有一道人到此。讀而喜之。衆請其說。道人笑曰。此山爲海潮來往之區。此聯出語。第一第二朝字。上平聲。第三朝字。下平聲。通作潮字。第四朝字。下平聲。第五朝字。上平聲。第六潮字。下平聲。凡此平聲者。皆應作潮字讀。對語第一第二長字。平聲。第三長字。上聲。第四長字。平聲。第五長字。上聲。第六長字。又是上聲。如此讀之。自不煩言而解。不過此言潮汐長消而已。言訖。道人遂不見。或以爲純陽現身也。按此塔聯與寺聯。字句互異。其爲仙筆與否不可知。而塔聯似較簡明有趣。故余曾錄入楹聯續話中。學博言道光壬辰。颶風大作。此聯已吹在江中。不知飄流何處。而余今冬重游。則寺門仍有此聯。卻非舊款。後題章安蔡朝珂重錄。因複記之。

### 熙春山聯

吾鄉邵武熙春山。爲一邑勝地。邑人龔正謙題聯。頗可喜。遠近稱之。而山名益著。聯云。放開眼界。看朝日纔上。夜月正圓。山雨欲來。溪雲初起。洗淨耳根。聽林鳥爭鳴。寺鐘響答。漁謠遠唱。牛笛橫吹。

但雲湖都轉聯句

張仲甫曰。維揚城內保赤堂。收育嬰孩。養而兼教。法良意美。髻幼概令識字讀書。稍長。量其資稟。能讀書。則讀書。不能。則卽改業。就其實性材器。所願學能學者。分別各執一藝。故堂中有課蒙者。有授經者。有教詩文者。有教算法者。有教紡織者。有教九流雜技者。各師與徒。分坐分等。書聲。機聲。算子等聲。錯雜相應。但雲湖都轉題聯云。隨地遭艱危。貌是諸孤。更何望長我育我。顧我復我。回天敷惠澤。誰非人子。敢或忘飲之食之。教之誨之。仲甫並言數年前。小住邗城數日。偶過門外。忽忽入堂一觀。僅記此聯。惜未暇考其章程。并未知何年何人所建立也。

丙塘居士輯載數聯

東望望閣隨筆。題丙塘居士輯。不著姓名。云四月初八。乃南宋謝太后壽崇節。初九日。乃度宗乾會節。賈似道命黃蛻作牋云。聖母神子。萬壽無疆。復萬壽無疆。昨日今朝。一佛出世。又一佛出世。又題佛寺山門。內金剛對聯云。莫怪和尚們。這般大樣。請看護法者。豈是小人。又題養濟院云。看諸君。腦滿腸肥。此日共餐常住飲。想一樣鐘鳴鼎食。生前都是宰官身。可當晨鐘一擊。又云。乾隆五十五年。純廟八旬萬壽。寶少宰東皋先生。進楹帖一聯。最合聖意。句云。天數五。地數五。五十五年。五世一堂。共仰一人有慶。春八十。秋八十八。八旬八月。八方萬國。咸呼萬壽無疆。按予叢話卷二所載彭文勤之聯。與此大同小異。而此所載

似更簡老。所述撰人亦不同。可重錄也。

金沙港聯

金沙港延青水榭。富海帆中丞一聯云。新水漲三篙。繞檻波光平似鏡。好山環四面。開窗嵐翠拱如屏。又張柳泉太守允垂聯云。鏡面湖光蘇堤一綫橫。窗碧雲端梵唱。竺嶺千盤壓閣青。兩聯皆雅飭可採。

此页空白

# 楹聯三話

## 卷下

### 賀雲臺師加銜聯

雲臺師以今年丙午鄉試重宴鹿鳴。大吏奏入。得優旨。晉加太傅銜。並有三赴鹿鳴之望。榮寵極矣。按吾師本以太子太保原銜。越加七級而至太傅。如斯曠典。前此所未聞也。謹考本朝滿漢大臣。生前以太傅加銜者。如金文通之後。洪文襄承疇。范文肅文程。鄂文端爾泰。曹文正振鏞。長文襄齡。不過六人。餘如馬文穆齊。佟端純國維。佟忠勇國綱。奉文勤寬。謝清義陞。楊敏壯捷。顧文端八代。王文恭頊齡。張文端英。朱文端軾。錢文端陳羣。蔡文恭新。董文恭諧。皆由身後贈太傅銜。其由太子太保越贈太傅者。則惟劉文正。統勳一人。若吾師之躬逢其盛。真稽古之殊榮。科名之曠遇。宜邗江士大夫。歡欣鼓舞。嘖嘖以爲美談矣。余客居無以爲賀。獻一聯云。異數超七階。帝眷東山謝太傅。嘉賓佇三肄。天留南國魯靈光。但求切不求工也。是年江南副考官黃徵三通副贊湯。爲吾師門下士。由金陵闈中寄聯相賀云。鸞詔親褒。歷相三朝賢太傅。鹿鳴重宴。同年一榜小門生。亦工不足而切有餘也。又山西平定州張石洲穆。以集杜句賀。

雲臺師重宴鹿鳴加太傅銜楹帖云。從來謝太傅。祇似魯諸生。師甚賞其巧切。而外人多不以爲工。按杜詩奉觀嚴鄭公廳事岷山滄江畫圖詩末聯云。從來謝太傅。邱壑道難忘。又奉送郭中丞兼太僕卿充隴右節度使詩中一聯云。恥爲齊說客。祇似魯諸生。不稽其出典。不知其渾成也。

鄂文端贈法淵若聯

聯云。除卻詩書何所癖。獨於山水不能廉。可想法公之爲人矣。

孫觀察贈孫頤谷侍御聯

孫淵如先生曰。漢以來傳儒林者。以通經詁守家法。至晉稍衰焉。有王肅起而亂之。至改易制度。故肅者。經學之罪人也。後世祀之黌舍。旋悟而黜之。星衍嘗作六天辨。五廟二祧辨。又擬集焉。昭叔然難。王申鄭之說。爲一編而未竟。得見頤谷先生家語疏證。爲之心折。因爲題柱云。申鄭難王。叔然所學。先羣後紀。北海之交。星衍爲先生年家子也。按今永嘉學博孫兩人同元。爲頤谷侍御哲嗣。余至永嘉。訪學博於學署。先生以墨蹟篆聯。尙懸壁間云。

阮雲臺師贈汪中翰聯

杭州汪小米中翰遠孫。嗜古能文。雲臺師贈以聯云。異書遠購吾妻鏡。好古常攜己子彝。吾妻鏡者。東洋人所撰書名也。

姚中丞贈范今雨聯

姚亮甫中丞贈范今雨對聯云。不少雄謀吞海若。祇憑餘事作詩人。自注云。道光庚子秋。今雨五兄來武林。話舊。出筐中諸作見示。並索余撰楹帖相贈。時濱海有警。相與論議數四。故及之。范蓋負經世才者。故中丞最器重之。

吳茂才贈趙雲松

袁簡齋曰。生面果能開一代。古人原不佔千秋。此余贈趙雲松詩也。作宦不曾逾十載。及身早自定千秋。此雲松見贈詩也。近至揚州書院。見壁上有秀才吳楷集余第一句配趙之第二句作對聯。贈掌教雲松。天然雅切。

林少穆督部贈聯

三兒恭辰。六上公車。依然故我。近緣福州舊宅。不能安居。奉余出遊。並奉捐輸令。因作郡大夫。指省浙江。以便迎養。非得已也。時少穆尙書。由陝西馳書相賀。中有哲嗣以二千石游登通顯。台端以八十翁就養。湖山云云。余謝不敢當。而心豔其語。囑少穆就此演成長聯。將懸挂於武林寓齋。以爲光寵。甫踰月。少穆果手製二十八字長聯見寄。並綴以長跋。詞翰雙美。感愧交并。時方集錄楹聯三話。得此。又增一美談。不禁眉飛色舞也。句云。曾從二千石起家。衣鉢新傳賢子弟。難得八十翁就養。湖山舊識老詩人。跋云。葑林



中丞老前輩大人。自出守至開府。常往來吳越間。今喆嗣敬叔太守。又以一麾莅浙。迎養公於西泠。公游與仍豪吟情更健。此真與湖山重締夙緣矣。昨書來索楹帖。以則徐前書有二千石八十翁對語。囑廣其意爲長聯。並欲識其緣起。公昔歷封圻。距守郡時才一紀耳。今懸車數載後。復以兒郎作郡。就養於六橋三竺間。此福幾生修得。若他日再見封圻之歷。承此衣鉢之傳。豈不更爲盛事。敬叔勉乎哉。道光丁未人日。同里館侍生林則徐識於青門節署。時年六十有三。少穆由西域賜環。後先權陝甘總制。旋撫關中。綏輯番民。筦理捐務。公私具舉。歡頌載途。而不知其三年塞上。開墾屯田。厥功尤偉。以逐臣而猶爲民爲國。豈復是尋常報稱之情。近雖因病陳情。行將感激復出。且聞已飭喆嗣鏡帆編修。還朝供職。其爲心存君國。實遠邇所同欽。適承公以長聯寄贈。余不揣固陋。亦勉成數語報之。雖不足以揄揚盛美。而情往似贈。興來如答。亦聊紀一時翰墨緣也。句云。麟閣待勞臣。最難西域生還。萬頃開荒成偉績。鳳池詔令子。喜聽東山復起。一門濟美報清時。按此聯書就。緘寄關中。適公已擢移滇黔總制。未知得達與否。而公所惠寄之聯。則早已製治完美。懸諸杭州三橋址新宅中。衆目快瞻。且贈笑人。少穆督部。本工爲贈答之語。得者往往矜爲家寶。蓋於稱揚中。更能雅切其人。非泛泛作諛詞者也。如吳中贈石琢堂前輩云。陶鎔梓里三千士。領袖蓬山二十科。時石掌教蘇州之紫陽書院。已十餘年也。關中贈楊密峯中丞名鳳云。點蒼南去鍾英地。太白西來建節天。楊以滇人開府陝西也。恩縣贈陶訪雲同年銜云。河清想見官如水。宦久真知縣是恩。贈巡捕官吳青士廷榕云。久許匡劉成國器。肯

將屈宋例銜官。贈張雲巢鹽使云。清門甲第傳兒輩。舊部湖山屬萬公。時卜宅武林。適得次君館選之喜也。送葉小庚申菴之官雲南富民縣云。人自玉堂來。吏亦稱仙宜不俗。神從金馬見。民能使富莫憂貧。贈王楷堂比部廷紹云。南士淵源承北學。秋曹門館坐春風。比部屢與分校。所得多南省佳士。一時無與爲匹者。

楊時齋制府壽聯

鄭子研有賀楊時齋制府遇春壽聯云。紫氣滿關中。合李聃同期而至。青城臨蜀道。先王旦一日以生。

松湘圃相國壽聯

姚亮甫中丞祝松湘圃相國筭壽聯云。仕宦閱六十年。駸駸未已。馳驅逾十萬里。蹇蹇匪躬。上聯固是雅切。下聯尤非公不足以當之。又有手贈一聯云。三德知仁勇。一官清慎勤。以之頌公。亦無愧色也。

張仲虞郡丞壽聯

湖州張仲虞通守學韶少奉其尊甫前河帥蓮舫公戍邊。嗣奉公命回籍省母。又奉母命出關侍父。未幾公終於戍所。復扶櫬入關。計奔走十年餘。所歷不下十萬里。中外皆以孝子稱之。繪有凌山策騎。龍沙罔極。兩畫卷。自爲之記。復廣徵名流題詠殆遍。近來筮仕南河時。同懷兄雨琴大令學襄亦官儀徵。母太夫人年已七十餘。猶健勝。每往來就養。同人以爲美談。值仲虞四十初度。嚴問樵撰聯美之云。歷沙磧兩度。

凌山有志竟成。父子各完忠孝節。奉板輿一條淮水。曰強而仕。弟兄同現宰官身。

雲臺師壽聯

嘆夷之不犯揚州。京師士大夫。以雲臺閣老之居邗江。比漢鄭康成之居高密。而以嘆夷比黃巾之保鄭公鄉也。踰年值八十壽辰。恭蒙賜壽。彭春農學士。以楹聯寄賀云。新恩又見臨裴野。近事爭傳保鄭鄉。卽指此事。

但都轉壽聯

嘆夷初犯京江。揚郡人家。已紛紛逃竄。賴但雲湖都轉。竭力防堵。加意撫循。不一月。卽各安其居。揚人甚德之。值都轉九月誕辰。各製楹帖。以致其頌禱之忱。然語或過當。甚有以郭汾陽李西平爲比者。則擬不於倫矣。惟雲臺師撰七字聯云。菊花潭裏人同壽。揚子江頭海不波。落落大方。恰如身分。不能不推爲大手筆也。

劉恭人壽聯

雲臺師有老妾劉恭人。卽嫡配江夫人之媵也。師兩次斷絃。得其內助力爲多。生子祐。登道光癸卯鄉薦。現官刑部山西司郎中。劉得四品恭人封典。女適吳刺史公謹。崧圃閣老子婦也。今歲七十壽辰。師許同人爲之製錦稱觴。余亦製一聯往祝云。鹿宴沐恩濃。正及臣門膺曠典。翟衣襄政久。更看子舍策清名。翼

日師親來謝步。並曰：此番同人所贈聯軸頗多，惟閣下及右原所贈句最佳。右原句云：溫溫恭人，母以子貴。潭潭相府，日引春長。先是右原以酒筵獻，吾師以手簡謝云：此席恰爲煖壽而來，煖者溫也。所謂溫溫恭人是矣。右原卽因此製成聯句，莊重渾成，真可入余聯話也。

### 雲臺師贈聯

余因覲入京，旋卽拜巡撫廣西之命。雲臺師以分書十四字賜之云：江鄉仁惠傳荒政，嶺表恩威播外夷。余曰：粵西接壤交趾，撫御爲難，余方不知所措，吾師何以預獎之如此？抑以頌爲規，正所以進之歟？師曰：以吾子當此任，我必其勝任愉快也。而上聯則實我由中之言，亦衆口如一者也。

### 姚亮甫中丞所撰輓聯

姚亮甫先生，好作楹聯，尤工爲輓對，能曲折盡意，各肖其爲人。余前錄其輓張蘭潛師一聯，載入續話中，而張仲甫家中實未奉到。後閱余續話，始知之。今年小住武林，與仲甫晤談及此，仲甫始從其後人索得一稿，皆亮翁所手錄。前聯卽在其中，而前所寄聯，尙不知浮沉於何人之手。然則余之編輯此書，亦不爲無裨於人也。亮翁在樞直最久，與程春廬爲至交，春廬由奉天少京兆請假歸，沒於京師旅邸。亮翁爲之經理其喪，甚周至。輓聯云：感舊琴亡，一慟空餘呼子敬；酬知劍在，九原何處覓徐公。語雖平近，而情極有餘。滿洲景勤園中丞敏，亦樞直老輩，與亮翁最稱莫逆，終於黔中撫任。亮翁寄輓之云：二十年禁苑聯

鑣感交合苔岑。長懷古處。七千里巖疆秉節。歎身騎箕尾。未竟嘉猷。鮑雙五先生。桂星。與亮翁同年至好。其卒也。亮翁輓聯云。雲路仰鴻儀。不少丹忱懸日月。烟霄驚鶴化。空留奇氣鬱詩篇。此恰肖先生之爲人。足以傳先生矣。錢裴山中丞之卒。其太夫人尙在堂。亮翁輓聯云。譽望始簪毫。歷廿年金馬蜚聲。果見鴻猷傾海內。恩勤歸畫荻。痛一夕慈烏失哺。長留遺恨徹泉臺。輓蔣礪堂節相云。黃閣仰殊勳。使相聲名傾遠近。青雲叨夙契。故交情誼黯平生。稿本中自注云。語有微詞。蓋惜其末路之顛躓也。輓潘小坡郡丞云。偉績盛河渠。報國眞資舟楫任。貽謀煥堂構。承家都具棟梁才。郡丞從公淮浦最久。歷年河員之後。人鮮登科甲者。今長公紅襟方伯。次公梧亭觀察。皆由進士出身。河上人豔稱之。輓汪竺君樞部。鳴爵云。溫室盛才名。五夜星辰輝彩筆。玉樓驚早世。一江風雪慘銘旌。輓錢次軒觀察。云。宿望冠蓬瀛。八表看花傳洛社。遺型式桑梓。千秋騎鶴歎蕪城。觀察歿於揚州。故云。輓錢古槎觀察。延熊云。華國挾高才。丹禁百篇餘制草。宣風痛邊徼。素車千里愧生芻。古槎卽次軒之喆嗣。由樞曹觀察蘭州。甫一年而逝。在次軒之前兩年也。輓陳香谷中丞。桂生云。節鉞盛才名。廿載鄉邦遺老。一衣冠。凄畫像。百年人望。遠尊三。輓宋湘帆方伯。其沅云。柏署仰寅恭。允矣直聲聞殿陛。梓邦資保障。凜然生氣壯河山。時嘆夷正犯浙東。湘帆行巡撫事。承烏敬齋之後。以勞卒於官。亮翁輓額云。匪躬盡瘁。亦紀實也。輓陸森如太守。楫云。宦海靖波瀾。同荷生成歸大造。寒江空涕泗。難申契闊向重泉。嘆夷初就撫也。輓朱雲麓觀

察鴻云。光霽德輝承。京邸從容懷古處。斗山人望失。寢門悲涕感師資。雲麓爲余老同年。品學兼優而時流多迂之。得亮翁此詞。推崇之至。雲麓可不死矣。輓楊梅梁中丞母田太夫人云。錫命荷三朝。翟芴夫榮節旄子貴。陳情纒隔歲。煙霄鶴化。風樹烏啼。太夫人卽忠武公之夫人。忠武甫乞歸。偕夫人銜恩旋里。不逾歲而夫妻雙逝矣。輓朱詠齋尙書云。報國勵丹忱。饗饗公忠聞海內。生天還絳闕。堂堂正氣在台垣。頗肖詠齋之生平。寄題三子婦錢孺人繡帷云。宗黨仰賢名。歎畢生辛苦持家。無愧相夫教子。關河悽老淚。論初地慈祥證果。定知成佛昇天。輓徐小巖孫培云。噩夢忽驚魂。痛絕高堂。環視孤檠還待撫。微疴真霧露。傷哉旅邸。是何醫藥漫相攻。小巖爲訪巖方伯之冢嗣。卒於客邸。蓋爲庸醫所誤耳。輓方葆巖制軍母吳太夫人云。錫命兩朝隆。曰順曰慈。內壺行堪符史筆。陳情三載允。惟忠惟孝。倚廬哀莫忘王言。順慈爲封誥中玉音。忠孝則允陳情時諭旨也。輓孫季圃閣老元配張夫人云。八座晉崇封。業煥綸扉資內助。三遷垂懿則。經傳紗帳溯遺型。時其詰嗣箕谷侍御善寶。苻卿太史瑞珍。皆國器也。輓鮑太守步蟬云。廉善廉能。山左早聞循績著。成忠成孝。楚南終古令名揚。太守爲樹堂副憲。勳茂第二子。曾官山左楚南。所莅皆有循聲云。輓錢竹西太守清履云。竹馬共嬉娛。六十年燈火揚州。長憶兒童笑語。銅符宣化澤。廿八載棠陰漢上。試聽父老謳歌。竹西爲余甲寅同年。又同官楚北。其沒也。余亦有聯輓之。今不復能舉其詞矣。輓鮑樹堂副憲云。獻賦共簪毫。紫禁追陪。萬事都曾咨伯始。酬知空掛劍。蕪城憑

眺九原何處覓徐君。輓景福泉方伯謙云。屏翰重周原。黍膏棠甘留政績。衣冠尊洛社。梅消石瘦見丰神。方伯素工六法。尤擅長爲水墨梅石也。輓徐晴圃中丞炳云。瑣闥憶肩隨。宦跡東西投老剛欣聯舊雨。黃壚驚腹痛。朋歡零落愴懷何處數晨星。

林少穆督部所作輓聯

少穆督部工作輓聯。余於前話中所載已夥。茲復有所得。因復錄之。輓吳槐江督部云。楚粵盛助猷。更饒廿載山林重。賡鳴鹿。皖吳尊齒德。何意三春風雨。遽痛驂鸞。輓吳玉松太守云。加數年。公卽百齡。才筆依然。胡不慙遺嗟。一老傳三世。孫纔五尺。書香長在。好教一髮引千鈞。輓朱虛舟撫部云。生爲西土福星。卻許湖山娛晚景。沒與東坡同日。應與仙佛締前緣。輓熊聲谷方伯常鐸云。清祕昔忘形。况經兩地同舟。逾艾年華頻話舊。旬宣今盡瘁。空說五絲續命。懸蒲時節正傷神。自注。方伯與余爲清祕堂舊侶。以庚子端午日終於粵東也。輓王紫瀾廉訪瑞徵云。恩命方新。悵籍甚聲華。身後遷除空撒手。官逋未了。歎蕭然環堵。庭前俯仰劇傷心。廉訪於沒後。始奉擢臬貴州之命也。輓屠琴隲太守云。病榻恩來。歎息膏肓難再起。潛園人去。流傳詩畫定千秋。時病中已受九江守也。輓陸萊藏郡丞我嵩云。澤被十閩。深溯頻年砥節奉公。薦鶡名留金筴重。靈歸三泖。遠悵暑月殫精校士。驂鸞人赴玉樓寒。輓江清渠學博有本云。澹泊任天真。憶掉頭苜蓿闌干。八十翁自耕鐵硯。老成悲電謝。試屈指枌榆甲第。廿三科誰共

瓊林。輓麟見亭河帥母惲太夫人云。紗幔仰傳經。八座起居。彤管頻題香茗集。板輿隆養志。三春報答。碧幢忽廢蓼莪篇。惲曾選閨秀。正始集梓行。且歷任皆就養也。輓周稚圭中丞母陳太夫人云。五省奉安輿。一品封崇。况見孫曾繇甲第。卅年隆祿養。百齡算近。忽悲仙佛渺旖幢。輓顧杏樓比部母蔣太恭人云。晝錦迓潘輿。忽感鄰舂驚罷社。春暉遠宋幔。恰常佛誕證生天。時比部回籍迎奉。而恭人適於二月十九日。在籍棄養。是日爲社日。輓江芝亭司馬室顏宜人云。煒管擅清詞。紅藥階前。曾伴郎君吟彩筆。繩床驚噩夢。綠莎廳上。忍教司馬濕青衫。顏有詩草。已梓行也。輓吳巢松太史室盛恭人云。荻閣含飴。正喜有孫傳祖硯。蘭陵返櫂。遽隨佛母渺仙幢。恭人無子有孫。適遭其母盛太恭人之喪。赴常州哭奠。歸蘇卽逝也。

### 盧學士輓聯

盧抱經學士。終於常州之龍城書院。有輓聯云。當代經師。鄭東海。馬扶風。抗前賢爲伍。此閒旅殯。荀蘭陵。蘇玉局。得夫子而三。對仗精切。惜不知何人所作。

### 朱侍郎輓聯

朱虹舫侍郎方增。平生體氣清羸。而好服大黃。後染寒疾。亦日日服之。以至不起。沒後逾月。生遺腹一子。彭春農學士以聯輓之云。上蒼有靈。遺腹定應昌厥後。大黃爲厲。回頭始悔自知醫。



玉文恭師輓聯

玉研農師由伊犁將軍內召甫入關薨於旅次九重震悼勅繪像紫光閣飾終之典備極哀榮嚴問樵撰一輓聯云百部風清攬銅柱高標定有英魂棲大樹九重雨泣痛玉關乍入不留生面畫凌煙

俞都轉輓聯

閒與兩淮離商談歷任都轉之賢以李秬軒爲第一鄒公眉觀察曰秬軒之清標亮節誠不可階然有守而兼有爲者終推平羅俞陶泉德淵一人而已憶陶文毅公整理淮離之始都轉屢不得其人手書令予切實舉薦余卽以陶泉應蓋陶泉令長洲守蘇州實心實政皆予所目擊心儀者也時陶泉方守金陵聞信力辭文毅以余手書示之陶泉語塞聞陶泉初到揚時運庫並無餘積次年遂有三百萬之儲此席擁東南財賦之雄冠蓋往來每多缺望謗議叢興自陶泉蒞任後改絃更張洗手奉職而哀多益寡稱物平施亦無不各得分願者惜其用心太苦精力驟衰位不稱才年不副德論者傷之余在蘭州藩署忽接陶泉之訃爲之涕如綆縻適其孤以急信懇余轉遞平羅余手揮一聯寄輓之云殫心力以報所知一代長才出甘隴處脂膏而不自潤千秋遺愛滿邗江素聞賀耦庚督部言陶泉無所不知無所不能不謂邊陲乃有此人物又若陶泉若長筦淮離可稱得人惜地方上少一好手耳此聯正隱括其意今年在揚州聞公眉觀察亦有一聯云敬以持己恕以接物一息尙存此志不容少懈生不交利死不屬子九京可作舍

公其誰與歸。出語本朱子。對語本檀弓。則真足以傳陶泉矣。

### 胡學士輓聯

胡書農學士敬。乙丑會元。詞林老宿。略司文枋。卽投効歸來。久主西湖講席。士論翕然。今其子弟皆聯翩。科甲克嗣家風。蔚成武林巨族矣。魏滋伯廣文輓聯云。三百輩杏林弁冕。三萬籤芸署編摩。衡鑒識冰心。文苑有人同涕泪。廿一科東觀楷模。廿二載西湖師表。簪纓聯寶樹。新宮無憾作神仙。組織工麗。無一贅語。足以傳學士矣。今西湖講席。卽其喆嗣。工部公接充。亦佳話也。又高伯蓀孝廉學沅亦撰一聯云。京兆衡才。由豫而皖而鄉邦。濟濟擢英賢。門下迭爲多士冠。承明珥筆。有史與文與典冊。莪莪揜羣雅。浙中欲得替人難。

### 百文敏輓聯

張蘭渚師輓百文敏公齡云。五等列崇班。勳爵亞桓信。躬穀三營。鍾閒氣。威名留楚粵。江淮出句切。其男爵。對句謂公生於張三營也。可稱確切不移。按我朝無五等之封。祇有公侯伯三名。與古相合。精奇尼哈番。卽子爵。阿思哈尼哈番。卽男爵。合之卽古之五等也。

### 戴簡恪輓聯

程春海侍郎輓戴簡恪公數元云。貴爲尙書。儉若寒士。數歷四十年。其趨公忘寢食。忠矣。幼稱神童。老推

名宿橫覽八千卷。獨精筭通天偉哉。此聯簡而賅。真而樸。非春海不能作此語。非簡恪亦不足以當之。  
曹文正師輓聯  
英煦齋師輓曹文正師云。從先大夫於九原。五典春闈。首證當年衣鉢。考中書令者廿載。三朝元老。遂成曠代哀榮。蓋文正出德文莊公門下。故出聯言之親切也。

姚亮甫中丞輓聯

翁二銘學士心存輓姚亮甫中丞云。烏臺執憲。龍節宣風。百城解綬避威稜。正色讜言。婦孺亦知包孝肅。燕翼多謀。鳳池繩武。十載抽簪娛晚景。清心學道。蒼英羣仰富文忠。又杭城同人公輓云。執法總朝綱。溯當年節鉞宣猷。聲望比富歐韓范。歸田娛暮景。看後起芝蘭挺秀。科名媲美軾轍郊祁。又張仲甫輓聯云。臣謨望重范韓。有孝有德有守有爲。朝野共欽嚴正性。父執交深管鮑。同榜同庚同官同社。後先並失老成型。自注云。公與先倉侍同甲辰應召試榜。同壬午歲生。同官中外。居又同里。又按公每假旋。必廬墓歸田後。亦廬墓。廬墓之日爲多。而世鮮有稱其孝者。故特表出之。

許封翁輓聯

張仲甫有輓許修門封翁聯云。五十年父執深交。申以盟誓。重以婚姻。憶歲在庚寅。猶扶疾哭吾翁館舍。三四代家聲濟美。子爲詞臣。孫爲貢士。數榜開甲乙。曾及身見兩世科名。

張仲甫哭子聯

仲甫有哭其長子某聯云。嗟吾多病愛閒。何堪垂老零丁。又折此剛強一臂。念爾母衰婦弱。未得抱孫慰藉。忍聽他慘戚雙啼。可謂一字一淚矣。

汪少海邑侯輓聯

汪少海仲洋。以詩人爲循吏。而所遇多窮。在錢塘任內。緣事奪職。鬱鬱不得志。從軍甬東。艱難始復一官。又回避至江蘇。已老病矣。遽沒於吳門。同人輓聯多可傳者。如云。通才百里難留。纔別杭州。鷲嶺魂魄依詩。是識宦迹。一生早定。終歸吳會。鯨圖神授。夢何靈。蓋少海留別杭州詩末章有云。劇愛飛來峯。魂魄飛不去。又聞少海大挑前一夕。夢神授以海圖。莅浙後。首捧檄至海鹽。治海塘。又調錢塘。奪官後。又以甬東軍功復職。至姑蘇。又以前在濱海軍功著績。責其防海。終其身不離海疆也。又一聯云。與子瞻生同里。官同方吏。治詩材稱伯仲。伴和靖寓相鄰。殯相近。湖波山色樂神仙。又一聯云。文章驚海內。詩酒滿天涯。二十年湖上勾留。身去名存。除却歐蘇無此福。薄宦感焦桐。佳人悲錦瑟。七千里蜀中。悵望才豐命。嗇劇憐。李杜亦終窮。皆才人之筆。惜不得撰者主名。少海有姬人某。得於秦淮。色藝無雙。先逝。故佳人句云然。少海從軍甬東。未補官而得藍翎。有書三年奔走空皮骨。萬古雲霄一羽毛。爲楹帖贈之者。殊爲工切。較劉金門先生自道之語爲佳。劉語已見續話。

林少穆督部室鄭夫人輓聯

林少穆督部之元配鄭夫人。卒於雲南官署。夫人一生福壽兼全。惟中年以後。卽爲疾疾所纏。然由甘隴移滇南。猶閒關萬里也。余未得其訃音。乃預製一聯寄少穆。憶余失偶時。曾以先室行狀寄少穆。少穆卽隱括狀中語。撰一長聯相寄。今余未得讀夫人行狀。道遠不能相待。乃以意質實言之云。相夫歷八州督。教子擅八磚才。誰知八座起居。病與一生相伴住。老屋憶文筆坊。新居望文藻宅。都是文星照耀。魂兮萬里定歸來。

梁楚香母李太夫人輓聯

浙江撫部梁楚香寶常。官庶常。於余爲同館。令山左。於余爲同官。而恭兒觀政之江。又託其宇下。其太夫人壽登八十有七。迎養在署。前歲承九重賜壽。有節署承歡之扁。備極寵榮。今歲撫部亦年登周甲。僚好各製錦稱觴。時余就養東甌。寄祝一聯云。東省憶同官。旋聽臺萊頌南國。北堂依壽母。長看旗翼照西湖。觀者稱其典重。撫部之壽辰。在六月十七。而太夫人於前一日。以微疾棄養。余復寄輓一聯云。錫命兼錫壽。從天節署。普慶承歡。喜堂北蕙榮。周甲剛娛萊子舞。同宗復同官。自昔弱息。又叨慈蔭。悵甌東萍繫。生芻遙奠穎封羹。

張仲甫代杭州紳士公輓梁楚香太夫人聯

錫齡膺異數殊恩。憶昨歲蜺旌。捧詔還轅。節省臚歡傳盛事。詒穀播清芬宏澤。念吾鄉鯨浦。歌豐擊壤。蒙麻有自頌徽音。

羅茗香所作輓聯

甘泉趙蓮淑茂才。於本年七月作古。茂才年甫強仕。上有八十七歲之所後母。下有少妾弱女。祚薄無承。祿之子茗香輓以聯云。慟生不逢辰。母在堂。妾在帷。弱女在閨。更嗣續猶虛。劇憐朝露先零。定卜此時難瞑目。嘆我無知己。家多故。身多病。命途多舛。信友朋最篤。豈料晨星又落。相期後至共論心。時茗香方遭母喪。繼又殤孫。雖乍離苦塊。而愁病交加。憤不欲生。故未及之。江蘇張鑄臺孝廉。以道光辛巳恩科舉人。大挑二等。不能補缺。並不能委署。致盼一苜蓿盤而不可得。茗香輓以聯云。命也何如。無祿竟難沾薄祿。天乎欲問。廣文可許作修文。張松崖郡丞。丁內艱。其太夫人厲氏。既爲茗香之妻嫂。又爲茗香姨母之女。茗香輓以聯云。羨姊三遷訓子。四行劬夫。計平生婦職無虧。仇氏班姬堪並擬。慟我十年炊臼。九月廢莪。想此後泉臺有伴。小姑從母定相親。又代叔公輓姪媳一聯云。七族盡同聲。讚從舅從姑。相吾家賢阮。一朝成永逝。對此日佳兒佳婦。憶衛國莊姜。

袁簡齋輓蔣愚谷

隨園詩話云。洞庭山人蔣愚谷。喜吟詩。致貧其家。以療疾亡。余輓之以聯云。生爲誰忙。學業未成家已破。

死虧君忍高堂垂老子初啼。

袁簡齋輓徐爽亭

隨園詩話又云江寧徐爽亭善小兒醫能詩年九十餘有句云船底水鳴風力大蘆中雁語月光高簡齋有小女病危爽亭活之因來往甚歡其卒也輓以聯云過九秩以考終從古名醫都登上壽痛三號而未已傷吾老友更失詩人。

庶母庶妻輓聯

近人有爲庶母三年服者製一輓聯云慈母如母貴父之命也顧我復我育子之憫斯以經對經莊重而工切又聞舊一貴官以媵婢爲妾生一子子亦貴顯其正妻沒後數年妾始卒見諸親友輓句多不愜意自作一聯云媵隨妻來轉令我思妹子母以子貴居然婢作夫人頗爲情文交至而此聯尤難著語也按我思妹子是李后主祭周后文中語見馬令南唐書

梁山舟先生集句

梁山舟先生贈人楹帖聞皆隨手集句爲之如送陳蘭隣作宰云神仙官職雙鳧鳥才子文章五鳳樓又贈廬陵宰云百里棠陰鄰畫舫一江峯影落琴牀又贈姜少司寇云君家舊事傳青史公望中朝仰白雲又送某副憲使閩粵云手搴海國珊瑚樹節擁天星赤繡衣又送粵東某官假回云煙雲得路駒千里炎

海收身鶴九臯。又贈湖州某廣文云。門前問字烏程酒。春暮吟風碧浪湖。又贈某糧道云。經濟只今劉計相。詞華自昔謝中書。又贈某星使本省讞獄云。玉節承天南斗靜。繡衣行畫使星明。又贈某山長云。文章東觀仙曹舊。杖履南湖講席尊。又送某司馬之任云。麾符地喜鄰臣地。姓氏天教上御屏。又贈某學使云。南國人才歸玉尺。中朝門望重冰壺。又贈某將軍云。龍門世澤常華盛。鯨海威名草木知。以上皆張仲甫所錄示。

### 張蘭渚師集句

張仲甫所居堂中。有林少穆督部手書一聯云。應視國事如家事。能盡人心卽佛心。跋云。一西老夫子大人。撫閩中。座右懸此對語。則徐昕夕隨侍。知夫子立心行事。皆實踐斯言之義。茲命書楹帖。卽錄此二語。誌銘佩之忱云。按余在蘭渚師幕中。却未獲觀此聯。師又號一西。亦余所未聞。仲甫曰。此先倉侍公所自集楹帖。上句乃仁廟面諭之語。下句則嘉慶丙寅年所奉訖詞也。按余有奉懷吾師句云。儒無名士氣。佛是老臣心。刻入師友集中。仲甫見之。以爲穩切之至。亦可作楹帖也。蘭渚師又喜集古語爲楹帖。如云。爲仁猶曰行仁。服膺弗失。於止知其所止。常目在之。又云。自新新民。止於至善。先覺覺後。求其放心。又集五經句。壽蔣礪堂閣老云。壽考不忘。以頌申伯。德音是茂。有若泰巔。蓋每句皆備平上去入四聲。因難見巧。張仲甫曰。先倉侍公所集四聲皆備聯句。不止一聯。今所記憶僅此耳。又張仲甫嘗述其祖蓮海公。



有集句楹帖留示孫曹云。聰聽祖考彝訓。深知稼穡艱難。又蘭渚師曾。手集經語。命章鉅以漢隸作楹聯。懸於廳事。以自警。句云。戒之在色。戒之在鬪。戒之在得。職思其居。職思其內。職思其憂。章鉅書竟。乘閒請曰。三戒中。惟在鬪二字。似與我輩身分不甚親切。師曰。鬪之一字。不必定指血氣之勇也。我輩既入名場。大凡奔競之心。傾軋之途。皆鬪象也。足下此時屏居州里。自然心平氣和。將來一登宦途。切須戒之。而使酒罵座。猶其小焉者矣。余謹識之。

陳方伯集句

陳蓮史方伯。有集句五七言楹帖。嘗手錄一副。本贈余。其爲余書楹帖。亦多用集句。道光己亥庚子閒。余次子丁辰。三子恭辰。均隨侍桂林節署。值方伯在里中養痾。兩兒最承其青眼。屢以書畫往復質證。方伯手集聯語贈之云。虛其心。實其腹。驥之子。鳳之雛。義兼褒勗。余及兒輩。甚感佩之。

羅茗香集句

羅茗香最善集句。嘗有賀人完姻集句聯三副。其一云。聞鳳窺丹穴。顏延年乘鴻駕紫煙。郭景純其二云。鳳鳥于飛。賓親以禮。太元經金玉爲寶。婚悅宜家。易林其三則專指十月吉期者。句云。十月維陽。嘉耦日配。三星在戶。吉事有祥。

嚴問樵集句

上海育嬰堂門柱有集四書聯句者不甚佳。嚴問樵易之云：非要譽，非內交，此謂民父母，無伐善，無施勞，以保我子孫。亦集四書語，較爲工穩。又製天后宮聯云：受天地之中以生，一曰水，有功德于民，則祀，謂之神，亦頗渾成。問樵又云：今人門帖多有取平爲福，居之安作對者，下句出孟子，人人知之，上句出莊子盜蹖篇云：平爲福，有餘爲害，物莫不然而財其甚者也。今習爲口頭語，而不知所出。

張仲甫集句

仲甫喜爲集句楹帖，嘗手鈔一本見示，自言與少穆先生所集彙鈔一冊，今不能分辨某聯實出何手也。

如云：舉盃邀明月，焚香看道書。太白讀書破萬卷，落筆超羣英。少陵百歲真過客，一身爲輕舟。東坡

忘身學草木，委懷在琴書。元次山江山助磅礴，烟月資清真。陸劉朗抱開曉月，高情屬天雲。東野

樂康一生如土梗，萬事皆波瀾。陶靖節自有琴書增道氣，只將詩句答年華。孔平仲子固精神老坡

氣，茶山衣鉢放翁詩。惠洪千古風流有詩在，一生懷抱與山開。山谷閒看秋水心無事，久住西湖夢

亦佳。皇甫冉方丈蓬萊多伴侶，木公金母相東西。半山至人無心亦無法，古者養民如養兒。子由

筆下江山轉葱蒨，雲中樓閣自陰晴。朱子大隱本來無境界，勝遊都爲好山川。東坡惜花意欲春常

在，落筆乃與天同功。劉屏山天下蒼生待霖雨，此閒風物屬詩人。復古瓣香急試博山火，好句真傳

雪竇風。誠齋詩名官職稱雙好，丹桂靈椿並一時。誠齋絕須絲竹娛安石，能使江山似永嘉。陳隨

經行東坡眠食地。會訪拾遺花柳村。山周益公。偶陪上閣鸞鸞會。新管江南山水來。梅聖俞張耒。好作新詩寄桑苧。想當逸氣吞江湖。米元章王廷珪。仲甫又見舊人集句兩聯甚佳。可作座右銘。一云。善言莫離口。善樂莫離手。獨立不愧影。獨寢不愧衾。出句爲唐孟詵語。下句爲劉勰語也。一云。靜以修身。儉以養性。入則篤行。出則友賢。出句爲南史陸慧曉語。下句則家語也。

陳郭集句

張仲甫爲余述陳曼生郭頻伽合作集句楹聯。贈杭州高惺泉。日澹曰。爲文須略識字。終身不復鼓琴。上句昌黎文。下句史記語也。余不識高惺泉。味此集句。似尙有言外意。擬俟晤仲甫時詳詢之。

集曹全碑字

仁和高棻仲大使頌禾。有集曹全碑字爲楹帖者。甚工雅。五言。如和風君子德。時雨聖人懷。又仁孝本諸性。禮義根於心。又月下三升酒。風前萬里山。又幽懷在泉石。好景足風雲。又二分明月戶。萬里白雲鄉。又泉流雲際月。風動雨中山。又涼意水雲際。高懷山谷閒。又不止泉明酒。閒臨米老山。又雲白風清際。廉泉讓水閒。七言。如清風明月有其樂。嘉辰美景置諸懷。又殘陽遠水南朝寺。月白風清北郭山。又讓水廉泉高士屋。禮門仁里聖人居。又雲階月地幽人室。水遠高山隱士居。八言云。與禮同節。與樂同和。以義爲根。以仁爲本。又敦仁秉德。並受其福。修禮陳義。乃獲有年。又列紀陳綱。是王者政。安仁布義。與聖人居。又子

孝孫賢。至樂無極。時和歲有。百穀乃登。又仁孝齊家。廉明報國。和平處世。禮義立身。又勳蓋南陽。文綜西蜀。辭雄子建。經擬相如。又典重商周。鼎追秦漢。賢齊廣受。屋並機雲。

舊人集句

張仲甫嘗雜錄舊人集句見示。中有可書楹帖者。如好學爲福。惟道集虛。出莊子。在家常起早。偶地卽安居。山舟先生所集。無事此靜坐。有情且賦詩。同前。花竹有和氣。風泉無俗情。黃山谷。孟東野句。欲共幽人洗筆墨。但驚妙語雜風煙。東坡。放翁句。餘子風流追魏晉。太平胸次到唐虞。杜範。劉過句。彩毫閒試金壺墨。花□重尋貝葉書。李維。劉升贛句。青竹閒垂任子釣。牙籤喜校鄴侯書。劉過。張耒句。墨妙已窺王令帖。良材還斲蔡翁琴。趙孟頫。楊公遠句。風騷意度卑唐體。人物依稀似晉時。劉克莊。薛嶠句。交情淡似秋江水。贈句清於夜月波。郭祥正。楊誠齋句。詩酒淋漓出狂怪。虹霓吐暖忘寒饑。又千首放懷風月裏。一尊時對畫圖開。又囊簡久藏蝌蚪字。詩壇欲效鶴鵝軍。皆東坡句。政用疏通合典則。地分清切任才賢。少陵句。都將筆下文章潤。散作人間雨露濃。歐陽元句。胸蟠杜甫千閒廈。氣壓陳登百尺樓。曹伯隆句。拔薤已觀賢守政。壽親還慰魯侯心。東坡。安石句。已發政聲□召杜。不惟詩句似陰何。沈與求。王半山句。南斗日躔韓吏部。西湖風氣白香山。張耒句。常棣並爲天下士。先生真是地行仙。東坡句。

孫淵如先生童語

孫淵如先生之父爲某邑廣文。有老友某過訪之。留飲齋中。時先生甫九歲。往來行酒。走風雨中不輟。其友笑曰。稚子無知走風雨。先生應聲曰。先生有道出羲皇。某友大嘆賞。卽書作聯句。懸學齋中。此陳曼生郡丞所述。

賀牛姓喜聯

天津牛稔文太守爲子娶婦。吾師紀文達公於太守爲中表兄弟。送喜對一聯云。繡閣團圓同望月。香閨靜好對彈琴。初不覺也。次日文達公來賀。乃謂太守曰。我昨所製聯。乃用君家典故。何如。

隱士門聯

有隱士署一聯於門云。風不出。雨不出。歌於斯。哭於斯。想見高雅之致。按堅口集云。孔侍郎極朝回遇雨。避於一叟廡下。叟延入廳事。逢迎甚恭。孔借油衣。叟曰。某寒不出。暑不出。風不出。雨不出。不知所謂油衣也。孔不覺宦輿頓消。此上聯所從出乎。

祈雨壇聯

明末辛巳壬午間。蘇州亢旱。祈禱無驗。有滑稽子爲聯語。懸之齋壇云。妖道惡僧。三令牌。擊退風雲雷雨。貪官汚吏。九叩首。拜出日月星辰。一時傳以爲笑。

某明府題武廟聯

張丹村廣文作楠梅簪隨筆云。錢貢麗水縣迎賓館記云。賓入門而左。額曰見賓。取出見大賓之義也。將入館。顏某堂曰。澹臺公至。取非公事不見邑宰之義也。讀之不覺噴飯。又謁武廟。見某明府題聯云。兄元德。弟翼德。水擒龐德。生蒲州。會涿州。坐鎮荊州。同官多哂之。余謂近集人撰周易緯史。於屯六二。稱曹操待壽亭侯。需上六。稱劉備桃園結義。如明府輩。更不必與之證陳壽之史。裴松之注矣。

彭甘亭長聯

客有以彭甘亭尺牘求題識者。册後有一長聯。出句云。那畔消息。見半點兒。有甚把鼻。若非是千了萬了。說不盡百樣郎當。因此上。雪山中。忙到釋迦。喫麻喫麥。受苦擔饑。生怕放逸魔。花費眼前日子。對句云。這邊事情。到十分處。還未稱心。霎時間。七旬八旬。却原來一場扯淡。只落得漆園裏。笑煞莊周。應牛應馬。逍散慮。都將順逆境。交付頭上天心。按此多彼法。奧妙語。甘亭沈酣內典。必能別有會心。附錄之以待懸解。

某相國堂聯

舊有某相國堂聯云。放開肚皮喫飯。立定脚跟做人。或議其上句不雅。徐野客曰。彼長戚戚之小人。震雷常在匕箸閒。那能放開肚皮喫飯乎。

陳見三聯

陳見三蘇州人。賣藥邗上。以此起家。開有青芝堂藥鋪。爲揚州第一家。買鄧侍郎休園爲別業。捐同知銜。每遇喜慶宴會。輒著天青褂。五品補服。居然以搢紳自命。有輕薄子製一聯贈之云。五品天青褂。六味地黃丸。按休園今已易主。余曾飲讌其中。

江山船聯

浙水江山船。最爲著名。船之後艙。皆有漁婦。率以豔粧對客。客必稱之爲同年嫂。相傳爲前明陳友諒之族戚。爲明祖貶落於此。凡九姓。限其自爲婚姻。不得通至他鄉。故至今未能振拔。而傅粉施朱。淺斟低唱。舟中客。鮮不被其蠱惑者。往往南北倒行。以拖延其時日。舟中客。每晝夜酣歌而不知也。此九姓者。皆桐廬嚴州人。故相爲桐嚴嫂。外人乃訛桐嚴爲同年耳。船製頗精美。兩岸風景亦絕佳。吾閩人由建溪偈仄而來。到此忽心開目朗。坐臥甚便。且客中忽入靡曼之鄉。驟得偎倚之樂。故尤心醉焉。有客題船窗一聯云。游目騁懷。此地有崇山峻嶺。茂林修竹。賞心樂事。則爲你如花美眷。似水流年。以蘭亭序對玉茗詞。頗有風趣。此聯相傳已久。至今往來吳越江鄉者。能道之。又有才士題江山船聯云。泛宅便爲家。有紅粉青蛾。長新風月。他鄉忘作客。看千巖萬壑。如此江山。亦工切。

周冰持自署門聯

松江詩話云。華亭周垂綸。宿來太守子也。有子名稚廉。字冰持。負才不偶。迹類清狂。嘗署門一聯云。論家世。如閣帖古鑿。可謂舊矣。問文章。似談箋顧繡。換得錢無。

### 酒肆聯

錢梅溪曰。途中遇沽酒者。或賣花者。其香撲鼻可愛。擬將採入詩中而未得也。偶見市中酒肆挂一聯帖云。沽酒客來風亦醉。賣花人去路還香。不知何人所作。可謂先得我心者矣。又曰。酒肆聯有絕可笑者。如劉伶借問誰家好。李白還言此處佳。每處皆有。不知起於何時。又河南永城睢州一帶酒店聯云。入座三杯醉者也。出門一拱歪之乎。則更堪噴飯矣。按吾閩亦有酒肆通行聯云。鐵漢三杯軟脚。金剛一盞搖頭。蓋自誇其酒之佳。又別一意也。梅溪又曰。南陽夏鎮各處人家。門外俱有一聯云。五湖天馬將四海地龍軍。則竟不知作何語。

### 女校書朱玉聯

秦淮女校書朱玉。敏慧能識人。嘉慶庚午。趙甌北先生。重赴鹿鳴宴。常主其家。朱玉乞先生贈楹聯。時玉有徵蘭之信。先生手揮一聯應之云。憐卿新種宜男草。愧我重看及第花。一時傳爲佳話。

### 王扶九聯

宋小茗耐冷談云。同里王扶九。年老就幕粵西。爲某縣延徵比一席。除夕戲書楹帖云。白髮蕭然。看他人



兒女夫妻。千般恩愛。黃金盡矣。數此日油鹽醬醋。百計安排。詰朝主人入館賀歲。見之惻然。贈以千金。並舟車之費。送其歸里。壽終於其家。

陳小雲自題聯

陳小雲。裴之寓居漢陽。於小樓上自題一聯云。情殷報國。臣之壯也。不如人仗藥爐經卷。了却三生。更休提如花美眷。志在養親。富可求乎聊復爾。幸楚尾吳頭。剛通一水。定能容若葉浮萍。詞旨淒宛。未幾。卽客死鄂城。了却三生。真成語識矣。

上海图书馆藏書



A541 212 0006 1825B



中華民國二十六年四月國難後第一版

(24138)

國學基  
本叢書  
楹聯叢話  
附續話  
三話  
一冊

每冊實價國幣伍角伍分  
外埠酌加運費匯費

編輯者 梁 章 鉅

發行兼  
印刷者 商 務 印 書 館  
上海河南路

發行所 商 務 印 書 館  
上海及各埠

